

中华易学集成  天文星象大全

# 开元占经

〔唐〕瞿曇悉达 撰 常秉义 点校

下



中国学术期刊电子出版社

## 卷六十 东方七宿占一

### 角 一

《春秋纬》曰：列宿二十八，是日月五星之所由，吉凶之所由兆也，故石氏簿赞，皆始于角而终于轸。今如旧次，东方七神之宿，为少阳摄提建节青华叶流苍帝灵威仰协助所因乘也。角二星，天关也，其间天门也，其内天庭也，故黄道经其中，日月五星之所行也。角主兵，一曰维首，一曰天陈，一曰天相。左角为天田，为狱，为理，主刑。南三度曰太阳道。右角为尉，为将，主兵，北三度曰太阴道。右角盖天之三门，犹房之四表也，万理之所由，祸福之源始也，故三光轨道从之则吉，干僻抵触则凶也。

石氏曰：角二星十二度，刘向《洪范传》曰：与古度同。度距左角先去极九十一度，在黄道外。度，金星也。《巫咸占》同。春夏为木，秋冬为金。两角之间是中道。郑之分野。角一名天田，一名天根。右角为尉，左角为狱。角者，天之府庭也。天门者，左右角之间，天道之所治也，阳气之所升也，臣之象也。

郝萌曰：右角为天庭，左角为天田。又曰：角亢秋狱，角为龙角。

《二十八宿山经》曰：角山与亢山相连，在韩金门山中。山中有忧变，则星应于上；星若有变，则山应于下。角亢星神常居其上。君臣和同，山星无异，麒麟凤凰，芝草醴泉，四时降矣。

《黄帝占》曰：视两角星明，王道大治。其星微小不明，王道失政，辅臣不言。角星左苍右黄，正色也，吉。其色白也，凶，王者大行，百八十日灾应，远不出一年二年。角星

而润泽，朝臣有次第。两角微小而不明，天下有兵，德令不行。乱错，角垂芒。角星明大，王道太平。角为天将之官，两角之间，三光之道也，南三度太阳道，北三度太阴道，日月五星出入中道，天下太平。出阳多旱，出阴多雨，有阴谋。乘左角，法官谋，南三尺，狱理多冤。两角不明，天下有兵；右角赤明，天下有兵，左角赤明，天下平。日月五星，天之三明也，皆从角所行。行阳道，道其阳，不从其行，岁大水，有兵。二十八宿皆同。角星明大润泽，贤者在朝廷，苍帝德行，天门为开。角主为兵。动内五寸，国中兵起，动外五寸，边兵起。左右动摇非其常，人主忧，臣弑君。各以日占。

## 亢 二

石氏曰：亢四星，九度，在黄道内五度半春夏为火，秋冬为水。《五星占》曰：亢，大也。亢北四尺，是中道。郑之分野。

石氏曰：亢者，庙也。亢者天帝庙宫，亢为天府。

《海中占》曰：亢，三光也，三公之事。下者地也，中央者，丞相也，主享祠。一曰亢亦为疏庙。一名天庭，主火与疾，故亢龙多疾。亢星齐明，宗庙有敬，朝廷有序；星不明，则辅臣失次，君令不行。亢星不明，王者内乱；星明大，辅臣纳忠，天下平安。

郝萌曰：亢星明大，民无疾疫。

石氏曰：亢星垂芒，为乱错。亢星离落位，有天子动旗而卒战于野。亢为疾，国有疾，占在亢。秋分视亢不见，五谷尽伤，余将二倍。

石氏曰：亢为朝廷，总领四海，故置平星以统理。

《海中占》曰：亢为朝廷布政宫。

### 氐 宿 三

石氏曰：氐四星，十五度。古十七度。距西南星先至，去极九十四度。在黄道内一度。春夏为金，秋冬为水。五星入宿占氐木也。氐南二尺是中道。宋之分野。氐，天子行宫也，一名天庙，一名天府。前二大星嫡，后二星妾。前星皇后贵族府，其星欲明，臣奉法度，邦君安宁。当大而小其位，臣失势；其星动，其臣出。

《海图》曰：氐宿宫后女之贵府，出入路寝之宿。氐星发，即有土功事。氐为天庭。氐主疫。

《二十八宿山经》曰：氐山在郑白马山东，氐星神常居其上。氐星明大，则民无出门之徭，马无汗劳。氐主徭役，氐动者徭役起。氐为宿路寝所止，故置庠楼以捍咎。氐为宿宫休解之房。

### 房 宿 四

石氏曰：房四星、钩钤二星，五度。古七度。距房西南第二星去极一百八度。在黄道外一度弱。春夏为水，秋冬为火。又曰：房土星也。房两服之间是中道。宋分野。房为天府，一曰天马，或曰天驷，一名天旗，一名天厩，一名天市，一名天街，一名天燕，一名天仓，一名天表，一名天龙。房为天子明堂，王者岁始布政之堂。房为天马，主车驾。房为四表，表者桀也。

石氏曰：天道四表之间，三光之正路，人天之定位也。天庙者，房也。房者关也。日月之行，常出其中。不出其中为不道，不道者政令不行。石氏曰：房主宿，街南二星，君位也，北二星，夫人之位也。房主财宝，房动外，财宝出，动内，财宝入。

《二十八宿山经》曰：房山在宋地，与心山相连。房心星



神常居其上。房心二宿动摇，则房心之山崩，国有走主。填星色黑，出入七十日以上，房心山崩，下伐上也。其星不明，则山有音声，人民扰扰，五谷贵。房心星暗黑，火星守之二百日，房心山则音声，万民相惊，大水，鱼盐五谷贵，百姓愁。若星色赤，赤地千里。房心不见，帝无教。房星欲明，群臣奉忠，天下道兴。

钩铃，天子御也。钩铃相去疏者，天下且赦，相去数者，天子急，多暴令，关闭。钩铃去房，不驾；钩铃离房，法令。王者至孝，则钩铃明。昆弟有亲之思，则钩铃不离房。钩铃去房，欲其近也，近则天下同心，远则天下不和。房主开闭，以其蓄藏之所由也。

## 心 宿 五

石氏曰：心三星五度。古十二度。距前第二星，去极一百八度半。在黄道外三度半。春夏为木，秋冬为水。又曰：心星火也。北四尺是中道。宋之分野。心为天相，一名大辰，一名大火，一名天司空。心者宣气也，心为大丞相。

石氏曰：心三星，帝座。大星者，天子也。心者木中火，故其色赤，为天关梁。心三星，星当曲，天下安，直则天子失计。心为明堂，中大星天王位，前后小星子属，以开德发阳，不欲直，直，王失势，期九十日，地动，主客，天子以弱亡。

《尔雅》曰：大火谓之大辰，房心尾也。主天下之赏罚，主天下之急，故天下变动，则心星见不祥。明堂旁多小星，天子忧弱于未处，天子威令不出阁，天下乖争，无君伯八九。心星直，心星变色黑，大人有忧民，血流心星灭，则主泣血，后奔逃，强国起。心星消，江河为害，期九年，天子灭。心星动，国有急。心星动摇若角芒者，天下大兵。心星离移，有流民。心前后星皆光明赤黄者，太子庶子各有赐贺之事。心三星

明大，则天下同庆，向风被泽。

太史公曰：心三星，上星太子星，星不明，太子不得代；下星庶子星，星明，庶子代。后心动者，国有忧。

### 尾 宿 六

石氏曰：尾九星，十八度。古九度。距东第二星先至，去极百三十四度。在黄道外十五度少。春夏为火，秋冬为水。又曰水星。尾北十尺是中道。燕之分野。尾一名后族，一名天厕，一名天狗，一名天司空，一名天鸡。尾者，后宫之场也，妃后之府也。上第一星，后也。第三星旁一星相去一寸，名神宫，解衣之内室，说虞之堂。一曰天矢，一曰天九江。尾者，边臣也。又曰通溜宫尾市也，天复船也。尾第一星，嫡妃也，第三星，夫人也，次五星嫔妾星。欲均明，大小相承，则后宫有序，多子孙。

《二十八宿山经》曰：尾山与箕山相连，在燕九都山西，尾箕星神常居其上。尾主水，又主君臣。尾动者，君臣不和，必有事。尾，天子之九子也，腾跃坼绝，不居其所，天下大乱，君臣不和。尾星明大，皇后有喜，不明微细，皇后有忧及疫。尾星疏远，皇后失势。尾星明，五谷大熟，则民不烦扰；其星不明，五谷大伤。尾星离徙而直，皇后失势。其星就聚，有大水。君臣不和，则占于尾。

### 箕 宿 七

石氏曰：箕四星，十一度。古十度，又十一度四分之一。度距西北星先至，去极百一十八度。在黄道外五度少。春夏为金，秋冬为土。又曰金星也。箕北六尺是中道也。燕之分野。箕星一名风星，月宿之，必大风。箕星为风，东北之星也。一名天阵。一名狐星，主狐貉。一名风口，一名天后也。为天貉府廷，天

鸡也，主时。金星也。箕斗，天子之冠服也，并后宫别府也。二十七世妇、八十一御女，妾别宫四者，女相也。故尾箕主百二十妃。尾者，苍龙之末也，直寅主八风之始。箕后星动，风扬箕，主致客箕库也。一曰天司空，箕为寄客。

《尔雅》曰：析木谓之津，箕斗之间，汉津也。一曰天市，主八风。箕为风，箕主蛮夷，箕动者，蛮夷有使来。箕舌一星芒动，则大风，不出三日。箕舌动，如致风扬沙。箕星居河边，岁大恶。若中河而居，天下食人。

《易纬是类谋》曰：大山失金鸡，西岳亡玉羊。箕星明大，即国无谗贼。箕中少星，则余贵。箕者人之精也，故天下安乐，即星众；不安，即星少。箕星离徙，天下大不安，民移徙其处。星不明，天下五谷伤。其星明，谷大熟。其就聚细微，天下忧食。箕中欲其多星。

石氏曰：尾箕主后宫妃后府，故置傅说衍子孙。

## 卷六十一 北方七宿占二

### 南斗占一

石氏曰：南斗六星，二十六度四分度之一。甘氏同。《洪范传》古二十二度。《淮南子》无四分之一。度距魁第四星先至，去北极百一十六度。在黄道外二度半，旧所有四分度之一，在斗度中，后推校知度少为多。今历不三百四分度之一七十五在营室一度之末。春夏为水，秋冬为金。巫咸释五星入宿吉凶占曰诸斗木星也。日月五星常贯之为中道，吴之分野。

《黄帝占》曰：南斗一名铁钺。

《春秋佐助期》曰：南斗主爵禄，神名帙瞻，姓拒终。

石氏曰：南斗魁第一星主吴，第二星主会稽，第三星主丹

阳，第四星主豫章，第五星主庐江，第六星主九江。

郝萌曰：南斗六星，一名天库，知之使人不安。

《北官候》曰：南斗一名天府天关，一名天机，一名天同，天子旗也。斗北二星，天府廷。中央二星，相也。南二星，天库楼也，天梁也。斗西大星，天关也，天子正旗也，土官也。六星欲均明，天下安宁。韩扬曰：南斗第一星上将，第二星相，第三星妃，第四星太子，第五星第六星天子。

《荆州占》曰：南斗，太宰位也。

《圣治符》曰：南斗者，天子之庙，主纪天子寿命之期。

甘氏曰：南斗，天子寿命之期也，故曰将有天下之事，占于南斗也。

《二十八宿山经》曰：斗山在吴阳羡山南，斗星之神常居其上。

甘氏曰：南斗主兵斗，动者兵起。南斗星明大，爵禄行，天下安宁，将相同心；其星不明，大小失次，芒角动摇，则王者失政，天下多忧。

郝萌曰：南斗星明，五谷大熟，其臣得势而亲近，治道和平，风雨顺时，斗星不明，五谷不收。移徙位直，其臣逐，风雨不节，天下病。

石氏赞曰：斗主爵禄，褒贤达士，故曰直建星以成辅。又曰：斗主爵禄功德祥，岁周受分和阴阳。

## 牵牛占二

石氏曰：牵牛六星八度。古九度。度距中央大星先至，去极百一十度。在黄道内四度。春夏为木，秋冬为火。巫咸曰：木星也。日月五星常贯牵牛中道也。吴之分野。

《佐助期》曰：牵牛主关梁，神名略绪炽，姓闾除。

《北官候》曰：牵牛一名天鼓，一名天关。牛第一两星如

连李，名即路，一名聚火。

石氏曰：牵牛六星，天府也，日月七政所王者。即察政，视牛星明大，次第相承，王道大昌，天下安宁。牛星不明其常色，其岁五谷不成，牛多灾凶。

甘氏曰：牵牛上二星主道路，次南星主关梁，次南三星主南越，故动摇变色，从而占之。

郝萌曰：天鼓星怒者马贵。

《天官书》曰：牵牛为牺牲。

宋均曰：牵牛为牛角。

《月食占》曰：牵牛为冬狱。

《二十八宿山经》曰：牛山与女山相连，各法其星形，牵牛须女星神常居其上。

《黄帝占》曰：牵牛大星亡，大牛死；小星亡，小牛死，疫。中央大星不明而黄者，天下为大贵十倍。牵牛星直，余平；曲，余贵。牛中央大星左右出不明，大将心不正，牛大贵。后星前近中央大星者，牛贵；远，牛贱。前星左右出者，前将心不正；后星左右出者，后将心不正。所谓前者星南星也，后者星北星也。牵牛不与织女星直者，天下阴阳不和。

黄帝曰：牵牛远汉者，天下牛大贵；其人汉中者，天下牛多死。

甘氏曰：牵牛动，牛灾，四方皆然。

郝萌曰：牵牛明大，关梁通利。牵牛主大豆，始出色黄，豆贱也；赤，豆虫也；色青豆贵。

《荆州占》曰：牵牛后星前近中央星者，诸侯以四足为弊，色青，道病，色黑死不至。牵牛星明，牛贵；细微不明，牛贱。

石氏曰：牵牛生于列泽之邑，以主越国，为府廷。

《百二十占》曰：将有牺牲之事，占于牵牛。



石氏赞曰：牵牛主关梁七政，故置九坎通水道。又曰：牵牛险阻主关梁，中星高下牛多殃。

### 须女占三

石氏曰：须女四星，十二度。古十度距西。度距西南第一星先至，去极百六度。在黄道内八度。春夏为水，秋冬为火。巫咸占曰：须女，水星也。须女南九尺是中道。越之分野。

《佐助期》曰：须女星，布帛，名色舒，姓终梨时。

《北官候》曰：须女一名天少府，一名天女，一名务女，一名临官女。

《圣谕符》曰：须女者，主娶妇嫁女也。

巫咸曰：须女，天女也，天府天市斗也。

郝萌曰：须女主麻，其色白者麻。为色黄不为色青，麻虫。

黄帝曰：须女星欲明，明则士女有绪，国富民殷。

郝萌曰：须女星明大，则女工昌；不明，则法令易，诗书灭绝。

玄冥曰：须女星明，天下大丰，女工有储，国充富；星不明，天下虚，藏不足。

甘氏曰：须女动，则嫁娶。将有嫁娶 占于须女。

石氏赞曰：须女主布帛裁置之，故置离珠为藏府。又曰：须女珍物宝所藏。故主布帛奉给主。

### 虚宿占四

石氏曰：虚二星十度。古十四度。度距南星先至，去极百四度。在黄道内八度。春夏为水，秋冬为金。巫咸曰：虚金星也。虚南九尺是中道。齐之分野。

《佐助期》曰：虚危为礼堂。虚神名开阳。

《圣治符》曰：虚危，天益也。

《孝经内记》曰：虚，府廷也。

《北官候》曰：虚主哭泣谅闇之事，一名天军市，一名临官，一名天府，一名乡中，黄钟宫也，一名兑宫，一名申宫。

郗萌曰：虚者生于牛山之中，以为齐国府廷。

《尔雅》曰：北陆虚也。注曰：北陆，虚星名也。一名天府，主邑居，主庙堂，主祭祀，主祀祷之事。

黄帝曰：虚二星主坟墓冢宰之官。十一月万物尽于虚星主之，故虚星死丧。

甘氏曰：虚主丧事，动则有丧。

郗萌曰：虚危并为一体，主觴客之事。中有六星，不欲明见也，明见则神龟用事。将有哭泣之事，则占于虚。

《二十八宿山经》曰：虚山危山相连，在齐臣首山中坐，虚危星神常居其上。

郗萌曰：虚星动摇，有井田之法。虚星不明，天下大旱。

《荆州占》曰：虚危中有六星，不欲明见，明见则有大丧，近期一年，中期二年，远期三年。

## 危宿占五

石氏曰：危三星、坟墓四星，十七度。古九度。度距西南星先至，去极九十九度。在黄道内九度太。春夏为水秋冬为火。

巫咸曰：危，土星也。危南九尺是中道。齐之分野。

《佐助期》曰：虚危为礼堂，神名推长，姓吕贾王。

《北官候》曰：危一名天府，一名天市。

巫咸曰：危为百姓市，又为架构。

《黄帝占》曰：危主庙堂，上视危星以主室。危星主柱，主益屋，以成帝宫，以教天下。其星明，则天下安宁。

甘氏曰：危主架屋，星动则有架屋之事。

郗萌曰：危星动摇移徙，天下谋作不解。其星不明，客有诛者。

《玄冥占》曰：危动摇不明，天子作宫殿，民有土功事。

石氏曰：虚危主庙堂，祀考妣，故置坟墓，识先祖茔域。虚危五星为祠堂坟墓，四星祠祀享。

郗萌曰：危为发屋之事，为盖屋。将有盖屋之事，则占于危。

石氏赞曰：坟墓四星，主悲谅也。

### 营室占六

石氏曰：营室二星、离宫六星，十六度。古二十度。度距南星先至，去极八十五度。在黄道内十八度半。春夏为水，秋冬为土。巫咸曰：营室，木星也。室南九尺是中道。卫之分野。

《佐助期》曰：营室主军市之粮，神名玄耀登，姓娄方。

皇甫谧《年历》：营室一名休官。

《地轴占》：营室一名鲛鰪。

《北官候》曰：营室一名玄冥，一名天官，大人之宫。

郗萌曰：营室，西壁也。

《尔雅》曰：营室谓之定。郭璞曰：定，正也。

巫咸曰：营室为天库。

宋均曰：营室为舌俞角。

《天官书》曰：营室为清庙。

《广雅》曰：营室曰豕。

《圣谕符》曰：营室主土，天子庙。又曰：摄提宫，府廷也。

《二十八宿山经》曰：营室山在城山东南，与东壁山相连，室壁星神常居其上。

《黄帝》曰：营室二星主军粮，离宫六星主隐藏。营室三

军所立，外有羽林以卫帝，其星欲明，明则国昌，动摇则兵出。

甘氏曰：营室动，有土功事。

郗萌曰：离宫一星不具，忧子。

郗萌曰：营室一星小不明，祷祀不实，鬼神不享。一曰国家多疫。

郗萌曰：将有土功之事，则占于营室。营室二星亡，则辅臣病死。营室东壁四星，四辅也，欲其正。中有二星，二舍也，欲其实。正犹方，实其旁，多小星也。

又《荆州占》曰：四辅不正则辅臣不忠，越职卖权。二舍不实则宫女淫，出入不常，適媵相逾，君不悉御，后宫女怨旷去心。

《荆州占》曰：离宫者，天子之别宫也，主隐藏止息之所也。

石氏赞曰：营室主军粮以廩士，故置羽林省道理。又曰：营室二星主军粮。

## 东壁占七

石氏曰：东壁二星九度。古十五度。度距南星先至，去极八十六度。在黄道内十二度半。春夏为金，秋冬为水。巫咸曰：东壁，土星也。东壁南九尺为中道。卫之分野。

《佐助期》曰：东壁主文章，神名瞻工，姓刑孙王。

《北官候》曰：东壁一名天池，一名天术。

巫咸曰：东壁为天梁。

《孝经章句》曰：东壁，市也。又曰天市。

《圣治符》曰：东壁主土功之事。

《黄帝占》曰：东壁失色，大小不同，则王者好武，经士不用，图书隐藏，天下咸愚。

《甘氏占》曰：东壁主土星，动则土功事兴。东壁星明大，王者明道，术学大兴，国有君子。

郗萌曰：东壁离徙，作治田，就聚，以田宅为忧。一曰将有土功之事，占于东壁。

石氏曰：东壁主文章图书府，故置垒壁以卫后。

石氏赞曰：东壁主文章，万物犯壁本乡。

《洪范传》曰：北方七宿九十九度，今九十八度四分度之一。

## 卷六十二 西方七宿占三

### 奎 宿 一

石氏曰：奎十六星十六度。古十二度。度距西南大星先至，去极七十度。在黄道内十四度少。春夏为金，秋冬为水。巫咸曰：奎，金星也。奎南九尺是中道。鲁之分野。

《佐助期》曰：奎主武库兵，神名列常，姓均刘方。

《西官候》曰：奎一名天库，一名天边，偏将军武库军库也。奎者，天之玄冥也，沟渎陂池江河汉也。其木榆也，其物牛筋革。奎，金星也。

《天官书》曰：奎曰封豕，一名天豕。

《诗纬》曰：奎为女令。

《圣治符》曰：奎者沟渎也。

《孝经章句》曰：奎，府廷也。

巫咸曰：奎为天库。又曰：奎娄春狱。

郗萌曰：将有沟渎之事，则占于奎。其西南大星，所谓天豕目者也，亦曰大将，故欲其明也。

《玄冥占》曰：奎大星，大将军，其欲明而行列，两头免



近河以候水兵。芒、角动摇进退，国必用兵。或曰有赦令。

《二十八宿山经》曰：奎山娄山相连，奎娄星神常居其上。

黄帝曰：奎星芒角动摇，国必有兵，不出年中。

《河图》曰：帝淫佚政不平，则奎有兵。

《文曜钩》曰：奎星直，期九年，主弑天下，无文法，兵官营垒不宁。

甘氏曰：奎星动，有沟渎之事。

郗萌曰：奎头大，星色黄，忽然不明者，将军叛王也。非其旧，故黄也。

《荆州占》曰：奎中星明者，水大出。

石氏赞曰：奎主军，兵禁不时，故置将军以领之。又曰：奎主库兵，秉统制政，功以成。

## 娄宿占二

石氏曰：娄三星十二度。古十五度。度距中央星先至，去极八十度。在黄道内十二度，春夏为水，秋冬为火。巫咸曰：水星也。娄南九尺是中道。鲁之分野。

《佐助期》曰：娄主苑牧，神名及方，姓台卫。

黄帝曰：娄主宗庙五祀，一名天府，郊太牢也。

《西官候》曰：娄一名密官，一名国市，一名天庙库。娄者，天独禄车也，主为聚众之事。其木柱也，其物铅锡银黄金石。

《圣谕符》曰：娄者，聚众也。

《孝经章句》曰：娄，市也。

巫咸曰：娄为天狱。

郗萌曰：有聚众之事，则占于娄。

《海中占》曰：天子孝，则娄星明大，天下太平。

郗萌曰：娄星直有执主之命者；就聚，国大不安。一曰星明大则赋敛时。

《玄冥占》曰：娄星明，则王者郊祀天享之，天子明，臣子多忠孝，王者多子孙，天下和平；娄不明，大小失色，不修五祀。

石氏赞曰：娄主苑牧给享祀，故置天仓以养之。娄主苑牧有掩敛，盖藏以春营。

### 胃 宿 占 三

石氏曰：胃三星十四度。古十一度。度距西南星先至，去极八十二度。在黄道内十二度。春夏为木，秋冬为水。巫咸曰：胃，金星也。胃南九尺是中道。赵之分野，《淮南子》《洪范传》曰魏分。

《佐助期》曰：胃主廩仓，神名稽览，姓研骨白。

《西官候》曰：胃一名天中府，一名密官，为兵为丧。金星也。

《圣谕符》曰：胃者，仓廩也。

《孝经章句》曰：胃者，库也。

《天官书》曰：胃者天库。

《百二十占》曰：胃为天府藏也。

郗萌曰：将有仓困之事，占于胃。

《二十八宿山经》曰：胃山昂山，东与毕山相连，在赵常山中央，其山最高大，胃昂毕之神常居其上。

甘氏曰：胃动，有输运之事。胃星明者，王者郊天得福，天下和平；星不明，大小失位。

《海中占》曰：胃星明大，王者须祀，则寿命长，子孙昌。

郗萌曰：胃星明大，仓廩实；胃星离徙，仓谷不出。其星

就聚，谷大贵，民流于道。

《荆州占》曰：胃中星众者谷聚，星少谷散。

石氏赞曰：胃主仓廩五谷基，故置天囷以盛之。又曰：胃宿三星主仓廩，阴收积聚一云万物积聚。知入藏。

## 昴宿占四

石氏曰：昴七星十一度。古十五度。度距西南第一星先，去极七十四度。在黄道内四度少。春夏为火，秋冬为金。巫咸曰：昴，火星也。昴南九尺是中道。赵之分野，《淮南子》曰魏分。

《佐助期》曰：昴主狱事，神名敖，姓金宋赵胜。

《西官候》曰：昴一名武，一名天厨，一名天路，胡星，主兵主丧，其一星亡，邦有兵，水星也。

甘氏曰：昴，茅也。

郗萌曰：昴有一星大名黄星，其星明者天下安，不明者天下大凶。

巫咸曰：昴为天耳目。

黄帝曰：昴星，天牢狱也，王者承天以利狱事，以检淫奢。其星不欲明，明则天下多狱者。

《春秋纬》曰：昴为旄头房衡位，主胡星，阴之象。

《圣谕符》曰：昴者白衣。巫咸曰：昴为白衣聚。又曰胡聚。

《孝经章句》曰：昴，市府廷也。

郗萌曰：将有白衣之会，则占于昴。

《尔雅》曰：西陆，昴也，一曰天狱。

石氏曰：天街者，昴毕之间，阴阳之所分，中国之境界。

《天官书》曰：阴阴国，阳阳国。孟康曰：阴西南维河山以北国也，阳河山以南国也。

《元命包》曰：帝位明，即昴星光大。

甘氏曰：昴星明，天下多犯狱。昴星动摇，必有大臣下狱。又曰：有白衣之会。又曰：昴星大而数动尽跳者，胡兵大起，不出年中。又曰：昴一大星跳跃，余皆不动者，胡欲侵犯边境，期年中或三年。

郗萌曰：昴星明大则牢狱平。昴星皆明与奎星等者，水满天下。昴七星，黄道起。昴有一星亡者，多兵为丧。

《五官书》曰：白帝行德，毕昴为之围。围三暮，德乃成；不暮及围不合，德不成。

石氏赞曰：昴主狱事典治囚，故置卷舌以慎疑。昴主狱事系凌淫，化伐所犯谋是当。

## 毕宿占五

石氏曰：毕八星，附耳一星，附耳主听察也。十七度。古十五度。度距左股第一星先至，去极七十八度。在黄道外六度太。春夏为金，秋冬为水。巫咸曰：毕，火星。附耳，水星也。毕北七尺是中道。赵之分野，王者执毕前驱，即其象也。一曰囚车，今掩兔者曰毕，亦其义也，故主弋猎。其大星曰天高，一曰边将，邦外候也。《淮南子》曰：魏分野。

《佐助期》曰：毕主边兵，神名扶骨，姓傅儿候。

皇甫谧曰：一名天耳，一名天目，一名风口。

《西官候》曰：毕一名浊，一名天罡，一名天都尉，主制候四方。

《圣诰符》曰：毕者扬兵，一曰清池宫。

《河图》曰：毕为天罡也。

《孝经章句》曰：毕，府廷也。

巫咸曰：毕为天狱。

郗萌曰：毕主山河以南中国也。中国于四海内则在东南，为阳，阳则曰岁星，荧惑，填星，占于街南。

《春秋纬》曰：毕罕车为边兵，主弋猎，阳微掇，故置附耳，在大星旁，司天下摇动，谗臣乱主。

《春秋纬》曰：毕为边界天街，主守备外国，故立附耳以闻不祥。

郗萌曰：将有田猎之事，则占于毕。

黄帝曰：毕左股大星，边将也，主边邦胡狄，候五帝三王，垒外域。其国倍叛，其星耀芒。其星欲明，明则远夷来贡。失其色，大小不如其故，则边境还自乱，中国不宁。天以毕罪扫奸雄，平通外域。

《西官候》曰：毕大星，边将军也，星动有芒角，边将有急。

《百二十占》曰：毕主弋猎，为阳国，昂为阴国。日月五星出阳国，即有水，入阴国即旱，上教不行。

黄帝曰：其国背叛，毕星耀芒。

《元命包》曰：毕星光大，色度和同，天下太平，国号未央。

郗萌曰：毕星动摇，有谗臣。毕一星亡为丧，一曰为兵。毕中星出，国内乱，一曰国无主。毕星明大，则边无近远夷贡，来王廷中。毕离移，天下狱大乱。其星就聚，法令大酷。其明，太平；不明，天下谋为乱。

《列宿说》曰：毕星动者，边城有兵起。

石氏曰：附耳著毕，司街候邪。

巫咸曰：附耳，火官也。

黄帝曰：附耳摇动，有田之事。

《洛书》曰：附耳角动，谗贼将起。

《春秋纬》曰：附耳明，贼动，宋均曰：贼盛也，中国微。边兵惊，外国交斗连年，大将虏，主败失。附耳摇动，非其处，有乱臣在侧者。一曰主忧愁。



《论语》曰：附耳明，盗贼令。

郗萌曰：附耳入毕口直一星，期四十日；直二星，期三十日；直三星，期二十日；直四星，期十日；直五星，期七日；直六星，期三日，兵起。附耳入毕中，为兵革入深大。附耳缩结，王命兴，辅佐出。附耳动，兵大起，边兵尤甚。

石氏赞曰：毕主边兵备夷谋，故置天弓以射之。毕为天街主边兵，守备境界知暴横，附耳移动谗邪行。

### 觜 参 占 六

石氏曰：觜参三星，一度。古六度。度距西南星先至，去极八十四度。直黄道外十二度太。春夏为水，秋冬为土。巫咸曰：觜，金星也。觜北三尺是中道。晋魏之分野，《淮南子》曰赵分。

《西官候》曰：觜参主斩刈左足，一名白虎将，一名天将，斧钺，白虎首，主外军。其外梁也，其内魏也。其木杨，其物钱金器矾石，金星也。

《圣谕符》曰：觜参伐天梁市也。

石氏曰：觜参者，内主梁，外主巴汉。一曰觜参者，三军之候也。

巫咸曰：觜为宝货，又为天货。

《天官书》：小三星隅置曰觜参，为白虎首，主葆旅之事。如淳曰：关中俗谓桑榆生曰葆。晋灼曰：葆，菜也，野生谓之旅。

《列宿说》曰：觜参动，葆旅起。将有葆旅之事，则占于觜。

《二十八宿山经》曰：觜参山与参山相连，在魏天山西南，觜参星神常居其上。

甘氏曰：觜参三星，行军府藏也，其星欲明，明则国盈，军有储；其星不明，不以出军行将，天下军士无食。王者将

出，必察其星。

《百二十占》曰：觜大皃其星明，则盗贼众。

石氏曰：觜星动明，寇戎发，盗群行。

郝萌曰：觜星近参左股，臣有谋其君者，若主之命，夺主之藏。近右股，大臣谋伐其主，若有大命。觜星明，大将得势。

石氏赞曰：觜参主葆旅收敛，故置参伐山相助。

### 参宿占七

石氏曰：参十星十度，古度同。度距中央西星先至，去极九十四度半少。在黄道外二十三度半。春夏为水，秋冬为土。巫咸曰：参，金星也。参北十三尺是中道。晋魏之分野。《左氏传》子产曰：昔高辛氏有二子，伯曰閼伯，季曰实沈，不相能，寻干戈以相征伐。注曰：寻，用也。传曰：后帝不臧。注曰：后帝，克也。传曰：迁閼伯於商丘。主辰注曰：商丘，宋地，主祀辰星大火也。传曰：商人是因。辰为商星，迁实沈於大夏，主参。《淮南鸿烈》曰赵分。

《佐助期》曰：参伐主斩刈，神名虚图，姓祖及。

黄帝曰：参应七将也，中央三小星曰伐，天之都尉也，主胡、鲜卑、戎狄之国，故不欲其明也。

《孝经章句》曰：参伐，市府廷也，又为天尉。

巫咸曰：参为衡。

石氏曰：参伐，一名钟龙。

《天官书》曰：参为白虎三星，直也为衡，右下有三星，锐曰罚，晋灼曰：星邪列为锐。为斩刈事。其外四星，左右扇股也。参一名伐，一曰大辰，一曰天市，一曰钺钺，又为天狱。

《彗星要占》曰：参者，天之市也。伐者，天之都尉也，天之车骑也，与狼狐同精，天之候蜀也，主南夷戎之国，一曰晋地。

《玉历》曰：参中央星主命，左星主左司马，右星主右司马，左臂主天门，右臂主天狱。

《西官候》曰：参左大星，左将军也；右大星，右将军也；中央三星，三将军；又三小星，小将军也，主胡、鲜卑、越野诸君王也。其星动摇，兵起。

《圣治符》曰：参者，白虎宿也，足人井中，名曰滔足，虎不得动，天下无兵；足出井外，虎得放逸，纵暴为害，天下兵起。

《元命苞》曰：参主斩刈，所以行罚也；又主权衡，所以平理也；又主边城九驿，故不欲其动也。参，白虎之体也，其星三列，三将也。东北星曰左肩，主左将军；西北星曰右肩，主右将军；东南星曰左足，主后将军；西南星曰右足，主偏将军。

《黄帝占》曰：参星，天右将军也。天市石武，金性刚强，斩刈平时。参应七将，其中三星列，三将也；右肩右足，右将也；左肩左足，左将也。白虎性有怒，左足下有井星，动而陷之，以节其势。凡七将明大，天下之兵精，卫帝有方。茂明芒角，又张亦耀横射，三军骇动，帝自躬甲。

秘萌曰：参为横衡，不正，天下倾。

《百二十占》曰：参为将军，常以夏三月视参两足，进前兵起，若退却，兵罢国宁。又视参两星，动摇则兵起，子有忧。一曰虫苗。

《易纬》曰：参无头，国分兵强。

《圣治符》曰：参伐者，衣冠衡石，天子之师也。

《春秋纬》曰：参伐灭绝，臣弑君，子弑父。

石氏曰：参左足不入井中，兵大起。参星不欲动，动则兵起。其星不具，其军亡地。星失其色，其军散败，蹉跌不常，王臣不忠，外其心。参中央星差南，胡人入塞；复正，胡人

出。

郗萌曰：参星移，名曰失天；客伐主人。明动者，兵军大起。参两肩外向而大者，兵外强；其内向而大者，兵内强。参左股亡，则东方南方不可举兵；右股亡，则西方北方不可举兵。参左足入玉井中，兵大起，天下大水，若其有丧，山石为怪。参为天刑，主伐。星大则兵起，进退迫居及客番息，皆为刑急。参星明者，大将执势，夺去威权，天下变易。参星不明，大将疾。参星离处，大将逐；就聚，大将诛戮。参中央星差北，胡人北。

《荆州占》曰：参星芒角动摇，边候有急，天下兵起。参肩细微，天下兵弱。

石氏曰：参四足有进者将出，有退者无功失势。进者谓移北也，退者谓南也。

《春秋纬》曰：伐有角黄芒，天子灭。

《春秋纬》曰：数世绝则伐生角。

《合诚图》曰：伐有角，诸侯之寝排门闑。

甘氏曰：参伐动者，有斩伐之事。

巫咸曰：伐，水宫也。

郗萌曰：参伐星明大，则新刈行。伐三星去疏，则法令缓，数则法令急。伐三星不欲明，明与参等者，天下大臣皆谋去其君，是谓不理。伐星大则兵起。

《百二十占》曰：伐星移南，胡山寨，移北，胡山寨。

石氏赞曰：参伐斩刈阴气孳，故置玉井以给厨。参伐主斩刈摧伤，九州合谋自败失。

刘向《洪范传》曰：西方八十三度，今八十度。

## 卷六十三 南方七宿占四

### 东井占一

石氏曰：东井八星，钺一星，三十三度。古二十九度。度距北南轸西头第一星先至，去极七十度。在黄道外二度半。春夏为火，秋冬为水。巫咸曰：东井，水星也。日月五星行贯井是中道，秦之分野。

《黄帝占》曰：东井，天府法令也，天谗也，一名东陵，一名天井，一名东井，一名天关，一名天阙，一曰天之南门，三光之正道。行不出其中，为天下无道。三光行经其中，不得留守。东井主水，用法清平如水，王者心正，得天理，则井星正行位，主法制著明。左垣四星，四辅也。右垣四星以辅赤帝。井中六星主水衡，其星明大，水横流。

《孝经章句》曰：东井为天渠。

巫咸曰：东井为天亭天候。又曰井鬼夏狱。

《广雅》曰：东井曰鹑首。

《玉历》曰：东井曰天齐。

齐伯曰：东井，天渠也，主于员山，又为其国事。

何法盛《悬象说》曰：井，女主之象也。

《百二十占》曰：东井为天池。

《二十八宿三经》曰：东井與鬼山在秦火山南，井鬼星神常居其上。

《圣治符》曰：井钺星大而明，斧钺且用，兵起。

《易纬》曰：钺星明，主自遁，诸侯乱。

石氏曰：东井堕，天下涌水。井钺去则水满。

甘氏曰：用法平，王者心正，则井星明，行位直。钺星



明，则臣多犯罪者。

《海中占》曰：井钺一星司淫奢，其星不欲明，明则斧钺用，以斩伏诛之臣。

焦延寿曰：天钺星不与井齐，则大臣有斩者，以欲然也。

郗萌曰：斧钺用，王命兴，辅佐出。

石氏赞曰：东井主水衡以平时，故置钺星斩淫奢。东井八星主水衡，井者象法水，法水平定，执性不淫，故主衡。

## 與鬼占二

石氏曰：與鬼五星四度，古五度。度距西南星先至，去极六十八度。在黄道内太。春夏为火，秋冬为水。巫咸曰：鬼，土星。與鬼南六尺是中道。秦之分也。

郗萌曰：弧射狼，误中参左肩，與尸于鬼。鬼之言归也。

《南官候》曰：與鬼一名天钺，一名天讼，主察奸，天目也。

《孝经章句》曰：與鬼为夏狱。又曰：天金玉府也，又名天匱、天圻，其星明则兵起而战不用节，无兵，兵虽在外，不战。

《黄帝占》曰：與鬼，南星石氏曰：南二尺一星。积布帛，西星石氏曰：西二尺一星。积金玉，北星石氏曰：北二尺一星。积铢钱。东星石氏曰：东二尺一星。积马，中央星积尸。

石氏曰：鬼东北一星主积马，东南一星主积兵，西南一星主积布帛，西北一星主积金玉。此四星有变，则占其所主也。中央色白如粉絮者，所谓积尸气也，一曰天尸，故主死丧，主祠事也。一曰钺，故主法，主诛斩。

郗萌曰：與鬼，中者为钺。鬼星章明，人民更相请召。五谷熟成。

《玉历》曰：與鬼为天尸，朱雀颈中星，如粉絮，鬼为疫

害。

《南官候》曰：與鬼者，天庙，主神祭祀之事，其国秦也，其木杨也，其物马牛羊虎也。

郗萌曰：與鬼星明大，岁熟；不明，民大散；其星移徙，民大愁，政令急。與鬼星皆动，其色瞳瞳，望之若有光，上赋敛重数，徭役繁多，万民悲怨，不出五年，身死家亡。又曰：见此后灾，连年大水，秦国尤甚。與鬼，质星，欲其忽忽不明，不明则安，明则兵起，斧钺且用。

石氏赞曰：與鬼视明察奸谋，故置五诸侯以刺之。與鬼五星主视明，从阴视阳不失精。

### 柳 占 三

石氏曰：柳八星十五度，古十八度。度距西头第三星先至，去极七十七度。在黄道外十二度。春夏为水，秋冬为火。巫咸曰：柳，土星。柳北六尺是中道。周之分野。

《南官候》曰：柳，天府也，一名天相，一名天大将军，天少府也，其国狄也，其木桑也，其物羊豕也。

《尔雅》曰：咮谓之柳，柳，鹑火也。一曰注，音相近也。

《圣治符》曰：注者，木功也。

《孝经章句》曰：柳，天库也。

巫咸曰：柳为木官，主工匠。又曰：柳为天库。

《天官书》曰：柳为鸟，注主草木。

齐伯曰：柳者生于道泽之山，为其国府庭也。

郗萌曰：将有木功，则占于柳。

《二十八宿山经》曰：柳山七星山张山皆相连，在周嵩高山东北，柳七星张星神常居其上。

《黄帝占》曰：柳者，朱雀颈也，主卿相大臣之厨，凡八

星，以防诈伪。其星欲明，明则大臣重镇以防不虞；其不明，王者失令，宫室不安。

《春秋纬》曰：参注灭绝，臣弑君，子弑父。

郗萌曰：柳星位直，天下谋伐主。其星就聚，兵满国。其星不明，德弊离。其星明，国安昌。注星明，厨养具。注举首，王命兴，辅佐良。

石氏赞曰：柳主上食和味滋，故置天稷以祭祀。柳主上食长养形，仁以行恩成其明。

## 七星占四

石氏曰：七星七度，古十三度。度距中央大星先至，去极九十度。在黄道外二十一度少。春夏为火，秋冬为水。巫咸曰：七星，水星也。七星北十三度是中道，周之分野。

《黄帝占》曰：七星，赤帝也，一名天库，一名天御府，于午火隆入中宫，德于土星，主衣裳帝冠被服绣之属。

皇甫谧曰：七星，一名延颈。

《南官候》曰：七星，一名天员，天府也，主保葆旅之事。

《玉历》曰：七星，一名天河。

《百二十占》曰：七星为员官，一名津桥。

宋均曰：注候，七星也。

《圣诰符》曰：七星者，倍海也。

巫咸曰：七星为赐货，又天廷。

《天官书》曰：七星颈为天员官，主急事。

郗萌曰：七星为天帝守诸群盗贼。

《列宿占》曰：七星主兵。

《黄帝占》曰：七星正主阳，朱雀心也。星主衣裳，鸟之翹也，以覆鸟身，以主衣裳也。其星欲明，明则王道大昌，君

子家不隐，贤人不逃藏；其星不明，中辅逃亡，贤良不处，天下虚空。王者开四门，则七星光泽，天援纲纪。

甘氏曰：七星动者兵起。

郗萌曰：七星大则皋麻熟成。七星明，执政者平；不明，天子疾。七星离，天下易政，家殊计。

石氏赞曰：七星主衣裳盖身軀，故置轩轅裁制之。又曰：德归好性信有成，故以衣裳属七星。

### 张宿占五

石氏曰：张六星十八度。古十三度。度距应前第一星先至，去极九十七度。在黄道外二十六度半。春夏为木，秋冬为水。巫咸曰：张，水星也。张北十三尺是中道，周之分野。

《南官候》曰：张为天府也，一名御府，宝文玉神之藏也。一名天玉，被服也。一名天倡，其星明即天子昌。

齐伯曰：张者生于江水之山，为天庠。一曰生于道释之山，为周庠。又为都官。

《黄帝占》曰：张，天府也，朱雀嚆也，主帝之珠玉宝，宗庙所用，天王内官衣服。其辅帝中宫，内张外翼，以卫帝宫。

《圣诒符》曰：张者主酒食。

《孝经章句》曰：张为天相，王者珍宝物，宗庙所用。其西四星，四辅也。帝宫内翼外张，以匡帝宫。

《天官书》曰：张嚆为厨，主觴客。

《南官候》曰：张者为厨，主觴客之事，其木梧桐，其物粟鸡狗羊皮，其国周也。

《列宿说》曰：张主赏与，星动者有赏与之事。

《黄帝占》曰：张星明大，则王者行五礼，得天下之中；其不明，修礼，退金官，以木官代之，则星光明。

《海中占》曰：张星不明，王者少子孙。

郗萌曰：张星明大，则厨养具；若张星不明，多病者、移徙者，天下有逆民就聚者，有兵。

石氏赞曰：张主赐客宾主嬉，故近一本云故置之少微礼义时。张主长养位盛阳，人君向治统纲纪。

## 翼宿占六

石氏曰：翼二十二星，十八度。古十三度。度距中央西星先至，去极九十九度。在黄道外二十度半。春夏为金，秋冬为土。巫咸曰：翼，金星也。翼北十二尺是中道，楚之分野。

《南官候》曰：翼主天昌，五乐八佾也。一名化宫，一名天都市，一名天徐，以和五音。

石氏曰：翼，天乐府也，主辅翼，以卫太微宫，法九州之位，人为将士，相绳直有例，内外小心四十六，官各随其度，小臣之象也。

《圣治符》曰：翼者，宾客也。

《孝经章句》曰：翼者，市也。

《百二十占》曰：翼为天倡，倍海也，天旗天都也，其国楚，其木茱萸也，其物辘轳也，奴婢毛羽节器也。

《黄帝占》曰：翼和五音，调笙律，五辅以卫太微宫，九州之位，人为宰相。其星明，则帝德明，王者纳贤征圣，有进言之庆，礼乐大兴，天下和平；其星不明，天子有忧，将有负海之客，礼乐不和，律吕不调。

巫咸曰：翼，天羽翼，又为负海。

《天官书》曰：翼为羽翮，主远客。

《二十八宿山经》曰：翼山軫山相连，在楚门山中央，最高，翼軫星神常居其上。

郗萌曰：将有负海之事，则占于翼也。

《列宿说》曰：翼主蛮夷，其星动，则蛮夷来见天子者。

《黄帝占》曰：翼星光芒明，帝臣群圣三王清澈，圣贤有期，集会之庆，礼乐大兴，天下和平。

郝萌曰：翼明大，则四夷宾服。翼星徙，天子举兵征伐；其星就聚，天下相伐；其星明，旗用；其星不明，天下无忧。

石氏赞曰：翼主天倡以戏娱，故近太微并尊熿。翼二十二星主天倡，建旗秉节物满张。

### 轸宿占七

石氏曰：轸四星，长沙一星，辖二星，十七度。古十六度。度距西北星先至，去极九十九度。在黄道外十五度少。春夏为木，秋冬为土。巫咸曰：轸，金星也。轸北十三尺是中道，楚之分野。

《南官候》曰：轸一名天志，主风死丧。东小星辖，西小星辖，膏轸同合，边兵起。膏去轸二尺，所进近轸，名为天膏。辖者车骑发，膏辖反，故车骑罢，远兵息。

《圣治符》曰：轸者，车事也。

《孝经章句》曰：轸，府廷也，车也。

巫咸曰：轸，天庠，楚国星也，会稽也。轸子，天子政朝也。

《南官候》曰：轸者，天员府也，其国楚也，汉江荆湘衡也，其木松柏弓，其物青帛帛也。

齐伯曰：轸者，生于蒙山，长为楚之国，为府廷。

《黄帝占》曰：轸，主察凶灾，冢宰之臣，四辅也。

《天官书》曰：轸主风。

黄帝曰：轸者，以候王者寿命，故置长沙一星，主延期，辖二星，主侯王。左辖为同姓，右辖为异姓。长沙辖星欲明，明则寿命长，天下不亡也，细微亡不见七日，其位王侯当之。

《天官书》曰：长沙星不欲明，明与四星等，若五星入轸中，兵大起。

郗萌曰：轸北小星去轸数寸者，辖也，辖明与四星等，若辖进退，兵大起。轸南小星去轸二尺者，膏也，辖进膏搏轸，是谓天亡膏，三日车骑发。辖膏各反其处，车骑罢。有兵而辖远轸者，兵罢。

《百二十占》曰：轸为天车，车失辖则倾。

郗萌曰：轸星明大，则车驾备。轸星及长沙星明，天子内佐亲强。轸星移徙，天子忧，谋兵。其星就聚，兵大起。轸星流不正，又无一星，如车无辖，国主忧，将有军出入，则占于轸。轸辖举，南蛮侵。

《列宿说》曰：辖星动，车骑用。

石氏曰：辖二星不欲明，明则輶车行罔。辖欲进，相去七寸，相去一尺以外，皆凶。

郗萌曰：轸星明，兵大起。

《百二十占》曰：辖星动摇三月，车马大凶。

黄帝曰：长沙明则主寿长。

《洛书曰》：长沙明，下大臣逆谋，兵乃生。

《春秋纬》曰：长沙，左辖中星，不欲明，明与四星等，兵大起。

石氏曰：长沙星明，王者保庆，子孙昌。

巫咸曰：长沙明，天子寿丰。

石氏曰：轸主死丧，知凶灾，故设长沙以延期。

石氏曰：轸四星主死丧，建时立节，威严庄，春王小终，季夏殃。

巫咸曰：长沙，木官也。长沙一星主囚亡。

《洪范传》曰：南方一百七度，今一百十二度。

## 卷六十四 分野略例

### 宿次分野一

角亢，郑之分野，自轸十二度至氐四度，于辰在辰，为寿星。三月之时，万物始达于地，春气布养，万物各尽其于其天性，不罹夭夭，故曰寿星。《尔雅》曰：寿星，角亢也。郑玄注《月令》曰：仲秋者，日月会于寿星。一名库营。皇甫谧曰：寿星一名天库，一名天翼，一名天正。《天官书》曰：角亢氐，兖州。《淮南子》曰：角亢，郑也。费直《周易分野》曰：自轸七度至氐十一度为寿星。蔡伯喈《月令章句》曰：自轸六度至亢八度谓之寿星之次，未之分野，曰郑星得角亢也。颍川之文城、定陵、襄城、隶阳、颍阴、长社、阳翟、郟，八县颍川郡，秦置。东接汝南，西接弘农，特得新安、宜阳。二县属弘农郡，汉武帝置。皆韩之分野。《韩世家》曰：韩氏姬之苗裔也，韩武子事晋，得封於韩也。《诗风》陈郑之国与韩同星分也。《陈世家》曰：陈本太昊之虚也，周武王克殷，求舜后，得妫汭，封之于陈，以奉舜祀，为胡公。淮阳国之陈县，则其地也。郑国，今河南之新郑是也。新郑县也，河南郡，秦山川郡也，汉高帝改名焉。本高辛氏之火正祝融之虚，重黎为帝誉高辛氏居火正，甚有功，能光融天下，帝誉命曰祝融。祝，大也，融，明也。及成皋、荥阳，二县也，属河南郡户也。颍川之嵩、阳城，二县也。皆郑之分也，《郑世家》曰：周宣王封庶弟友于郑，是为桓公也。属兖州。《尚书禹贡》曰：济河惟兖州。《周官》曰：河东曰兖州。《未央分野》曰：郑治颍川，从荥阳南至梁山，东至龙山，今为颍川。氐房心，宋之分野，自氐五度至尾九度，于辰在卯，为大火。东方为木，心星在卯，火出木星，故曰大火。《尔雅》曰：火，辰房心尾也。大火谓之辰也。语曰参辰，亦曰参商，谓参星与心星也。已释于



魏次注中。郑玄注《礼记月令》曰：季秋者，日月会於大火，斗建戌之辰也。《周礼》曰：大火一名味，一名天马。皇甫谧曰：大火一名天相，一名天府。《天官书》曰：房心，豫州。《淮南子》曰：氐房心，宋也。费直曰：自氐十一度至尾八度，为大火。蔡氏曰：自亢八度至尾四度，谓之大火之次。《未央分野》曰：宋星得房星，今为梁也。梁，秦碭郡，汉高帝改为梁国也。楚，汉高帝置楚，周宣帝以为彭城郡也。山阳郡，汉景帝分梁国置。东平汉景帝分梁国置济东国，宣帝改为东平国也。济阴，汉景帝分梁国为济阴国。东郡之须昌、寿张，二县也，寿张本名寿良，汉光武避叔讳，改为寿张也。皆宋之分野。周分微之於宋，今之睢阳是也。睢阳县属梁国，周成王封紂庶兄微子于宋，以奉殷祀。本陶唐火正阏伯之虚也。阏伯，高辛氏之长子也，居商丘也。济阴定陶定陶，县也，属济阴国。《诗风》曹国是也。周武王封弟叔振铎于曹，定陶县是也。属豫州。《尚书禹贡》：荆河惟豫州。《周官》：河南曰豫州。《未央分野》曰：宋治下蔡，淮阳从南恒至济汉水沛郡济阳太行东海，今为梁也。尾箕燕之分野，自尾十度至南斗十一度，于辰在寅，为析木，尾东方木宿之末，斗北方水宿之初，次在其间，隔别水木，故曰析木。《尔雅》曰：析木谓之津箕，斗之间汉津也。郑玄注《月令》曰：孟东者，日月会于析木而斗建亥之辰也。《周礼》曰：析木之津，一名天昭，一名汉津。皇甫谧曰：析木一名天丞相，一名天司空，一名天家子，一名天津。《天官书》曰：尾箕，幽州。《淮南子》曰：尾箕，燕也。费直曰：自尾九度至南斗九度，为析木之津。蔡氏曰：自尾四度至南斗六度，谓之析木之次。《未央》曰：燕星得尾箕也。周武王定殷，封召公于燕，其后三十六世，与六国并称王。王，易王也。东有渔阳、右北平、辽东、辽西，西有上谷、代郡、六郡并秦置。雁门，郡秦置。南得涿郡之易、容城、范阳、北新城、故涿县、良乡、新昌，八县也，涿郡秦置。勃海之安次，安次县也，勃海，汉高帝置。皆燕之分也，属幽州。周分冀州置幽州。《周官》曰：东北曰幽州。《尔雅》

曰：燕，幽州。《未央》曰：幽州治蓟，南至积石，东至恒山，今为上谷、渔阳、右北平、辽东、辽西、涿郡也。南斗牵牛，吴越之分野，自南斗十二度至须女七度，于辰在丑，为星纪。星纪者，言其统纪万物，十二月之位，万物之所终始，故曰星纪也。《尔雅》曰：星纪斗，牵牛也。郑玄注《月令》曰：仲冬者，日月会于星纪，建子之辰也。皇甫谧《年历》曰：星纪一名天津，一名天府，一名天苟，一名天鸡。《天官书》曰：斗，江湖，牵牛婺女柳州。《淮南子》曰：斗，吴越也。高诱注《吕氏春秋》曰：斗，吴也，牛，越也。费直曰：自南斗十度至须女五度为星纪。蔡氏《月令章句》曰：自南斗六度至须女二度，谓之星纪之次。《未央》曰：吴越星得牛斗，今之会稽、九江，二郡秦置。丹阳，秦为津郡，汉武改为丹阳。豫章，汉高帝置庐江，汉文帝分淮南置。广陵，六安，汉文帝改江都国为广陵国，分衡山立六安国也。临淮，郡汉武帝置也。皆吴之分也。《史记吴世家》曰：吴太伯，周太王之长子也，与弟仲雍让国于季历，奔荆蛮之地，断发文身，荆蛮义而归之，自号句吴国。武王克殷，求太伯仲雍之后，得仲雍曾孙周章，封之于吴也。今之苍梧、郁林、合浦、交趾、九真、日南、南海，皆越之分野。《越世家》曰：越之先，夏少康之庶子，封会稽，曰无余，以奉禹祀。十有餘世，微弱为民，禹祀中绝，千有餘载，后有子生而能言：我无余之苗裔也。越人尊以为君，号曰无余王也。至孙允常，越复兴焉。并属扬州。《禹贡》曰：淮海惟扬州。《周官》曰：东南曰扬州。《未央》曰：吴越北至大江，南至山东，至海，西至洞庭。须女虚，齐之分野，自须女八度至危十五度，于辰在子，为玄枵也。玄者黑，北方之色，枵者耗也。十一月之时，阳气在下，阴气在上，万物幽死，未有生者，天地空虚，故曰玄枵也。郑玄注《月令》曰：季冬者，日月会于玄枵斗，建丑之辰也。《周礼》曰：玄枵一名天一，颞顛之虚。皇甫谧曰：玄枵一名婺女，一名少府，一名河鼓，一名天机。《天官书》曰：虚危，青州。《淮南子》曰：虚危，齐也。费直曰：自须女六度至危十三度为玄枵。蔡

氏曰：自须女二度至危十度，谓之玄枵之次。《未央》曰：齐星得虚危。东有菑川，汉文帝分齐国为菑川国。东莱，郡汉高帝置。琅邪，郡秦置。高密，汉宣帝改胶西国为高密国。胶东，汉高帝分齐为胶东国。南有太山，郡汉高帝置城阳，汉文帝分齐国立城阳国。北有千乘，汉高帝立为国。得清河以南，勃海之高乐、高城、重合、阳信，西有济南，汉文帝分济国立济南国。平原，汉高帝置。皆齐之分也。《齐世家》曰：齐太公望佐周武王，而王乃封太公于齐。武王崩，成王命齐国东至于海，西至于河，南至于穆陵，北至于无棣，而都营丘也。属青州。《禹贡》：海岱惟青州。《周官》曰：东曰青州。《尔雅》曰：齐曰营州，则青州也。《未央》曰：齐治营州于营丘，北至燕，西至九河，南至菑水，东至海。危室壁，卫之分野，自危十六度至奎四度，於辰在亥，为谡訾。谡訾，叹息也。十月之时，阴气始盛，阳气伏藏，万物失藏养育之气，故哀愁而叹悲，嫌无阳，故曰谡訾。谡訾者，古诸侯也。帝訾娶谡訾氏女，生摯，摯，尧兄也。《尔雅》曰：谡訾曰营室，东壁也。一曰豕韦夏氏之御龙氏国也。《左传》曰：苾弘对周景王曰：蔡侯弑其君之岁，岁在豕韦也。郑玄注《月令》曰：孟春者，日月会于谡訾，而斗建寅之辰也。《周礼》曰：谡訾一名豕韦，一名颡顓，一名谡訾，一名天府，一名北陵，一名卿中。《天官书》曰：营室东壁，并州。《淮南子》曰：营室，东壁也。费直曰：自危十四度至奎一度为谡訾。蔡氏曰：自危十度至东壁八度谓之豕韦之次。《未央》曰：卫星得营室，东壁也。今东郡，秦置。魏郡，汉高帝置之。黎阳，河内郡，汉高帝置，本殷之旧都，周既克殷，分其畿内为三国。《诗风》邶鄘卫国是也。野王朝歌皆卫之分也。卫为翟人所灭，文公徙封楚丘，后三十年，子成公迁于帝丘，今濮阳是也，属并州。周分冀州置并州。周官曰：正北曰并州。今分野无并州所部郡县，并州凡九郡，悉在燕赵秦次中，未详也。《未央》曰：卫置濮阳，其地从王水以东至沛，今为东郡也。奎娄，鲁之分野，自奎五度至胃六度，于辰在戌，为降娄，降下娄曲也。阴生于

午，与阳俱行，至八月阳遂下，九月阳微，剥卦用事，阳将剥尽，阳在上，万物枯落，卷缩而死，故曰降娄。《尔雅》曰：降娄，奎娄也。郑玄注《月令》曰：仲春者，日月会于降娄，而斗建卯之辰也。《周礼》曰：降娄一名清明。皇甫谧曰：降娄一名天官。《天官书》曰：降娄，鲁徐州。《淮南子》曰：奎娄，鲁也。贾直曰：自奎二度至胃三度，谓之降娄之次。《未央》曰：鲁星得奎娄。东至东海，郡汉高置。南有泗水，泗水国，汉武帝分东海郡立也。至淮，得临淮之下相、睢陵、僮、取虑，皆鲁之分也。周成王以少昊之虚曲阜封周公子伯禽为鲁侯，以为周公主也。《鲁世家》曰：周武王克殷，封弟周公旦于少昊之虚。周公佐武王，不就封。武王崩，成王命周公子伯禽代居国，是为鲁公也。属徐州。《禹贡》曰：海岱及淮，惟徐州。《尔雅》曰：齐东曰徐州，而周罢徐合青，汉武复置徐州。《未央》曰：东至温水，西至荥阳，北至代，西至江。胃昴，赵之分野，自胃七度至毕十一度，于辰在酉，为大梁。梁，强也，八月之时，白露始降，万物于是坚成而强，故曰大梁。《尔雅》曰：大梁，昴也。郑玄注《月令》曰：季春日月会于大梁，斗建辰之辰也。注《周礼》曰：大梁一名大阳，一名西陵。皇甫谧曰：大梁一名耕田，一名天仓，一名天猷，一名大军，一名偏将军。《天官书》曰：昴毕，冀州。《淮南子》曰：昴毕，魏也。贾直曰：自胃四度至毕八度为大梁。蔡氏曰：自胃一度至毕二度为大梁之次。《未央》曰：赵星得参伐也。赵本晋地，分晋得赵国。汉高帝以邯郸郡为赵国。北有信都，汉高帝立。真定国汉武帝立。常山，郡汉高帝置，本因山为名。恒山郡，汉文帝讳恒，故改曰常山也。又得涿郡之高阳、郑州乡，二县也。涿郡，汉高帝立。东有广平，国汉武帝立。钜鹿，郡汉高帝置。清河，国汉文帝分赵国立又得渤海之东平、舒中、武邑、文安、东州、城平、章武，六县也，汉置河以北也。南至浮水，水名，一作漳水。繁阳、内黄、斥丘，三县属魏郡，高帝置。西有太原，郡秦置。定襄，郡汉高置。云中，秦置。五原秦九原郡，汉武帝改。朔

方，汉武帝开置上党，秦置。本韩之别郡，远韩近赵，后卒降赵，皆得之自赵夙。后九世称侯，四世敬侯徙都邯郸。后三世，有武灵王五世，为秦所灭。《赵世家》曰：赵氏之光，帝颡项之苗裔，伯益之后也。又虞舜妻之，姚姓之，女赐姓嬴氏，历夏殷，世为诸侯。后造父为周穆王御而西巡狩，而偃王反，缪王日驰千里，还攻徐，破之，乃赐造父赵城，由此为赵氏，属冀州。《禹贡》曰：冀州既载壶口，治梁及岐。《周官》曰：河内曰冀州。《未央》曰：赵治邯郸，北至常山、代郡。毕觜参，魏之分野，自毕十二度至东井十五度，于辰在申，为实沉。言七月之时，万物极茂，阴气沉重，降实万物，故曰实沉。高辛氏有二子，伯曰阏伯，季曰实沉，而不相能。后帝不臧，迁阏伯于商丘，主辰商，人是因故为商星。迁实沉於大夏，主参唐，人是因故参为唐星。至周武王感灵梦而生叔虞，成王时唐有乱，周公灭唐。成王因戏而封虞于唐河汾之东，方百里，太原郡之晋阳县是也。实沉，参之辰也，因名次焉。郑玄注《礼记月令》曰：孟夏者，日月会于实沉，斗建巳之辰。《周礼》曰：实沉一名不疑。皇甫谧曰：实沉一名大唐，一名中尉，一名天路，一名天沟，一名天京，一名璇头。《天官书》曰：觜觿参，益州。《淮南子》曰：觜觿参，赵也。郑玄注《周礼保章氏》曰：实沉，晋也。费直曰：自毕九度至东井十一度为实沉。蔡氏曰：自毕六度至东井十度为实沉之次。《未央》曰：魏星得胃昴毕也。自高陵县也，属益州。以东，尽河东，郡秦置。河内，汉高帝置南有陈留，郡汉武帝置。汝南之邵陵、潁强、新汲，秦置。及西华、长平，潁川之舞阳、鄆、许、鄆陵，河南之开封、中牟、阳武、酸枣，酸枣县属陈留县，则为重见也。皆魏之分也。《魏世家》曰：毕公高之后也，与周同姓。高佐周武王，得封于毕，更为毕氏，后分其苗裔曰毕万事。晋献公从伐霍耿魏，灭之，献公以魏封万魏，河东郡之永安县是也。武子子悼子徙霍，霍，平阳郡之永安县是也。悼子子昭子徙安邑，河东之安邑县是。昭子孙献子与赵鞅共谋祁羊舌氏，分其地，献子曾孙桓子与赵韩灭智伯，桓子孙文侯，时魏

为强大，周烈王赐命为诸侯，文侯子武侯与赵韩灭晋分其地，故参为魏之分野也。属益州。汉武帝改梁州为益州，非魏地，益州地尽在秦楚汉中，为其略，未详其旨。《未央》曰：晋治太原，徙魏以西至襄治之，今为河东、河内、上党、云中。东井與鬼，秦之分野，自东井十六度至柳八度，于辰在未，为鹑首南方七宿。其形象鸟，以井为冠，以柳为口，鹑鸟也，首头也，故曰鹑首。《尔雅》曰：味谓之柳。郑玄注《礼记月令》曰：仲夏者日月会于鹑首，斗建午之辰也。《周礼》曰：鹑首一名小章。皇甫谧曰：鹑首一名天禄，一名天子市，一名白虎将，一名斧钺。《天官书》曰：东井與鬼，雍州。《淮南子》曰：东井與鬼，秦也。费直曰：自东井十二度至柳四度，为鹑首，蔡氏曰：自东井十度至柳四度，谓之鹑首。《未央》曰：秦星得东井與鬼也。自弘农故关以西，故关，古函谷关也。弘农郡，汉武帝置。京兆，扶风，冯翊，并秦内史，汉武帝分为三辅。北地，上郡，二郡秦置。西河，安定，天水，三郡汉武帝置。陇西，秦置。南有巴郡，蜀郡，二郡秦置。广汉，汉置。犍为，汉武帝置。武都，西北有金城，汉置。武威，本休屠王地也。张掖，本昆邪王地。酒泉，敦煌，敦煌本属酒泉，汉武帝置。又西有牂牁，越巂，益州，皆秦也，三郡并汉武帝开置。秦之分野。《秦世家》曰：秦之先曰非子，与赵同姓，伯益之十六世孙也，为周孝王养马甚息，孝王封为附庸，邑之于秦号曰秦嬴，天水之陇县则其地也。秦嬴曾孙曰秦仲，周宣王使伐西戎，为戎所杀。宣王复命仲子庄公与四弟伐戎，破之，赐仲大骆之地，于是居于大丘，扶风之槐里县是也。属雍州。《禹贡》曰：黑水西河，惟雍州。《周官》曰：正西曰雍州，汉武帝改为凉州。《未央》曰：秦治栎阳，又治咸阳，今为长安北地，从华山西至随流沙，今为三辅。巴蜀、汉中、陇西、北地、上郡也。柳七星张，周之分野。自柳九度至张十七度，于辰在午，为鹑火。南方为火，言五月之时，阳气始隆，火星昏中，在七星朱鸟之处，故曰鹑火。《尔雅》曰：柳，鹑火也。柳七星张南方之中宿也，故曰火。《周礼》曰：鸟与七

游象以鹑火也。郑玄注《礼记月令》曰：季夏者，日月会于鹑火，斗建未之辰也。《周礼》曰：天井一名致方注。《天官书》曰：七星张三河。《淮南子》曰：七星张周也。费直曰：自柳五度至张十二度为鹑火。蔡氏曰：自柳三度至张十二度，谓之鹑火之次。《未央》曰：周星得注张。今之河南，雒阳，谷城，平阳，偃师，巩，维氏，此七县属河南郡。并周分也。《周世家》曰：周之先曰弃，弃生有神怪，长好稼穡，为舜播植百谷，舜封之于郟，扶风是也。号曰后稷，姓为姬氏。曾孙公刘，国于邠，扶风是也。十世孙曰太王，为狄所侵，迁于岐，扶风之美阳是也。太王孙文王，有圣德，周室方隆，徙都于鄠，鄠在京兆之杜县。文王子武王灭商，徙都于镐，镐在京兆之长安县。武王子成王营雒邑，都河南，鄠之河南县是也。或云成王居雒邑，六世孙懿王迁大丘也。属三河。河南，河内，河东三郡是也。案周之将亡，惟河南一郡，故以为周分野。其河内河东乃在魏次中，未详。周分野称三河之谓矣。《未央》曰：周治洛阳，西至华山，东至荣泽，少室，北至河，南至濮水，今为河东陈留。翼轸，楚分野，自张十八度至轸十一度，于辰在巳，为鹑尾。南方朱雀七宿以轸为尾，故曰鹑尾。郑玄注《礼记月令》曰：孟秋者，日月会于鹑尾，斗建申之辰。《周礼》曰：鹑尾一名鸟帑。皇甫谧曰：鹑尾一名鸟注，一名天根，一名旄，一名树。《天官书》曰：翼轸，荆州。《淮南子》曰：翼，楚也。费直曰：自张十三度至轸六度，为鹑尾。蔡氏曰：自翼十二度至轸六度，为鹑尾之次。《未央》曰：楚星得翼轸也。今之南郡，秦置。江陵，江陵即南郡所部县，即重见矣。江夏，汉高帝置。零陵，郡汉武帝置。桂阳，武陵，二郡汉高帝置。长沙，郡秦为郡，汉高帝改为国及江中，秦置。汝南，汉高帝置。皆楚之分野。周成王先师鬻熊之曾孙熊绎于荆蛮为楚子，居丹阳。后十馀世，至熊通，号武王，浸以强大。后五世，有庄王，并有江汉之间，吞陈蔡，县申息，服随唐。后十世，顷王徙于东焉。《楚世家》曰：鬻熊，祝融之苗裔也，姓芈氏。丹阳，今南郡之枝江县是也。武子文王都于郢，江陵是

也。庄王曾孙昭王为吴所破，吴兵入郢，昭王奔随，楚大夫申包胥求救於秦，秦乃救楚，大败吴师。阖庐弟夫概王反，自立为王，阖庐班师，昭王乃得反国，更都于郢，南郡郢县是也。属荆州。《禹贡》曰：荆及衡阳惟荆州。《周官》曰：正南曰荆州。《未央》曰：楚治，南至九江，北至淮水，东至海，西至鱼腹山，今为淮阳、汝阳，庐江、长沙、南海，故楚治南郢也。

### 月所主国二

《荆州占》曰：正月周，二月徐，三月荆，四月郑，五月晋，六月卫，七月秦，八月宋，九月齐，十月鲁，十一月吴越，十二月燕赵。

### 日辰占邦三

石氏曰：甲为齐，乙为东海，司马迁、班固并以甲乙日月不占。晋灼注曰：海外远甲乙日時，故不占之。丙为楚，丁为南蛮，司马迁、班固并以丙丁为江淮海岱。戊为魏，一云戊为韩，司马迁、班固并以戊己为中州河济也。己为韩，一云己为魏。庚为秦，辛为西夷，司马迁、班固并以庚辛为华以西，壬为燕，司马迁、班固并以壬为赵，《淮南子》壬为卫。癸为北夷。司马迁、班固并以壬癸为常山北，《淮南子》癸为赵。

石氏曰：子为周，丑为翟，一云丑魏翟梁寅为赵，《淮南子》《荆州占》并以寅为楚。卯为郑，辰为晋，班固、刘表、韩杨并以辰为邯郸，一云辰为赵也。巳为卫，午为秦，未为中山，一云宋。申为齐，一云申为晋魏，《荆州占》为申为晋。酉为鲁，戌为赵，班固云：戌为赵。荆州云：戌为吴。亥为燕。

### 灾变期应四

巫咸曰：五星之合，金星以金日，木星以木日，水星以水



日，火星以火日，土星以土日。月期十二辰。候其灾之变，以其杀时。甲乙日应在金，丙丁日应在水，戊己日应在木，庚辛日应在火，壬癸日应在土。五星皆同法也。岁星主木也，日以甲乙；荧惑火也，日以丙丁；填星土也，日以戊己；太白金也，日以庚辛；辰星水也，日以壬癸。二十八舍以十二子，故金应在火，木应在金，水应在土。火应在水，土应在木。故木期十二日，十二月，十二岁；火期四十三日，四十三月，四十三岁；土期二十八日，二十八月，二十八岁；金期八日，八月，八岁；水期十日，十月，十岁。又曰：五星守二十八舍，左为春应，右为秋应，前为夏应，后为冬应。其法随气所制前后。

石氏曰：凡五星行犯列舍，前为春应，后为秋应，左为冬应，右为夏应。假令春以东为前，西为后，北为左，南为右，夏以南为前，北为后，东为左，西为右，秋以西为前，东为后，南为左，北为右，冬以北为前，南为后，西为左，东为右。

宋均曰：灾祥见在正月，则应在七月；灾祥见在二月，则应在八月；灾祥见在三月，则应在九月；灾祥见在四月，则应在十月；灾祥见在五月，则应在十一月；灾祥见在六月，则应在十二月；灾祥见在七月，则应在来年正月；灾祥见在八月，则应在来年二月；灾祥见在九月，则应在来年三月；灾祥见在十月，则应在来年四月；灾祥见在十一月，则应在来年五月；灾祥见在十二月，则应在来年六月。

《荆州占》曰：甲乙日有变，期百二十日；丙丁日有变，期八十日；戊己日有变，期六十日；庚辛日有变，期四十日；壬癸日有变，期二十日。

### 顺逆略例五

巫咸曰：五星之行，东行为顺，西行为逆。

韩公宾注《灵宪》曰：当东反西则逆。

石氏曰：日行五寸一尺为平行，日行一寸二寸为迟。

甘氏曰：逆日迟。

韩公宾注《灵宪》曰：五星之行，近日则迟。

石氏曰：日行一度为疾。

韩公宾曰：五星之行，远日则速。

石氏曰：未应去而去为出，未当来而来为人。

甘氏曰：同形为人。日月五星与宿星同舍为合。

石氏曰：芒角相及，同光为合。

巫咸曰：诸舍精相沓为合。

《荆州占》曰：相去一尺内为合。

孟康曰：合，同舍也。

石氏曰：星光曜相逮为合。

郗萌曰：留三月为合。

孟康曰：舍，宿也，入宿度为舍。

甘氏曰：共行在一宿为舍。

石氏曰：行度所居为舍。

石氏曰：留二十日以上为宿，宿犹守也。

甘氏曰：行所当至，过二十一日，色润泽为居。

石氏曰：以度至而不去为居。

石氏曰：不东不西为留。

郗萌曰：住不移为留。

石氏曰：居之不去为守。

甘氏曰：徘徊不去其度为守。

《文耀钩》曰：留不去为守。

郗萌曰：二十日以上为守。东西正当为中。

甘氏曰：在上而下为乘。

石氏曰：五星入度，经过宿星，光耀犯之为犯。

郗萌曰：五星所犯木火土水，同度去之七寸为犯，太白一尺以内为犯。

韦昭曰：自下往触之为犯。

甘氏曰：未当入度经入为侵。

甘氏曰：在下犯上为陵。

石氏曰：在上犯下为陵。

郗萌曰：星围宿周回一匝为环。不周曰绕。

石氏曰：东西为勾。

甘氏曰：去而复还为勾。

郗萌曰：星行如勾为勾。

石氏曰：南北为己。

甘氏曰：再勾为己。

郗萌曰：星行如己字为己。

石氏曰：西入东出为贯。

甘氏曰：在下相侵为贯，在傍为刺。

郗萌曰：直至为抵，星相触而止为触。

甘氏曰：相切为磨。

石氏曰：相至为磨。

甘氏曰：去之寸为靡，星相灭为抵。

巫咸曰：两体相著为薄。

甘氏曰：不于晦朔者为薄。虽非日月同宿，阴气隆奄者为薄，日光也。石氏曰：不交而食曰薄。

《帝览嬉》曰：赤黄无光为薄。

孟康曰：日月无光曰薄。

京房曰：日月赤黄为薄。

韦昭曰：气往迫之为薄。

石氏曰：相陵为斗。

甘氏曰：倚视离而复合，合复离为斗。

韦昭曰：星相击为斗。

郗萌曰：边侵为食。

京氏曰：相侵之食，日体三毁三复，行异处，是为相侵食也，三分日取一也。

韦昭曰：亏毁曰食。

石氏曰：光五寸以内为芒。

巫咸曰：光一尺以内为角，岁星七寸以上谓之角。

郗萌曰：色非其常为变，光耀摇艳为动。

甘氏曰：润泽和顺为喜。

石氏曰：五星光芒隆，谓之怒。

郗萌曰：壮大色强为怒。

石氏曰：超舍而前谓之赢。

《七曜》曰：超舍而前，过其所当舍之宿，以上一舍二舍三舍，谓之赢。

《易萌气枢》曰：大进曰赢。

班固曰：出为赢。

石氏曰：退舍而复为缩。

《七曜》曰：退舍以下一舍二舍三舍，谓之缩。

《易萌气枢》曰：大退曰缩。

班固曰：晚出为缩。

甘氏曰：相近为就聚。

甘氏曰：相远为离徙。

石氏曰：星月相近俱隆明为同光。

巫咸曰：凡五星入月中，星不见为月食星，星见为星食月。

## 卷六十五 石氏中官占上一

### 摄提占一

石氏曰：摄提六星，夹大角，入角八度少，去北极五十九度半，在黄道内三十二度太。一名环枢，一名天枢，一名阙丘，一名致法，一名三老，一名天铁，一名天狱，一名天盾，一名天武，一名天兵。星东西三三而居，形似鼎足。常东向，天子吉昌，若北向，即大人失位，圣人更制，天下有事，期三十日兵出，复三十日兵罢。若摄提北向，向格而治，十日而令出；其反故位，十日而兵罢。

《天官书》曰：摄提者，直斗杓所指以建时，故曰摄提格。

巫咸曰：摄提三星如鼎足，左右角西南向，主易姓。

《乐纬叶图徵》曰：摄提为盾，以其夹捧帝席也。

《合诚图》曰：摄提主九卿。

《洛书》曰：摄提移政更权。

《帝览嬉》曰：仁道不行，摄提失衡。

《含文嘉》曰：王者敬师长有尊，则摄提如列，无则反折。宋均注曰：师者所以教人为君也，长者所以教人为长也。大角为帝席，摄提六星携纪纲以辅。大角，师长象也，如列者，如鼎足俱东向。

《春秋纬》曰：摄提斗携角以接下，化而东向，令乖行，则天下更纪，王者灭。

《文曜钩》曰：代提，天下更纪，世有名师。宋均曰：主德不一，则摄提代移更纪，授有令名为天下师表者也。

《援神契》曰：摄提运度，主接灵。

石氏曰：摄提色欲黄而润泽，温温不明，天下安，明大

者，三公恣，天子弱，铁钺用。

《元命包》曰：摄提反衡，天下大乱，易姓兴。宋均曰：反衡谓不东向也。

《春秋纬》曰：摄提移向北，王者以过见灭。摄提疏阔，大夫僭差。

焦延寿曰：摄提星近大角，若不居其故，近戚有谋贼王者。

石氏赞曰：摄提六星携纪纲，建时立节伺机祥。

## 大角占二

石氏曰：大角一星，在摄提间。入亢二度半，去极五十八度，在黄道内三十四度少。一名格，一名汉星。

《诗纬》曰：大角一曰帝筵，成统理。

《纪历枢》曰：大角为天栋，以正纪纲。一曰大角为火，以其赤明也。

《春秋纬》曰：大角为坐候。一曰大角为帝席，以布神厚德。又曰：大角者，天王帝筵也。

甘氏曰：大角者，栋星也。其星光泽明大，扬芒奋角，强臣伏诛，天下安宁。芒之所指，兵所从往者吉。

石氏曰：大角，天栋也，明则天子威行。

《雒罪级》曰：栋星亡，不言，王失号。

《尚书纬》曰：栋星亡，罪深重诛。

《春秋纬》曰：大角不见，苍帝失势。

《含文嘉》曰：王者警诸父有差，则大角光明以扬。宋均曰：诸父，伯仲叔季也。角坚刚而居帝前，帝敬诸父，感天，故应之也。

《钩命决》曰：赤灭乱，栋星去。

《论讖》曰：栋星亡，主旷之。

石氏曰：大角，贵人象也，主帝座，光润明大则吉，光不明者，若有他色，青忧赤兵，黑疾白丧。大角不明，王者失天心，强臣凌主，天下有忧。秦之亡也，摄提不动，而大角亡去。

焦延寿曰：大角星角起扬光，若近天帝，左右有以席荐害主者。

郗萌曰：大角变色，有芒角，大动，不出三月，兵大起。大角数动，人主好游，不居其宫，驰骋天下。《晋阳秋》曰：孝武太元二年七月乙亥，大角摇。三年二月乙巳作新宫，帝及二后移会稽。大角不明，则天子耗衰。栋星明大，天子辅强。

《荆州占》曰：栋星亡，王者死。

韩杨曰：大角动摇，主不安，臣下有恶事劫主者。《宋天文志》曰：安帝隆安五年七月癸亥，大角星散摇五色，元兴二年，桓玄篡位，迁帝浔阳。

石氏赞曰：大角帝席色欲明，光隆润泽德合同。

### 梗河占三

石氏曰：梗河三星，大角北。西星入亢八度，去极三十八度，在黄道内四十九度。

郗萌曰：天矛者，天子之兵也。

《黄帝占》曰：梗河三星天锋，天之剑戟，主于罚戮。其星如常明而不动，边寇宁，天下安。星若明大，芒角动摇，边夷兵起，胡人为乱，王者有忧。

《荆州占》曰：梗河天盾，晋灼曰：名天螽。玄弋天矛也，相近相向，大安。

石氏曰：梗河三星，天矛也，梗者递也，河者担也，士卒更递担，持天矛以行也。在斗杓头，主杀，所向无前也，主胡兵。芒角大则四裔不靖，边兵大起。

黄帝曰：梗河主丧，阴十日不见，国有丧。以初不见日占之，男女梗河，末男本女。天不阴，梗河亡不见，视二十八宿星羸缩，若在北斗傍，所见之宿，其国若诸侯有丧。

石氏曰：梗河亡三日不见，国有谋兵，若诸侯有死者。七日不见，国有大丧。以其初不见之日以占其国。梗河，天矛也，亡不见，即有所藏，所藏之国宿有谋，兵，不然有丧。求于二十八宿若斗，则是以见之日知其期。

《荆州占》曰：天矛星不欲明大，明大兵起。

石氏曰：梗河三星天矛锋。

#### 招摇占四

石氏曰：招摇一星，梗河北。入氐二度半，去极四十度太，在黄道内五十七度强。

黄帝曰：招摇，尚羊也。吴龙共《天官星占》曰常阳。尚羊者，悬以匡也。一名矛盾，胡星也。与梗河玄弋列，从北斗柄端抵大角，近北斗者，玄弋，次曰招摇，星明大，赤角而动，胡兵大起，四夷主昌，中国亡。又曰：其俱明，胡利。

《黄帝占》曰：招摇为矛，摄提大盾相当；兵大起，大战。

《春秋纬》曰：斗端有两星，一内为招摇，一外为盾。天锋主兵用，若动兵大行。

《荆州占》曰：招摇，南夷也。

巫咸曰：矛盾，兵星，金官也。

《黄帝占》曰：招摇欲与梗河栋星相直，则胡常来受命，贡献于中国；不相直，则胡人叛戾。招摇明而不正，胡不来受命。斗末之星，招摇之间，名为天库，招摇离其处，名曰开库，开库兵发。招摇星欲明而微小，则王者威令行四夷。

《春秋纬》曰：矛盾动，兵四行，臣子谋妄奸通，弑君弑



父，九州振。

《春秋纬》曰：盾动摇若角，大兵起，天下弑主；害于中，发四方。并兴，正者行德，纳贤正度。又曰：臣主争伐相诛，则矛盾角跃相干。

焦延寿曰：招摇亡去，国兵起，主遇贼。

《天官书》曰：招摇星赤角，胡兵大起，不来受命。星大亦然。

《荆州占》曰：招摇奋光明动，天子强。招摇色青，有忧；赤白而明者，天子有怒；黄白光泽，天下安静；小而黑，军破国亡。又曰：色黑为弱。

《荆州占》曰：矛盾动，近臣恣，庶雄谋。

石氏赞曰：招摇玄弋主胡兵，芒角变动兵革行。

### 玄弋占五

石氏曰：玄弋一星，在招摇北。入氐一度，去极三十二度半，在黄道内五十三度半。

《黄帝占》曰：玄弋主北夷，玄弋，招摇雌也，星欲小微，小微则王者吉，天下安宁。其星明而大，则胡夷单于动，兵大起。

甘氏曰：玄弋主胡兵，星若小动，兵小动，大动，兵大起胡人入境。

《乐纬》曰：玄弋，宫也，戌子候之，宫乱则荒，其君骄，不听谏，佞在侧。宫和则致凤凰，颂声作。

《荆州占》曰：玄弋小数动后而大动，则兵大起。

石氏曰：玄弋星赤，天下有兵。

### 天枪占六

石氏曰：天枪三星，在北斗杓东。西星入氐太，去极二十八

度太，在黄道内七十一度。

《黄帝占》曰：天枪一名天钺，三星鼎足形，在北斗柄端，其状忽然不明，明大则斧钺用。一曰有兵。小不明则兵罢。

石氏曰：天枪三星，主帝伏兵。枪者今之枪也，以竹为之，锐其头以捶地，锋外向以枪人。星温温而不明则吉，若光明则伏兵行。

巫咸曰：枪，金官也。

黄帝曰：枪三星，备非常，若今之机枪也，其星温而不明，则王者吉，其星明大，则兵起，斧钺用。

石氏曰：左枪右棓，天之武备也。攻城袭邑，当视枪星。大而明，若有叛而自归者，其国不可出兵。星小而明，兵可出，城可袭。

《荆州占》曰：天枪一星不具所见，而兵起。

黄帝曰：天枪星动摇若角，大兵起，天下弑主，害以中发。

《荆州占》曰：天枪扬光，天降丧乱。

石氏赞曰：枪棓八星备非常。

## 天 棓 占 七

石氏曰：天棓苏林曰：打棓之棓。五星，在女床东北。柄星入箕八度半，去极三十二度，在黄道内七十一度。

郗萌曰：天棓者，先驱也。

石氏曰：天棓五星，天之武备也。棓者大杖，所以打贼也，皆所以禁暴横，备不虞也。

《黄帝占》曰：天棓五星，天之武备也，以防不虞。其星不明而静，则天下无兵；其星明大动摇，则兵大起，五仗用。

石氏曰：天棓一星不见，其国兵起。

郗萌曰：天棓星微细则吉，变明则凶有忧。

荆州曰：天棓一星不见，天下有大兵。

### 女床占八

石氏曰：女床三星，在天纪北。西星入箕一度，去极五十度，在黄道内五十六度。女床，后宫御也，众妾所居宫也，侍皇后，随从，以时御见者。

黄帝曰：女床星，后宫御也，嫔妾所居宫也。其星欲明，大小相承，如其故，则后妃安，宫人吉；星若微小不明，非其常处，嫔妾不安，其宫有忧。

郗萌曰：女床者，主女藏。

石氏曰：女床星不明则吉，明则宫女恣。女床星动不吉。

焦延寿曰：女床星舒，妾代女主，不乃死。

《荆州占》曰：女床星无故不见，女子多疾。

韩扬曰：女床非其故，则后宫有忧。

石氏曰：女床主女事，行列微靖吉，乱明动不吉。

石氏赞曰：女床三星待后宫。

### 七公占九

石氏曰：七公七星，招摇东，西星入氐四度半，去极三十九度少，在黄道内五十九度半强。

黄帝曰：七公一名天纪。七公主议疑，天之辅相，七政之象，评议之臣。其星大而齐明，议人有忠，王者安；其星大小有差，微而不明，议者不同，决事不从，人主有忧。

石氏曰：七公，天之相也，三公，廷尉之象也。上星，上公也，次星，中公也，明则七辅强。

《海中占》曰：七公，七辅也，上星上公，次星次公，下星下公，各以其次第，齐明辅臣，居其常职。其星不明者，各

以其次，辅臣有黜，若有罪，期不出年。

郗萌曰：七公主七政，别善恶。

石氏曰：七公主议疑，天之相理，谓三公、左辅右弼、前疑后丞之官，平议疑狱，断折刑法，欲详审也。星大小不明，议事者不从也。

石氏赞曰：七公七星议欲详。

## 贯索占十

石氏曰：贯索九星，《天官书》曰：勾圜一十五星。晋灼曰：贼人之牢。案贯索为贼人之牢，止有九星，未详迁所云。十五星所以在七公前上，右星入尾半度，去极五十九度少，在黄道内三十七度。在七公前。

《黄帝占》曰：天牢者，贼人之牢也，天下狱律也，一名连索，一名天受，一名天围。

《论讖》曰：贯索主天牢。

郗萌曰：贯索为逮狱之法律也。天牢主天子之疾病忧患。

《春秋纬》曰：贯索，贼人之牢，中星实则囚多，虚则开出。

石氏曰：贯索北开，名曰牢户，其星间阔则户开，必有赦；若星狭而不开，牢中有忧，贵人当之。

《黄帝占》曰：常以四时候天牢，其口星开披，天下赦，不赦，逆，人主忧，开市不利。

《黄帝占》曰：天牢中央大星，牢监也，左右徙倚不居其处若不见，大赦，期十八日。天牢中常有系星三，以甲子丙子戊子庚子壬子暮视之，其一星去，有善事，其二星去，有赐令爵禄之事，三星尽去，人主德令，赦天下。甲子期八十一日，丙子期七十二日，戊子期六十日，庚子期八十日，壬子期六十二日而赦。

黄帝曰：天牢中星不欲众，众则囚多。其中星稀则囚少。其中无星，天下无罪人，其国安。连索直而抵织女，天下有急布帛之征。

石氏曰：贯索入汉中，人相食，兵起。天牢口所向开门者，兵所往，期六月。

焦延寿曰：贯索星户开左，若星入牢中，有贵人自索，守者不复，必凶兵死。

郗萌曰：天牢直若角，赦，以丑未候之。天牢旁有此星，以至开闭，天牢已开，天下大赦。此星闭而赦为逆，此星以开不赦为不慎顺，天牢空，更立元年，不行德令，天雨沙石，期三年。

《天官书》曰：赤帝行德，天牢为之空。

《荆州占》曰：天牢中多星，则多系囚。九星天下狱烦，八星奸人入，七星小赦，六星五星大赦。天牢斧钺动摇，非其故，斧钺用。

石氏赞曰：贯索九星禁暴横。

### 天纪占十一

石氏曰：天纪九星，在贯索东。四星入尾五度，去极五十一度半，在黄道内五十六度太。

黄帝曰：天纪，天纬也，主正理冤讼。星齐明，王法正直，无有偏党，天下纲纪。

《论讖》曰：天纪星以表九州，定图位。天纪星主历音律。

黄帝曰：天纪星败绝，山崩易政，有饥民，君不安。

石氏曰：天纪绝，天下大乱，主凶。天纪星明，天下多词讼者，亡则政理坏。

焦延寿曰：天纪星与女床合，王者妻姑姨以淫亡，若以女

謁失位。

郝萌曰：纪星入汉中，人相食。

班固《天文志》曰：纪星散者山崩，不则有丧。

《荆州占》曰：纪星散绝，不山崩则主死。又曰：纪星弛散，则国纲纪乱。

石氏赞曰：天纪九星理怨讼。

## 织女占十二

石氏曰：织女三星，在天纪东端。大星入斗十一度，去极五十二度，在黄道内六十三度太。

郝萌曰：织女一名东桥。

《荆州占》曰：织女一名天女，天子之女也，在牵牛西北，鼎足居星足，常向牵牛、扶筐。牵牛、扶筐星亦常向织女之足。不如其故，布帛倍其价，若有丧。班固《天文志》曰：织女。杜预曰：星占之，织女，处女也，天孙女也。案织女七夕有渡河之期，似非处女之称。

石氏曰：织女主经纬丝帛之事。大星皇圣之母，二小星者，太子庶子位也。三星俱明，天下和平。

《诗记历枢》曰：织女内正纪纲。

《合诚图》曰：织女，天女也，主瓜果收藏珍宝，以保神明，成衣立纪，故齐制，成文绣，应天道。

巫咸曰：织女，天水官也。

郝萌曰：织女，大长秋也。

黄帝曰：织女主丝帛五采之府。大星后两小星，太子之位，三星齐明，天下和平，丝绵彩帛贱。星若不明，主后有忧，丝绵缙帛贵。织女大星怒而角者，布帛贵。

黄帝曰：织女一星亡，兵起，女子为侈。织女不居其处，若更，天下以女为忧。

石氏曰：织女之道，与贯索相直，布帛贱；不相直，天下有急，布帛贵。织女主丝帛之事，与扶筐为妃，其足常向扶筐即吉，不则丝帛有变。其一足亡也，女病，或曰兵起。

焦延寿曰：织女星入汉，妇人皆水行，后亦然。

郝萌曰：织女晨见东方，赤精明，女工善，不精明，女工恶，常以十月朔六七日视之。

郝萌曰：织女星非故，山摇地动，若牛疾。

陈卓曰：王者至孝，神祇咸喜，则织女三星俱明，天下和平。

石氏赞曰：织女三星保神明，收藏珍宝以奉王。

### 天市垣占十三

石氏曰：天市垣二十二星，张衡浑仪曰：天市二十二星，帝座前有一耳。在房心东北。门右星入尾太，去极九十四度少，在黄道内一度少。

郝萌曰：天市垣星一名天府，一名长城。

巫咸曰：天市，五帝之治水官也。

郝萌曰：天市者，天子之市也。

《诗纬》曰：天市主聚众。

《春秋纬》曰：天市主权衡。

《荆州占》曰：天市西北大星，南方相去三尺，所名曰天曹。

石氏曰：市者四方所乐，帝都之邦，主王之坐，故帝座在市中，圣主之明候也。

郝萌曰：天市之垣，天之旗帜也，欲其大明，明则余贱。

石氏曰：天市垣二十二星，主四方边国。门左星宋也，次星丑，次星燕，次星东海，次星徐，次星太山，次星齐，次星河中，次星九河，次星赵，次星魏，次星中山，次星齐，次星

河间。市门右一星韩，次星楚，次星梁，次星巴，次星蜀，次星秦，次星周，次星郑，次星晋也。其星光芒，即其国有谋也。若星色微小，其国色弱，王者修德以扶之。

黄帝曰：天市垣星不明，市中星简，其岁虚，五谷伤，余大贵，人民饥。天市中星次其明润泽众蕃，可以积贮，市中星不明，市少，可以发出贮积。

《含文嘉》曰：王者于族人有次序，则天市正明。宋均注曰：王者于亲疏有次序族者，非一人也，天市之应，明所悉多。

石氏曰：天市星明，则市吏急，商人无利。星微小，则吏弱，商人多利。天市中星众明，则岁实，星稀则岁不实，虚也。

郝萌曰：天市星明大，则余贱，不明则余贵。天市中多小星，民富足。

石氏赞曰：天市二十二星为外臣。

### 帝座占十四

石氏曰：帝座一星，在市中候星西。入尾十五度半，去极七十度少，在黄道内三十九度。

《黄帝占》曰：帝座，天庭也。人主象也。

石氏曰：帝座，天位也。帝座，天之贵神也，执阴阳之锐，秉杀生之府，总万化之原，保存亡之机，和阴阳之气，应四时之分。帝座星色欲明光而润泽，则天子吉，威令行；微小则凶。星亡则王者有忧，大人当之。天下乱，有兵起，期二年。

石氏赞曰：帝座一星尊时行。

### 候星占十五

石氏曰：候一星，帝座东。入箕二度半，去极七十三度太，在



黄道内三十八度少。

巫咸曰：候星，土官也。

石氏曰：候星以候阴阳，伺远国夷狄，以知谋微。候星主时变货财，安静吉。候星明，万国同风，王道通利，辅臣强也。微小不明，则王道不通，辅臣弱。星移，主不安，期不出年。若星亡，主失位，期不出年。

《荆州占》曰：候星明大，则四夷开。候星微细，则国安。

石氏赞曰：候星在东司阴阳。

### 宦者占十六

石氏曰：宦者四星，在帝座西。南星入尾十二度，去极七十二度半，在黄道内三十八度。宦者星，常侍黄门左右小臣侍从之官，常侍市中，帝座也。宦者刑余人，在座西，微吉，明凶。

郝萌曰：宦者星非其常，宦者官有忧。宦者刑人也，有刑人于市。

石氏赞曰：宦者在西侍主傍。

### 斗星占十七

石氏曰：斗五星，在宦者西南。第一星入尾十度少，去极七十二度，在黄道内二十五度。

郝萌曰：斗者主也，暑物散也，其星明，吉，不明，凶。若其星亡，岁饥。或其星仰，则天下升斛不平，覆则岁稔。又斗星不明，谷不成，岁大饥，人相食。

石氏赞曰：南有斗星主平量。

### 宗正星占十八

石氏曰：宗正二星，在帝座东南。南星入箕二度，去极八十

四度，在黄道内二十七度半。宗正主宗人，小宗之象也。

黄帝曰：宗正，帝宗也，主万物之名，品类于市。其星非其故处，帝宗后族多有黜者，若多死。

石氏曰：宗者主也，正者政也，主政万物之名于市中。星非其故，吏不去则死，及更号令。宗星失色，宗正有事。宗正星明大，帝宗强大；星不明，帝宗弱也。

石氏赞曰：宗正二星宗大夫。

### 宗人星占十九

石氏曰：宗人四星，在宗正东。南星入箕七度半，去极八十五度，在黄道内二十八度。

《元命包》曰：宗人主先人以时祠享。

石氏曰：宗人主恩享，大宗之象，敦穆亲亲。

《含文嘉》曰：族人序，则宗人倚文正明。

黄帝曰：宗人星明如其故，宗室有序，人主吉昌。若动摇不如其常，则宗人不和，王者亲属有变，若宗族贵人多死者。

石氏曰：宗人星离绝，有大怪鸟见。

石氏赞曰：宗人四星录亲疏。

### 宗星占二十

石氏曰：宗星二星，在宗人北。南星入箕九度，去极七十九度，在黄道内二十三度太。

《元命包》曰：宗星主先人祠享。

石氏曰：宗星主别亲疏，宗室之象也，皆帝辅血脉之臣也。

《黄帝占》曰：宗星明而相近，帝相亲，后族有序；其星不明而相远，则帝亲后族相简若有谋者，王者有忧。

石氏赞曰：宗星二星恩不殊。

## 东西咸占二十一

石氏曰：东咸四星，在房东北。南星入心二度，去极一百三度，在黄道内二度少。

石氏曰：东咸四星在房北。

黄帝曰：东西咸一名大明，在房东西，各四星而列，荧惑道也，不道辄还之。

石氏曰：东咸西咸八星者，房户之扇，常为帝之前屏，以表障后宫，以防奸私也。

郗萌曰：东西咸，日月之道也。日月五星不以道，必有贼。

《荆州占》曰：东西咸者，房户也，星明如列表间，天子吉，子孙蕃滋。

石氏曰：东西咸四星在房东北，主日行，色明吉，不明凶。

《海中占》曰：东咸西咸，星明而行列，王者威令行，妃后守其宫。其星微小而不行列，若亡不见，人主威弱，女主自恣，奢淫无度，防守者忧，若宫人有罪。一曰贵女有黜者。

焦延寿曰：东咸星上近钩铃十日，则有谗贼臣人害主者。西咸星前近上，若有角摇起，明动十日，有人以知天数人为害者。

石氏赞曰：东咸西咸防佚淫。

## 天江星占二十二

石氏曰：天江四星，在尾北。南星入尾六度少，去极一百一十一度，在黄道外二度半。

黄帝曰：天江星如常微小，则阴阳和，水旱调；其星明大，天下大水，江海溢流，五谷不熟，民人以水饥。若其星微

若，参差不齐，马贵，一曰马多死。

石氏曰：天江星中河而动，则兵起如流沙，死人若乱麻，以人渡河。如其星不见，则津梁不通。又曰：其星不欲明，动摇则大水出，没城邑，大道不通。

郗萌曰：天江星不欲明河中，而居河中者，大兵起，车骑满野，道不通。

石氏曰：天江四星主太阴，其星明大水不禁。

### 建星占二十三

石氏曰：建星在南斗北。西星入斗七度少，去极一百一十三度少，在黄道内一度。

黄帝曰：建星者，一名天旗，一名天关。

巫咸曰：建星，土官也。

郗萌曰：建星，天之都关也，为谋事，为天鼓，为天马。南二星，天库也，中央二星，市也，铁锁也。上二星，旗也。天府庭也。斗建之间，三光道也。

《海中占》曰：斗建者，阴阳始终之门，大政升平之所起，律历之本原也。

郗萌曰：箕星与建星之间，日月五星之下道也。

《诗雅度览》曰：建星动，劳未央。

焦延寿曰：建星一星不具，若与斗合一月，辟亡二星，合十日，亡三星，合三日，亡病也。

《荆州占》曰：建星欲其相对列，则天下安，若不相类，天下乱，人主忧。

石氏曰：建星明大，则大臣忠孝，帝承天心；不明，大小不齐，则王者失道，忠臣不用。

石氏赞曰：建星六星为斗承，主国日月行失绳。

## 天弁星占二十四

石氏曰：天弁九星，在建星北，西星入斗六度太，去极九十度太，在黄道内一十七度太。

石氏曰：天弁九星，在天市垣外，天下市官之长也，主市中列肆诸价，人在市籍者，商税还，方持物来，皆当贵其租税。其星明大，则市物盛兴；其星不明，则万物衰耗。

黄帝曰：天弁星欲明大，则天下安宁，万物兴隆，珠玉珍物贱；其星不明，天下空虚，万物衰恶，五谷不成，珍物贵。

《乐纬》曰：弁星，羽也，壬子候之羽乱则危，其财匮，百姓枯竭，为旱。

石氏曰：天弁星，主恭俭，明，吉，不明，凶。

焦延寿曰：天弁星近建星，若明大动摇，天下有女乐见人主为害者。

石氏赞曰：天弁九星知市珍，其星明大万物兴。

## 河鼓星占二十五

石氏曰：河鼓三星、旗九星，在牵牛北。大星入南斗二十二度太，去极八十五度，在黄道内二十八度太。

黄帝曰：河鼓一名天鼓，一名三武，一名三将军也。中央星，大将也，左星左将军，右星右将军，皆天子将也。

郝萌曰：河鼓一名提鼓，一名天董，一名天廐。

巫咸曰：河鼓，金官也。

《天官书》曰：河鼓大星，上将也。

《合诚图》曰：河鼓备关梁，设难距鼓，金声无口，以音守，闻远知近，达志意。

郝萌曰：河鼓星主军鼓，主斧钺，主外关州。又主军喜怒。

《赫连图》曰：河鼓怒，黑命成矣。

石氏曰：河鼓旗扬而舒者，大将出不可逆，当随旗之指而击之，大胜。

石氏曰：河鼓旗星明者，则旗帜出，以日占其国，其星若戾，将军政乱，士卒强，将相凌。若旗星不正，有兵。

黄帝曰：河鼓星曲，失计夺势。

石氏曰：河鼓不正，若变色，皆为兵忧将免。其星动若怒，皆为兵马或将出。又河鼓欲正直而明大黄润泽，则无兵，大将吉。又曰：三武易次，兵起。

郝萌曰：天鼓之星怒者，马贵。一名元鼓。

石氏赞曰：河鼓鼓旗建音声，设守险阻知谋徵，旗星差戾乱相攻。

### 离珠星占二十六

石氏曰：离珠五星，在须女北。北星入须女初，去极九十四度，在黄道内二十度。

郝萌曰：离珠，女子之星也。

石氏曰：离珠星者，御后宫离袿衣也，环珮玉珠，后夫人之盛饰也，主进王后之衣服也。

黄帝曰：离珠星明如其常，则宫人妃后安身；其星不明易其故，则宫人不安。

石氏曰：离珠非其故，后宫乱。从危之阳，天旱；危之阴，大水，五谷不登。离珠明大，则后宫昌；失色不明，则后势，任子不显，所近不正。

石氏赞曰：离五星，御后宫。

### 匏瓜星二十七

石氏曰：匏瓜星五星，在离珠北。西星入须女少，去极七十

一度半，在黄道内三十三度。

《黄帝占》曰：匏瓜一名天鸟，一名天鸡，其四星剑鐔之形。其星明大如其故，则果物皆实，岁熟；星若不明，非其常，果物皆恶，岁不登，有大水，川道不通。

石氏曰：匏瓜者，一名天匏，一名天鸡。匏瓜大则岁熟，星微则岁恶。

《黄帝占》曰：匏瓜星主后宫。匏瓜，天鸡也，主司中，所以和五味。

《元命包》曰：匏瓜主阴谋。

郗萌曰：天子果园，为献食者。

《星官训》曰：匏瓜，大瓜也，性内文明而有子，美尽在内。

黄帝曰：匏瓜星明，则野瓜甘露生，庖厨后宫官多子孙；星不明，后失势。又其星非其故则山摇。

石氏曰：匏瓜非其故，则山谷多水，天下不通。

焦延寿曰：匏瓜星不见，若不正动摇，皆为有贼，人主者若以果实为败。

石氏赞曰：匏瓜五星司谋忠。

## 天津星占二十八

石氏曰：天津九星，在须女北河中。西北星入斗二度，去极四十九度，在黄道内四十九度少。

《黄帝占》曰：天津者，一名天潢，一名潢中，一名巨潢，一名江星，一名水王柱，一名格星，一名潢星，一名天津。天津有潢四星，在危之北，居汉。

郗萌曰：天潢者，天津也，一名天汉。

《元命包》曰：天潢主河梁，所以度神，通四方也。又曰：天潢一星，天子都船也。

《黄帝占》曰：天津有变，水贼称王，水道不通。

石氏曰：天津处，河溢天津，覆水滔天。天津亡，河水为害，天下不通。

石氏曰：天津亡，津道不通；天津张，天下安。

郝萌曰：天潢星不具，天下津河关道绝不通。

石氏赞曰：天津九星通厄穷。

### 螣蛇星占二十九

石氏曰：螣蛇二十二星，在营室北。喙星入营室一度半，去极五十一度，在黄道内五十三度少。螣蛇，天蛇也，主水虫。又蛇，蛇之牡也，与龟鳖交，水虫之长也，水中之虫皆属蛇。

黄帝曰：螣蛇星明，水虫茂，鱼盐贱；星不明，则水虫衰耗，鱼盐贵。

石氏曰：螣蛇星移南，则军兵起；移北，大水。若星明，不安；微则安。

石氏赞曰：螣蛇之星主水虫。

### 王良星占三十

石氏曰：王良五星，在奎北。居河中，西星入壁半度，去极四十二度半，在黄道内五十七度。

郝萌曰：王良一名天津，一名王济。案《荆州占》云：王良或占车骑，或占津梁，且古字通用，故二字并依旧本。

《元命包》曰：天骑四星，在汉中，一名天驷傍，一名王良，主天马。

郝萌曰：王良，一名天马。

《黄帝占》曰：王良主御风雨水道，主河梁。

《河图》曰：王良为天桥。

巫咸曰：王良，天子道桥之度水之官。



郗萌曰：王良者，天子奉车。

郗萌曰：王良策马，前与马等，后与马等。

《荆州占》曰：王良为西桥，故或占车骑，或占津梁。

黄帝曰：驷马参差不行列，天下安；若驷马齐行，王良举策，天子自临兵，国不安。

黄帝曰：王良发者，河水出。

《河图》曰：王良策马，此皆兵候，圣雄并起，期不出九年，天下之兵扰。

《考灵曜》曰：王良策马狼狐张，咄咀害出血将将。王良一星名策，策马谓有光芒也，张犹明也。咄咀，大星名也，血将将，兵起死伤以众也。

《含文嘉》曰：天子乘舟得其所，贵贱不相逾僭，则王良附路星明，常在河中，天子寿昌，万民无疫疠之殃。

《论讖》曰：王良策马野骨曝。

石氏曰：王良星移则有兵，以东西南北处所在。王良星不具，津河道不通。王良策马，车骑满野，天下大乱，兵大起，明君出，期不出三年。

《海中占》曰：驷马不动，天子安宫。

焦延寿曰：天驷星前与阁道相近，有江河之变。

郗萌曰：王良正，马疾病。王良与马齐，天子有疾马。

《荆州占》曰：王良与马齐，天下有急。

郗萌曰：王良向造父，马贱。

《赫连图》曰：王良策马，北夷制号。宋均曰：策星在王良傍，若移在王良前，居马后，是谓策马。

石氏曰：王良星常在汉中则吉，不可移动，移动则有兵。王良驷马动摇，天子欲出，小动小出，大动大出千里。驷马有芒角，天子兵，期二年，王者必有所在，惟意有所想，未发颜色王良星。

石氏赞曰：王良五星知王庄。

## 卷六十六 石氏中官

### 阁道星占三十一

石氏曰：阁道六星，司马迁《天官书》云：后六星绝汉抵营室，曰阁道。案图簿，营室北有螣蛇二十二星，其阁道止六星，恐由于长之谬矣。在王良东北。南星入奎五度，去极四十三度少，在黄道内五十八度少。

巫咸曰：阁道，水官也，

石氏曰：阁道，形如飞阁之状，从紫微北门出，至河上，天子法驾乘其行，神乘也。

石氏曰：阁道，王良旗也，一名紫宫旗，在王良傍而抵紫宫垣。旗动摇不如其故，旗所指者，兵所起。

《春秋纬》曰：阁道所以扞冲难，灭诸咎。

《黄帝占》曰：阁道，天子御道也，绝汉直紫宫后，名曰阁道。其星明，行列正直，人主吉，天下安。其星动摇不如其故，若星不具，则天子津道不通，有谋臣。阁道星主道星，天子私出入。王者别宫以候近出，星明大，则王者圣明，四方大通，若星不具，天子道津不通。

焦延寿曰：阁道星与紫宫蕃星同行辟，溺河梁，若王者宫阙道有害者。

石氏赞曰：阁道六星神所乘。

### 附路星占三十二

石氏曰：附路一星，在阁道南傍。入奎三度，去极四十三度，在黄道内五十七度。

郗萌曰：附路一名王济之太仆，一名伯乐，一名就父。

《论讖》曰：附路主扫除。

郗萌曰：附路主御风雨。

石氏曰：附路以通道，若阁道道坏当从附路，道备豫不虞，以候灾害，故曰备路。

《礼纬》曰：附路明，天子寿昌，万民无疫病之殃。

《论讖》曰：附路亡，道途塞。

石氏曰：附路星芒，则车骑满野。

郗萌曰：附路正马，车骑满野，天下大乱，期十月。王良，驷马也，正马，谓移在驷马之前。

石氏赞曰：附路一星备败伤。

### 天将军占三十三

石氏曰：天将十一星，在娄北。大星入奎十五度半，去极六十度少，强在黄道内二十九度少。

巫咸曰：天将军，金官也。

郗萌曰：天将军者，天所以将率忠正之群士而自卫者。

石氏曰：天将军者，天之大将军也，中大星，大将也，外卫小吏士也。大将星动摇，兵起，大将出。

《黄帝占》曰：天将军小星动摇不具，兵发。又占曰：天将军星欲明安静，天下无兵，大将安宁；其星不明摇动，天下大兵，大将出行。

《海中占》曰：天将军星动摇，天子自将兵出。

郗萌曰：天将军旗陈直扬者，所指者胜，所背者负。旗者左右星也。

石氏赞曰：天将军，十一星，主武兵。

## 大陵星占三十四

石氏曰：大陵八星，在胃北。北星入娄六度少，去极四十三度少，在黄道内四十度少。

石氏曰：大陵一名积京，其星明，蕃国多有大丧，民多疾病，诸侯有丧。

石氏曰：大陵中有积尸星，明则有大丧，死人如丘山。

甘氏曰：大陵丧墓，积尸随居。

郗萌曰：积京者，大陵也，卷舌之口也。大陵曲而北向，卷舌曲而南向，相为牝牡。

郗萌曰：积京中星众则粟聚，星少则粟散。

石氏赞曰：大陵八星主崩丧。

## 天船星占三十五

石氏曰：天船九星，在大陵北河中。北星入娄九度，去极四十三度半，在黄道内四十三度少。

郗萌曰：天船九星，一名王船，中有四星，常欲均明，即天下大安，不明移处，消小不见，天下有兵，若有丧。

石氏曰：天船主水旱之事，一名天更。

《黄帝占》曰：天船主帝王济渡之官，常居汉中。

郗萌曰：天船，天将军兵船也。

石氏曰：天船常在汉中，不明，天下兵起，津河不通，川水大出，舟船用。

焦延寿曰：舟星头四星常在汉中，将以水战不成，若有没国，水大出。

石氏赞曰：天船九星济不通。

## 卷舌占三十六

石氏曰：卷舌六星，在昴北。北星入胃十度少，去极五十六度，在黄道内四十一度太。

《黄帝占》曰：卷星一名胜舌，一名左舌，一名积京，一名积薪。

《春秋合诚图》曰：卷舌主口语。

石氏曰：卷舌主利口，明大则利口用事。

石氏曰：卷舌星欲微小不明，明大多谗言，下多谗，口舌作也。

石氏曰：卷舌星曲如舌即吉；舌直，天下多口舌之害。

《圣谕符》曰：卷舌动，其中星众，兵大起，多口舌；卷舌安静，其中星希，则国宁无兵。

郝萌曰：卷舌星蕃盛，天下多口舌，民多疾死。一曰兵起，人死如丘山。

郝萌曰：卷舌星动，兵大起，多口舌；星希则无兵。

郝萌曰：卷舌星出守不居汉中，天下尽为口舌妄言。

石氏赞曰：卷舌六星知谗谤。

## 五车星占三十七

石氏曰：五车五星、三柱九星，凡十四星，在毕东北。西星入毕三度，去极六十三度，在黄道内十度太。

石氏曰：五车一名天库，一名天仓，凡五星，在毕昴北，大陵东。其西北端一大星曰天库，天库，将毕也，秦也，太白也，其神名曰令尉；次东北星，名曰狱，燕赵也，辰星也，其神名曰风伯；次东星名曰天仓，天仓，卫鲁也，其神名曰雨师；次东南星名曰司空，楚也，镇星也，其神名曰雷公；次西南星名曰乡，乡，韩魏也，荧惑也，其神名曰丰隆。

石氏曰：五车中有三柱，晋灼曰：柱解音注。三星鼎足居柱，一名休格，一名旗。

郗萌曰：五车一名咸池，一名为五潢，一名为重华，居丰隆也。

《天文志》曰：三渊者，五车柱也。

《黄帝占》曰：五车者，五帝之座。

巫咸曰：五车，天子五兵水官。

郗萌曰：五车，天子大泽也，主轻车。

石氏曰：五车，西北大星，大豆，东北星稻也，东南星麻也，正南星粟也，西北麦也。

甘氏曰：五车星，五谷各有所主分野，其星动摇变色，其国有兵，五谷大贵，人民饥亡。

郗萌曰：五车主五谷。一车主粱，粱，麻也；一车主麦；一车主赤黑豆；一车主黍；一车主稻米。

《黄帝占》曰：五车三柱星动，期三十日，车骑发。

《礼纬含文嘉》曰：天子观天文，察地理，和阴阳，揆星度，原神明之变，获福于无方，得灵台之礼，则五车三柱均明，不离其常，川原陆泽年丰穰。宋均注曰：天子考察天气，若祥填见赤星之祲者也，所以获福禳灾。五车主五谷，为灾禳灾，得民福，民无饥寒之困，故五车星均明以应之也。

《春秋元命包》曰：五车三柱，象天下之车。一柱不见，三分一车行；二柱不见，三分二车行；三柱不见，天子自将兵。

《文曜钩》曰：咸池中三柱不具，兵革起。

石氏曰：五车中一柱出若不见，兵少半出；二柱出若不见，兵大半出；三柱尽出若不见，兵尽出。柱入而兵入，柱外出而不与天库相近者，军出谷贵，转谷千里。柱外出一月，谷贵，期一岁；出二月，谷贵六倍，期二岁；出三月，谷贵九

倍，期三岁；出三月不入，谷贵十倍。

石氏曰：五车柱外出，不居两星之间者，天下大水，木大贵。柱倒立者，就车行，土大贵，转土千里。

石氏曰：五车星欲其均明，阔狭有常。五车天库星中河而不见，天下有积尸，人不可度河，河不通，即有军。

石氏曰：五车明大，若星繁众，兵革大起。

石氏曰：五车休出库者，甲兵强，轻车骑出；休出仓者，大车出，妇女挽粮。休格所指者，车从之。

石氏曰：五车仓星不见，其所临之军必绝食，太穷而亡。

郝萌曰：五车旗不见，天下大风，发屋折木。又占曰：五车休旗动，四夷畔。又占曰：五车休格反抵大星，兵起天下，先兵者胜。

《荆州占》曰：五车柱倒立，战军行。

石氏曰：五车星俱明，五谷丰。一星不明，则其谷不升。又占曰：五车星失色，赤地三千里不生。

石氏曰：五车星有不见，其国饥，有兵忧。

石氏赞曰：五车三柱欲均明，主谷丰耗知败伤。

### 天关星占三十八

石氏曰：天关星在五车南，参西北。入觜初度，去极七十三度半，在黄道外二度太。

郝萌曰：天关，天门也，在黄道中，日月不出其中，行必有一国之主不朝者。一曰柱不道者。五星不出其中，臣必有不道者。

《黄帝占》曰：日月五星不出天关中者，必有叛臣不从君命，若主不道，臣谋君，有兵起。

石氏曰：天关星芒角，有兵。

焦延寿曰：天关星不在，若与五车星舍，大将披甲，国门

闭。

《天官书》曰：黑帝行德，天关为之动。

石氏曰：天关星欲大明，明大则王道平通。

石氏赞曰：天关一星道所从。

### 南北河戍占三十九

石氏曰：南河北河六星，夹东井。东河中央入井十七度少，去极八十度，在黄道外十四度。

《春秋纬》曰：井钺北曰北河，南曰南河，两河天关门为关梁也。

《黄帝占》曰：南河戍名曰南纪阳门，南宫南高南关越门。

《黄帝占》曰：南北河戍一名天高，一名天亭，两河戍间为天道。

郗萌曰：南河戍一名南藏，北河戍一名北藏，一名天门。

《黄帝占》曰：北河戍名曰北横阴门，北宫北高北阙胡门。

《黄帝占》曰：南河戍为权，北河戍为衡。权不正则天倾。所谓不正者，南河戍南五尺。

《黄帝占》曰：南北河戍为天街，天街流相抵，天下大乱，亲离也。

巫咸曰：南北戍，北门水官也。

石氏曰：天关者，河戍也，主中国之难，此皆天之度，以昭示人也。

郗萌曰：两河戍与戍俱为帝关。又占曰：两戍间为天门，日月五星常出其门中，经行吉，不得久留守焉。日月五星不出其中者，为王失道，行其南，以刑法举措不当失道；行其北，以女及财物金钱失道。近期三年，中期六年，远期九年。



韩杨曰：南北戍者，天门也，两戍间为天道，日月五星常出南北戍间，出北旱。

《黄帝占》曰：两河星欲明，大小如其故，则天下安宁，四夷来朝；其星不明，若动摇不于其常，则边兵大动，交侵中国，人主有忧。

郗萌曰：北河戍下多小星，有民不治，将不明，多失职。

《黄帝占》曰：日月五星行不出天道间，必有不道之臣。一曰必有道不通。

石氏曰：南戍主夷狄，北戍主中国，两戍之间天关门。

石氏曰：南北河星不具，道不通。一曰大水。

石氏赞曰：两河六星知逆邪。

### 五诸侯占四十

石氏曰：五诸侯五星，在东井北，近北河。西星入井二度，去极五十七度，在黄道内三度少。

《黄帝占》曰：五诸侯主帝心，一曰帝师，二曰帝友，三曰三公，四曰博士，五曰太史。此五者，为帝定疑也。

巫咸曰：五诸侯，士官。

石氏曰：五诸侯五星，在北戍之南，东西列，东端第一星齐也，西端一星秦也，其余星皆为诸国。

《春秋纬元命包》曰：五诸侯主刺举，戒不虞。

《援神契》曰：五诸侯主危倾，此皆诸侯之职也。

石氏曰：五诸侯者，使发摘奸谋，司察阴私伏匿之事。

《春秋纬》曰：五诸侯理阴阳，举外害，察得失，九州之外，使五星之变逆出名罚。第一典岁，其次如位，故以上天祸从中起。

《礼纬含文嘉》曰：五礼修备，则五诸侯星正行，光明不相凌侵，五禾五木应以大丰。

《黄帝占》曰：五诸侯星欲均，大小齐明，则王吉昌，天下太平，其臣皆忠。星若差戾摇动不明，则辅臣不忠，王者不安，天下有忧。

《春秋纬元命包》曰：五诸侯生角，祸在中。

《春秋纬元命包》曰：五诸侯星流四，去外牧，伤，天子避宫，公卿逃。

石氏曰：五诸侯星明大润泽，大小齐同者吉，诸侯忠良，王道大兴。细微者凶。

郗萌曰：五诸侯星当明，即天下大治安昌；不明若不见者，天下之贵人有谋其主者，不出三年而发。

韩杨曰：五诸侯纮戒见，乱相屠。

石氏赞曰：五诸侯星主议疑。

### 积水星占四十一

石氏曰：积水一星，在北河西星北。入井十三度，去极五十五度，在黄道内十二度太。

石氏曰：积水一星，一名聚水，积聚美水，以给酒官之旗。

巫咸曰：积水之官。

《黄帝占》曰：积水一星给酒旗。积水者，甘泉也，拟于醪酿，以待宾客，其星欲明，天下安，飨宴之礼行；其星不明，人主不安，五谷不登，飨宴礼废，徭役殷烦，人民忧。

石氏曰：积水星明大动摇，天下水，河海溢流，津道不通。

石氏赞曰：积水星，给酒旗。

### 积薪星占四十二

石氏曰：积薪一星，在积水东南。入井二十一度半，去极六

十一度半，在黄道内十度太。

石氏曰：积薪，聚薪也，聚薪以给享祀。

《黄帝占》曰：积薪所以给庖厨，以燎熟饮食。其星欲明，明则王者安，五谷熟；其星不明，则庖厨空虚，天下旱，岁不登，人民饥，王者有忧。

石氏曰：积薪与积水相去五尺以内，天下太平，五谷成；若相去一丈以外，天下饥荒，人民流亡，去其乡。

石氏曰：积薪明大，则人君增庖厨。

石氏曰：积薪星明大，帝尝察；星不明，君臣不和，百祀不享。

石氏赞曰：积薪一星主给庖。

### 水位星占四十三

石氏曰：水位四星，在东井东，南北列。南星入井十九度半，去极七十二度半，在黄道外三度太。

《黄帝占》曰：水位，主水官也。其星微小如其故，则阴阳和，雨泽以时，天下安；其星明大，大水横流，沟渠溢满，五谷死伤，民以水饥。

石氏曰：水位星，主水衡。衡平象，水泽平而后流，泽不壅塞也。星明大则兵水兴。

焦延寿曰：水位星上近北戍，国没为河，不乃有滔天之水，以日占国。

石氏赞曰：水位四星泻溢流。

### 轩辕星占四十四

石氏曰：轩辕十七星，在七星北。大星入张大，去极七十一度，在黄道内一度少。

《诗推度灾》曰：黄龙在内，正土职也。一曰陈陵，二曰

权星，主雷雨之神。

石氏曰：轩辕一名昏昌宫，而龙蛇形，几十七星。南端明者，女主也，母也；女主北六尺一星，夫人也，屏也，上将也；北六尺一星，次夫人也，妃也，次将也；北六尺一星，次妃也，其次皆次妃也。女主南三尺星不明者，女御也；御西南丈所一星大明也，太后宗也；御东南丈所一星少明也，皇后宗也。

郗萌曰：轩辕，女主之廷也，一名天柱。

《荆州占》曰：轩辕前大星明，一曰天关，主阴关。

《淮南鸿烈》曰：轩辕，帝妃之舍也。

巫咸曰：轩辕，天子后妃之庭，主土官也。

《黄帝占》曰：轩辕十七星，主后妃黄龙之体，以应主。南第一星，皇后也；次北一星，三夫人；又北一星，九嫔也；次北一星，二十七世妇；其次北一星，八十一御女。西南六尺一星，太后宗也；东星六尺一星，皇后宗也。后妃星南一尺一星小者，皇子也；次南二尺一星，女史也。其星主雷雨风霜雾露虹蜺背袂抱珥，此轩辕之变气，皆应主之祥。

石氏曰：轩辕星，王后以下所居宫也。一曰帝南宫，中央土神女主之象也。女主之位，黄帝之舍也。

《礼纬含文嘉》曰：诸舅有仪则，轩辕东西角大张。

石氏曰：轩辕屏星去，无君臣之义。

石氏曰：轩辕星如其故，色黄而润泽，则天下和，年大丰。

石氏曰：轩辕移外，民流亡，从胡人；移其内，民人大饥，胡人来。

焦延寿曰：轩辕星动有摇，若相就，皆为后夫人之宗有死丧，若卑伐尊者。又占曰：女御星去后星远，有贼星迫近之，有赏赐事。其东西至大民少民，王者娶不以次，淫佚不用道

理，以下贱为正也。

郗萌曰：轩辕角振，后族败。振，动也。

《荆州占》曰：轩辕欲小，小，黄明也。消小不见，皇贵妃不安，黑色大凶。

石氏曰：轩辕星合为百二十妃，大小相次，后宫多子孙，不明，有暴忧。

石氏赞曰：轩辕龙体主后妃。

### 少微星占四十五

石氏曰：少微四星，在太微西，南北列。南星入张十度半，去极七十度半，在黄道内三度半弱。

韩杨曰：天官图簿，少微四星谓第一处士，第二博士，第三义士，第四大夫也。别书云，有五星，南端一星主真人，老子许由也，第二星处士，孔子也。第三星工士，奚仲、鲁班也。第四星术士，定钟律，师旷也。第五星能士，力举九千钧也。《天官书》曰：廷蕃西有堕星五。案图簿止有四星，且韩杨又云异闻，今故兼录也。

《文曜钩》曰：少微，士大夫位也，一名处士。

巫咸曰：处士，水官也。

石氏曰：少微，伏戏之廷。

巫咸曰：少微，天子副主。或曰博士官。一曰主卫掖门。

《黄帝占》曰：少微主艺能之士，若闻如孔子，巧如鲁班，道术之士，悉皆主之。

《黄帝占》曰：少微星明而行列，王者任贤良，举隐逸才用，天下安；其不明，微而不见，贤良不出，术士潜藏，人主不安。

《春秋纬》曰：大夫专权，则兵陵地坼，少微纤昧。

石氏曰：少微星明大而黄润泽，则贤士举而忠臣用。

石氏曰：少微星微小，则贤士退而忠臣废。

巫咸曰：少微星非其故，女主有忧。

巫咸曰：处士明，王命兴，辅佐出。

焦延寿曰：少微星近太微，若一星独前，入太微西门，胡主有谋贼辟。

石氏赞曰：少微四星逸士位。

## 太微星占四十六

石氏曰：太微十星，案司马迁《天官书》、班固《天文志》，并匡衡《十二星验图簿》及所见星位，止十星，未详其占。在翼轸北门右星入翼九度，去极七十六度半，在黄道内二度太也。

吴龚《天官星占》曰：太微者，天关也，南门关千里，分为左右掖。

郝萌曰：太微之宫，天子之廷，上帝之治，五帝之座也。案张衡《灵宪》曰：太微为五帝之庭。名曰保舍，十二诸侯之府也。其外蕃，九卿也。轩辕为权，太微为衡。案《续晋阳秋》曰：桓温入蜀，闻有善星者，后有大志，遂致之，夜独执其手于星下，问国社之修短。星人曰：太微紫微文昌三宫气候如此，决无忧虞，五十年外不论耳。温不悦，遗绢一匹，钱五千。星人诣习凿齿曰：受旨自裁，乞命为标揭棺木。凿齿问其故，星人曰：赐绢令我自缢，乞钱买棺，故知之耳。凿齿曰：君几误死。君亦知星宿有不覆之义乎？织以戏君，钱供资粮，是听君去耳。星人喜，以此言诣温，温叹曰：君三十年看儒书，不如一诣习主簿。

《淮南鸿烈》曰：太微者，主朱鸟也。许慎曰：大风之乡朱鸟

《孝经纬》曰：太微天廷，帝以纪录出图，五星并设，神灵集谋，故置将相辅佐执法郎，位少微以议疑。

巫咸曰：太微，天子常侍土官也。

《黄帝占》曰：太微，天子之宫，西蕃四星，南北列，南

端第一星为上将；北间为太阳西门，门北一星为次将；北间为中华西门，门北一星为次相；北间为太阴西门，北端一星为上相。东蕃四星，南北列，南端第一星为上相；北间为太阳东门，门北一星为次相；北间为中华东门，门北一星为次将；北间为太阴东门，北端一星为上将。南蕃两星东西列，其西星为右执法，其东星为左执法，廷尉尚书之象。两执法之间，太微天廷端门也，右执法西间为右掖门，左执法之东为左掖门。帝有四部将军，相有十帝之所尊贵者为上，将相不以廷尉尚书为例。

《洛书》曰：太微西蕃将执威诛不顺，东蕃相执美拒侯王。

《春秋元命包》曰：太微权政所在。又曰：太微为天廷，理法平辞，监升授德，列宿受符，诸神考节，舒情稽疑也。南蕃二星，东星曰左执法，廷尉之象也，西星曰右执法，御史大夫之象也，执法所以举刺凶奸者也。两星之间，南端门也。左执法之东，左掖门也，右执法之西，右掖门也。东蕃四星，南第一星曰上相；上相之北，东门也，第二星曰次相；次相之北，中华门也，第三星曰次将；次将之北，太阴门也，第四星曰上将，所谓四辅也。西蕃四星，南第一星曰上将；上将之北，西门也，第二星曰次将；次将之北，中华门也，第三星曰次相；次相之北，太阴门也，第四星曰上相，亦为四辅也。

《春秋纬》曰：天廷微序五统三，立法式，成章匡，卫星为蕃臣，西星将位，东星为相位，中执法，南两星端门，旁左右掖门，五诸侯王。

## 卷六十七 石氏中官

### 三台占五十三

石氏曰：三台六星，两两而居，起文昌，列抵太微。两台北星入井三十度太，去极三十度少，在黄道内三十八度少也。

《黄帝占》曰：三能苏氏曰：能音台。者，三公之位也，诸侯农人也，一名天柱，太一之舍道也，文昌之庭也，在下名曰天奇。

《黄帝占》曰：三能近文昌宫者曰太尉司命，为孟；次星曰司徒司中，为仲；次星为司空司禄，为季。

《黄帝占》曰：泰阶，天之三阶也，上阶上星为天子，下星为女主；中阶上星为诸侯三公，下星为卿大夫；下阶上星为士，下星为庶民。所以和阴阳而理万物。又占曰：三台大间，中相去十六度为平过，为太灭，为损。小间中相去太半度为平过，为奢灭，为迫。又占曰：知三能者，使人不病病，夫妻俱，视三能，使人离。三能虽尊，臣之位也。又占曰：司禄主人君之爵禄。

《礼含文嘉》曰：三台为天阶太一，躐以上下，一曰天阶。

《春秋纬》曰：三能在前，参稽正绪。

《春秋纬元命包》曰：魁下六星，两两而北，曰三能，主德闻德宣符也。西近文昌二星曰上台，为司命，主寿；次二星中台，为司中，主宗室；东二星曰下台，为司禄，主兵。

《论讖》曰：上台上星主兖豫，下星主荆扬；中台上星主梁雍，下星主冀州；下台上星主青州，下星主徐州。星非其故，以占其邦。



巫咸曰：三能，天子六阶。六阶，士官也。

郗萌曰：三能主爵，为天仓。

司马迁《天官书》曰：三能三衡者，天庭也。

《荆州占》曰：司命主兵，间六尺有兵。又占曰：司命司中禄星，天子定见安危之府也，万民寿之主也。

《黄帝占》曰：司命司中司禄星，色青黑，天下多忧。又占曰：司中主宗室，间六尺，主乱政急，骨肉亲疏远，宗室不和附，人君不安，兵起。

《黄帝占》曰：公侯背叛，率部动兵，则中阶上星其色赤；夷狄侵边，境内骚动，则中阶下星疏而横，其色白；卿大夫废正向邪，作奸营私，则下星垂而疏，其色赤；避尊比下，兴众同位，则星迫而下，色白。

《黄帝占》曰：士庶民不从法令，犯刑为贼，则下阶上星其色赤。去本就末，淫侈相起，则闾人横，其色白。令行法胜，委命听从，则星迫而下，其色白。又占曰：上能不具，春不得耕；中能不具，夏不得芸；下能不具，秋不得获。又占曰：三阶平，则阴阳和，风雨时，五谷丰，祲祥应，天下太平。三阶不平，则阴阳不和，风雨不时，百灵不享，灾异并生，百姓不宁。

《黄帝占》曰：天子刚猛好兵，灭后杀嗣，则上阶上星其色赤。循宫广圉，肆其声色，则上阶奢而横。温懦柔弱，诛罚不行，则上阶迫，其色白。朋党比周，度逾適易，则上阶下星其色白。妃嫔尊荣，谗言进用，则上阶下星奢而横，其色白。侍宠肆欲，怀邪作乱，则星高而仰，其色赤。

《黄帝占》曰：人主有纲，臣下有纪，赋敛惟省，刑罚用轻，则上阶为之蹙；诸侯纳贡，朝聘有礼，三公尽忠，卿大夫无私，则中阶为之比；庶民奉化，闺门和穆，干给以时，徭役有序，下阶为之密。蹙、比、密者，相近也。

《黄帝占》曰：人主徭役肆意纵欲，崇飭台榭，数夺农时，上阶为之奢；诸侯盛车服上僭，三公专权，卿大夫贪夸，则中阶为之疏；案王隐《晋书》曰：张华少子建晓仰占云：中台坼，内惧，遂劝华逊位。华言今惟修德以应之耳。檀道鸾《晋阳秋》曰：张华死后，中台遂坼。太元中还阴斂正，中国以为谢太傅祖德之所致也。《宋书天文志》云：晋惠帝永康元年三月，中台星坼，是日贾后杀太子赵王伦，寻废杀后及张华，又废帝自立，于是三王并起，操据天权也。士庶民去本趋末，不务农桑，奢侈相凌，竟为狡猾，则下阶为之阔。奢、疏、阔者，阶相远也。

《洛书》曰：三能横通，天下嚶嚶，后十二年，山大崩，亡主之符也。

《尚书中候》曰：中能垂，公辅谋。

《尚书中候》曰：天能有变，厥为灾，土沦山崩，谷溜满，川枯。

《礼含文嘉》曰：王者得礼之制，不伤财，不害民，君臣和集，草木昆虫各蒙正性，则三台为齐明，不阔不狭，如其度。宋均注曰：君臣制度宫室车旗多少各有科品，则应之也。

《礼纬含文嘉》曰：殡丧之礼各以其时，变制革礼之差，得制之宜，三台平正，有德星出入其间矣。

《春秋纬》曰：三公擅恣，非其人，则山崩，三台移，鼎折足。

《春秋纬》曰：三能色齐，君臣和；不齐，大乖。

《春秋纬》曰：三能色乱，天子不贤。

甘氏曰：三台色明，行列齐等相类，则君臣和吉而治臻。

甘氏曰：三台色黄，天下谋德，色赤谋兵，色黑有忧色，白为丧色，白为疾。三台不直，天下失谋。

甘氏曰：三能流相抵者，诸侯为乱，天子不见，有亡主，以其日占其国。

甘氏曰：司中星坼，摇若合，赦。

甘氏曰：司禄星其坼者凶，主者当之。

焦延寿曰：三能星摇动，皆为有谋。

郗萌曰：三能之上星疏者，变从上家起；中星疏者，变从中家起；下星疏者，变从下家起。所谓变起者，反逆之事。又占曰：司命司中司禄星，欲其赤黄，万民奋壮，所为数利。

《荆州占》曰：三能一疏一数，宗庙咎责，亡孝悌仁义也。五府不顺此，三公之过也。又占曰：三能不齐等，三公不相信。又占曰：三能色不齐，君臣奔走，黑为丧。

《荆州占》曰：三能一星去，天下危；二星去，天下乱；三星去，天下不治。

《荆州占》曰：三能色黄泽，赦。又占曰：三能黄泽有光，民安寿。又占曰：司命司中司禄，欲其大淳而泽，天子多推恩。

石氏赞曰：三台六星三公位，其色齐明德洋溢。

### 相星占五十四

石氏曰：相一星，在北斗南。入翼五度，去极三十一度半，在黄道内三十七度也。

《黄帝占》曰：相星，天丞相也，大臣象也，主衣服之章。

《黄帝占》曰：相星明大，则天子明，忠臣兴；相星亡，则辅臣黜，若有诛。

石氏曰：相星明，吉；不明，凶。

焦延寿曰：相星亡，相死，不死出走。

石氏赞曰：相在斗南集众事。

## 太阳守星占五十五

石氏曰：太阳守一星，在相西南。入张十三度少，去极三十五度半，在黄道内三十九度也。

《黄帝占》曰：太阳守，辅臣象也，所以守卫天主之宫，备守诸门。其星明，则人主威伏四方，天下安，王者致符瑞。

石氏曰：太阳守星明，吉；不明，不吉。

焦延寿曰：太阳守星北近斗，居七星行间以入，曰辟煞亡。

陈卓曰：太阳守星非其常，天下兵起，中国不安，大臣诛。

石氏赞曰：太阳守在西，设武备。

## 天牢星占五十六

石氏曰：天牢六星，在北斗魁下。东星入张一度少，去极二十六度半，在黄道内四十四度太也。

《黄帝占》曰：天牢，贵人之牢也，在北斗魁下，所以禁暴横。

《春秋合诚图》曰：天牢主守将。

郗萌曰：天牢，天子疾病之忧患。

《黄帝占》曰：天牢中星众，贵人多下狱；星希，天下安，无罪人。

石氏曰：天牢中无星，天下安宁；有星，贤主伤。

焦延寿曰：天牢星明大动摇，辟拘系。一星明，主侯有系者。

司马迁《天官书》曰：赤帝行德，天牢为之空。

石氏曰：天牢与贯索通占。

石氏赞曰：天牢六星，禁暴去恶。

## 文昌星占五十七

石氏曰：文昌六星，一本七星。案陆绩《浑天图》曰：文昌中有一星在司禄内，名为主禄，统名为七星。西星入井十五度太，去极二十五度太，在黄道内四十三度半也。

司马迁《天官书》曰：斗魁戴匡六星曰文昌宫。晋灼曰：似戴故曰戴匡也。

《黄帝占》曰：文昌六府之宫也，在斗魁前，经纬天下文德之宫。六府谓金木水火土谷，从斗魁第一星为上将，建威武；第二星为次将，临左右；第三星为贵相，主文理；第四星为司命，主赏功进贤；第五星为司中，班固《天文志》云司禄。主司过诘咎；第六星司禄，佐理宝。《天文志》曰司中。

《洛书》曰：文昌主六府寇。

《春秋纬元命包》曰：文昌主集计祸福也。天道文者精所聚，昌者扬天纪，辅弼并居，成天象。

《春秋纬》曰：文昌宫为六府，以布升度，明天道，上将招威，次将辅主，贵相宣德，司命进官，司中灭咎，司禄赏善，佐理杨宝。六名执权守，隶四海之府，土官也。

巫咸曰：文昌，天子司禄之府，土官。

陈卓曰：文昌一星上将，大将军也；二曰次将，尚书也；三曰贵相，太常也；四曰司中，司隶也；五曰司怪，太史也；六曰大理，廷尉也。

《黄帝占》曰：文昌宫者，天府离宫也。文昌宫三能属轩辕相与为体，星明大齐同，则王者致太平，星不明，道术隐藏。王者求贤则星明。

《黄帝占》曰：文昌星黄润泽光，万民安；青黑微，多所害。又占曰：司命主灭不祥，其星黄泽有光，万民安；苍为天下多有忧。

焦延寿曰：文昌星动摇不如故，三公诛，不乃后死。

陈卓曰：文昌星明，大小齐等，天瑞臻。

石氏赞曰：文昌在西则六府治。

## 北斗星占五十八

石氏曰：北斗七星，辅一星，在太微北。第五星入井十三度，去极十一度太，极星入张初，去极十八度少，在黄道内九十八度也。

《黄帝占》曰：北斗为帝车，运于中央，临制四方，《汉书天文志》曰：四海。吴襄《天文星占》曰：四卿也。分别阴阳，建于四时，均立五行，移应节度，定诸纪纲，太一之事也。配于二十八宿，天所以发其时，地所以成万物，诸侯属焉。

《春秋纬元命包》曰：斗为帝令，出号布政，授度四方，故置辅星以佐功为。斗为人君之象，而号令之主也。兵法曰：北斗名长史，小字大方，能知者便不畏白刃。

巫咸曰：北斗，天子受命之使，士官也。

《河图》曰：北斗魁第一星开枢受枢，受枢至四星属魁，为璇玑，第二星提执序，第三星玑耀绪，第四星权拾取，第五星玉衡拒，第六星开阳纪、辅星纪，第七星摇光吐，摇光主玉衡，属杓为玉衡。案《春秋纬元命包》曰：玉衡北绳注曰直杓，故曰玉绳也。《舜典》曰：璇玑玉衡以齐七政。巫咸曰：七政者，日月木火土金星是也。

《洛书》曰：北斗魁第一曰天枢，第二璇星，第三玑星，第四权星，第五玉衡，第六开阳，第七摇光。第一至第四为魁，第五至第七为杓，合为斗杓。阴布阳，故称北斗。开阳重宝，故置辅。易斗中曰北斗，第一曰破军，第二曰武曲，第三曰廉，第四曰文曲，第五曰禄存，第六曰巨门，第七曰贪狼。

石氏曰：北斗第一星曰正星，主阳主德，天子之相也。第

二曰法星，主阴主刑，女主之位也。第三曰令星，主福。第四曰伐星，主天理，伐无道。第五曰杀星，主中央，助四旁，杀有罪。第六星危星，主天仓五谷。第七曰部星，一曰应星，主兵。

《淮南鸿烈间诂》曰：斗杓为小岁，岁之言越历十二辰而行。正月建寅，月后左行，行十二辰，咸池为太岁。二月建卯，月徙右行，四仲终而复始，太岁迎者辱，顺者强，左者丧，右者昌。小岁东南即生，西北即煞，不可迎也，而可顺也，不可左也，而可右也，其此之谓也。又曰：北斗之神有雌雄，十一月建于子月，后一辰雄，左行，雌右行。五月合午谋刑，刑为煞，故荞麦死也。十一月合子谋德。德为生，问射于振末。

《诗含神务》曰：七政天斗上一星天位，二主地，三主火，四主水，五主土，六主木，七主金。

《春秋纬》曰：正星主营室、东壁、奎、娄，法星主胃、昂、毕、觜、参，令星主参、东井、鬼、主柳，伐星主七星、张翼、轸，煞星主角、亢、氏、房，危星主心、尾、箕，南斗部星主牵牛、须女、虚危。

石氏曰：北斗第一星主日，第二星主月，第三星主荧惑，第四星主辰星，第五星主填星，第六星主岁星，第七星主太白。

《黄帝占》曰：北斗第一星主秦，第二星主楚，第三星主梁，第四星主吴，第五星主赵，第六星主燕，第七星主齐。

《春秋纬》曰：北斗杓携龙角，孟康注《天文志》曰：携，连也。衡殷南斗，魁枕参首，用昏建者，杓华山以西南，孟康传曰：第七星法太白，杓斗之尾，为阴位，在西方，故主西南也。夜半建者，衡以殷中州河济之间，平旦建者，魁海岱以东北也。孟康传曰：斗魁第一星，法于日主齐，魁斗之首阳也，又用其在阴阳，与明德在东房，故主东北，齐也。

《春秋纬文曜钩》曰：华岐以北，龙门积石，西至三危之野，雍州属，魁星；太行以东，至碣石、王屋、砥柱，冀州属，璇星；三河雷泽，东至海岱以北，兖青之州属，玑星；蒙山以东至羽山，南至江，会稽、震泽，徐扬之州属，权星；大别以东，至云泽、九江、衡山，荆州属，衡星；荆山西南至岷山，北距鸟鼠，梁州属，阳星；外方熊耳以东，至泗水、陪尾，豫州属，杓星。

陆绩《浑图》曰：魁星第一星，主徐州，第二星主益州，第三星主冀州，第四星主荆州，第五星主兖州，第六星主扬州，第七星主豫州。

皇甫谧《年历》曰：斗者天枢也，天有七纪，故斗有七星。星间相去七度百二十分，曜各百里，周七千里，分得日月五星九州之地。自一至四曰魁，自五至七曰杓。一曰枢星，太白金主之，雍州属焉；二曰璇星，填星主之，冀州属焉；三曰玑星，荧惑主之，青兖州属焉；四曰权星，辰星主之，徐扬州属焉；五曰玉衡，岁星主之，荆州属焉；六曰开阳，日主之，梁州属焉；七曰摇光，月主之，豫州属焉。摇光一名杓，或曰招摇。以昏候之，左旋于天，月建一辰，昼夜一周，日月会焉，故孟春建寅，日月会于豕韦，仲春建卯，会于降娄，季春建辰，会于大梁，孟夏建巳，会于实沈，仲夏建午，会于鹑首，季夏建未，会于鹑火，孟秋建申，会于鹑尾，仲秋建酉，会于寿星，季秋建戌，会于大火，孟冬建亥，会于析木，仲冬建子，会于星纪，季冬建丑，会于玄枵。

《黄帝占》曰：北斗七星名曰七神，神各主四宿，而卫太一之宫。其星欲明大润泽相类，七政齐明，则天子吉，大臣昌；其星不明，王者弱，大臣有殃。星若摇动，不出百八十日，天下尽兵，多有死者。又占曰：北斗魁第一星为天道六甲，主五子，甲子、丙子、戊子、庚子、壬子。五子者气之始



也。魁星建除，主建万物，甲子木春始王，所以通达根茎，丙子火夏始王，所以通成花叶，戊子土，季夏始王，主万物肌肤，庚子金秋始王，煞万物，壬子水，冬始王，主含冻定根，故魁星为岁星，其位甲子。故天子不尊鬼神，幼稚多弱，则魁星不明，不明则岁星不光，不光则万物少稚不昌。天润不盈，魁星不泽，列地封虚，财而不赏。王道所后，及皆思其下纪也。

《黄帝占》曰：北斗第二星为地道六甲，主乙丑、乙亥、丁丑、丁亥、己丑、己亥、辛丑、辛亥，建除主除闭。物无不除，除陈发新，地道自虐，故天使万物皆得盛合宁。故第二星为太白，其位为后主诸侯。故天子教令显，数发土功，发坏没山林不受藏，则第二星不明，不明则太白无光，无光则名术士不昌，藩臣不忠，地泽不藏，藩臣多疾。

《黄帝占》曰：北斗第三星为人道，六甲主丙寅、甲戌、戊寅、丙戌、壬寅、庚戌、甲寅、壬戌，建除主满开天下。能承天理物，设上定下，夫妇升进而定家道，故第三星主荧惑百姓，不进为退过，则第三星不明，不明则即荧惑无光，无光则百姓罢死役，士多避过亡匿，智士退，贤人避。

《黄帝占》曰：北斗第四星为四时六甲，主丁卯、癸酉、己卯、乙酉、癸卯、己酉、乙卯、辛酉，建除主平四时。四者万物之节度数也。故第四星为辰星，其位为司徒，故天子出令教化不顺四时，春行秋政，夏行冬政，秋行春政，冬行夏政，四时不和不明，则辰星无光，无光则岁凋杀，五谷不盛，万物不昌，百姓夭丧，上下不相亲，司徒非其人。

《黄帝占》曰：北斗第五星为音德，六甲主戊辰、壬申、庚辰、甲申、壬辰、丙申、甲辰、戊申、丙辰、庚申，建除主定成。音者五气之和，五官之政，制乐之节，皆在于是，故第五星为填星，其为天子中宫，故天数更日历，损宗庙，历衣

服，远亲离疏，戮辱父兄，蕃臣以兵，上下相欺。

《黄帝占》曰：北斗第六星为法星，六甲主己巳、辛未、辛巳、癸未、癸巳、乙未、乙巳、己未，建除主执危。法律者，所以善善而恶恶也，故死者不可生，刑者不可息，故第六星为月，其位主天理。天子出令法苛刻，诛不正，威煞用刑，则第六星不明，不明则月不光，不光则执政不察，盗贼并起。

《黄帝占》曰：北斗第七星为部星，六甲庚午、壬午、丙午、戊午、甲午，建除主破收，主兵，主天四渎。渎者，江河淮济之水，故第七星主日，其位主司马。不敬诸神，江河淮济，则第七星不明，不明则日无光，则海水出流，煞百性，则其年有兵，司马将军而行，万民不昌，司马与士卒俱凶。

《河图》曰：玗四星纪日蚀，微玉衡三星纪天伦山崩。

《洛书》曰：开枢受微，逆天失度；提旋序微，地道失理；机耀渚微，人民冤结，政乖失常；权拾取微，江河涸竭，水失道；玉衡枢微，音节灾纪；开阳纪微，律历钟吕昧失理；摇光吐微，星辰政度失序。

《诗含神务》曰：七政星不明，各为其政不行。

《尚书璇玑铃》曰：北斗第一星变色，微赤不明，六日而日蚀。

《礼记斗威仪》曰：君乘土而王，其政太平，则宫室黄大，其余六星晖光四起。宫，北斗魁星也。

《春秋演孔图》曰：八政不中部，则王纲纪绝失常。

《春秋元命包》曰：衡之拨起，三公后妃恣，君如赘旒。

《春秋纬文曜钩》曰：王者失执偏任，臣下擅任，则衡拨胎柳失制。拨者阳星戾，戾则日蚀心消，江河为害，期九年，天子无威，王者舒濡，臣并为政，则衡匡移侧不停。匡者阴星进，进则山崩谷满，极星亡，日不见，期八年，中国无君王，天下大乱。王者贪恣，开利门，贾百姓，朝以货财为荣，无仁

义之廉，则玗星低。低者，枢机星下移，移则山跃参差，天投石，蝗虫为害，奎星息，期九年。主试天下无文法，兵官荣，王者不用仁义为政，则佞臣炽，哲人消，群奸之害，以圆为方，以欺为忠，朝廷闭塞，天下蔽塞，则杓仰。仰者，杓星上旬移而高，则山崩，龙群吟飞，火泉踊，慧入斗，辰守房，天库虚，狼狐张，期八年，五伯起，帝王亡，后党嬉，宋均曰：嬉，盛也。谗贼兴，群官之政以私害公，则魁星反而扰衡。

《春秋运斗枢》曰：王者承度行义，郊天事神不敬，废礼文，不从经图，则枢星不明，主病目舌若喉，此类见，主以逆天自恣，为三公名侯所谋。举土功，立州侯，失德逆时，害谋显恶，问仰左官，随意已虐符，则璇星不明，主鲜落若偏枯，近臣恣，将相谋，主以逆阴失符德义。少残百姓，家狱惨毒，吏巧邪暴，设变害舒，失民命，怀冤抑，则玗星不明，主病心腹若眩疽，太尉谋，主以逆人伦诛。符命到禁切愚，喜怒动失时，则横星不明，若主蹶，逆以无禁诛。远雅颂，若倡优奢政，伪度毁谗则嬉，则玉衡不明，主若痿蹶以迷或诛。德弊任过，官多尸禄，爵赏逆，符不修，斗度房表之枢。法令数更，以苛相杓，则开阳星不明，主若鬲疽以不聪明诛。废江淮不省，山渎之祠，州土之位不应天符，斩伐无度，坏山绝渠，威德四弱，外国远州，摇光不明，主若肿痂痔痛急失枢。

《孝经援神契》曰：王者德至于天，则斗极明。

《援神契》曰：天子不事礼名山，不敬鬼神，则斗第一星不明；数起土功，坏决山陵，逆地理，不从谏，则第二星不明；天子不爱百姓，则第三星不明；发号施令不从四时，则第四星不明；用乐声淫佚，则第五星不明；用大法深刻，则第六星不明；不省江河淮济之祠，则第七星不明。

《孝经内记》曰：两北斗夜见者，天子易后当起。

石氏曰：北斗第四星名照，明大动，天子兵强国安，其微

小，色若青黑，军破国亡。

石氏曰：七政星明者，其国昌；不明者，其国有殃。

石氏曰：北斗七星欲其明大润泽相类，不相类者治乱。又占曰：北斗一星亡，天下必有大事，若有大变。又占曰：正星有变，其宫有忧若死；法星有变，女主当之若死；令星有变，火官有忧若死；伐星有变，水官有忧若死；煞星有变，土官有忧若死；危星有变，水官有忧若死；部星有变，金官有忧若死。

甘氏曰：衡星分明，则法令从，微细则法令不行。衡星相疏，法令缓；相去数，法令急。又占曰：北斗自晕破军，北斗消，天下君臣相背。

巫咸曰：北斗星明，王者治。

郗萌曰：北斗杓为北高，主急事，驰马兵惊，常以春三月候。北斗魁第一星者曰应，星色赤，大赦，色白，有喜。

郗萌曰：北斗旁多星，则国家安。又占曰：北斗前移外，胡人北，移内，胡人南。

巫咸曰：王者逆道，则北斗不明。

《瑞应图》曰：王者孝行溢，则斗湔精者精光不陨也。

《荆州占》曰：北斗星盛动摇者，不出百日中，天下尽以兵革死。

《荆州占》曰：北斗中多小星者，民怨上，天下多讼法者。无星，二十日有赦。又占曰：北斗亡不相反，害必有伐主。

《荆州占》曰：北斗第一星不明，御史大夫非其人也；第二星不明，大司农非其人也；第三星不明，少府非其人也；第四星不明，光禄非其人也；第五星不明，鸿胪非其人也；第六星不明，廷尉非其人也；第七星不明，执金吾非其人也。

《荆州占》曰：北斗魁第一星主阳主德，天子之象也，万

国之始也，即有变，日应之，使其官有忧，若有死亡。正星色赤，有兵，不出月中；色白，为水。若扬光色赤，无利，春至夏马牛金石物贵，夏至秋黍麦贵，秋至冬粟黍麦鱼盐贵，冬至春新菜贵而余贱。

《荆州占》曰：北斗第二星主阴主刑而生万物，女主位也，即有变，月应之，无救，大人一子为忧，女主官当之者死。法星色赤，有兵，无救，期一岁若二岁，兵罢。色青三日，有兵，期三月若四月。色青不复，有暴疾之君。色青白，有白衣之会，期三月。色黄黑，更弊。色黑，有大水，期三年中，其有期三月中。色黑白，郭坏之，有暴雨若大风，期六月中。

《荆州占》曰：北斗第三星变色青黑，变更法令，天下不安。赤黄有兵。其变白，为一月而兵罢。又占曰：北斗第四星色青若赤，大臣有忧；黄，君有喜。又占曰：北斗第五星色青，米粟贵；赤，菽贵；赤黑，麦贵；白，禾黍贵；黑，余贱。

《荆州占》曰：北斗第六星色青，有离国；赤，有兵。又占曰：北斗第七星一名应星，主兵，即有忧，太白应之，金官有忧若死。色赤，死，有兵，期一岁，其春也有喜。色青，有移徙民。色黄，有君益地。色白，有忧。色黑，有水。

《文曜钩》曰：辅星匡危。孟康曰：在北斗第六星旁。

《春秋合诚图》曰：辅星主旋明。

《援神契》曰：辅星正，矫不平。

《荆州占》曰：辅星，丞相之象也。

《雒罪级》曰：辅星微，公宰弱，无良羽。

《春秋纬》曰：辅星小，天子佐消，七政毁，辅乃亡。

《春秋纬》曰：辅星明近，则辅臣亲厚；疏小，则辅臣弱无道。

郝萌曰：辅星明，则王者夹辅佐出。

郝萌曰：辅星远斗星五六寸，相不死出走。

《荆州占》曰：辅星近斗一寸二寸，臣欲迫胁主。又占曰：辅星不见，相死。又占曰：辅星北则黄瑞降，子孙蕃昌。又占曰：斗星明，辅星不明，主强臣弱。又占曰：辅星明，斗星不明，臣强主弱。又占曰：辅星大而明，主夺政。又占曰：辅星不明，相不死则免。又占曰：辅星欲小明，小明则相明。又占曰：辅星合斗星，十日兵起。又占曰：辅星明大与斗星合，兵起，臣强主弱。又占曰：斗辅星去，丞相去。

《孝经右秘》曰：大夫不信，斗辅亡。

郝萌曰：辅星入斗中，相系。

《荆州占》曰：辅星入斗中，辅臣有诛者。

《荆州占》曰：辅星生翌，天子惊，大将谋。

《春秋纬》曰：辅星生翌，不出三年，主诛，臣为王。又占曰：邪臣挟私擅国符，辅生翌。又占曰：九卿阿党，排挤正直，骄奢侈害，则江河溃决，斗辅生角。辅远阳，大臣无德，邦必立王。

石氏赞曰：北斗七星，禀授辅相，一本云辅养，一本云辅争，近臣见微意。

### 紫微垣星占五十九

石氏曰：紫微垣十五星，西蕃七，东蕃八。在北斗北，右星入轸十度，去极九十度半，在黄道内五十六度太。

《荆州占》曰：紫微宫，紫北也，宫中也，一名天营，一名长垣，又曰日旗。

《乐什图》曰：天宫，紫微宫也。

《春秋合诚图》曰：紫宫者，太一之常座。郝萌曰：太一之常舍也。

巫咸曰：紫宫者，天子之常居土宫也。

张衡《灵宪》曰：紫宫为皇极之居。

《春秋元命苞》曰：紫宫吐阳合阴。

《淮南天文间诂》曰：紫宫执斗而佐还，日行一度，以周于天日，冬至骏狼之山。骏狼之山，冬至所止也。日移一度，行百八十二度八分度之五，而夏至牛首之维。牛首之维，夏至之所至。反覆三百六十五度四分度之一，而成一岁。

《诗含神雾》曰：紫宫主出度。

《圣治符》曰：紫宫以戊子日候之，宫乱则荒，其君骄奢不听谏，奸佞在侧，紫宫和而正，则致凤凰颂声作。

石氏曰：紫宫之星均皆明，大小有常。

郗萌曰：紫宫星不盛，即土耗亡妻子。又占曰：紫宫旗直者，天子出，自将兵。紫宫开，兵起。

《荆州占》曰：紫宫星盛即吉昌，内辅强。

石氏赞曰：紫微宫中十五星，备蕃臣。

### 北极钩陈星占六十

石氏曰：北极五星，钩陈六星，皆在紫微宫中。钩陈六星入东壁八度太，去极十一度半，在黄道内八十四度。

《黄帝占》曰：北极者，一名天极，一名北辰。《论语》曰：譬如北辰，众星拱共，谓北极也。紫宫，天圣主也，三公也，在北斗前。北极纽星，天之枢也，天运无辍而旋星不移也。

《黄帝占》曰：天枢，天一坐也。

吴龚《天官星占》曰：北辰者一名天，一名西秋。

《春秋纬》曰：北极星其一明大者，太一之光，含元气，以斗。布常开，命运节，序神明，流精生一，以立黄帝。

《春秋纬》曰：道起于元一为贵，故太一为北极天帝位。

司马迁《天官书》曰：天极星，其一星太一常居也，旁三

星三公，或曰子属。

《广雅》曰：北辰曰曜魄。

《黄帝占》曰：北极，太一之座也，第一星主月，太子也。谓第一星者，最赤明者也。

《黄帝占》曰：极星盛，人君吉昌；不明，人君耗。

《礼纬》曰：天子正珪瑁，则北辰列齐。

《春秋纬》曰：北极主出度。又占曰：极星亡，期八年，中国无君王，天下大乱。

《春秋纬运斗枢》曰：王者承度行义，郊天事神不敬，废礼文，不从经图，则枢星不明。

《孝经纬》曰：德至天，则斗星极明，甘露下。

石氏曰：北极星明大，数动摇，主好出游。色青微灭，皆凶。

《荆州占》曰：北极出斗，去地三丈，大星独居无位出，天下大乱易姓，人相食。又占曰：北极中央星不明，去疏，主不用事。左星不明，太子有忧；右星不明，庶子有忧。

《荆州占》曰：天枢大端指心，小端指参，故用兵者顺行皆天枢，则左青龙，右白虎，前朱雀，后玄武。苍龙白虎朱雀七星，玄武虚危。

《乐什图》曰：钩陈，后宫也。

《合诚图》曰：钩陈，大帝之正妃也，大帝之常居也。

巫咸曰：钩陈，天子护陈将军，水宫也。

郗萌曰：钩陈者，后宫也。

司马迁《天宫书》曰：后勾四星末，大星正妃，馀三星，后宫之属。

《荆州占》曰：钩陈，天子大司马。又占曰：钩陈者，黄龙之位也。

《荆州占》曰：钩陈四守，太一之所妃也。



《黄帝占》曰：钩陈四守星盛，人君吉昌；不明盛，人君耗。

石氏曰：钩陈星欲其光明耀美，天子左右强；若细色黑，左右弱。

郝萌曰：钩陈星盛，天子之辅强；小微即辅弱。又占曰：钩陈星去不见，女主恶之。

《荆州占》曰：主不用谏，佞人在位，则钩陈星不明。

石氏赞曰：北极五星最为尊，钩陈大星配辅臣。

### 天一星占六十一

石氏曰：天一星在紫宫门外右星南，与紫宫门右星同度。南星入轸十度，去极十度半，在黄道内七十四度半。

韩杨曰：天一星名曰北斗，主其星明则王者治，不明者王道逆，则斗主不明，七政之星应而变色。

《黄帝占》曰：天一星，地道也，欲其小有光，则阴阳和，万物成。天一星大而明盛，水旱不调，五谷不成，天下大饿，人民流亡，去其乡。

《黄帝占》曰：天一星明泽光润，则天子吉。

石氏曰：天一星欲明而有光，则阴阳和，万物成。又占曰：天一星亡，则天下乱，大人去。

《荆州占》曰：天一之星盛，人君吉昌。

石氏赞曰：天一太一，主承神也。

### 太一星占六十二

石氏曰：太一一星，在天一星南相近。入轸十度，去极十度，在黄道内七十四度半也。

祖暅占曰：太一，赤天帝神也，主使十六神，知风雨水旱兵革饥馑疾疫灾害所在之国。

石氏曰：天一星明，吉；不明，不吉。

《合诚图》曰：太一离其位而乘斗后，九十日兵必起。

《荆州占》曰：太一星失其位，在天子有所之未反。又占曰：太一之居左丈而右武后极，而前行四帝方，旁众神为辅，文武不明，辅乃不强。

## 卷六十八 石氏外官

### 库楼占一

石氏曰：库楼十星、五柱十五星，衡四星，凡二十九星，左角南。西北星入轸少，去极百四十度，在黄道外二十一度太。库楼一曰天库，兵车之府也。其大六星，库也，西四星，楼也，旁十五星，三三而聚者，柱也，中央小星，衡也。

巫咸曰：天库，金官也。

《春秋元命苞》曰：天库主陈兵。

《黄帝占》曰：五车外库者，芒角明大，星多蕃众，则兵大起，车骑多用。库楼所指者，兵所指者，兵所往，人能知，库楼者，使人不忘。

《洛书》曰：库楼兵动，害及胡，一曰戎马惊。

《洛书》曰：库无星，下土臣逆谋，兵乃生。

《春秋纬》曰：天库虚，诸侯谋反。一曰中州谋兵四合。

《春秋考异邮》曰：王者谋伐四夷，则库兵动。又占曰：库楼五柱皆动，五将尽行。五柱生角若芒，多众及具，无处车马。

石氏曰：库楼及五柱皆不见，兵车尽出，天子自将兵。

焦延寿曰：天楼星上近柱，王者楼殿有飞，不知其处，若有天火烧之者。

郗萌曰：天库主远兵，星摇者其将行，星皆动，将尽行。

郗萌曰：天库星众则藏善，散若皆去则兵起。

石氏赞曰：库楼之官兵所藏，其中欲实恶虚空。

### 南门星占二

石氏曰：南门二星，在库楼南。右星入轸十四度，去极百三十度，在黄道外二十一度太。

《春秋纬》曰：角南两大星曰南门。南门，天之外门也。

《黄帝占》曰：南门星欲明，执法吉，人主昌吉；星若不明，非其故，则臣不忠，若有兵起，王者忧。

石氏曰：南门中有小星三芒者，则兵车出。

石氏赞曰：南门二星主守兵。

### 平星占三

石氏曰：平星二星，在库楼北。西星入轸十四度，去极百度，在黄道外十一度太也。

《春秋合诚图》曰：平星主廷平。

《论讖》曰：平星主法。

《黄帝占》曰：平星欲其明而正直，大小齐同而明，君臣和，政令行；其星不明，差戾不正，君臣不和，政法荒乱。

石氏曰：平星欲齐等，广狭有常，高下不差，则天下治，万物成。

石氏赞曰：平星执法正纪纲，其星差戾政乱荒。

郗萌曰：平星主天下之狱事，若今廷尉之象。

### 骑官星占四

石氏曰：骑官二十七星，在垣南。西行北星入亢四度太，去极百一十五度半，在黄道外十九度半也。

石氏曰：骑官一名轻能，星众天下安，星少骑士畔。骑官者，今虎贲也。

石氏曰：房南众星曰骑官将军。骑官主宿卫，一曰骑官金官也。

《黄帝占》曰：骑官者，宿卫帝宫，以防不虞。其星常众而明，王者后宫吉，天下安；其星微少若芒不见，守卫忧，兵大起，骑乘出。

《荆州占》曰：骑官星众则骑出。一曰星无故皆去，则骑官东守卫王。

### 积卒星占五

石氏曰：积卒十二星，在房心南。西星入氐十三度太，去极百二十四度少，在黄道外二十一度少也。

石氏曰：积卒一名卫士，芒角动，聚兵事。一曰积卒兵官，金官也。

郗萌曰：积卒者，士也，积士也者，所以卫卒暴。

巫咸曰：积卒兵官，金官也。

《黄帝占》曰：积卒主守卫明堂，其星欲微小而明，则天子吉，其国安昌；若明大动摇，则君臣不宁，朝廷有兵。一曰积卒主守卫。

《春秋合诚图》曰：积卒主卫尉。

石氏曰：积卒一星亡，兵少半出；二星亡，兵大半出；三星亡，兵尽出。

《海中占》曰：积卒不如其故，兵，其微细若不见，兵车尽出，士卒满野。

石氏赞曰：积卒十二星归明堂。

## 龟星占六

石氏曰：龟五星，在尾南。头星入尾十二度，去极百三十一度，在黄道外二十一度。

《黄帝占》曰：龟星一名连珠，赞神明。其星明，则君臣和好，奉祀神明岳渎；其星不明，则上下乖离，臣逆于君，不事鬼神，其国不安，主有忧。

《黄帝占》曰：龟星不居汉中，川有易者。

石氏曰：龟星常居汉中吉，星明君臣和，不明即乖。又占曰：龟星常居汉中，则阴阳和，雨泽时；星若不居汉中，有易水。一曰天下水旱，物不成。

石氏赞曰：龟星在东赞神明。

## 傅说星占七

石氏曰：傅说一星，在尾后。入尾十二度太，去极百二十度半，在黄道外十三度太。

《黄帝占》曰：傅说星主后宫，祈神明，保子孙，文章祝说以求福庆。其星明则后宫吉，子孙昌；其星不明或若不见，则后宫人多疾，子孙凶，多有死者。

《春秋元命苞》曰：傅说主祸章，巫官也。章，请号之声也。傅说盖女巫也，主王后之内祭祀，以祈子孙，广求胤嗣。

石氏曰：傅说星亡，社稷无主。

石氏曰：傅说星明大则吉，不明者，天下多祷祠。

焦延寿曰：傅说星入尾，天下有祝诅人主者，若有巫医之害，以入日占国。

郗萌曰：傅说星光明，王命与，辅佐出。

《荆州占》曰：傅说星明大，王者多子孙。一曰傅说主祸章。

## 鱼星占八

石氏曰：鱼一星，在尾后河中。入尾十四度，去极百二十二度，在黄道外十二度也。

《黄帝占》曰：鱼星一名据星，一名蒙星，忽然不明而在，则鱼多，星亡则鱼少。

黄帝占曰：鱼星主云旗，其星忽然不明，如云常居汉中，微而不明，则阴阳和，风雨时，其星明而动摇，则阴阳不调，雨泽不时，有大水。

《春秋元命苞》曰：鱼星主云旗，统阴事，调和云雨之期。

《黄帝占》曰：鱼星常居河旁，中河而处，则兵起，期七月，常在河东近箕。

石氏曰：鱼星大而明，则阴阳和。又曰：鱼星动摇，则水暴出。又曰：鱼星出河，大鱼死。一曰旱。

《海中占》曰：鱼星中河而居而明大，天下大水，津道塞。若微小，出河中外，天下大旱，五谷不成。

焦延寿曰：鱼星明则河海水皆出。

班固《五行志》曰：鱼星中河而处，车骑满野。

石氏赞曰：汉中鱼星知云行。

## 杵星占九

石氏曰：杵三星，在箕南。北星入箕一度太，去极百三十二度半，在黄道外二十一度太。

巫咸曰：杵白，土官也。

《黄帝占》曰：杵星明而动，天下有兵，杵白用事，军粮急；其星微小，天下安宁而无兵。

石氏曰：天杵白动，则民失其釜甑，大去其乡。杵纵则民

足食，横则民饥。

石氏曰：天杵白星不具，民卖釜鬲。

甘氏曰：杵白星明，则天下安，五谷成，杵白用，其年丰。星若不明，岁大恶，五谷不成，杵白不用。一曰杵在箕南，给庖春。

### 鳖星占十

石氏曰：鳖十四星，在南斗。右星入南斗一度，去极百二十九度半，在黄道外十四度也。

《黄帝占》曰：鳖星常居汉中，微而不明，则天下和，雨泽时；其星若不居汉中，则阴阳不和，天下旱。

石氏曰：鳖一星去，有白衣之会；二星去，有大丧，以去日占国。

班固《天文志》曰：鳖星不居汉中，有易川者。

石氏赞曰：鳖星为水虫太阴也。

### 九坎星占十一

石氏曰：九坎九星，在牵牛南。西南星入斗十四度半，去极百三十六度，在黄道外十九度太。

巫咸曰：九坎，水官也。

《荆州占》曰：九坎九星，主水旱之事。

《黄帝占》曰：九坎主通水泉，星明则阴阳调和，百川通流，皆注于海；星若不明，百泉不通，河海枯竭，天下大旱，人民饥馑，国有忧。

石氏曰：微吉，明不吉。

石氏赞曰：九坎九星水泉通。

## 败臼星占十二

石氏曰：败臼四星，在虚危南。西南星入须女十度，去极百三十一度少，在黄道十九度。

《荆州占》曰：败臼四星，主正治之事。

《黄帝占》曰：败臼主殃凶，其星微而不明，温温然，则主者吉，人民安；星明而动摇者，人主有忧疾，多灾凶，人民愁苦，天下不安，多死丧。

石氏曰：败臼一星不具，民卖釜甑，去其处。一曰败臼四星主凶灾。

## 羽林星占十三

石氏曰：羽林四十五星，垒壁阵十二星，凡五十七星，在营室南。四星入危四度太，去极百二十度太，在黄道外十三度太也。

郝萌曰：羽林一名材官，一名天南库，一名单于军，又主翬王。

《春秋合诚图》曰：危南有众星曰羽林，为天军。又羽林军，水官也。

《元命苞》曰：羽林主军骑。

《黄帝占》曰：羽林星三三而居，行列相随，守卫之官也。其星实而众明，王者吉，其国安；星希而不明若动，兵士出；星若亡不见，天下兵尽出。

郝萌曰：羽林星不欲动，动即有兵，不出六十日兵车发，有所之而起。又曰：不出三十日有兵。又曰：羽林中无星，天下兵尽出。一曰大将军发，若大赦。

《春秋元命苞》曰：垒城在军位。

郝萌曰：垒城钺，主斩矛。又曰：阵星备武急，非其故，兵起，有破军杀将。



石氏赞曰：羽林众星主翼王。

石氏赞曰：垒壁阵十二星，为营壅。

### 北落星占十四

石氏曰：北落一星，在羽林西南。入危九度，去极百三十度太，在黄道外二十三度半。

郗萌曰：羽林西南有大赤星，状如大角，天军之门也，名曰北落，一名师门。北者，宿在北也；落者，天军之北落也；师者，众也，门者，军门也。

《春秋合诚图》曰：北落主非常。

《黄帝占》曰：北落师门星明大，士卒昌，大将军强；星微小若亡不见，天下兵，大将出行，其国不宁，主有忧。

《春秋元命苞》曰：北落角者兵起。

《文曜钩》曰：北落亡角有军。

石氏赞曰：北落师门一星主候兵。

### 土司空星占十五

石氏曰：土司空一星，在奎南。入壁七度太，去极百二十度少，在黄道外二十四度少也。

《春秋合诚图》曰：司空主土城。

石氏曰：土司空星大，天下安。又曰：色黄明则吉。一曰知祸殃。

《黄帝占》曰：土司空星明而黄润，则天下安吉，王者吉；其星不明若亡不见，其国有丧，若土功之事，若有旱灾。

### 天仓星占十六

石氏曰：天仓六星，在娄南。南星入奎四度太，去极百二十度，在黄道外十八度。

郗萌曰：天仓者，天司农也。

《黄帝占》曰：天仓，主仓府之藏也。天仓中星众，谷粟聚其中，积储实其中；星希少，仓中虚耗无储，积粟散出。

石氏曰：天仓户开，则岁大熟，粟聚；仓户闭，岁谷不登，天下民饥。

《黄帝占》曰：天下有兵，而仓库之户俱开，主人胜客，客事不成，期二十日发。

石氏曰：天仓中星小众盛，则粟聚岁实，星希，岁耗，谷散仓，则天下乱，若大饥。

郗萌曰：天仓星不具，道不通。

《黄帝占》曰：天仓不见，其所临军分绝仓，大穷而亡。

### 天囷星占十七

石氏曰：天囷十三星，在胃南。东北入胃六度少，去极九十六度半，在黄道外十四度少。

《黄帝占》曰：天囷主御粮，百库之藏也。在野曰囷，在邑曰仓，一曰圆曰囷，方曰仓。囷星欲明，其中星众，百库之藏实满；其星不明，囷中星简，库藏空虚，若多散出，天下不安，其国有忧。

石氏曰：天囷星明则吉，微则凶。

郗萌曰：天囷见即天下囷仓实，不见即皆虚。

石氏曰：天囷十三星，给衒粮者也。

### 天廩星占十八

石氏曰：天廩四星，在昴南。南星入胃十一度少，去极九十九度，在黄道外九度太。

《春秋合诚图》曰：天廩主廩仓。

巫咸曰：天廩一名天庾，主廩藏会计之事。其星齐明，则

年丰国饶，人民安，王者吉；其星小而不明，岁恶藏虚，人民饥。一曰臣受君禄。

《黄帝占》曰：天廩星欲其明而盈实，则岁熟多粟；星黑而希，则岁败腐矣。

### 天苑星占十九

石氏曰：天苑十六星，在昴毕南。东北星入毕二度太，去极百十四度，在黄道外四十八度少。

巫咸曰：天苑，金官也。

郗萌曰：天苑，天子之苑也。

石氏曰：天苑，天囷也，主马牛羊，非其故，若星不具，有斩死吏。

《黄帝占》曰：天苑主苑牧牺牲牛羊之属，其星行列齐明，苑中星众，则畜牲蕃息，多饶野兽；其星微小不明若不见，苑中星希败，畜牧不孽，牛羊野多死。

郗萌曰：天苑星非其故若不具，有斩刈之事。

石氏赞曰：天苑十六星主牛羊。

### 参旗星占二十

石氏曰：参旗九星，在参西，一名天弓。南星入毕九度半，去极九十三度，在黄道外十三度半也。

郗萌曰：天弓九星不具，天下大赦。为兵赦，非无故自赦也。一名参旗，一曰天府。

《春秋纬》曰：参旗在参西勾曲，九星三处，一曰天旗，二曰天苑，三曰九游，以宣威明开绪。

巫咸曰：天弓，金官也。

《春秋纬》曰：天旗司五星之变，日月过之，荧惑守日蚀星，天下乱。

郗萌曰：天弓主司兵弩之事，其星动摇，有以迷惑主者。

《黄帝占》曰：参旗星不欲明，微小而直，王者安，天下无兵，明而曲，状如张弓，天下不宁，兵大起，人民忧。

《礼含文嘉》曰：王者制度有科，物应以宜，则参旗弓行。宋均注曰：弓行者，参旗星行列纡曲似弓也。

《易纬》曰：旗星明振，主自消，诸侯乱。

《礼纬》曰：天子至卿士，旗旒中礼，制度有科，则参旗弓行，政齐均平。

石氏曰：参旗不明吉，明有白衣会。一曰边寇动，兵起，弓弩射士发。

石氏曰：参旗九星不欲张。

### 玉井星占二十一

石氏曰：玉井四星，在参左足下。西南星入毕十二度少，去极百二十度太，在黄道外五十度少也。

巫咸曰：玉井，水官。

《春秋纬》曰：玉井主军敌。

《论讖》曰：玉井主粥厨。

《黄帝占》曰：玉井星微小如其故，则阴阳和，雨泽时，五谷成，天下安；其星明而动摇，有大水，五谷不成，人民大饥，国不宁。

郗萌曰：玉井动摇，有水，不出二年。

石氏赞曰：玉井四星主水浆。

### 屏星占二十二

石氏曰：屏星，在玉井南。北星入觜太，去极百一十八度，在黄道外四十六度太。

《春秋纬》曰：天屏主上疾。

石氏曰：天屏星不具，人多疾。

石氏赞曰：屏星在南为屏风。

### 厕星占二十三

石氏曰：厕四星，在屏东。西北星入参三度少，去极一百一十五度，在黄道外四十四度半。

郗萌曰：厕星主观天下疾病。

《黄帝占》曰：天厕星欲黄赤，黄赤而明，吉，苍黑凶。

石氏曰：厕星不具，贵人多病。一曰天，一曰陷厕。

石氏曰：厕星青黑，主有腰下之疾。黄吉，白凶，黑死，皆为贵人。又曰：黄泽者岁熟。

《玉历》曰：厕星欲温温然明润泽，则王者无疾病，出入不时，星若微小不见，人主带病腹肠之疾，若人民多疫。

石氏赞曰：厕星在东名自彰。

### 天矢星占二十四

石氏曰：天矢一星，在厕南。入参七度，去极百二十三度，在黄道外五十三度也。

石氏曰：天矢星主候吉凶。色黄即吉，青白黑凶。

《黄帝占》曰：天矢星明，万物有命。

《黄帝占》曰：天矢星微，万物流星不具，多疾死，星亡，万民大瘠。又占曰：常以春秋分候。矢星明黄而润泽，则天下人民无疾病，王者安；其星不明，色青黑，天下人民有腰肠之病，其国饥，人民饿死。

《黄帝占》曰：天矢色黄，为贵人吉，青白为贵人疾，黑贵人死，期三年。

石氏曰：秋分候天矢星亡，万民大乱。

《荆州占》曰：天矢星亡，万民多死。

石氏赞曰：矢星在南色欲黄。

### 军市星占二十五

石氏曰：军市星，在参东南。西星入井三度少，去极百十度，在黄道外三十一度。

石氏曰：军市十三星，水官也。

石氏曰：军市星众，则军有馀粮，星少即军饥。

巫咸曰：军市，水官也。

### 野鸡星占二十六

石氏曰：野鸡一星，在军市中。入井八度，去极百一十一度，在黄道外四十二度太。

《黄帝占》曰：野鸡，大将也，主屯营军之号令，警急设备。其星明大，则主将猛，士卒强；其星不明，主将弱，兵士离散。

石氏曰：野鸡安静吉，芒角凶。

《荆州占》曰：野鸡，野将也，主兵。又占曰：野鸡出市，天下有兵，诸侯相攻。

石氏赞曰：野鸡一星主野邦。

### 狼星占二十七

石氏曰：狼一星，在参东南。入井十三度，去极百六度太，在黄道外四十二度少也。

《黄帝占》曰：狼星一名夷将，其星色欲黄白，无光芒，不动摇，天下宁，兵不起，其星色赤而大，光芒四张，动摇变色，天下乱，大兵起，盗贼起于道路，人主不安，百姓忧苦。

《荆州占》曰：狼星，秦南夷也，名曰候，一名天纪，一曰天陵。狼者贼盗，弧者天弓，备盗贼也，故弧射狼。矢端直

者，狼不敢动摇，则无盗贼而兵不起。动摇明大，多芒变色，不如常，胡兵大讨。

《纪历枢》曰：狼星为野将。

宋均曰：狼星为羊角。

郑玄曰：狼星主羊。狼在于未，未为羊也。

巫咸曰：狼星盛，兵弩贵，小，兵弩贱，金官也。

《黄帝占》曰：狼星盛，兵弩贵，小兵弩贱。

《元命苞》曰：狼星变色，盗贼萌。

石氏曰：狼星色赤而光明，芒角长大，天下兵起，将军有死者，期二年。

巫咸曰：狼星易其处，不如其故，天下饥，兵士满野，其国凶荒，期不出年。

郗萌曰：狼星白芒，百徒聚天下。又占曰：狼星躁走，为人主不静，不居其宫，驰骋天下。

《荆州占》曰：狼星芒角多，多盗贼，芒角少，少盗贼。

《荆州占》曰：狼星非其故，人相食。

石氏赞曰：狼星在参东南有常，芒角变动为忧兵。

## 弧星占二十八

石氏曰：弧九星，在狼东南。西星入井十六度，去极百二十二度少，在黄道外五十二度半也。

石氏曰：弧星者，天弓也，以备贼盗。狼星为奸寇，弧星为司其非，其矢常欲直，狼则不敢动，天下安宁，无兵起。若矢不直，弧其不张，天下多盗贼，兵大起，国不宁。

《黄帝占》曰：弧星主弓矢之府，以备非常。其星大而齐明，其色黄润，则四方安静，天下无兵，其星色变，不如其常，天下皆兵，弓矢大贵，人主不安。

《荆州占》曰：弧星主武官。弧张，迎战者不胜；弧动，

先用兵吉，后者凶。

《黄帝占》曰：狼旗七星屈曲者，夷狄弱，可攻。

《洛书》曰：狼弧张，害及胡。

《尚书纬》曰：黑帝亡也，狼弧张。

《春秋纬》曰：狼弧张，四年之后天下永乱。

焦延寿曰：天弓张，天下尽兵，主与臣相谋。

郗萌曰：有兵，若弧星张，先起兵者利，后起兵者不利。

《荆州占》曰：弧星青黑，有大忧。

《荆州占》曰：弧矢动摇，明大多芒，变色不如常者，多盗贼，胡兵起。

石氏赞曰：弧在东南，阴谋张也。

### 老人星占二十九

石氏曰：老人星，在弧南。入井于九度，去极百三十三度半，在黄道外七十五度太。

《黄帝占》曰：老人星，一名寿星，色黄明大而见，则主寿昌，老者康，天下安宁；其星微小若不见，主不康，老者不强，有兵起。

郗萌曰：老人，南极星也，立秋二十五日晨见丙午之间。以秋分见南方，春分而没，出于丙，入于丁。

巫咸曰：老人星，木官也。

《春秋元命苞》曰：直弧比地。晋灼注《天官书》曰：比地，近地也。有一大星曰南极老人，见则主安，不见则兵革起。常以秋分候之南郊以庆，主令天下。

《春秋纬》曰：老人星见则治平主寿，老人星亡则君危若世夭。

《春秋文耀钩》曰：王者安静，则老人星见。

《春秋运斗枢》曰：王政和平，则老人星临其国，万国



寿。

石氏曰：老人星明，主寿昌，天下多贤士。又占曰：老人星色欲黄润，王者老人吉；其色青，主有忧，老人疾。色若黑白，主有老人多死，各以五色占吉凶。

孙氏《瑞应图》曰：王者承天，则老人星临其国。

### 稷星占三十

石氏曰：稷五星，在七星南。西星入柳十四度少，去极百四十八度，在黄道外六十八度少也。

祖暅曰：上稷，农正也，稷者，稷也，取乎百谷之长以为长也。

《黄帝占》曰：稷星主五谷丰耗，其星温温而明，岁大熟，五谷成；其星不明若亡不见，岁不熟，天下饥荒，人民流亡去其乡。

石氏曰：稷星不见，岁饥也。

石氏赞曰：稷在张南时报功。

## 卷六十九 甘氏中官占五

### 天皇大帝占一

甘氏曰：天皇大帝一星，在钩陈口中。

《黄帝占》曰：天皇大帝名耀魄宝，主天女象下出命符。

《河图雒书》云：以授夫子，立五礼。

《春秋纬》曰：大帝紫宫，不言不动摇，以斗运度推精，使五帝修名号。

《元命苞》曰：帝位明达，羽翮秀良，则光大，色度和同，天下太平，国号中央。宋均曰：帝，大帝之精也，皇大帝之

星。

甘氏赞曰：天皇大帝，秉万神图。

### 四辅星占二

甘氏曰：四辅四星，抱北极枢。

郗萌曰：四辅去，君臣失礼，辅臣有诛者。

甘氏赞曰：四辅机权，北极枢也。

### 华盖星占三

甘氏曰：华盖七星，杠九星，凡十六度，在大帝上。

《荆州占》曰：正上柱盖者名曰杠星，次盖大星者母也，其中央者身也。母星下二寸者，妻子也。若此星有变，各有所主灾也。母星下有二寸有小星，不当见，见即有急，太子不得代立，若有异姓欲立，近期一年，中期二年，远期三年而起，天下烦乱，五谷大贵，田宅无价。

甘氏赞曰：华盖张光，掩翳帝杠，玄撩周杠，摇植距跌。

### 五帝内座占四

甘氏曰：五帝内座五星，在华盖下。

甘氏赞曰：内座设席。

### 六甲星占五

甘氏曰：六甲六星，在华盖杠傍。

《春秋纬》曰：六甲中为辅，包罗物类，为神户。六甲所以纪阳，阳而纪时，故在杠旁，以布政授民。

甘氏赞曰：六甲中候，出入有须。

## 天柱星占六

甘氏曰：天柱五星，在紫微宫中，近东垣。

甘氏赞曰：天柱立政，朔望悬书。天柱立政教悬图法之所也，常以朔望施禁令于柱，以示百僚。

## 柱下史占七

甘氏曰：柱下史一星，在北极东北。

甘氏赞曰：柱下史记过，密移东厨。厨书藏也。

## 女史星占八

甘氏曰：女史一星，在柱下史北。女史，妇人微者也，主传漏也。

甘氏赞曰：女史传漏动记时。

## 尚书星占九

甘氏曰：尚书五星，在紫微宫门内东南维。

甘氏赞曰：尚书纳言，夙夜咨谋。

## 阴德占十

甘氏曰：阴德二星，在尚书西。

《文耀钩》曰：紫微宫前列直，斗口三星随北端锐，若见若不见，曰阴德，为天一刚。《天官书》《天文志》并云三星。或曰天一。案图簿志，二星。

《运斗枢》曰：阴德主正经。

《春秋纬》曰：阴德动，臣主争伐相谋。

《运斗枢》曰：阴德浮，近臣恣，庶雄谋，天子咸并相谋。宋均曰：浮犹见也。阴德星帝微，今著明也。

焦延寿曰：阴德星明，太子伐主，若有女主治天下者。

《赫连图》曰：阴德灭，圣人即纪。

甘氏赞曰：阴德惟惠，周民赉抚。

### 天床占十一

甘氏曰：天床六星，在紫微宫门外。

甘氏赞曰：天床寝舍，解息燕休。

### 天理星占十二

甘氏曰：天理四星，在北斗魁口中。

《乐纬》曰：天理，贵人之牢也。

《合诚图》曰：天理主司三公。

巫咸曰：北斗魁中天理，主贵者，水官也。

《援神契》曰：天理敕修纪中情。

甘氏赞曰：天理执平，首鞠魁头。

### 内厨星占十三

甘氏曰：内厨二星，在紫微宫西南角外，大宫之内，饮食厨也。

甘氏赞曰：内厨优宴，房诵说虞。

### 内阶星占十四

甘氏曰：内阶六星，在文昌北。

《合诚图》曰：内阶星主明堂。宋均曰：阶星，内阶也。

甘氏赞曰：内阶朱户，显宠念虑。

### 天厨星占十五

甘氏曰：天厨六星，在紫微宫东北维外。

甘氏赞曰：天厨咸饌，百宰若疏。

### 策星占十六

甘氏曰：策一星，在王良前。

巫咸曰：策星，天子兵马，金官。案《豫章列士传》曰：周胜字叔达，南昌人，为侍御史。桓帝当南郊，平明应出，胜仰观曰：主御者策星，今宫车出，必策马星悉不动，明必不出。至四更星子卒，遂止也。

郗萌曰：策星主天子之仆御。

甘氏赞曰：策执御右，螣蛇先驱。

### 传舍星占十七

甘氏曰：传舍九星，在华盖上，近河傍舍，宾客之馆舍也。

巫咸曰：传舍，水官也。

焦延寿曰：传舍星入紫微宫垣间，胡人来；入汉宫，害上，若胡兵大起。

甘氏赞曰：传舍止客。

### 造父星占十八

甘氏曰：造父五星，在传舍南河中。

郗萌曰：造父一名西桥，一名司马，星御道仆。

《黄帝占》曰：造父星移处，兵起，车骑满野，马贵。又曰：造父亡，马大贵。

甘氏赞曰：造父洗马，轡勒御镳。

### 车府星占十九

甘氏曰：车府七星，在天津东近河傍。车府，主车官也。

甘氏赞曰：车府撰御。

### 人星占二十

甘氏曰：人星五星，在车府东南。一曰卧星，主治万民。

《元命苞》曰：卧星主夜行，一度齐记以防淫。

巫咸曰：人星，土官也。

焦延寿曰：人星不具，王者有子不成而死；星尽不见，有人传相惊以诏事，若有诈伪诏者。又曰：妇人大乱，后大兵起。又曰：卧星立，则天子明死民。

甘氏赞曰：人星优游，乃尔宁诸。

### 内杵星占二十一

甘氏曰：内杵三星，在人星傍。

### 臼星占二十二

甘氏曰：臼四星，近人星东南。

《论语讖》曰：杵臼七星主给庖。

郝萌曰：杵臼主军粮食。

《黄帝占》曰：天杵臼星不具，民卖其釜甑，去其处。

郝萌曰：天臼之星众则岁乐，星疏则岁饥。又曰：杵臼离，黎民饥。

陈卓曰：杵臼星不具，民失杵臼。

甘氏赞曰：杵臼充春，主给养厨。

### 扶筐星占二十三

甘氏曰：扶筐七星，在天津北。

《元命苞》曰：扶筐主藏，盖量入知息耗。

郝萌曰：扶筐主将作事。

焦延寿曰：扶筐近织女，若不正，皆为天下府藏空开。  
甘氏赞曰：扶筐采叶，翊养玄羞。

### 司命星占二十四

甘氏曰：司命二星，在虚北。  
《诗纬》曰：司命执刑行罚。  
《元命苞》曰：司命举过，灭除不祥。  
甘氏曰：司命继嗣移正朔。  
郝萌曰：司命主百鬼。又曰：司命与舆鬼司候。

### 司禄星占二十五

甘氏曰：司禄二星，在司命北。又曰：司禄增年延德。

### 司危星占二十六

甘氏曰：司危二星，在司禄北。又曰：司危骄逸亡下。

### 司非星占二十七

甘氏曰：司非二星，在司危北。又曰：司非以祛多私。  
甘氏赞曰：四司续功，桑麻襄陆。

### 败瓜星占二十八

甘氏曰：败瓜五星，在匏瓜傍。  
甘氏赞曰：败瓜熟烂，遗种畜殖。

### 河鼓左旗星占二十九

甘氏曰：河鼓左旗九星，在河鼓傍。  
甘氏赞曰：左旗幽谷，阻险隐逃。

## 天鸡星占三十

甘氏曰：天鸡二星，在狗国北。

《合诚图》曰：天鸡主候时。

《荆州占》曰：天鸡非其故，多大水，不通。

甘氏赞曰：鸡鸣司旦，审夜察时。

## 罗堰星占三十一

甘氏曰：罗堰三星，在牵牛东。

郝萌曰：罗堰主起居。

甘氏赞曰：罗堰紫壅，激内注渠。

## 市楼星占三十二

甘氏曰：市楼六星，在市中临箕上。又曰：楼星监市，斗食嗇夫。

《合诚图》曰：天楼主市贾。

郝萌曰：市楼，天子市府也。

《援神契》曰：市楼星动，即贾殊。

甘氏曰：市楼星不见，政乱。

焦延寿曰：市楼星不见，兵作于市，若胡人来，入汉市，以兵相害。

郝萌曰：市楼星阳为金钱，阴为珠玉，星有不备者，天子币大乱。又曰：市楼星，天珠玉金钱府也，欲其忽然不明，明则赋敛众。

石氏曰：市楼亡，天下易政。

甘氏赞曰：律度制令遍市楼。



### 斛星占三十三

甘氏曰：斛四星，在市中斗南。

《论语讖》曰：天斛星主量则。

甘氏赞曰：斗斛称量，尺寸分铢。

### 日星占三十四

甘氏曰：日一星，在房中道前。

甘氏赞曰：日诏德令，耀生飞鸟也。

### 天乳星占三十五

甘氏曰：天乳一星，在氐北。

甘氏赞曰：天乳甘露，醴酪充饴。

### 亢池星占三十六

甘氏曰：亢池六星，在亢池北。亢，舟船也；池，水也。亢池犹度水也。

《黄帝占》曰：亢池一名代津，一名亢星。亢星，巨星之两端也。亢池败，天下不通。

焦延寿曰：亢池不居亢度中，则庙有大怪。以主司日见，则主命终。

郝萌曰：亢池主水道，其星微细则凶，其坏败宗庙。

甘氏赞曰：亢池不居，移徙之家。

### 渐台星占三十七

甘氏曰：渐台四星，属织女东足。四方高曰台，下有水曰渐，主暑漏律吕之事。

甘氏赞曰：渐台守漏暑吹灰。

### 辇道星占三十八

甘氏曰：辇道五星，属织女西足。

甘氏赞曰：辇道逍遥，优游私行。

### 三公星占三十九

甘氏曰：三公三星，在北斗柄南。三公若今之太尉曰司徒司空也。

石氏曰：三公星，天子辅臣也，其星欲大，明黄润泽，有德令。其星赤，皆有兵，苍白黑，有急丧。

《黄帝占》曰：三公一星去，天下危；二星去，天下乱；三星去，天下不治。

甘氏赞曰：三公宣德，奉均匡衡。

### 周鼎星占四十

甘氏曰：周鼎三星，在摄提西。

《春秋纬》曰：天鼎主流亡。宋均曰：天鼎，周鼎也。

甘氏赞曰：周鼎酒樽，二簋缶壶。

### 帝席星占四十一

甘氏曰：帝席三星，在大角北。

石氏曰：帝席不欲明，明则大臣外其心，期三年。

甘氏赞曰：帝席设座，宴旅酢酬。

### 天田星占四十二

甘氏曰：天田二星，在右角北。

甘氏赞曰：天田处界，县邑正邪。

### 天门星占四十三

甘氏曰：天门二星，在左角南。

甘氏赞曰：天门待客，应对无疑。

### 平道星占四十四

甘氏曰：平道二星，在左右角间。平道，主治道之官也。

甘氏赞曰：平道除道，途辙宣输。

### 进贤星占四十五

甘氏曰：进贤一星，在平道西。

甘氏曰：进贤，卿相举逸命才。

甘氏赞曰：进贤乡里庠序选。

### 谒者星占四十六

甘氏曰：谒者一星，在左执法北，主赞谒之官也。

### 三公内座星占四十七

甘氏曰：三公内座三星，在谒者东北，朝会宴私之所也。

### 九卿内座星占四十八

甘氏曰：九卿内座三星，在三公北。

甘氏赞曰：三公九卿，赞谒者诸侯。

### 内五诸侯星四十九

甘氏曰：内五诸侯五星，在九卿西。又曰：五诸侯卫国，故列在帝庭。

《河图》曰：五诸侯主刺奸。

《礼纬》曰：辟雍之礼，得穆穆皇皇和服，则太微诸侯明也。

### 太子星占五十

甘氏曰：太子一星，在帝座北。

### 从官星占五十一

甘氏曰：从官一星，在太子西北。从官，侍卫之臣也。

甘氏赞曰：从官常陈，五署列居。

### 幸臣占五十二

甘氏曰：幸臣一星，在帝座东北。

甘氏赞曰：太子幸臣，侍座后聚。

### 明堂星占五十三

甘氏曰：明堂三星，在太微西南角外。

甘氏赞曰：明堂显化，常尽孝慈。

### 灵台星占五十四

甘氏曰：灵台三星，在明堂西，观候之所也。

甘氏赞曰：灵台考符，居南密微。

### 势星占五十五

甘氏曰：势四星，在太阳守北。

甘氏赞曰：势不专事，相命御之。势者官也，谓刑馀之人不可专事，助宣王命而已。

## 内平星占五十六

甘氏曰：内平四星，在中台南。

甘氏赞曰：内平近决，谏请礼书。内平近执法之官，有疑则准案礼律。

## 燿星占五十七

甘氏曰：燿四星，在轩辕尾南柳北。

巫咸曰：燿，土宫也。

甘氏赞曰：燿举烽表，远期沉浮。燿，烽火惊急以火相告，日行万里。

## 酒旗星占五十八

甘氏曰：酒旗三星，在轩辕右角。酒，酒官也。旗，旗官也。

《元命苞》曰：酒旗主上尊，大帝运枢，阴阳满陈，列宿成德，五星布恩，神明和合，四节并宣，历纪齐得，诸灵合欢，故设酒旗以人侑神。

焦延寿曰：酒旗不具，天下有燕大丧，以酒亡。

甘氏赞曰：酒旗燕会，情意欢娱。

## 天樽星占五十九

甘氏曰：天樽三星，在东北井。

甘氏赞曰：天樽愍民，怜育幼孤。天樽主盛饷粥以给贫病也。

## 诸王星占六十

甘氏曰：诸王六星，在五车南。

《元命苞》曰：诸王星主存亡。

郗萌曰：诸王主朝会。

《元命苞》曰：王星明则下附从。宋均曰：不明，下倍畔也。

甘氏赞曰：王星督察，诸侯存亡。

### 司怪星占六十一

甘氏曰：司怪四星，在钺前。司怪主占候灾祥者也。

《洛书》曰：司怪集得失。又曰：司怪主人揆灵出微。

焦延寿曰：司怪星不行，宫中有大怪，若天下多怪物。

甘氏赞曰：司怪诰咎，国无灾殃。

### 座旗星占六十二

甘氏曰：座旗九星，在司怪东北。

甘氏赞曰：座旗，旗表别异，殊居以旗。表则君臣之安位也。

### 天高星占六十三

甘氏曰：天高四星，在参旗西近毕。

《合诚图》曰：天高主斋戒之门。

焦延寿曰：天高星近井钺，大臣斩，不乃高为下，下为高。

甘氏赞曰：天高阙远，九层望楼。

### 砺星占六十四

甘氏曰：砺石四星，在五车西。

甘氏赞曰：砺石砥刃，百工淬治。

## 八谷星占六十五

甘氏曰：八谷八星，在五车北。八谷谓稻、黍、稷、大麦、小麦、大豆、小豆、麻子也。

巫咸曰：八谷星，主土官也。

郗萌曰：八谷主候岁。

石氏曰：八谷一星不具，则一谷不成；三星已上不具，以食为害。

甘氏赞曰：八谷平衡，聚集王都。谓谷粟皆归集于王都也。

## 天谗星占六十六

甘氏曰：天谗一星，在卷舌中。

石氏曰：天谗星明大，则谗佞害民善，天下二心，诸侯专权诬欺。

甘氏赞曰：卷舌唾水，谗主天医。

## 积水星占六十七

甘氏曰：积水一星，在天船中。

石氏曰：积水星明，则水大出，船行人道，必有沦邑者；星动摇而行上，舟船摩天。

甘氏赞曰：天船布罔，积水候灾。

## 积尸星占六十八

甘氏曰：积尸一星，在大陵中。

石氏曰：大陵中有朽骨，故大陵中有积尸。若其星明大者，有大丧，死人如丘山。

甘氏赞曰：大陵表墓，积尸随居。

## 左更星占六十九

甘氏曰：左更五星，在娑东。左更，山虞之官，主川泽林藪竹林菜蔬之属也。

郗萌曰：左更主仁之道。

黄帝曰：左更星不具，天下道不通。

焦延寿曰：左更星不动摇，王者以出，必道亡；其动者，以出吉。

甘氏赞曰：左更采薪，菟园采茹。

## 右更星占七十

甘氏曰：右更五星，在娑西。右更，主牧养牛马之官也。

郗萌曰：右更主礼义。

《黄帝占》曰：右更星不具，天下道不通。

焦延寿曰：左更不动，右更独动，王者私出；左右俱动，王者千万官出。

甘氏赞曰：右更仆畜孕重犊驹也。

## 军南门星占七十一

甘氏曰：军南门一星，在天将军西南，大将军之南门也。

甘氏赞曰：军门营垒，禁攻御暴。

## 天潢星占七十二

甘氏曰：天潢五星，在五车中。

《合诚图》曰：天潢主河梁，所以渡神人，通四方。

《礼纬》曰：潢星明，天子寿昌，万民无疾疫灾殃。

甘氏赞曰：天潢济渡，渐池濯高。



### 咸池星占七十三

甘氏曰：咸池三星，在天潢西北。

黄帝曰：咸池一名黄龙，一名五潢。注云：《天官书》曰：咸池星曰天五潢，一名天津，一名潢池，一名天井，一名天渊。丰际太阴，阴者苍龙之舍也，五帝之车也。

《乐叶图》曰：咸池五车，天关也。宋均曰：五车，咸池别名也。

《春秋纬》曰：咸池天潢，五帝车舍。

《淮南子》曰：咸池者，水鱼之囿也。

郝萌曰：咸池者，天子名池也。

《合诚图》曰：咸池主五谷。

焦延寿曰：咸池星明大，则有龙堕死者，不乃虎狼为人害，若大兵起。

郝萌曰：咸池者，五车中星也，非其故，国旱。

郝萌曰：咸池不足，津河道不通。又曰：五潢欲其黄泽明也。

甘氏赞曰：咸池陂泽，鸛鸡雁鸟。

### 月星占七十四

甘氏曰：月一星，在卯东，主女主大臣之象也。

甘氏赞曰：月明刑度，光生蟾蜍。

### 天街星占七十五

甘氏曰：天街二星，在昴毕间，近月东。

巫咸曰：天街，水官也。

《春秋图》曰：天街主伺候。

石氏曰：天街阴阳之所分，中国之境界，昴以西属外国，

毕以东属中国也。

石氏曰：天街者，日月五星出入之道也。

甘氏赞曰：天街保塞，孔途道衢。

### 天阿星占七十六

甘氏曰：天阿一星，在昴西，偏高曰阿，亦曜候之处，以察山林之妖也。

甘氏赞曰：天阿察近，岑蔚西隅。

## 卷七十 甘氏外官

### 青丘星占一

甘氏曰：青丘七星，在轸东南。青丘，南方蛮夷之国号也。

《荆州占》曰：青丘星非常动摇，大官有事。

甘氏赞曰：南夷蛮貊，大赫青丘。

### 折威占二

甘氏曰：折威七星，在亢南。折威者，狱卒也。

石氏曰：折威者，天子执法之徒也。

郗萌曰：折威星不居积卒间，胡兵大兴，中国大伤，边将死。

甘氏赞曰：将威断狱，弃诸市都。

### 阵车占三

甘氏赞曰：阵车三星，在氐南。阵车犹革车也。

### 骑阵将军占四

甘氏曰：骑阵将军一星，在骑官中东端。骑阵将军，将军骑将之行阵也。

### 车骑星占五

甘氏曰：车骑三星，在骑官南。

巫咸曰：车骑，金官也。

甘氏赞曰：阵车骑部行。

### 糠星占六

甘氏曰：糠一星，在箕舌前。

甘氏赞曰：箕主簸扬，糠给大猪。

### 农丈人星占七

甘氏曰：农丈人一星，在南斗西南。农丈人，老农也。

郗萌曰：农丈人主岁丰耗。在箕东，岁大熟；在箕西，饥；在箕南，小旱，穰；在箕北，大穰。

甘氏赞曰：先农丈人，执斗与箕。

### 狗星占八

甘氏曰：狗二星，在南斗魁前。

《荆州占》曰：狗星不如常，戒御之臣当之。

甘氏赞曰：狗主守内，夹门伏跽。

### 狗国星占九

《荆州》曰：狗国四星，在建星东南。

黄帝曰：狗国星不具，天下有大盗。

甘氏赞曰：狗国鲜卑，乌丸沃沮。

### 天田星占十

甘氏曰：天田九星，在牵牛南。

郗萌曰：天田如井干状，在营室南。

甘氏赞曰：天田本农，耕器犁锄。

### 哭星占十一

甘氏曰：哭二星，在虚南。

### 泣星占十二

甘氏曰：泣二星，在哭星东。

甘氏赞曰：哭泣悲凉，坟墓倚庐。

### 盖屋星占十二

甘氏曰：盖屋二星，在危南。主盖治之官也。

甘氏赞曰：危盖屋室，柱梁侏儒。

### 八魁星占十四

甘氏曰：八魁九星，在北落东南。

甘氏赞曰：八魁陷井，栈门扬翘。八魁主张捕陷阱设机也，机覆阱也，揭翘为毒炆，使人无践也。

### 雷电网占十五

甘氏曰：雷电六星，在营室西南。

甘氏赞曰：雷电震音，殷殷动摇。

## 云雨星占十六

甘氏曰：云雨四星，在霹雳南。

甘氏赞曰：云雨兴和，休祁茂孽。兴，发也，和，善也，休亦善也。祁，雨盛貌，孽，草木蕃茂也。

## 霹雳星占十七

甘氏曰：霹雳五星，在土公西南。

甘氏赞曰：霹雳奋击摔。拽、拖、投也。

## 土公星占十八

甘氏曰：土公二星，在东壁南。

《论语谶》曰：土公主豫储。

## 土公吏星占十九

郗萌曰：土公吏，主司过度。

甘氏曰：土公吏二星，在营室西南，一曰土公，司屏廐设储。

## 铁钺星占二十

甘氏曰：铁钺五星，在天仓西南。

甘氏赞曰：铁钺剡钩石有饶。铁，斧也，钺，槌也，主新彘以饴牛马。四石为钩，言新剡丰饶盈钩石也。

## 天濶星占二十二

甘氏曰：天濶七星，在屏南。

甘氏赞曰：天濶伏作，杼厕粪丘。天濶，厕也。

## 外屏星占二十二

甘氏曰：外屏七星，在奎南。外屏所以障天濶也。

甘氏赞曰：屏蔽拥幃，安濶莫睹。

## 天庾星占二十三

甘氏曰：天庾三星，在天仓东南。屋积曰仓，露积曰庾。

甘氏赞曰：天庾积谷，草茂身拊。

## 刍藁星占二十四

甘氏曰：刍藁六星，在天苑西。

郝萌曰：刍藁一曰天积。天积，天子之藏府也。

《黄帝占》曰：天积中星盛，则百库之藏存，中星无，百库之藏散出。

郝萌曰：刍藁星见，刍藁贱，不即刍藁贵。又曰：天积中星繁，则岁丰穰，民乃安宁；星希则货财散出。

甘氏赞曰：刍藁甸服，纳铨总输。生草曰刍，禾稗曰藁，故《禹贡》曰：百里赋纳总，二百里纳铨。川藁曰总，刈穗曰铨，谓甸服入之以供牛马之食也。

## 天园星占二十五

甘氏曰：天园十三星，在天苑南。

郝萌曰：天园中小勾曲星明，果熟，苑马牛羊皆善。又曰：天苑南，牛马枥也，其中小星，枥槽也，不见者，牛马羊多死伤者。

甘氏赞曰：天园草宝，菜茹蓄储。生曰菜，熟曰蓄，茹，储卑薪也。

## 九州殊口星占二十六

甘氏曰：九州殊口九星，在天节下。

《黄帝占》曰：九州殊口，一名勾风，凡九星，在参间，常以十月十一月候。若一星不具，其国凶；三星已上不具，兵起，天下乱。

巫咸曰：九州，外官也。

郗萌曰：九州殊口主聚议。

甘氏赞曰：九州殊口重译辞。九州殊口，能晓方言之官，九州言语不同，要荒蛮夷，重译乃通也。

## 天节星占二十七

石氏曰：天节八星，在毕附耳南。

甘氏曰：天节小而明，节使忠直；其不明若不见，奉使无威敬。

甘氏赞曰：天节奉使，专对无疑。天节以给使命灵威德于四海。

## 九游星占二十八

甘氏曰：九游九星，在玉井西南。

郗萌曰：九游一名苑游，在参西九星。

石氏曰：九游一名司曲，一名天旗，主司五星之过。

《元命苞》曰：九游统九州别邦。

石氏曰：九游光芒盛，兵起。

《元命苞》曰：九游星明大，则其位多大人，微则小人临州。

甘氏赞曰：九游威旗，色盛兵兴。

## 军井星占二十九

甘氏曰：军井四星，在屏东南。

《荆州占》曰：天井如轮曲，与狼星俱，主水旱。

甘氏赞曰：军井给水，师用不竭。

## 水府星占三十

甘氏曰：水府四星，在东井南。

巫咸曰：水府，水官也。

甘氏赞曰：水府堤防，开道激满。

## 四渎星占三十一

甘氏曰：四渎四星，在东井南轸东。四渎者，江河淮济之精也。

甘氏赞曰：四渎受输，涤源注海。

## 阙丘星占三十二

甘氏曰：阙丘二星，在南河南。

《元命苞》曰：阙丘主灭除之官，毁疏明恩，以帝五常。

宋均曰：阙丘主阙坠丘之官也，毁疏过于王历，则迁之于礼，更立近，明恩情所在诸星也。

甘氏赞曰：阙丘双塾，外屏累戩。阙丘门外象魏也，天子谓之阙，诸侯谓之两观，丘，高也，塾门西高堂也，天子外屏累戩，在宫门外，诸侯内屏累戩，在宫门内，所以别尊卑也。

## 天狗星占三十三

甘氏曰：天狗七星，在狼东北。

《元命苞》曰：天狗主守贼。



郝萌曰：天狗非其故，天下有大盗。

甘氏赞曰：野狗响吠，雌雄咸噪。

### 丈人星占三十四

石氏曰：丈人二星，在军市西南。

### 子星占三十五

甘氏曰：子二星，在丈人东。

### 孙星占三十六

甘氏曰：孙二星，在子星东。

甘氏赞曰：丈人杖行，子孙扶持。

### 天社星占三十七

甘氏曰：天社六星，在弧南。昔共工子田内龙，能平水土，其精为星，故祀以为社也。

希萌曰：天公社者小人，天公祠祀非私所事也，所祠者公社主也。

甘氏赞曰：老人天社，理落祷祀。

### 天纪星占三十八

甘氏曰：天纪一星，在外厨南。天纪主知禽兽年齿，凡所烹宰，不杀孕，不夭幼，以致繁盛，故处外厨之门也。

甘氏赞曰：纪别少齿，胎夭不屠。

### 外厨星占三十九

甘氏曰：外厨六星，在柳南。

甘氏赞曰：外厨烹伦，鸡羊犬猪。

## 天庙星占四十

甘氏曰：天庙十四星，在张南。天子之祖庙也。

《黄帝占》曰：天庙星均明则吉，微细则凶，又曰：星非其故，有凶忧，若白衣之会。又曰：有兵，军食不通。

郗萌曰：天庙星大，色黄润，则吉；苍白为忧，青黑，忧在宫中。

《荆州占》曰：天庙星非其故，有庙残之事，吏不去则死。

甘氏赞曰：天庙祭祀，示民不息。

## 东瓯星占四十一

甘氏曰：东瓯五星，在翼南。东瓯，东越也，今永嘉之永宁县是也。谓东瓯星兼主此地也。

甘氏赞曰：康居穿骨，越裳东瓯。

## 器府星占四十二

甘氏曰：器府三十二星，在轸南。器府，乐器之府。

甘氏赞曰：器府掌故，管弦丝竹。

## 巫咸中外官

### 太尊星占一

巫咸曰：太尊一星，在中台北。

巫咸赞曰：太尊一星，职比圣人。

### 三公星占二

巫咸曰：三公在北斗魁第一星西。

黄帝曰：三公一星去，天下危；二星去，天下乱；三星去，天下不治。

巫咸赞曰：三公星七政齐同。三公犹今三公也。和阴阳，齐七政也。

### 大理星占三

巫咸曰：大理二星，在紫宫门左星内，大理者，平狱之官也。

巫咸赞曰：大理奏事，南门左阓。

### 女御星占四

巫咸曰：女御四星，在钩陈星后北，女御为八十一御妻之象也。

巫咸赞曰：女御礼仪，威容步趋。

### 天相星占五

巫咸曰：天相三星，在七星大星北。

石氏曰：天相者，天丞相也，主服彩色文章。

巫咸赞曰：天相爵服，彩色显光。

### 长垣星占六

巫咸曰：长垣四星，在少微西南北列。

郝萌曰：长垣在七星北，南星亦在太微西六七尺。

《合诚图》曰：长垣主界域。

巫咸赞曰：长垣四星，城邑相包。

### 虎贲星占七

巫咸曰：虎贲一星，在下台南。虎贲士，以虎皮为冠，示威

猛也。

巫咸赞曰：虎贲四骑室旄头。

### 军门星占八

巫咸曰：军门二星，在青丘西，天子六军之门也。

《荆州占》曰：军门非其故，军道不通。

巫咸赞曰：军门营候，虎尾威旗。

### 土司空星占九

巫咸曰：土司空四星，在军门南。

《合诚图》曰：土司空主土城。

石氏曰：土司空四星，近青丘司空、水土司察者，星黄润则吉。

巫咸赞曰：土司空主界域族神土羹。

### 阳门星占十

巫咸曰：阳门二星，在库楼东北。

巫咸赞曰：阳门戍远，剑戟盾矛。

### 顿顽星占十一

巫咸曰：顿顽二星，在折威东南。顿顽，亦狱官也，所以与折威相近。

巫咸赞曰：顿顽捕制，察伺狱囚。

### 从官星占十二

巫咸曰：从官二星，在房星南。

巫咸赞曰：从官二星，主疾病。

### 天辐星占十三

巫咸曰：天辐二星，在房距西星。天辐，宰乘輿之官也。

《元命苞》曰：天辐主言祠事，气有离合，设祷谢。宋均曰：离，星相远也，合，星相近。

焦延寿曰：天辐近尾吉，远尾，天下有为害者。

巫咸赞曰：天辐陈驾，被轩鸾旗。

### 键闭星占十四

巫咸曰：键闭一星，在房东北。键闭主钥关门之官。《天官书》：铃北一星牵前。《天文志》曰：常也。

《荆州占》曰：键闭星明则道大昌，不明则暗乱，宫门不禁，津梁隔绝。

巫咸赞曰：键闭司察，心腹口喉。

### 罚星占十五

巫咸曰：罚三星，在东威西南北列。

巫咸赞曰：罚星受金，罚贱市租。

### 列肆星占十六

巫咸曰：列肆二星，在天市中斛西北。列肆，列店也，贩鬻金玉珠珍，故在市南。

巫咸赞曰：列肆货贩，金玉玃珠。

### 车肆星占十七

巫咸曰：车肆二星，在天市门左星内。

巫咸赞曰：车肆二星，百贾肆区。车肆者，列车服之贾，百品随类区别也。

## 帛度星占十八

帛度二星，在宗星东北。

巫咸赞曰：帛度卖买，与平者俱。

## 屠肆星占十九

巫咸曰：屠肆二星，在帛度北。

巫咸赞曰：屠肆烹熬，盛饌宾娱，楼星监市，斗食毒夫。

屠宰之肆以供待宾客相娱乐。

## 奚仲星占二十

巫咸曰：奚仲四星，如衡状，在天津北。

巫咸赞曰：奚仲弥轮，路铃优綯。奚仲，车正也，铃在轼前，优綯，覆铃者也。

## 钩星占二十一

巫咸曰：钩九星如钩状，在造父北。

《礼含文嘉》曰：王者赐命诸侯皆如其德，则阴阳和，风雨时，其九为钩曲直。宋均曰：天之九星主珍异，令赐诸侯，亦所以显异之也，应于主珍之星，故为之曲，有直者也。

《荆州占》曰：钩星非其故，地动。

巫咸赞曰：钩星戒道，传路宣舆。

## 天桴星占二十二

巫咸曰：天桴四星，在河鼓左旗端南北列。

《黄帝占》曰：天桴者，一名奚仲星，在河鼓东，天桴前，近河鼓则鼓用。又曰：天桴动，桴鼓用。

石氏曰：天桴星明，军鼓鸣。

《荆州占》曰：天桴星不明，度数改，漏刻失时。

巫咸赞曰：天桴应度，节漏省时。天桴，鼓槌也。谓应漏刻时节也。

### 天钺星占二十三

巫咸曰：天钺八星，在南斗南杓第二星西。天钺，殒钺也。

巫咸赞曰：天钺祀记，稽问莫疑。

### 天渊星占二十四

巫咸曰：天渊十星，在鳖东南九坎间，一名天渊，一名天海，主灌溉之官。

《广雅》曰：天渊辘路寝。

巫咸赞曰：天渊灌溉，盈满渊区。

### 齐星占二十五

齐一星，在九坎东。

### 赵星占二十六

赵二星，在齐西北。

### 郑星占二十七

郑一星，在赵东北。

### 越星占二十八

越一星，在郑西北。

### 周星占二十九

周二星，在越东北。

### 秦星占三十

秦二星，在周东南。

### 代星占三十一

代二星，在秦东南。

### 晋星占三十二

晋一星，在代西南。

### 韩星占三十三

韩一星，在晋

### 魏星占三十四

魏一星，在韩，近

### 三十五

楚一星，在魏西北，近郑星。

### 燕星占三十六

燕一星，在楚东南，近晋星。

巫咸曰：齐赵诸国，应天列宿，土地九州，其星有变，各为其国。

### 离瑜星占三十七

巫咸曰：离瑜三星，在代东南北列。离，袿衣也，瑜，玉饰，此妇人服也。

巫咸赞曰：离瑜玩饰，并见舅姑。



### 天垒城星占三十八

巫咸曰：天垒城十三星如贯索状，在哭泣南。

巫咸赞曰：天垒主北夷、丁零、匈奴。

### 虚梁星占三十九

巫咸曰：虚梁四星，在危南。虚梁，国陵也，非人所处，故曰虚梁也。

巫咸赞曰：虚梁宫室，屋室谨祷。

### 天钱星占四十

巫咸曰：天钱十星，在北落西北。

巫咸赞曰：天钱藏府，聚众谈夸。

### 天纲星占四十一

巫咸曰：天纲一星，在北落西南。天纲，大纆索也，以张帐幔。天子游猎野次所须。

巫咸赞曰：天纲武帐，官府置卫。

### 铁钺星占四十二

巫咸曰：铁钺三星，在八魁西北，一曰铁钺。

《元命苞》曰：铁钺主乱行，斩诛枉诈。

郝萌曰：星欲不明，明若动，皆为铁钺用。又曰：铁钺非其故，兵起，铁钺用。

《荆州占》曰：星非其故，兵将有忧。

巫咸赞曰：铁钺拒难，斩伐奸谋。

### 天厩星占四十三

巫咸曰：天厩十星，在东壁北，近王良。

《合诚图》曰：天厩官主传舍。

巫咸曰：天厩星非其故，有庙戒之事，人主以马为忧，否则马疾。

巫咸赞曰：天厩置驿，逐漏驰骛。天厩主马，如今驿马，其行急疾，与晷漏竞也。

### 天阴星占四十四

巫咸曰：天阴五星，在毕柄西。

巫咸赞曰：天阴羽猎，附耳密谋。

## 卷七十一 流星占一

### 流星名状一

河图曰：诸流星，皆钩陈之精，天一之御也。

流星大如缶若瓮，行绝迹，名曰飞星。其迹著天，名曰流星。

孟康曰：流星，光相连也，大如瓜桃，名曰使星，飞星主谋事。流星主兵事，使星主行事，以所出入宿占之。自上而降曰流，自下而升曰飞。

《尔雅》曰：奔星谓之彗约。流星大而疾曰奔。

郭璞曰：彗而约，流星别名也。

石氏曰：流星如缶瓮，初直后白，其前分为雨，是为使星，所之国受福。

《帝览嬉》曰：流星夜见，光望之有尾离离如贯珠，名曰

天狗，从所下，兵大起，王者徙都邑，期三年。

巫咸曰：流星有光见面坠地，若不至地，望之有足，名曰天狗，所往之乡有战流血，其君失地，期不出三年灾应。又曰：大流星堕破如金散，而有音声，野雉尽响，名曰天狗，其所之地必有战流血。

班固《天文志》曰：流星有声止地类狗堕，望如火光，炎炎中天。

《天官书》曰：冲天其下圜照数顷处，上锐有黄色，名曰天狗，见则兵起千里，破军杀将。一曰状如大镜。

《玄冥占》曰：流星夜见，头足如奋火，名曰天狗，其所下有兵起，必有战期二年。

《黄帝占》曰：流星大如瓮，头大尾小，长可三四尺，其后形迹皎皎然，赤白色，名曰天棊，见则其国兵起流血，有死将，期一年，远三年。

《雒书》曰：飞星大如缶瓮，而行绝迹，色如烟火堕，名曰天保，此星所往者，其分受福有利，若有吉事，期不出年。

《文耀钩》曰：流星有光，夜见墙垣而有声者，野鸡尽响，名天保，所止之野大兵起。

《荆州占》曰：流星有光黄白，从天堕，有音如炬烟火下地，鸡昼鸣，名天保也，所坠国安，有喜若水。

石氏曰：流星如缶瓮，其后纍纍白亘天，王者吏均封疆。

《荆州占》曰：将军均封疆。

《海中占》曰：流星有声如雷，其音止地，野鸡尽响，名曰天鼓，其所止国兵大起，必有战，僵尸满野，期三年。

巫咸曰：流星有光青赤，其长二三丈，名曰天雁，将军之精也，其国起兵，将军当从星所之。

《荆州占》曰：流星其色青，名曰地雁，其所坠者起兵。

《圣谕符》曰：流星大如瓮，其光赤黑有喙者，名曰顿

顽，见则其国有兵，有失地君，期二年。

《荆州占》曰：飞星大如缶若瓮，后皎然白，前卑后高，此谓顿顽，其所从者多死亡削邑而不战。

《圣治符》曰：飞星如瓮。

《荆州占》曰：大而赤若瓮，后皎然白，长可一丈。

《荆州占》云：长数丈，其星灭，化为云，周流天下，名曰浩滑。

《荆州占》曰：名曰大滑。

《海中占》曰：名曰否颠，见则其国必有大战，流血积骨，期一年，远二年。

齐伯曰：飞星如瓮。

《荆州占》曰：如缶若瓮，其后皎然白，前卑后高，名曰浩亢。

《荆州占》云：名曰降石，摇头，乍上乍下，大饥，人相食。

《荆州占》曰：人食不足，期三年。

《荆州占》曰：飞星大如缶若瓮，兵皎然白，星灭后白者曲环如车轮，此谓解衔，其国人相斩，为爵禄，此谓自相啮食。

《荆州占》曰：流星大如缶，其光赤黑有喙者，名曰梁星，其所坠之乡有兵，君失地。

《太公阴秘》曰：凡出军击贼，见大流星所指向者，将之用兵顺之行则胜。又曰：流星下入军，营必空，主将无功，避之则吉。

《推度灾》曰：奔星所坠，其下有兵。

《文耀钩》曰：流星前如缶盆，后皎然白，其欲入时施施如金散，此谓使星，其所入宿受福，期一年，远二年。

《春秋纬》曰：大奔星，有声望之如火光，见则破军，四

方相射。案《续汉书》曰：灵帝中平二年，边章韩遂将数万骑寇三辅。五月夜，有流星如火光，长十余丈，照章遂营中，驴马尽鸣。贼以为不祥，欲走。董卓闻之喜，明日并兵俱攻，大破之，斩首数千级，章遂败走。《魏志》曰：司马宣王围公孙文懿，夜有大流星长数十丈，从首山东北堕襄平城东南，及文懿走，当流星处斩之。又近验前代，边将败绩，多有奔星坠其营中。

石氏曰：流星落落如遗大光，其下有战伤。又曰：赤流星其后圆如轮，所之国兵，其将有他意。

甘氏曰：流星色黄，其后如一疋帛练，所之国增地有喜，期一百八十日。

班固《天文志》曰：汉孝昭始元中，流星下燕万载宫极东去。李奇曰：极，屋梁也，三辅间名为极。或曰极，栋也，寻栋东去也。廷驾谓之堂前栏檐也。法曰国恐有诛，其后左将军与长公主燕刺王谋作乱，咸伏其罪。

《荆州占》曰：大流星赤光照地，流而东，吴越部兵，一书云齐地部兵。流而南，楚宋部兵，流而西，秦郑部兵，流而北，燕赵部兵。案《宋天文志》曰：晋孝怀永嘉元年九月辛卯，有大流星自西南流于东北，小者如斗相随，天尽赤，声如雷。是年五月，汲桑杀东燕王胜，遂据河北，十一月始遣和都为征北将军，镇邺西，田甄等大破汲桑，斩于乐陵，于是以甄为汉郡太守，弟兰巨鹿太守。小星相随，小将副帅之象也。司马越忿魏郡以东平原以南皆党于桑，悉以赏甄等，于是侵掠桑地，有声如雷，忿怒之象也。

《荆州占》曰：流星耀然有光，色白长竟天者，人主之星也。星之所往，人主从之，人主不从，即将军若相从之。星如瓮者，为发谋起事；大如桃者，为使事也。

《荆州占》曰：流星之尾长二三丈，耀然有光竟天，其色白者，主使也，其色赤者，将军使也。案司马彪《天文志》曰：光武中元二年十月戊子，大流星从西南东北行，如雷。是时使中郎将窦

固、杨虚侯马武、杨乡侯王赏将兵征西羌。《宋天文志》曰：晋海西公太和四年十月壬申，大流星下有声如雷，明年，遣使免袁真为庶人。桓温征寿春，真病死，息瑾代之，求救于苻坚，温破坚军。六年，寿春城陷如雷，将士怒之象也。

《荆州占》曰：小流星从敌军上来，徐至吾军上而入，有间谍者，且来间吾军。又流星前赤后青黑者，客军败死。又流星夜见光尾长如厚布，色苍白，为使，亦有兵黑死丧。又流星甚大，其光照地，色青赤，流四旁，若有赤光，人饥，五谷不藏。又无风云，有流星见，久食间乃入，为大风，发屋折木。

《玉历》曰：流星出都邑中，王者有忧，欲去都邑，及有叛者，期不出二年。

《宋书志》曰：蜀后主建兴二年，诸葛亮帅大众伐魏，屯于渭南，有长星赤而芒角，自东北西南投亮营，三投再还，往大还小，占曰：两军相当。有大流星东走军上及坠军中者，皆破败之徵也。九月，亮卒于军，焚营而退，群师交恶，多相诛戮。

宋幽川王《幽明录》曰：陈郡袁真在豫州送妓女阿薛、阿郭、阿马三人与桓宣武，至经时，二人共出庭前观，望见一流星直坠盆水中，薛郭二人更以瓢酌取，皆不得，阿马最后，取星正入瓢中，便饮之，即觉有妊，遂生桓玄。

### 流星四面交行二

《考异邮》曰：陪臣专行，请谒至尊，众星数流，主命凶。

《海中占》曰：流星纷纷，交行耀目，人君自贵，视臣如草土，臣欲有离散之象也，期不出二年。

班固《天文志》曰：孝昭元平元年二月，有大流星如月，众星随而西行。大如月，大臣之象也，众星随之，众人皆随从

大臣之象也。此大臣欲行权以安社稷。其四月，昌邑王贺行淫僻，立二十七日，大将军霍光白皇太后废贺。

韦昭《洞记》曰：四月癸未，昭帝崩。

司马彪《天文志》曰：流星百数，四面行者，废人移徙之象。案《宋天文志》曰：宋明帝太始二年三月乙未，有流星大小西行，不可胜数，至晓乃息。占曰：人流之象。其年淮北四州地彭城兖州并为虜所没，人流之象。

《黄帝占》曰：大流星出行，众星纷纷从之而流，期不出三年，王者徙都邑，去其宫殿。又曰：星数流者，天下不安，急使络驿之象也。

石氏曰：流星纷纷交行，移时不止，天下大饥，兵起，人民流亡，各去其乡，期不出三年。

司马彪《天文志》曰：光武建武十二年正月己未，小流星百枚以上，或西北，或正北，或正东，或东北，二夜止。六月戊寅，流星百枚以上四面行。小星者，庶人之类，流行者，移徙之象。于时西讨公孙述，北征虏羯，匈奴侵边，汉遣将军马武等屯下曲阳，临呼沱以备胡。匈奴入河东，中国未安，米谷荒贵，人或流散。后三年，吴汉等从雁门、代郡、上谷、关西使人六万余置常关居庸关以东，以避胡寇。

《宋书天文志》曰：晋孝怀永嘉元年十二月丁亥，流星震散。案刘向说天官列宿，在位之象，众小星无名者，废人之类，此百官庶人将流散之象也。其后天下大乱，百官万人流移转死矣。验近事，中宗朝，卫王重俊与李多祚等欲举兵诛锄于纪者武三思等，于时先夜有流星缤纷交乱，不可胜记，向晓有大流星百数，皆有尾迹，纷驰渐下向西南。及至王与左右将军等奔退，多向西逝，卫王亦殒身于西南方有郭之野。又验景龙二年六月癸未夜，有流星无数，四方奔墜，缤纷纷纷，不可胜记，多出虚危河鼓天津贯索织女羽林王良阔道。又先天二年六月庚戌，夜有流星无数，皆向北及西北流，从羽林飞入紫微宫者甚众，亦出

河鼓织女等坐，后皆朝有变故。因羽林兵诛岑义等贼，干戈垂于紫宫，锋镝流于绛阙，群小流移，急使駉驛。又验其月丙辰夜，小流星四面交流极多，不可胜记，所流者不过二尺，后果京兆醴泉坊人遂相讹恐，多弃己宅，散走他里，经宿而止。凡小流星者，庶人之象，交流者惊驰之应也。

《荆州占》曰：流星以人定至夜半见者，期岁数，夜半至鸡鸣见者，期月数，鸡鸣至平明见者，期日数。

石氏曰：流星见甲子旬为东方，丙子旬为南方，庚子旬为西方，壬子旬为北方，戊子旬为中方。

司马彪《天文志》曰：流星者，贵使也，星大者使大，星小者使小。声隆隆者，怒之象也。行疾者期疾，行迟者期迟也。

《天文志》曰：景元四年六月，大流星二并如斗西方分流南北，光照地，隆隆有声。占曰：流星为贵使，星大者使大。是年钟邓克蜀，二星盖二帅之象。二帅相背，又分流南北之，应钟会既叛，三军愤怒。隆隆有声，兵将怒之象也。

《荆州占》曰：流星大无光者，众人之事也。小而光者，贵人之事也。大而光者，其贵人且众。乍明乍灭者，败革也。前大后小者，忧恐也。前小后大者，喜事也。蛇行者，奸事也。往疾者，往而不反也。长者，其事长久也。短者，其事疾也。

### 流星昼行三

《黄帝占》曰：流星名曰营头，营头所之下，流血滂沱，赤地三千里，若过四关，天下道不通，期不出三年。

司马《天文志》曰：王莽地皇四年六月，莽使司徒王寻、司空王邑将兵，号百万众，驱犀象虎狼，放之道路，昼有云气如坏山坠其军上，人皆似压，所为营头之星也。是时光武将兵



数千人赴昆阳，奔击二公兵，并力焱发，号呼声动天地，虎狼豹惊怪散。会天大风，飞屋瓦，雨如注水，二公兵乱败，自相贼杀者数万人，竞赴湓水死者委积，湓水为之不流。杀司徒王寻，军人皆散走归本郡，王邑还长安，葬败俱诛死。晋太安二年十一月辛巳，有星昼陨中天北，下有声如雷。明年，刘渊、石勒攻掠并州，多所残灭，王浚起燕代，百姓涂地。

《洛书摘亡辟》曰：流星昼行，亡君之诫。

甘氏曰：星昼行名曰营首，营首所在，有流血滂沱，则天下不通。一日大旱，赤地千里。所谓昼行者，日未入也。

巫咸曰：流星昼行，名曰争明，其分有兵，国破君亡，期一年，远三年。

京房曰：星昼行，唯百姓不安。

《荆州占》曰：暮若昼有流星甚大而长，兵从之，其后散无功。又曰：流星昼见坠邑都中，有王来入都邑者。

《玉历》曰：流星昼行，下都邑中，赤，不出二年，外国相有来者。色白，臣谋主不成，戮死。

班固《天文志》曰：成帝元延元年四月丁酉，日晡时，天清晏，殷殷如雷声，有流星头大如缶，长十余丈，皎然赤白色，从日下东南去四面，或如大盆，或如鸡子，耀耀如雨下，至昏止。郡国皆言星陨。春秋星陨如雨，王者失势，诸侯起霸之异也。其后王莽遂专国政。王氏之兴，萌于是也。是时已有星陨之变，后王莽遂篡国。

#### 流星犯日四

《荆州占》曰：奔星入日中，有臣欲谋其主。凡流星贯日不中者，臣谋主，事不成而戮死也。

## 流星犯月五

《河图》曰：天无云，有流星过月下若月上，其国有喜。

《洛书》曰：流星入月中，不出三年，人主忧。

《海中占》曰：流星入月中，星无光，不出其年亡国；星出，亡国复立。

《海中占》曰：使星入月中，女主疾。

《荆州占》曰：流星入月中，无光，四夷侵中国，不出十月。又奔星入月中，有臣谋其君。又使星入月中，有君失地者。又曰：使星入月中无光，将军戮，期十年。

## 流星犯五星六

郗萌曰：流星抵岁星，大臣弑主。一曰相戮死。又云：流星抵岁星，岁星没不见，流星反为岁星，人主死，相出走。

《荆州占》曰：使星入岁星，色苍黑，则大农相国死；赤，岁大病，天下饥；黄白，饥，青足食。又流星抵荧惑，天子将大行，国旱饥。又使星入荧惑，国多谗臣，天子备火。

黄帝曰：流星抵填星，后忌之。

郗萌曰：流星抵太白，有喜令。

《天官书》曰：流星抵太白，没不见，流星反为太白，更国政令，将戮死，有内兵。又云：流星抵辰星，辰星没不见，流星反为辰星，国大乱。

## 卷七十二 流星占二

### 流星犯东方七宿一

#### 流星犯角一

石氏曰：流星入在角，兵吏有见系者。色赤以兵系，色黄以土功系，色白以义系，色黑凶死，色青以忧黜。

黄帝曰：流星入角，宫中有事，贵人多死。一曰臣谋主而戮死，不出一年。

郗萌曰：流星色赤如缶，入两角间而止，有来言兵事者。星前赤后黑，军败将死，以四方知所从来者。又曰：流星色黄若白，入角亢间，有贵客来见君庙者。

《荆州占》曰：流星色白入两角间，有诸侯客来者，诸侯有口令。

石氏曰：流星从他宿入角，有邻邦之使者。又曰：流星入角间，关梁不通，有军，边境不通。

甘氏曰：流星出两角间，天子大使出。

郗萌曰：流星色黄，出右角而东极望，人主有出游者也。又曰：使星出入天门间，宫移矣。

《荆州占》曰：流星色青，出左角而东军忧而兵败绩。黑而光出在角，邦多疾病，若死亡。

石氏曰：流星抵右角星，后终无子。

黄帝曰：流星抵角，角不动，臣欲弑其主而戮死。

郗萌曰：流星抵角，角不动而散，散而复合，不出其年，其国宫中有大事，贵人多死者。又曰：流星比于右角，流而东，军无战功，二国终相和也。

## 流星犯亢二

石氏曰：流星入亢，主宗庙事，有使者受命于庙。色赤言兵，黄言土，白言义，青言忧，黑言死。

《海中占》曰：流星入亢中，幸臣有自杀者，期一年。

郝萌曰：流星色黄若白，入角亢间，有贵客来见君庙者。又曰：流星色黑出亢，忧，臣以口舌事自杀，期一月，若一年。

石氏曰：流星出亢使臣出。以五色占之，国多兵也。

## 流星犯氐三

黄帝曰：流星入氐，兵起，若国有大水。

石氏曰：流星入氐，国相疾。流星出亢入氐中，人相食，有病从带以下。

甘氏曰：流星入氐，主有疾。一曰国亡。

石氏曰：流星抵氐，国多淫女。

## 流星犯房四

石氏曰：流星入房，不出其年，主国有大丧。

甘氏曰：流星蛇曲入房，臣杀主代王，辅臣亡，王者以赦除灾，年中销。

郝萌曰：流星入房，王者杀忠臣，辅弼者亡，人主以赦除咎，期二年。流星出左服若右服，君使之诸侯，以马为币。

石氏曰：流星在房，国贵人多死。流星抵房，远乡贡异兽班头马，其国君亡。

《海中占》曰：流星绝钩铃，主有奔马则败。

## 流星犯心五

石氏曰：流星犯心，大人忧，臣欲伐主，兵大起宫中，不出一年，远二年。

郗萌曰：流星犯乘明堂星，皆为大人忧，为内乱，欲伐君，近期十月，远期三年。犯乘守太子星，太子忧；犯乘守庶子星，庶子有忧。

《荆州占》曰：流星犯乘明堂，若不死则去。

黄帝曰：流星入心，不出其年，国有大丧。一曰弑主，期不出三年。又曰：使星出房，大如鸡，色赤如血，入心，人主遇贼。其出心也行道远，人主贼人于千里之外。

郗萌早：流星入心，不出其年，臣弑其主，不成戮死。又流星入心，不出其年，大臣相贼。

巫咸曰：流星入心，有使来者，赤色言兵，黄言土，白言义，青言忧，黑言凶。出心，大臣出使，以五色占之。

石氏曰：流星出心，远国使来，星大大国使，星小小国使。又流星起心南行，越君死。

郗萌曰：流星起心，至北斗，赵君死。流星抵心，不出一年，国有大丧。使星入天子宫，留十月，有来聘。

## 流星犯尾六

《圣治符》曰：流星入尾，妃后有忧，若有黜者。一曰贼人女当有暴贵者。又流星入尾，前青而后白，人主死。从酉至黄昏，期六十日，将军行；从夕至人定，期九十日，将军行。

石氏曰：流星入尾，色青黑，故臣有败身者；流星出尾，色青黑，臣有逃者。

## 流星犯箕七

巫咸曰：流星入箕，宫人有来者，及有献女者。甘伯曰：期一年。

《百二十占》：流星入箕，客有来者。

巫咸曰：流星出箕，宫人有出者。甘伯曰：期一年。

《百二十占》：流星出箕，大臣有弃捐者。

## 流星犯北方七宿二

### 流星犯南斗一

《感精符》曰：流星入南斗，有使来入国者，色赤兵，黄土，白义，青忧，黑死。

《海中占》曰：流星入南斗，当有邻国使来，不出百八十日。

《二十八宿山经》云：有流星入斗散绝，谷贵，四年之中，异姓为主，人民劳。

石氏曰：流星出南斗，大臣有出使者，以五色占之。

郝萌曰：流星从南斗走北斗，其国有赦令，期在正月二月中。

### 流星犯牵牛二

《荆州占》曰：流星干牵牛，大将出，期八十日。

《文耀钩》曰：流星入牵牛，当有邻国使者来，不出百八十日。

郝萌曰：流星入牵牛，客有四足虫为币来者，色青道病，色黑道死不至。

《荆州占》曰：流星色赤入天鼓，将受命于主；出天鼓，

将出如星所之，以占四方。

《百二十占》：流星出牵牛还，使出也，期百八十日，远一年。

《宋天文志》曰：晋安帝隆安五年二月甲寅，流星色赤，众多西行，经牵牛虚危天津阁道，贯太微紫宫，占曰：星者庶民类，众多西行，民将西流之象，经行天子廷，主弱臣强，诸侯兵不制。五年三月，孙恩攻高雅之。五月侵吴郡，内史袁崧出战，为贼所杀。六月孙恩至京口，高雅之击破之，恩进军蒲州，于是内外戒严营阵，屯守栅，断淮口。十月，司马元显大治水军，将以伐桓玄。元兴元年，孙恩在临海，人众饿死散亡，恩亦投水死，吴郡、吴兴户口减半，又流奔而西者不可计。十月，桓玄遣将击刘轨，破走之。二年，玄篡位，迁帝寻阳。

### 流星犯须女三

石氏曰：流星入须女，天子有纳美女者。若出须女，女御有使者。干须女，贵女下狱，期百八十日。

《文耀钩》曰：流星抵须女，女主有逆谋，于君有戮死者，期不出一年，远二年。

### 流星犯虚四

《文耀钩》曰：流星入虚，人主大忧，臣下相贼，拔邑若国亡，期三年。

石氏曰：流星入虚色青，哭泣事，色黄白，有来受赐者。

郗萌曰：奔星以乙丑日流入须女虚危之间，为民流，占曰：流星色赤若苍黑，入虚危，有拔邑。又流星数从虚危中出者，贵人往求医药。

石氏曰：流星出虚，臣有出使者。

## 流星犯危五

石氏曰：流星入危，小人乘君子位。

甘氏曰：流星入危，天下不安，期一年。

巫咸曰：流星入危，天下不安，其国有忧，下欲谋上，期百八十日，远一年。

《百二十占》曰：流星入危，盖屋之事；出危，发屋之事。色赤火发，色黑水发，色青忧发，色黄以好发。

石氏曰：流星入危中，若从危出，不出一年，大水，万民饥，卖畜生财物，不能自食。

郗萌曰：流星入危色赤，以人为币；之危右，以兵为币；之危左色青，以主为币；白，以四足虫为币；黄，以贝为币。

石氏曰：流星抵危色赤，为兵，期一年；黄土功，白丧，期一年；黑死，有分国。又云：流星成对抵危，中国与北狄交兵。

## 流星犯营室六

《帝览嬉》曰：流星入营室，其君淫佚，宫中有忧，若有变事。

郗萌曰：奔星以冬至前后三日入营室中，国有急事。

石氏曰：流星入营室，有使者来，赤言兵，黄土，白义，青客凶，黑客死。

黄帝曰：流星一曰奔星，出营室，人主去其国，若有内乱，兵起宫中，王者有忧。

郗萌曰：流星出营室，有使，以五色占之。

石氏曰：流星同上。

《北官候》曰：大奔星色赤，流抵营室，有凶，其国贵人有死者。上旬见为老年，来月上旬死；中旬见为中年，来月中



旬死；下旬见为盛壮，来月下旬死。

### 流星犯东壁七

石氏曰：流星干东壁，大国分兵。

《荆州占》曰：流星犯东壁，能文章者死。

石氏曰：流星出入东壁，主文章者有忧。又曰：人之有祭庙之事。

郝萌曰：使星从西壁出入东壁，人主用故臣。营室一名西壁。

石氏曰：流星抵东壁，有大臣往使四夷。

### 流星犯西方七宿三

#### 流星犯奎一

郝萌曰：流星入奎，有破军死将。

《甄曜度》曰：流星入奎，有沟渎之事，若有使来之国者，使出之他国，不出百八十日，当以冲日为期。

刘奎曰：流星流入奎，有沟渎之事于国内；出奎，有沟渎之事于国外。

《宋书天文志》曰：晋成帝咸康三年六月辛未，有流星大如二斗魁，色青赤，耀地出奎中，没娄北，占曰：为民饥，五谷不藏。是月大旱。又宋文帝元嘉七年十二月丙戌，有流星头如瓮，尾长二十余丈，大如数十斛船，色赤，有光耀人面，从天船西行，经奎北大星南过至东壁止，其年索虏寇青州，杀刺史，掠居民，遣征南大将军檀道济讨伐，经宿乃败。

#### 流星犯娄二

石氏曰：流星入娄，有聚众之事于国内。一曰白衣之会，

大人为乱，期三年。

《百二十占》曰：流星入娄，有聚众之事。

《流星占》云：流星抵娄，贵贱相谋。

### 流星犯胃三

《圣治符》曰：流星入胃，有谷粟之税入，若出之，则有出粟。

石氏曰：流星入胃，保仓之事入于其国内；流星出胃，保仓之事出于其国外。

### 流星犯昴四

《文耀钩》曰：流星入昴，四夷交兵，白衣之会，若贵人有急下狱，期三年；若出昴，士众满野，若他国有使至，期百八十日，远一年。

石氏曰：流星入昴，贵人有系囚者。

《论语讖》曰：尧率舜等游于首山，观于河，有五老游于河渚。一老曰：河图将来告帝期。二老曰：河图将来告帝谋。三老曰：河图将来告帝书。四老曰：河图将来告帝图。五老曰：河图将来告帝符。龙衔玉苞，金泥玉检封盛书。五老飞为流星，上入昴。

《甄曜度》曰：流星出昴，胡兵起，士众满野，若边国有死王，期一年，远二年。

韩杨曰：流星成对抵昴，中国与四夷交兵。

### 流星犯毕五

《荆州占》曰：流星干犯毕，边兵大战。

黄帝曰：流星入毕中而复不出，其星小小赦，其星大大赦。

《海中占》曰：流星入毕，其君有大忧，先起兵者兵破亡，若有逐相，以其入日占，期百八十日，远一年。

郗萌曰：奔星以己巳日流而之参浊，其国有流民。浊谓毕也。

《西官候》曰：流星入毕，贵人有囚系者。

《百二十占》曰：流星入毕，有兵革之谋，出毕，有畋猎之事。

石氏曰：流星出毕，边军大战，贵人多有系囚者。

### 流星犯觜六

《荆州占》曰：流星干犯觜，其国兵起破亡。

石氏曰：流星入觜，太子使也，外宿中来则外也。四十丈至一百丈，将军使，十丈至三十丈，小使者，皆不出一年。流星入觜中，有师旅之事于国内。

《荆州占》曰：流星入觜中，大臣有倍其主者。

《玄冥占》曰：流星入觜中，大臣叛主，大兵聚，车马将急行，人主有忧，期百八十日若一年。

《百二十占》曰：流星出觜，有师旅之事于国外。一曰兵罢也。

### 流星犯参七

《流星占》曰：使星色赤若苍黑，于参傍行，人死于中央，县令死。

《黄帝占》曰：流星入参，不出其年兵起，先起者破。一曰客军破。案《续汉书天文志》曰：孝和永元元年正月辛亥，有流星起参，长四丈，有光色黄白。二月流星起天梧东北，行三丈所灭，色青白。壬申夜，有流星起太微东蕃，长三丈。三月丙辰，流星起天津。壬戌，有流星起天将军东北行，行参为边兵，天梧为兵，太微天廷天津为

水，天将军为兵，流星起之，皆为兵。其年六月，遣车骑将军窦宪等出朔方，日逐王等八十一部降，凡三十余万人，追单于至西海。是岁七月，又雨水漂人民，是其应也。

《圣治符》曰：流星入参中，不出其年，国有破军。

《文耀钩》曰：流星入参，有兵起，客军破；若出参，中国之米粟大贱。一曰先起兵者亡，后起兵者昌，期二年。

石氏曰：流星入参，国内均衡石之事。色青黑，不出其年兵起。

郗萌曰：流星赤，之参正星若之伐正星，出右以兵为币，之左以人为币，之右以金帛为币。一曰兵，一曰币。

《文耀钩》曰：流星出参，象弓矢，兵大起。

郗萌曰：流星色赤，从东方来，至伐而止，此来兵大败吾军也。奔星以己巳日流而之参浊之间，其国有流民。流星出南门以刺参，不出十六年，有一国王兼有天下。南门，东井也。流星出参，国粟米贱。

石氏曰：流星出参，有均衡石之事于国外。

黄帝曰：使星守参右，谷贵，参左，五谷贱。

### 流星犯南方七宿四

#### 流星犯东井一

《荆州占》曰：流星干犯东井，大臣谋其国，有兵，期百八十日也。

石氏曰：流星入东井，其国君死。

甘氏曰：流星入东井，有水令，从来者其分国亡。

巫咸曰：流星入东井，其国若以水亡，其分民饥，期三年。

郗萌曰：流星入东井，水与城等。

《百二十占》曰：流星入东井，有水事于国中。

《黄帝占》曰：流星出柳入东井，人主浮舟。

郗萌曰：流星出入东井，所之国大水。

《百二十占》曰：流星出东井，有水事于国外。一曰水有绝者。

### 流星犯與鬼二

《感精符》曰：流星犯與鬼，中国与南蛮通，四夷来贡。一曰有宗庙祠祀事。

《百二十占》曰：流星入與鬼，有祠事于国内。

《五星总占》曰：流星交抵與鬼，中国与南蛮交兵。

郗萌曰：奔流星抵與鬼，贵人有戮死。又占曰：奔星有光如火散，且行與鬼上，大臣得赐，期六月。

### 流星犯柳三

《荆州占》曰：流星干犯柳，周国当之，期九十日。

《圣谕符》曰：流星入柳，名木有来者；若出，名木有出者。

《百二十占》曰：流星抵柳，名山林有国受伐者。

### 流星犯七星四

郗萌曰：流星干七星，国有兵，不出百八十日。

黄帝曰：流星入七星，客有以急使来者；若出之，王者有吉事出使，期百八十日，若一年。

《宋书天文志》曰：流星大如斗，出柳北行，尾十余丈，入紫宫，没尾后，余光良久乃灭，占曰：天下凶，有兵丧，天子恶之。武帝、文穆后相继崩。

## 流星犯张五

石氏曰：流星入张，有使来纳币者。又云：诸侯有谋者，若有人君使人于诸侯。一曰天下有迁徙之民，期三年。

郝萌曰：流星入张，诸侯有来赐吾君近臣者；出张，君赐诸侯臣。

石氏曰：流星出张，诸侯有受赐者。

## 流星犯翼六

《荆州占》曰：流星干犯翼，国君大臣有忧，远期百八十日。

黄帝曰：流星入翼，贵人有系者。

石氏曰：流星入翼，倍海国有来使者，以神鸟为贡。色黄无故，青道病死，黑死不至。

《海中占》曰：流星入翼，其国用兵，大臣有忧若抵翼，天下尊诸侯，期百八十日。

《玉历》曰：一年。

石氏曰：流星出翼，倍海国受赐。流星抵左翼，天下尊诸侯。

《宋书天文》曰：晋孝武太元六年十月乙卯，有奔星东南经翼轸，声如雷。《星说》曰：光迹相连曰流，绝迹而去曰奔。案占楚地有兵，军破民流。十二月，苻坚荆州刺史梁成、襄阳太守阎震率众伐竟陵，桓石虔击，大破之，生擒震，斩首七千，生获万人。声如雷，将帅怒之象也。七年九月未，倅击襄阳，拔将六百余家而还。

## 流星犯轸七

黄帝曰：流星入轸，兵丧并起，国以平为币，王者能以善令则无咎，期三年。

石氏曰：流星入轸，有来使者。一曰为贵人多系者。流星出轸，臣有出使者，以车为币。

郗萌曰：流星入长沙，天下逃亡无处者。

## 卷七十三 流星占三

### 流星犯摄提一

《黄帝占》曰：流星入摄提，外国当以兵为使来者，若有急；流星出之，王者以兵出使，各以五色占。

### 流星犯大角二

黄帝曰：流星抵破大角，兵大起，四塞有急。若刺大角过，王者失位，期三年。

石氏曰：流星抵大角，有兵起，大将出，人主忧，期百八十日。流星触破大角，四兵合有急；刺大角，主失位；裂之尤甚。流星发大角，盛光明耀，大将出；破大角，亡不吉。

### 流星犯梗河三

陈卓曰：流星入梗河，王者诛夷国，不出三年。

《玉历》曰：流星入犯梗河，王者诛四夷，若边兵起。一曰蛮王死，期一年，远二年。

### 流星犯招摇四

黄帝曰：流星起招摇，其所向者兵在焉。又曰贼寇大败。

石氏曰：流星入抵招摇，四夷兵来，边兵大败，若王败，敌有忧，期一年。

### 流星犯玄弋五

《圣谕符》曰：流星入抵玄弋，夷欲入中国，战大败，流星所抵兵徙来，期不出二年。

### 流星犯天枪六

齐伯曰：流星入天枪，外夷来侵，防戍有急者，边境忧。

### 流星犯天棓七

《甄曜度》曰：流星入天棓，兵大起；五丈长，国有兵，王者忧，期二年。

陈卓曰：流星入天棓，诸侯多讼地者，部分不均平也；出四夷安。

### 流星犯女床八

《海中占》曰：流星入女床，后宫有忧，贵女当有暴诛者，期百八十日。

### 流星犯七公九

《玄冥》曰：流星入七公，人主信谗佞，诛忠直，谏者凶，人起兵，义人入狱，期一年。

石氏曰：流星经七公，当有兵将出。

《文曜钩》曰：流星入抵七公，有兵起，大将出。一曰辅臣有诛，不出二年。

### 流星犯贯索十

巫咸曰：流星入贯索，天下有狱事，多有死者。一曰臣有人狱者，期一年。案《异苑》曰：田镇之夜傍阶墀走，忽值流星入贯



索，天狱也。旧传若见此者必致死兵，要应披头仰瞻，须星出则无祸矣。镇惧，潜语其妇，散发屋上。兄宵起，见上有物，谓是怪鸟，引弓射之，应弦而坠，乃其弟也。

陈卓曰：流星入贯索中，女主死，若有兵，又曰使星入天牢，有赦。袁檀道鸾《晋阳秋》曰：孝武大元三年三月庚辰夜，流星大如三斗器，尾长三丈，从七公西行至招摇，须臾转还东，行至贯索而没。六月，苻坚遣其子丕等十万余人五道寇襄阳。四年正月辛酉，大赦天下。

《春秋纬》曰：大流星赤黄出贯索中者，怪获死者，女子也。

石氏曰：大奔星赤黄出贯索中，其国贵女有死者。

《荆州占》曰：流星绝连贯索，国城屠。

### 流星犯天纪十一

《黄帝占》曰：流星入天纪，大臣为乱，兵起宫中，妃后有出者，期二年。

### 流星犯织女十二

石氏曰：流星入织女，贵女有忧，若有白衣女来者。一曰后族当有出者，期不出百八十日，远则一年。

司马彪《天文志》曰：孝明永平七年正月戊子，流星大如杯，从织女西行照地。织女天之贵女，流星出之，女主忧。其月癸卯，光烈皇后崩。

巫咸曰：流星入织女，有使从诸侯所来者；出织女，有使之诸侯。

韩杨曰：流星入织女，有白衣女子会，其出也，贼将出。

石氏曰：流星出入织女，有大水。

黄帝曰：流星出织女，有白衣会，为贼兵吏凶淫内。

《宋书天文志》曰：穆帝永和十年四月癸未，流星大如斗，色赤黄，出织女，没造父，有声如雷，占曰：燕齐有兵，民流。升平元年，慕容隼遂据临漳，尽有幽并青冀之地，缘河诸将渐奔散，河津隔绝矣。

### 流星犯天市十三

石氏曰：流星入天市，色苍白，万物贵，赤必大灾，民多疾。又云：大臣有罪戮于市者，若市吏有忧者。

巫咸曰：流星入天市，乱度量不平，执命者死。

郗萌曰：流星入天市而出，死罪复生。

《玉历》曰：流星入天市，若有死罪当戮，入市而得免者，不出二年。

司马彪《天文志》曰：孝明永平元年四月丁酉，流星大如斗，起天市楼西南行，光照地。流星为使，天市为外兵，西南行为西南夷。是时益州发兵击姑复，蛮夷大牟替陵斩首，传诣雒阳。

### 流星犯帝座十四

甘氏曰：流星抵帝座，诸侯兵起，臣谋主，若贵人变，更改，期三年。

### 流星犯候十五

《圣谕符》曰：流星抵候星，有兵起，近臣相攻，夷狄内侵，王者有忧。

### 流星犯宦者十六

齐伯曰：流星入宦者左右，臣不宁若有忧。一曰当有被黜者，期一年。

### 流星犯斗星十七

郗萌曰：流星抵斗星，权量不平，市吏有忧。一曰五谷贵，斗不用事。

### 流星犯宗正十八

《海中占》曰：流星入宗正左右，贵臣多死，若帝宗后族有黜者，期百八十日，远一年。

### 流星犯宗人十九

《甄曜度》曰：流星入宗人，亲戚臣为乱，若宗中有变事，亲戚离别，期不出年。

### 流星犯宗星二十

玄冥曰：流星抵宗星，王者宗族不相亲，宗室相疑，以亲为疏。

### 流星犯东咸二十一

黄帝曰：流星入抵东咸，后出入不得时，淫佚自恣。一曰女主乱宫，王者忧，期一年，远二年。

### 流星犯天江二十二

石氏曰：流星入天江，有大水，河海溢，人民饥。

### 流星犯建星二十三

《玉历》曰：流星入建星，关道不通，若有使来者。一曰兵起四塞，民多盗贼，不出三年。

陈卓曰：流星入建星，天下谋乱。赤者昌。

## 流星犯天弁二十四

甘氏曰：流星入天弁，余大贵，人民饥。若抵犯之，有兵起，将土行，期二年。

## 流星犯河鼓二十五

《海中占》曰：流星入河鼓，有兵起，大将出。若抵之，有死将，随其所犯将当之，期一年，远二年。大星为大将，小星为小将。

郗萌曰：使星入河鼓，大将亡其旗鼓。

石氏曰：流星出河鼓，兵出；入河鼓，兵入。又曰：流星入河鼓，所入将惊死；出河鼓，所出将废。

《宋书天文志》曰：宋明帝太始二年六月己卯，竟夜有流星百余西南行，有一大如瓠，尾大，余黑色，从河鼓出，南行至尾没。占曰：天下鼓出，其年四方反叛，内兵出，大帅亲戎。

## 流星犯离珠二十六

《圣治符》曰：流星入离珠，兵官中起，其官人有罪及诛者。

## 流星犯匏瓜二十七

齐伯曰：流星入匏瓜，天下有忧，若有献果者，中有药不可食，防备之，期百八十日。

《甄曜度》曰：流星出匏瓜，食官有忧。一日鱼盐价千倍。

## 流星犯天津二十八

《帝览嬉》曰：流星入汉中而不出，士卒不可以涉；星若绝汉，即可涉。三日内雨则不吉。

石氏曰：流星入天津，必有大使随星所之，期一年。

《海中占》曰：流星入天津，水道不通，梁塞若津渡有忧。

石氏曰：流星出北斗，人主使于诸侯。

郗萌曰：流星入汉中不出，军不可渡水，先渡者不还。又曰：使星入河津，有大众行者。

《荆州占》曰：流星入汉中，贵人有戮死者，若溺死。

## 流星犯腾蛇二十九

玄冥曰：流星入腾蛇，雨水为害，鱼盐贵，水物不成，期不出年。

## 流星犯王良三十

《文曜钩》曰：流星入王良，天下有急，关津不通，有兵起，及牛马多死。

陈卓曰：流星入王良，天下兵尽起。

## 流星犯阁道三十一

巫咸曰：流星入阁道，王者有忧，左右有谋，道中有伏兵，若道不通，期百十日，远一年。

## 流星犯附路三十二

《帝览嬉》曰：流星抵附路，太仆有忧，若马多死，若马大出，期二年。

### 流星犯天将军三十三

黄帝曰：流星入天将军，大将出，士卒用；若抵犯之，将有忧，星所之兵所来，期三年。

石氏曰：流星入天将军，大将惊出。案司马彪《天文志》曰：孝和永元元年正月辛卯，有流星起参，长四丈，有光色黄白。二月，流星起天棓，东北行三丈所灭，色青白。壬申夜，有流星起太微东蕃，长三丈。三月丙辰，流星起天津。壬戌，有流星起天将军，东北行。参为边兵，天棓为兵，太微为天庭，天津为水，天将军为兵，流星起之为兵，其六月，汉车骑将军窦宪、执金吾耿康、度辽将军邓鹭出朔方，并进兵临私渠北鞬海，斩虏首万余级，获生口牛马羊百万头，日逐王等八十一部降，凡三十余人追单于至西海。是岁七月，又雨水漂人民也。

### 流星犯大陵三十四

石氏曰：流星入大陵，有土功事，坟陵之役。若抵之，国有大丧，大人当之，期不出三年。

### 流星犯天船三十五

《玉历》曰：流星入天船，天下大水，舟船用，若津道不通，有急事。

### 流星犯卷舌三十六

甘氏曰：流星入卷舌，有谗言乱主者，若有口舌于君，幸臣有忧。

### 流星犯五车三十七

黄帝曰：流星入五车，天下兵，车骑发，先起者昌。若抵

之，其所主五谷贵，期二年，远三年。

郗萌曰：流星入五车，以甲子日中粟车，期三十日粟贵；丙午日中麦车，期二十日麦贵；戊寅日中豆车，期二十七日豆贵；庚申日中蕡车，期二十日蕡贵；壬戌日中黍车，期十日黍贵。以月所见流星之处，则县邑之市为贵矣。

石氏曰：流星出五车，色白，诸侯以兵为忧，色黄受贺，色赤寇兵，车骑满野，青黑多死者，各以其日占。

### 流星犯天关三十八

石氏曰：流星入抵天关，天下有急兵，关道不通，若多盗贼，人民忧，期百八十日，远一年。

### 流星犯南河三十九

巫咸曰：流星犯南河，蛮兵起，防戍有忧。一曰流星入南河，为旱为兵。

宋《天文志》曰：宋武大明八年四月，有流星大如五斗瓠，赤色，有光照面，尾长一丈余，从参北出东行直下，经东井过南河没。占曰：民饥，吴越有兵。明年，四方贼起，王师水陆征伐，义兴吴陵大战，杀伤千计。

### 流星犯北河四十

巫咸曰：流星入北河，胡兵起，来入中国，若关梁不通。一曰流星入北河，为水为饥，皆期二年。

黄帝曰：流星绝两河间，天下大难，路不通。

石氏曰：南河北河有流星，绝两河戍间，有客抵之，天下大乱，亲戚不恤。

### 流星犯五诸侯四十一

石氏曰：流星出五诸侯，有大丧，以星所入日占其国。

《玉历》曰：流星入五诸侯，辅臣有忧，若有黜者。一曰诸侯兵有谋主，期不出年。

石氏曰：赤流星出，诸侯有叛者。其中星散绝，诸侯坐其殃咎。

### 流星犯积水四十二

甘氏曰：流星入抵积水，有大水，舟船用，民大饥。

### 流星犯积薪四十三

《圣谕符》曰：流星抵积薪，天下以薪藁为忧，若厨官有罪者。

### 流星犯水位四十四

齐伯曰：流星入水位，天下有水，河海溢流，五谷不成，流民大饥，期三年。

### 流星犯轩辕四十五

《甄曜度》曰：流星入轩辕，后妃有乱，女主有逆谋，天子宜防之，期三年。

郝萌曰：流星散入轩辕间，女主宫多谗乱。

《荆州占》曰：流星大如瓮，出东陵西下，必有积血。

### 流星犯少微四十六

郝萌曰：流星入抵少微，贤良集，道术出。一曰能人多来者。



## 卷七十四 流星占四

### 流星犯石氏中官

#### 流星犯太微一

黄帝曰：奔星入太微中，其国有乱。

《海中占》曰：流星入太微，有兵起，外国当以兵至，及有使来者，不出其年。

郝萌曰：使星入天官，留十日，有叛者。

《荆州占》曰：奔星入太微，宫内有乱，近西相也，近东将也。

石氏曰：奔星入太微天庭，避之吉，不避者危死，所谓避者，从左来，避之右，右来避之左。

黄帝曰：流星出太微东门，大兵起，大臣为乱，贵人多死者，若有谋，近期一年，中二年，远三年。流星出太微，大臣有外事，以所之野命其方。

石氏曰：奔星出太微中，有立王，若从王。流星出太微南门，其众贵臣有死者。

《海中占》曰：流星出太微端门，天子之使出，各以所之野命其国，期不出年。

《荆州占》曰：流星出太微天庭之门者，天子使也，以所之野命。其东西南北星来者，使复命。奔星出太微，中国失君。

《玉历》曰：流星出太微天庭，天下兵起，将士大出，王者有忧，期三年灾必应。

石氏曰：流星出太微天庭，大将出。

《荆州占》曰：流星大而赤，数出入天官庭如浮船状，有贼臣在旁，人主备，不可出游。

《荆州占》曰：流星纵横经行太微中，主弱臣强，四夷不制，期三月。

石氏曰：流星犯抵左右执法，东相西将，各以所犯皆当谋，以其人日命其国，皆不出三年。

### 流星犯黄帝座二

石氏曰：流星入太微，犯黄帝座，大人易其东西，犯者皆死亡。

黄帝曰：流星入太微，抵于帝座，天下乱臣弑主，国易政，期不出三年。

### 流星犯四帝座三

巫咸曰：流星入太微，犯四帝座，辅臣有诛，执法者忧，贵人多死，期二年。

### 流星犯屏星四

《玄冥占》曰：流星抵屏星，尚书有忧，若有死者，期百八十日，远一年。

### 流星犯郎位五

巫咸曰：流星入抵郎位，守卫之臣有诛，若左右为乱，若戮有死者，期一年，远二年。

### 流星犯郎将六

齐伯曰：流星抵郎将，则将有诛，若大臣为乱，王者戒慎左右，不出其年。

### 流星犯常陈七

《甄曜度》曰：流星入守常陈，卫人有罪者诛，人主忧，期百八十日，远一年。

### 流星犯三台八

《海中占》曰：流星入上台司命，大臣有罪若有死；流星出之，近臣有出者，期二年。

《玄冥占》曰：流星入中台司中，奸臣来近主者，流星出中台，奸臣有出者。

甘氏曰：流星入下台司禄，大臣有赐爵封者；流星出之，臣有罪出走，色黑死，皆期二年。

黄帝曰：流星走三台者，大将出。

《辩终备》曰：奔星入三能，天下感，兵祸聚隅。感，动也。

### 流星犯相星九

《文曜钩》曰：流星抵相星，大兵起，大将出，辅相有变。

### 流星犯太阳守十

巫咸曰：流星抵太阳守，有兵起，将军出，期三年。

### 流星犯天牢十一

《黄帝占》曰：流星入天牢，贵人有系者，若多下狱，人民多有罪，期不出年。

黄帝曰：常以丑未日候，流星入天牢者有赦。

《荆州占》曰：流星出紫宫，奔走入天牢，天子以赦解

之。黄帝曰：天牢中有一使星出者小赦；二星出，赦在关内；三星出，赦天下。

《荆州占》曰：流星入贵人之天牢，太仆名臣有系者。其色黄白，无故，青忧，黑凶，赤，以金煞之日出，赦狱中，系者出。

### 流星犯文昌十二

黄帝曰：流星若奔星入文昌宫，其国有乱。

石氏曰：流星入文昌，其国失政，宫庭有兵若内乱，期二年。奔星出文昌，宫内乱。

《荆州占》曰：奔星出文昌宫，国去其君。一曰国失君。

班固《天文志》曰：孝成帝建始元年九月戊子，有流星出文昌，白色，光烛地，长可四丈，大一围，动摇如龙蛇形，有顷，长可五六丈，四围所屈折委曲，贯紫宫西北，斗西北子亥间，后屈如环，北方不合，留一刻。所占曰：文昌为上将贵相，是时帝舅王凤为大将军，其后宣帝舅子王商为丞相，皆贵臣任政。凤妒商，谮而罢之，商自杀，属亲皆废黜。

司马彪《天文志》曰：孝灵二年四月，有流星出文昌，入紫宫，蛇行，有尾无目，赤色，有光照垣墙。占曰：文昌主上将贵相。后六年，司徒刘郃为中常侍曹节所谮，下狱死。

### 流星犯北斗十三

黄帝曰：大流星入北斗，天下乱，大发兵，将军出，期六月若一年。案司马彪《天文志》曰：光武建武十年三月癸卯，流星如月，从太微出，入北斗魁第六星，色白，傍有小星射者千余枚，灭则有声如雷，食顷止。是时光武帝使吴汉发卒三万人击蜀。成帝公孙述十二年十一月，护军高午刺述，洞胸死，屠蜀城，灭述妻子宗族。孝灵光和元年四月癸丑，流星犯轩辕第二星，东北行，入北斗魁中。至中平元

年，黄巾贼起，上遣中郎将皇甫嵩等征之，斩首千余万级。

石氏曰：流星入北斗魁中，失名人。流星夜有光入北斗，大臣有系者，以五色占之。

郗萌曰：大流星色青，入北斗魁中，大臣有系者，有忧也。大流星入北斗魁中失明者，系者斩死。案班固《天文志》曰：成帝绥和元年正月辛未，有流星从东南入北斗，长数十丈，二刻所止。其年十一月庚子，定陵侯淳于长坐执左道，下狱死。

郗萌曰：彗星入北斗中，中国使匈奴。案班固《天文志》曰：成帝阳朔四年闰月庚午，飞星大如岳，西南入北斗下。明年鸿嘉元年正月，匈奴单于离陶莫皋死，五月甲午，遣中郎将杨兴使吊。

《荆州占》曰：大流星入北斗魁中，大臣背叛。流星使星入北斗魁中，臣有系者，星出系者出。大流星入北斗魁中，贵人囚，青黑忧赤黑死，赤兵死。

郗萌曰：流星入应星中，天下有赦。

石氏曰：流星出北斗，人主使人于诸侯。色黄白有贺事，青黑有忧事，赤有兵，期二年。

石氏曰：流星出北斗魁中，人主左右有系死者。流星出北斗魁中，若东西不出，期年兵起。流星出北斗魁中，大将军出，以星出日占知所之。

郗萌曰：大流星出北斗后，尾长数丈，将出。流星黄白出北斗魁中，有赦令。

《荆州占》曰：大流星出北斗魁中，不出其年兵起，占星所之者。使星出北斗东行，齐赵负兵。《玉历》云：齐鲁郑。出北斗南行，荆魏负兵。《玉历》云：为荆州楚韩。出北斗西行，秦郑负兵。《玉历》云：秦晋魏。出北斗北行，楚赵负兵。《玉历》云：燕赵，皆不出三年。

玄冥曰：流星出部星，天子伐诸侯，天下将太平，期二年。

京房曰：流星于北斗傍，明如炬火，长六七丈，一本云六七尺。如缙布，贼臣专制天下，期三年。

郗萌曰：流星从南斗至北斗者赦令，期正月二月。

《荆州占》曰：使星守北斗，天下乱。

郗萌曰：大流星拂北斗尻，不出其年，有戮死臣，期三年。奔星以冬至前后十日之内击北斗柄，天子当之，期六十日。

郗萌曰：大流星抵北斗柄破之，大臣有忧，期六月。流星抵北斗，天下大发兵。使星抵北斗东行，不出其年，臣有戮死者。

《荆州占》曰：流星不入北斗魁中，居其傍，贵人有避宫者。

黄帝曰：流星抵正星，大人遇贼忧。流星出正星，执政者易，期一年。

甘氏曰：大流星抵法星左右，其有光者，男君疾，无光者，女主疾。若出法星，兵起，若有变事，期一年，远二年。

《荆州占》曰：流星抵法星，法星色青，三日有兵，期不出四月；色青白，九月有兵，期不出十月而起，期以春也。不出月大变，变易国名。

《圣谿符》曰：流星抵令星，有兵起，天下不安；若出令星，王者使诸侯，行令四方。

齐伯曰：流星抵伐星，蛮夷以水兵来入国，若出伐星，天子出使于蛮夷，蛮夷和。若抵破伐星，人多死，期一年，远二年。

石氏曰：流星抵杀星，无光，五日君疾，有光，十日女主死。

甘氏曰：流星抵危星，五谷不成，人君有忧；若出危星，天子出行令。

《荆州占》曰：流星多抵危星，其色赤，有兵，期一岁，黄有土功事，白有丧，期一岁，黑有分国。危星不明，流星数抵之，五谷不成，国相去，君有忧。

郗萌曰：大流星数抵部星，王者忌之。

《荆州占》曰：流星抵部星，色赤，有大忧，若有土封爵，列侯有令，若兵器有怪，黄，有喜。

石氏曰：流星入辅星，相官不治，天子制之。星出辅星，相免若死。

### 流星犯紫宫十四

黄帝曰：流星入紫宫，有大丧，大兵起，将军有戮死者，期三年。案司马彪《天文志》曰：孝章建初二年九月甲寅，流星过紫宫，长数丈，散为三灭。后四年六月癸丑，明德皇后崩。孝和永元七年正月丁未，有流星起天津，入紫宫中灭，色青黄有光。十二月己卯，流星起文昌，入紫宫，后窦太后崩，陇西羌反。宋《天文志》曰：宋前废帝永光元年六月壬午，有流星前赤后白，入紫宫。明年，会稽太守寻阳王子房、广州刺史袁粲、雍州刺史袁顗、青州刺史沈文秀并叛，昭太后崩。明年太始二年三月甲寅，流星从五车出，至紫宫西藩没。其年四方反叛，内兵大出，六师亲戎，昭太后崩，大将殷孝祖为南贼所杀也。

石氏曰：流星入紫宫，主忧，天下多死者，臣犯主。又曰：入紫宫，使者忧。又曰：入紫宫，使者复命。名曰使星，诸侯有来使者。

班固《天文志》曰：孝昭元平元年三月丙戌，流星出翼轸东北，于太微紫宫，始出小，旦入大，有光入，有声如雷，三鸣止。占曰：流星入紫宫，天下大凶。其年四月癸未，宫车晏驾。

《荆州占》曰：流星入紫宫，水旱不调。案韦昭《洞纪》曰：汉灵帝嘉平二年，有流星出文昌，入紫宫。六月，北海水溢，司空

杨赐免也。

《荆州占》曰：奔星入紫宫中，大乱。一曰为其国有乱。其出也，国去其君。案《中兴书》曰：安帝隆安五年三月甲寅，有流星赤色，众多西行，历牵牛、虚、危、天津、阁道、贯索、太微、紫宫、桓玄篡位之应。

《荆州占》曰：使星入紫宫，匈奴起兵。

陈卓曰：奔星入紫宫，天下大乱，若有奇令。

石氏曰：流星出紫宫，天子之急使也。青忧，赤有兵，黄有土功，白有丧，一曰义，黑有水事，皆以所之分野命其国。星复入者，使复命也，不出其年。

《海中占》曰：流星出紫宫，主宫殿空，若有徙王，不则出走，期三年。

《荆州占》曰：流星出紫宫中，奔入天牢中，天子以赦应之。

《宋书天文志》曰：宋文帝元嘉二十年二月二十四日乙未，流星大如桃，出天津，入紫宫，须臾，有细流星或五或三相续，又有一大流星从紫宫出，入北斗魁，须臾又有一大流星出贯索中，经天市，诸流星并向西北行，至晓不可称数。《流星占》并云：天子之使。又曰：庶民惟星，星流民散之象。至二十七年，索虏破青冀徐兖豫六州，民死大半。

《荆州占》曰：使星出入紫宫，有空国，王徙。

### 流星犯北极十五

黄帝曰：使星色白，入北极，天下兵聚。一曰国有大变，若有称兵。

石氏曰：流星入北辰，天下道塞；出北辰，天下安。

焦延寿曰：流星入北辰，兵大起。

黄帝曰：流星出北辰，地动。



石氏曰：使星出北极，兵在外者罢，若兵聚外境，期不出年。

《荆州占》曰：使星色赤出北极，兵罢于外。

石氏曰：当以戊日占，有流星出北辰，天子德令安天下。

黄帝曰：流星抵北极，国有大丧，天下兵起，非一国，将军战死，若大臣破戮，期不出三年。

石氏曰：流星抵北极而止，色前赤后白，有来言兵事者。前白后黄，人主立太子，有裂地者。色赤而前黄锐，有来吾国而死者。色白而前后皆锐，有来言开关而和者，若兵罢四方皆然。

甘氏曰：流星入钩陈，必有迫劫主者，若臣谋其主，若兵起宫中，期二年。

### 流星犯天一太一十六

《圣诒符》曰：流星犯抵天一太一者，五谷成熟，人民安乐，天下太平，邻国宁。

## 卷七十五 流星占五

### 流星犯石氏外官一

#### 流星犯库楼一

黄帝曰：流星入库楼，库兵发用事，车骑出；流星出之，兵大起，随星所之，兵所从往，期三年。

郝萌曰：流星出天库，所之邑受兵。使星出入天库楼，天下空虚，兵尽出。

## 流星犯南门二

石氏曰：流星入南门，西夷兵起，关道不通，国有忧。  
《荆州占》曰：流星入南门甚众，大臣有外事。

## 流星犯平星三

《玉历》曰：流星入平星，执令臣有忧若有罪；星若出之，臣有黜者，期百八十日。

## 流星犯骑官四

甘氏曰：流星入骑官，有兵起，骑士将出有忧，若马多死，期一年，远二年。

石氏曰：流星抵骑官，兵起，星所止知之。

## 流星犯积卒五

《圣谕符》曰：流星入积卒，兵士大行，若将死。一曰近臣有诛者，期不出二年。案《晋阳秋》曰：大元元年三月丁巳，流星大如斗碗，赤色，尾长二丈，起心星南五丈，经积卒。九月，秦王苻坚屠凉州，虜刺史张天锡，车骑桓冲屯军淮泗。

## 流星犯龟星六

齐伯曰：流星入龟星，天下有水，珠玉贵；流星出之，天下大旱，五谷贵，期不出年。

郗萌曰：流星出龟星，色青黑，所之国大水；赤黄，所之国大旱。

## 流星犯傅说七

《甄曜度》曰：流星抵傅说，王者有子孙之忧，若出之宫

中，有子孙之喜，期不出百八十日。

### 流星犯鱼星八

《海中占》曰：流星抵鱼星，天下水，鱼盐贵，星若出之，天下旱，鱼行人道。

### 流星犯杵星九

玄冥曰：流星入杵星，五谷大贵，其岁杵不用事。

### 流星犯鳖星十

《文曜钩》曰：流星入鳖星，国有大水，色赤出鳖，其国大旱。

郗萌曰：大流星出鳖星，色青黑为大水，赤黄为大旱，视其所之以命邑。

### 流星犯九坎十一

巫咸曰：流星入九坎，有水旱之变，从南入则大旱，从北入则大水。

### 流星犯败臼十二

《帝览嬉》曰：流星入败臼，天下有急发米粟之事，杵臼用，期一年。

### 流星犯羽林十三

黄帝曰：流星入羽林，兵大起，士卒发用，将军有出者，期三年。

石氏曰：流星色赤，入大牢东，君起兵；入其西，太子起兵；入其北，诸侯起兵；出大牢，兵随所之。流星色赤，入天

军之南，天子死；入其西，太子死；入其北，诸侯多死。流星色黄白，入天军之西，天子立太子；入其中，天子立侯王，不则受赐。流星色白，入天军之南，后忧疾；入其北，诸侯忧疾。

《春秋纬》曰：使星出入羽林，兵起。

#### 流星犯北落十四

石氏曰：流星抵北落，天下有兵，北夷寇虏入塞，大将出，铁镞用，期百八十日，远一年若二年。

#### 流星犯土司空十五

《玉历》曰：流星抵土司空，其国有兵，土功起；若抵破司空，国有丧，期三年。

#### 流星犯天仓十六

石氏曰：流星色赤，入天仓中，兵内起；其犯破天仓，旱若火起，出天仓，粟以兵出。流星色黄白，入天仓中，岁饥，出入天仓，岁大饥出谷。

甘氏曰：流星入天仓，天下饥，谷散出，若发粟于民，有转谷之事。

#### 流星犯天囷十七

《圣谕符》曰：流星入天囷，有兵起，谷当出，有军粮之急，期百八十日若一年。

#### 流星犯天廩十八

齐伯曰：流星入天廩，其国大饥，五谷不成，人民饥死，米粟当有出廩者，期不出二年。

### 流星犯天苑十九

《甄曜度》曰：流星入天苑，有兵起，马出行若多死。一曰禽兽多死。

石氏曰：流星色赤，入天苑中，牛马多伤；出天苑中，牛马多以兵事出者。流星色黄，入天苑中，牛马野禽兽蕃息。流星色苍白黑，入天苑中，牛马野禽兽多死；出天苑，牛马以全出者。流星入天苑，马之事，出天苑，名马出币，人，四足兽有币者。流星入天苑，名马有人者；出天苑，名马有出者。

### 流星犯参旗二十

《海中占》曰：流星入参旗，兵大起，弓弩用；流星出之，将军出，兵士行，期二年。

郝萌曰：使星出入天弓，匈奴兵起。

### 流星犯玉井二十一

黄帝曰：流星入玉井中，皆为强国失地；出玉井，强国得地。

郝萌曰：有大流星循伐以下入玉井中，不出其年，水与城等，以星小大迟疾占之。

玄冥曰：流星入玉井，国以水为忧若疾，国失地；若出之。大水溢流，有溺死者，期不出二年。

《荆州占》曰：流星出玉井，将出。

### 流星犯屏星二十二

《文曜钩》曰：流星入屏星，执法臣有戮死者，人民多疾，若有死，不出其年。

### 流星犯厕星二十三

巫咸曰：流星入厕星，天下大饥，人相食。一曰若大水，陷厕中，有谋兵。

### 流星犯天矢二十四

石氏曰：流星抵天矢，人民多疾，若多死，天下饥。流星色黄吉，青白多疾，黑多饥。

### 流星犯军市二十五

《玉历》曰：流星入军市，兵大起，大将出，军饥绝，粮市散，期二年。

### 流星犯野鸡二十六

甘氏曰：流星入军市，抵野鸡，将离散，士卒死亡，先起兵者殃，期三年。

### 流星犯狼星二十七

黄帝曰：流星抵破狼星，秦国有殃，先起兵者亡，期一年，远二年。

石氏曰：流星抵狼星，其国兵大起，大将有千里之行，将军有死者。

### 流星犯弧星二十八

齐伯曰：流星入弧星，天下兵起，诸侯相攻，弓弩用，车骑出。一曰弓矢贵，秦负兵，期不出百八十日，远一年。

司马彪《天文志》曰：光武建武十一年十二月己亥，大流星如缶，出柳，西南行，入弧且灭，分为千余，如遗火状，须

夷，有声隐隐如雷。柳为周，弧为秦蜀，大流星出柳入弧者，是大使从周入蜀。时光武使大司马吴汉发南阳，三万人乘船泝江而上，击蜀成帝公孙述。又命将军成等平武都邑郡。十二年二月，吴汉又击述大司马谢丰，斩首五千余级。十一月丁丑，汉护军高午刺述洞胸，其夜死。明日，汉入屠蜀城，诛述大将公孙晃等，所杀数万人，灭述妻子宗族万余人。

### 流星犯老人星二十九

《荆州占》曰：使星出入老人星，老人有疾忧。

《海中占》曰：流星抵老人，天下多病，老人不安。一曰大兵起，老者行。

### 流星犯天稷三十

玄冥曰：流星入天稷，五谷散出，谷不熟，天下饥，人民流亡，去其乡。

### 流星犯甘氏中官二

#### 流星犯天理一

《荆州占》曰：流星入天理，贵人之牢，太仆名臣有系者也。青忧，赤以金杀之，黄白无故，黑凶。流星出魁中，赦系狱者，天理也。

#### 流星犯咸池二

黄帝曰：流星出咸池中，星所之者兵起。

石氏曰：流星入咸池，大水。

郗萌曰：使星舍咸池，有丧。

### 流星犯甘氏外官三

#### 流星犯哭星一

黄帝曰：出入哭星，有哭泣事。

#### 流星犯水府二

郗萌曰：有大流星赤黄色，出水府，所之邑大旱。

郗萌曰：有大流星青色，出水府，所之邑大水。

### 流星犯巫咸中外官四

#### 流星犯长垣一

《帝览嬉》曰：流星入长垣中，匈奴兵起，来侵中国，人主有忧。

《荆州占》曰：使星入长垣，匈奴起兵。

#### 流星犯天渊二

郗萌曰：大流星色青黑，出天渊，所之邑大水。大流星色赤黄，出天渊，所之邑大旱。

#### 流星犯厖三

陈卓曰：使星出入天厖，天下有惊。

## 卷七十六 杂星占

#### 星昼见一

甘氏曰：星与日并出，名曰女嫁。星与日争光，武且弱，



文且强，女子为主而昌。在邑为丧，野为兵。

《辨终备》曰：星昼见，虹不藏，臣人生海失常，主淫于色酒湎沉，慎失职，出游遨。

甘氏曰：明星夺日光，天下有立王。

《吕氏春秋》曰：武王胜殷，将二虜而问焉，曰：若国有妖乎？二虜对曰：国有妖，星昼见。

甘氏曰：星无故常昼见者，名女王，不出三年，大水浩洋，若有女王立。

京氏曰：昼星见，人臣有奸心，上不明，臣下纵横修撰。

《孝经雌雄图》曰：一星昼见者，君子失国亡道，人边为虜。

《魏氏图》曰：一星昼见者，君子失国亡世，当败必死。

《雌雄图》曰：二星昼见者，皇后失势，以刑死。一曰公亡，刑则失度，为羌狄所贼。又曰：有白衣问，诈在宫中。

《魏氏图》曰：三星昼见者，君有亡邦忧，羌人人界，欲为天子。一曰臣有忧，其世绝。又曰：参与辰俱见，天下有兵，二邦相攻血流。

《孝经内记》曰：三星在日上下者，外人欲杀，奸在后宫。又曰：三星在日左右者，臣欲杀君，与将军共为一心。

《雌雄图》曰：三星昼见者，臣有大忧，公卿为夷狄贼所害。又曰：四星及五星昼见者，王侯为外界人所杀。一曰君弟有死忧。

《内记》曰：四星在日上下者，王侯欲伐国政之忧。

《魏氏图》曰：北斗昼见者，君死亡，绝后嗣也。

## 恒星不见二

杨泉《物理论》曰：凡无名之星，一见一不见，唯二十八宿度数有常，故曰恒星。

《左氏传》曰：鲁庄公七年四月辛卯夜，恒星不见。恒，常也，谓常见之星也。辛卯四月五日夜，月光尚微，盖时无云，日光不以昏没也。夜中星陨如雨。如，而也，夜半乃有云，星落而且如雨，其数多也，皆记异也。日光不匿，恒星不见，云夜中者，以水漏也。

《传》曰：恒星不见，夜明也，星陨如雨，与雨皆也。皆，俱也。

《谷梁传》曰：常星者，在位人君之类，不见者，无君之象也。

《公羊传》曰：恒星布列四方，助天为光明，诸侯之象。不见者，象诸侯之背叛，不佐王者奉顺法度。

《春秋纬》曰：恒星不见，言周制绝灭，众耀陨乱。

《运斗枢》曰：苍帝行失则列星灭。

《雒罪级》曰：恒星不见，主严法度消。

《助佐期》曰：列星不见，精无耀，天子失政，诸侯横暴。

董仲舒曰：常星二十八舍，人君之象也，众星者，万民之类也，列宿不见，象诸侯微也。

许慎曰：众星者，庶民之象也，与列宿俱亡，中国微灭也。

郑玄曰：恒星谓列舍，特天子之正也，不见者，诸侯乘天子礼义法度。又夜明象诸侯慨然将强大也。

《河图舍占篇》曰：将失政不法，则星亡。

### 星斗占三

《吕氏春秋》曰：至乱之化，有星斗。

班固《天文志》曰：辰星与他星相遇而斗，天下大乱。

## 众星摇动四

《洪范天文星变占》曰：汉武元光中，天星尽摇，上问候星，对曰：星摇，民劳也。后征伐四夷，百姓劳于兵革也。

## 星陨占五

京房《易传》曰：星者，阴精也，五行之形，其体在下，精耀在天，百官之本，各因其原。星飞反行，万民不安。太星陨下，阳失其位，灾害之萌也。其救也，人君当悔过反政，克己责躬，省徭役，安国封侯，以宁民为先，则宿正矣。

《洪范传》曰：星者在位人君之类也，陨者众其陨坠失其所也。夜中然后陨者，言不得终其性命，中道而败。或曰：象其叛也。夜中然后反者，言当以中和之道反之也。天变所以语人也，防恶远非，陨卑有微将以安之也。

班固《天文志》曰：夜中星陨者，为中国也。

《盐铁论》曰：常星犹公卿也，众星犹万民也。列星正则众星齐，常星乱则众星坠。

《感精符》曰：天下无法度，莫能相治，患祸并见，四夷为邪，则星陨，皆失其正，异姓起，行贪奢，强国并兼，民流彼邦，此王者失执，诸侯起霸之异。

董仲舒曰：星陨者，君主太盛，臣下坠落之象也。省刑，罪无加贤臣以救之。

《洛书》曰：众星陨不言，侯伯伐王。

《天镜》曰：国易主，则星坠。国有大凶，其主亡，则众星坠。

董仲舒曰：众星坠，民失其所也。

《荆州占》曰：星坠，当其下有战场，天下乱，期三年。

《推度灾》曰：奔星之所坠，其下有兵；列宿之所坠，灭

家邦：众星之所坠，万民亡。

《运期授》曰：黄帝亡也，黄星坠。

《文曜钩》曰：镇星坠，海水溢。

《考异邮》曰：黄星骋，海水跃。

《运斗枢》曰：黄星坠，海水倾。

《淮南子》曰：奔星坠而渤海决。许慎曰：奔星，流星也。

《天官书》曰：宋襄公时，陨如雨。杜预春秋曰：如，而也，星落而且雨也。天子微，诸侯力政，五伯代兴，更为民主，自是之后，众暴寡，大并小，并为战国。

京房曰：星以春三月坠，岁凶不登；其二月，大殃；秋三月坠，兵起；八月大殃。

《左传》曰：星陨如雨，与雨偕也。

《洪范》曰：此象天子微弱，民将去土，诸侯起霸，终于微灭之应也。

《潜潭巴》曰：星陨如雨，厥民叛，下有专讨归众。

京房曰：人君不仁，伤胎孕，杀无辜，则岁星失度。星陨如雨不收，则弟杀兄，臣诛君。其救也，内慈仁敬让，外虑恩施惠，无犯四时，岁星承度，陨星上覆列宿。又曰：君不任贤，厥妖天雨星也。

《汉书》曰：成帝永始二年二月癸未夜过中，星陨如雨，长一二丈，绎绎未至地灭，至鸡鸣止。谷永对曰：日月星辰烛临下土，其有食陨之异。即遐迹幽隐，靡不咸睹，附丽于天，犹庶民附丽王者，君失道也，纲纪废颓，下将畔去，故星畔天而陨，以见其象。《春秋》记异，星陨最大，自鲁庄公已来，于今再为见。臣闻三代所以丧亡者，由妇人群小沉湎于酒。《书》云：乃用其妇人之言，四方之多罪逋逃，是信是使。《诗》云：赫赫宗周，褒姒灭之。颠覆厥德，荒湛于酒。及秦所以二世而亡者，养生太奢，奉终太厚。方令国家兼而有之，社

稷宗庙之大忧也。

《天镜》曰：星坠为石，天下兵起，流血万里。又曰：国有兵凶，则星坠为鸟兽。

京房曰：天下将亡，则星坠为飞虫。又曰：岁大饥大殃，则星坠为粟豆。又曰：天下大兵，则星坠为金铁。

《天镜》曰：天下有水，则星坠为水。又曰：国有大饥，有兵流血，则星坠为土。又曰：国主亡，有兵，则星坠为草木。又曰：兵起国主亡，则星坠为沙。

京房曰：星坠为人而言者，善恶如其言。又曰：国有大丧，则星坠为龙。

《河图》曰：将失政不法，石坠星亡。

《援神契》曰：星坠石坠，大人忧。

京房曰：星堕化为石，臣下倍主，主妄行。又曰：兵将作，妖星陨为石。

《天官书》曰：星坠地则石也。河济之间，时有坠星。

《左传》曰：僖十六年春，陨石于宋五，陨星也。周内史叔兴聘于宋，宋襄公问曰：“是何祥也？吉凶焉在？”对曰：“今兹鲁多大丧，明年齐有乱，君将得诸侯而不终。”退而告人曰：“君失问，是阴阳之事，非吉凶所生也。吉凶由人，吾不敢逆君故也。”

《洪范占》曰：明年齐桓公卒，五子争国，宋公伐齐行霸。后六年，为楚所败，不终之应也。

《抱朴子外图》曰：陨星者其精耀，非陨其质也。陨石于宋五，非星也。俗人视天上惟有日月与星，计言从天上堕，惟当是此三物，而日月常在，故谓有者必是星耳。天或雨血、雨鱼、雨灰、雨草木、雨兵、雨石、雨谷，如此是天降怪异，无所不有。春秋时陨石所谓雨石者也，何必星乎？或四方高山之石，飞行为怪，坠之于地耳，其妖大甚，不可悉载。

《史记》：秦始皇三十六年，有坠星下东郡，至地为石，黔首或刻其石，云始皇死而地分。始皇闻之，遣御史遂问莫服，尽取石旁舍人诛之，燔其石。

《洪范占》曰：是岁始皇崩，三年而秦灭亡。

《赵书》曰：石勒时，有星陨魏郡邺县东北六十里，初有黑黄云如幕，长数十疋交错，音声如雷，坠地热气如火，尘起连天，时左右有私锄者，皆震叠。尘止经视之，土犹带热。求觅见，有一石方一尺，青色而轻，击之声如磬。未几石勒死，虎杀其子而自立。

## 卷七十七 客星占一

### 瑞 星

宋均曰：景星大而中空。

孟康曰：景星者，有赤方气与青方气相连，赤方气中有两黄星，青方中一黄星，凡三星，合为景也。案《蜀志》曰：后主景耀元年，史官言星见于是，大赦，改年为景耀也。

《天官书》曰：天晴而见景星。景星者，德星也，其状无常，常出有道之国。

《瑞应图》曰：景星者，大星也，状如半月，生于晦朔，助月为明，王者不私人则见。又曰：德及幽隐则出。又曰：景星者，星之精也，光从月出，出于西方，王者不私人以官，使贤者在位，则景星出见，佐月为明。

班固《天文志》曰：天晴而见景星。占六十日晴精明亡。

《河图》曰：黄帝治，景星见于北斗也。

《尚书中候握河纪》曰：尧即位去年，景星出翼，凤凰止庭。郑玄注曰：景，大也，明也，翼，朱鸟宿也。又曰：帝执德

恭，聪明密微，思心清静，在庭从宜，仁推度符，移序精和，天地休通，五行相化，景星出摄提。

《含文嘉》曰：王者序长幼，各得其正，则房心有德星应之。

《合诚图》曰：天子精耀心，坟务德，则景星窥。宋均曰：坟，盛也，窥犹见也。

《礼稽命微》曰：王者制礼作乐，得天心，则景星见。

《感精符》曰：王者德，上感皇天，则景星见。

《演孔图》曰：天子以贤举，则景星效于天。

《元命包》曰：仁义茂盛，贤俊彰明，神符感出，景星守参。

《感精符》曰：尧时气充盛，上感皇天，故景星见。

《孝经内事》曰：天子行孝德则景星出。

《援神契》曰：王者德至天则景星见。

《白虎通》曰：景星者，大星也，月或不见。景星恒见，可以夜作，有补于人。

《帝王世纪》曰：舜时景星见于房。

《坤灵图》曰：至德之萌，黄景索于北斗，必以戊己日，其光无芒，行久，无武动军，莫之敢拒。

《含文嘉》曰：宫室之礼得，则虚危有德星应。又曰：居丧以礼，则德星应在虚危。

《稽命微》曰：礼得其宜，则虚危有德星见。

《含文嘉》曰：宫室之礼得，营室有德星应。又曰：居丧以礼，则德星应舆鬼。又曰：天子穆穆，诸侯皇皇，则少微有德星。又曰：殡丧之礼以其时，则三阶平正，有德星出入其间。又曰：天子袷禘巡狩有度，考功责实，外内之制各得其宜，四方之事无蓄滞，上下交通，则山泽出灵龟宝石，麒麟至苑囿，六畜繁多，天苑有德星应。案申颖《秦书》：苻坚建元六年

四月，天苑有大星，色甚白，占者以为太平之祥，乃立望气台于宫左。冬十一月平燕国，擒慕容暉。

《含文嘉》曰：天子行乡射饮酒之礼得其宜，则曰大德，天苑左右角皆有大德星应。

《海中占》曰：德星守建星，君臣俱明，天下更平，五谷更兴。

宋均曰：含誉瑞星，光耀倡彗。

《援神契》曰：喜则含誉射。

## 客星名状二

黄帝曰：客星者，周伯、老子、王蓬絮、国皇、温星，凡五星，皆客星也，行诸列舍十二国分野，各在其所临之邦，所守之宿，以占吉凶。又曰：客星大而色黄，煌煌然，名曰周伯，见其国，兵起，若有丧，天下大饥，人民流亡，去其乡。又曰：客星明大白淳然，名曰老子，所出之国为饥为凶，为善为恶，为喜为怒，常出见则兵大起，人主有忧。王者以赦除咎则灾消。又曰：客星状如粉絮拂拂然，名曰王蓬絮，见则其国兵起，若有丧，白衣会，其邦饥亡。

《荆州占》曰：王蓬絮星色青而荧荧然，所见之国风雨不如节，焦旱，物不生，五谷不登，多蝗虫。

黄帝曰：客星出而大，其色黄白，望之上有芒角，名曰国皇，见则兵大起，国多变，若有水饥，人主恶之，人多疾。又曰：客星色白而大，状如风动摇，名曰温星，常出四隅。出东南，天下有兵，将军出于野；出东北，有千里暴兵；出西北亦如之；出西南，其国兵丧并起，若大水，人饥。

石氏曰：温星出东南，为大将军服屈不能发者；出于东北，暴骸三千里；出西亦然。

黄帝曰：客星见其分，若留止，即以其色占吉凶，星大事



大，星小事小，星色黄得地，色白有丧，色青有忧，色黑有死，色赤有兵，各以五色占之，皆不出三年。

巫咸曰：客星入列宿，中外官者各以其所部舍官名为其事，所之者为其谋，其下之国皆受其祸，以所守之舍为其期，以五气相贼者为其使。

### 客星犯月三

《河图》曰：日月与大星昼并见，是谓争明，大国弱，小国强。

《河图》曰：大客星流入月中无光，当有与君俱并兵死者。又曰：客星入月中，有破触月，臣弑主，有内乱。

《洛书》曰：客星入月中，有破军。又曰：大星入月中，臣弑主。又曰：大星入月，月无光，其国再伐而亡。一曰其国当者灭亡，四夷来侵。又曰：居月见，不出三年，人主死，不死国有殃。又曰：星见月中，不出其年主忧。又曰：月末中而日星入之，有贼人为政者，在东方，文者长，武者亡；月过中而星入之，有贼人为政者，在西方，武者长，文者亡。又曰：他星入月中，兵将起，他国有来降者。

高宗曰：星入月中，将有大兵

《海中占》曰：星入月中，其国若有忧。一曰不出三年，臣胜其主。

京氏曰：星入月中，臣贼其主，夺其家。又曰：月中有星，天下有贼，星多者贼多。又曰：星入月中，大臣谋伐其主，主令不行。

《荆州占》曰：星入月，其国有丧。又曰：星入月中，有破军杀将。又曰：大客星入月中，月无光，其国灭亡，四夷来侵，期五月若十月。又云：客星贯月，其国内乱，大臣死。

《洛书》曰：星在月右角者，秦氏丁氏为奸，在西宫中。

又曰：星在月左角，窦氏宋氏为奸，在东宫中。星在月上者，邓氏司马氏为奸，在南宫中。星在月下者，赵氏李氏为奸，在后宫中。星在月两角，刘氏为奸败。

《孝经内记》曰：月在星角者，臣与黄门僮女人阴奸为贼；两星在月角者，臣与人君共作奸；一星在月中，臣与君妇女共作奸谋；一星在月下者，后宫列女要臣为奸也。

《河图》曰：星在月阴，负海国有胜。星出月下，芒相烁也，君死人饥。

京氏曰：星与月同光，臣下作乱，人民非上，令不行。

甘氏曰：星食月，其国相死。

《洛书》曰：星毁月，下司上。

### 客星犯岁星四

《荆州占》曰：岁星与他星合，人主不安。又曰：岁星与他星薄之，主有谋。又曰有贼。又曰：客星与岁星斗，不出其年，强国易相。

巫咸曰：他星守岁星，越有忧。一云城邑有忧。

甘氏曰：有星守岁星，人主有忧。

《春秋纬》曰：岁星与他星会而斗，因破他星，人主不宁。他星薄破之，主有谋贼害。

### 客星犯荧惑五

石氏曰：荧惑与他星会而斗者，皆为祸。

《荆州占》曰：荧惑与他星会而斗，天下兵起，他星破荧惑为祸，荧惑破他星会，事虽有，不能为祸。又曰：荧惑与他星合，相陵而斗，二星相近者其殃大，相远其殃小。

## 客星犯太白六

甘氏曰：有星入太白中，强国以战亡。又曰：有星入金星，天子伐诸侯，武士大将死。

郗萌曰：县乱星出也，常出太白之旁，相去三四寸所，星出天下大乱。又星从他所来，之太白旁居与往来，亦为使，其事急。又太白与他星过于四方，必有大败。又太白与他星遇，太白避他星，兵，畏他星，避太白，兵成。

## 客星犯辰星七

巫咸曰：有星入水星，天下大水，大理御史官多死。

班固《天文志》曰：辰星与他星遇而天下乱。

石氏曰：辰星与他星会，光相薄，乃为害。不相及，虽同会不为害。

《荆州占》曰：辰星与他星会，破之，刑事行；他星不破，刑事不害。石氏曰：辰星出与他星遇而斗，天下大乱。

## 卷七十八 客星占二

### 犯东方七宿

#### 客星犯角一

甘氏曰：客星干犯两角间，白者军起不战，邦有大丧；其色赤，战所指，必有破军侵城，期七十日或三年。

石氏曰：他星入左角，兵吏有来击者，色赤皆以兵击，黄皆以土讼，白皆以义，黑皆以死，青皆以忧。

巫咸曰：客星入左角，狱多死囚。

《荆州占》曰：黄星若白星入左角，里有受咎者。又曰狱官吉。入右角，尉有喜。

《荆州占》曰：赤星入左角，兵吏有攻者也，黄讼土事，白以好讼，青以忧讼，黑以死讼。

石氏曰：白星入右角，兵吏有易者，青以忧去，黄以好去，白以义去，黑以死去。

《海中占》曰：赤星入右角，兵吏有置兵军受命者。

夏氏曰：客星入角，五谷伤，蝗虫生。

郗萌曰：黑星入右角，兵吏有以丧置兵者，色黄若白，以好置兵，青以忧置兵。又曰：客星入角，将相后族家有收戮者。

石氏曰：赤星从两角间过，不入亢中，有兵，色白有过客，色黑有过丧。郗萌曰：有星出亢入两角间，君有使，诸侯有口令，色赤言兵，黄言土，白言义，青言忧，黑言凶。

石氏曰：他星出左角，狱吏易者，色赤以兵，色黄以好去，色白以义去，色黑以死，色青为忧。

郗萌曰：有星出左角，与星相迫，大如缶，赤如血，其名为祸星，三日三夜不入，命曰动兵，三年而国亡，以其日占之。又曰：黄白星出左角，狱啬夫受挺，色青有大忧，色黑有死者。

石氏曰：有星出右角，有惊将，色赤将不胜，青忧，黄将去，白不战，黑将死。

《海中占》曰：大赤星出右角，国门有出兵，左角国入兵。

郗萌曰：黄星出右角，国有惊，一云兵惊。不战受地，星白者不战而进，色黑青者战不胜凶。

《荆州占》曰：赤星出右角，郗萌曰：出右角入左角也。将有攻吏者，国有惊。其星不摇散不统绝，战胜。

巫咸曰：客星出角，臣谋其主，贼从外来，天下大乱，将相将有诛者。

《海中占》曰：赤星出角亢间，国邑有围者。

郗萌曰：大赤星若白星出角亢，国有大盗，黄星出北，止天门中，天下兵在外者罢，客星出角，兵大起，期不出二年。

《荆州占》曰：赤星出两角间，国有恐，人民惊。又曰：经两角间，军道塞。

《二十八宿山经》注曰：有客星如半席，出于角亢，则其年韩土有死兵，公使大臣谋死，多灾殃。

郗萌曰：赤星经两角间，国门闭，可以观邑门之闭开也。星白，军在外道塞。赤星从两角间过，不入亢中，有过兵。黄白星数就右角若左角，兵使有受地者。赤星大如锋矢，赤如鸡血，数就右角若左角，兵使遇贼。

《黄帝占》曰：大黄星之两角间，有贵客来见，君庙将有事。

《海中占》曰：黄星起右角之左角，尉理受执。

黄帝曰：赤星止两角间，国门闭，其食道绝。

陈卓曰：客星舍角，天下有陷地。

郗萌曰：客星入舍右角，小人有兵多恐，兵起不用。

石氏曰：客星守左角，色赤，天下大旱，五谷不成。

郗萌曰：客星守左角，狱吏多冤。

石氏曰：客星守右角，有大水。

巫咸曰：客星守右角，一曰色赤，多暴虐事。

郗萌曰：客星守南角间赦一云黄星守两角间。不尽出，期不出四十日。

班固《天文志》云：客星守两角间，奸人在宫庭。

《黄帝占》曰：大客星守角白，天下中隔不通。

石氏曰：客星守角，强臣宠取国势；他星守角，狱多讼。

巫咸曰：客星守角，五谷不登，大旱，不生草木。

郝萌曰：守角，臣谋其主。一曰贼臣从外人。又客星守角，大旱，五谷不熟，焦旱不生。一曰色赤守角，有兵。又客星守角，天庭大臣有乱者，凶。一口入天庭，十日天下大乱。又客星逆行守左角，谷贵。

《荆州占》曰：客星犯守角，大旱，五谷不登，富人贫。又赤星留守两角间，有兵，国闭，青有大狱事，白有义来者，黄有土功，黑有凶，人主有殃。

### 客星犯亢二

甘氏曰：客星干犯亢，中国不安，兵起政乱，期一年。

石氏曰：有星出入角间，入亢，色赤，有过兵，白有过客，黑有过丧。

《海中占》曰：客星数入亢，国疾疫，出亢疾已。

夏氏曰：客星入亢，人流亡。

郝萌曰：客星入亢天庭十日，天下大乱。又客星入亢，有小旱，期三十日。又曰旱。又曰有小水，八谷水伤。又曰五谷不登，为后年。一书云：五谷丰，人有礼让。又曰：客星入亢，兵战，士卒行，不出九年。又曰天下大乱。

《荆州占》曰：客星入亢中，天下有德令。色白期秋，赤期夏，黄期六十日，黑期百二十日。又有星出氏入亢中而散，人主有病，从带而上。

《东官侯》曰：赤星入亢，有宗庙事。色黑庙中有丧，色青见血，白有兵，女主有丧。

《百二十占》曰：他星入亢，有来使者受命于庙，色赤言兵，黄言土，白言义，青言忧，黑言忧客。

石氏曰：有星出亢，有出使者，以色占，赤言兵，黄言土，白言义，青使者忧，黑使者凶，一曰多兵。

郝萌曰：有星暴出亢，爰臣以口舌事自杀，期一月若一年。又黄星白星出庙以北，中人有受赐者。又黑星出庙北而南入庙，女主有客事者，有庙之事。又客星出入亢，五谷不登，为后年。

石氏曰：有星经两角间入亢，诸侯客有来者，庙将有事，有口令。

《海中占》曰：大赤星从角就亢，人主遇贼。

郝萌曰：客星与亢合，相为乱，国易政。

黄帝曰：赤星集亢氏间，廊庙间有陈兵。

《海中占》曰：客星出亢，若守之，其国大旱，五谷伤，贵人去其乡，人民流亡。若芒角变色，地动为害，期三年。

黄帝曰：客星守亢，国臣不祥。

巫咸曰：客星守亢，有德令。

郝萌曰：客星守亢，天下通臣有谋其主者，军败不成，多虫蝗，余贵丝贵，有奇令。又客星守亢，下田伤。

《东官侯》曰：客星守亢，则五谷频不成，余贵。

《荆州占》曰：客星留守亢，色赤旱，青黄人去其乡，黄无他害，黑人民流徙，贵人忧。芒角变色，地动摇宫。

《海中占》曰：客星犯守，国多妖祥。

### 客星犯氏三

甘氏曰：客星干人氏中，后宫有乱，暴兵动，期百八十日，远三年。

黄帝曰：有客星入氏，色白即将裔夫受赐，色黄迁，色青黑，不死则凶。又客星入氏，日食地震，余贵，石百五十，有奇令。一云余石千五百，谷为玉。

石氏曰：客星入氏，棺槨贵。

甘氏曰：客星入氏，《文曜钩》云守氏。边邦有献女者。

《海中占》曰：大赤星入氐，卒大出。

郗萌曰：客星数入氐，有疾。数出，疾已。

陈卓曰：客星入氐，兵从边起，若后宫乱，暴兵动，五谷不成。

《荆州占》曰：客星入氐，麦麻羊贵。

黄帝曰：客星出氐，一云入氐。色黄白，与两星齐，期十日而赦。去两星二尺，期百日有赦。

黄帝曰：有星出氐，若有疾于国外。

《文曜钩》曰：客星出氐，人主忧病，一曰有德令，若边国有献女者。

郗萌曰：有星入氐中而散，人主有疾，从带下而上。

《荆州占》曰：有星入氐中，人主有疾，从带而下。石氏曰：客星起氐中，天子不安，宫移徙，女失坐。

郗萌曰：客星乘氐下星，马牛大贵。

黄帝曰：客星逆行，入贯氐中央，日月薄食。

郗萌曰：客星逆入贯氐中，大人夺执失威，大臣乘国之权。又客星逆乘灭氐，有土功事。

黄帝曰：有星守氐，色黑，大水，其国有复王。白，廊庙有忧，黄有喜，赤有兵，在庙中，近臣谋弑贵人。

《文曜钩》曰：客星守氐，人主忧带下病。石氏曰：客星守氐，有谋臣欲危其主。

巫咸曰：客星守氐，兵起国亡，天下受图而俱起亡军。

《海中占》曰：客星守氐，有德令。

郗萌曰：客星守氐，天下中外不通，马不急行，国易政。  
案《后魏志武纪》曰：桓帝时有黄星见于楚宋之分，辽东殷雋善天文，言后五十岁当有真人起岁沛间，其锋不可当。至五十年而太祖破袁绍，天下莫敌。

《荆州占》曰：客星守氐，木器布帛倍价。



郗萌曰：客星逆守乘灭氐，诸侯王坐法者，诛绝无后。

#### 客星犯房四

《河图》曰：客星干房，失春政不法。

甘氏曰：客星干犯房，王国空，兵起，人饥，骨肉相残。

黄帝曰：客星入房，余石千钱，人多饿死相食，多移去其田宅，皆期后年。

石氏曰：客星入房，输食有人者；出房，输食有出者。赤星入房，国名宝用，龙马贵。客星入房，诸侯有献马者，余大贵。

郗萌曰：赤星就房，国围。又曰：入房马贵，出房，名宝有出者。客星入左服若右服，其有来献马者，出左右服，人君使诸侯以马为币。客星入房，有大臣弑其君者。又曰：入天府，天下有变更之令，若有急令。客星入天厩之中，满三日而去，有赦。

《荆州占》曰：白星入房下北门，有攻战，排门者，在于近臣，期百二十日。客星入天府，有德令。一曰有贼人，一曰有兵发，一曰天下且有大丧。

韩扬曰：白星入房，赦。

黄帝曰：客星出，《玉历》云：出若守之。在阳为旱为丧为饥，在阴为兵为水，亦为饥。

班固《天文志》曰：汉孝武元光元年六月，客星见于房，二年十一月，单于将十万骑入武州，汉遣兵三十万以待之。

郗萌曰：客星出房，近臣谋主若暴死，期一年。又有星出房左为父，次为太子，出房右为母，次为长女。

《荆州占》曰：青星出右驂若左驂而散，人主为牛犇败。

郗萌曰：客星在表之北，多水，去下田，耕高田；在表之南，多旱，去高田，耕下田。客星在中道，天下太和，马贵，

一曰牛贵。客星舍房左右，群臣有夺地者。又曰吞药死者。

石氏曰：客星守房，左驂马贵。客星守房，宫有谋臣，臣欲无其主。

巫咸曰：客星守房，余贵。

郗萌曰：客房，天下有急令，且恐，治驰道。又曰马疾，一曰人主以马为忧。

《海中占》曰：客星犯钩铃，主有犇马之败。

石氏曰：客星犯钩铃，王宫大乱，不出三年。

### 客星犯心五

石氏曰：有星入心，诸侯有来使者；星出心，君使人于诸侯。色赤言兵也，色黄言土功，色白言义，色青言使者忧，色黑言客凶。

甘氏曰：赤星入心留回之，天子不有丧当兵死。

夏氏曰：客星入心，有德令。

郗萌曰：客星入天子之宫，十日成勾己，天下有大赦。

客星入太子宫，太子益官。一本云太子不得代。黑星出房而入心，近臣谋主，若暴死。期一月中。客星入心，丞相忧疾。又曰大赦，期三月。赤星入心右星，太子有兵；入心左星，庶子有兵。青黑星入心右星，太子有忧若有罪；入左星，庶子有忧若有罪。黄白星入心右星，太子受赐；入左星，庶子受赐。

甘氏曰：客星出心，天下大旱，兵起满野，车骑用，国易政，期三年。

郗萌曰：客星出心中央星以南若左右，有抵罪而走者，黄白无占，青忧，黑死，赤以兵随之。又曰：心上有一星，去心一尺所，有中谋下，有星去心一尺所，有外谋，星多谋多，星少谋少，谋多者谓人多也。上下俱星，中外俱有谋，星远人远，星近人近。近期百日，中期在冲月，远期在一年中。

《荆州占》曰：以四月五月在心尾间，至七月八月，大虫从东南来。

黄帝曰：有星大如疋布，贯尾判心下星，诸侯有来附兵于君者。

郗萌曰：客星舍心，兵起。客星逆乘灭心，有谋易君者，宫内有乱谋，权在宗家，得执大臣。

黄帝曰：客星守心，不过三旬有善令。赤星大如锋矢，赤如鸡血，入守心，人主遇贼。其出心也，行道甚远，人主戮于千里之外。

《圣谕符》曰：客星守心，五十日不去，兵大起，国有丧，人民以饥亡，余贵十倍，期不出百八十日，远一年。

巫咸曰：客星守心，余贵人饥，兵臣谋，有奸臣；成勾己，有德令。期三月十月，稷、布大贵。

郗萌曰：客星守心，有大土功，有大丧，大人当之。又曰人疾。客星守心中央星，大人忧，守太子，太子得立，守庶子，庶子诛。客星守心，赤为亡兵，青黑为忧。客星守心，二十日，谷大贵。

《荆州占》曰：赤星守心，大军兵满野，车骑用，布帛贵，娟女运谷，三年易改。

《杂候集》曰：他星守心，其国亡，邑有善令。

《天旬占》曰：客星守心，蜚蝗大起，余大贵十倍，万人饥，流亡在道，下有谋反逆者。

石氏曰：客星犯守心，宫钟大鸣，剑戟大横，大臣相疑，天下兵起心变。期急，近期七日，中期七十日，远期百八十日。

《荆州占》曰：客星犯乘守心者，大旱，天下备火，近期十日，远期三年。

## 客星犯尾六

黄帝曰：客星入尾，岁饥，人相食，多死者。

《圣谕符》曰：客星入尾，大水，其人之顺行，有德，逆行凶。

石氏曰：客星入尾，北夷大饥，来降。客星入尾，人多移徙。又曰：入天司空，多土功事，有尾之禽大贵，天下大水。黑星若苍星入尾，故臣有来使者。白星入尾箕，边城将侯司空死之。客星入尾，皇后有以珠玉簪珥惑天子者。客星入尾，多风。一曰水祥，一曰雨降。客星入尾，宫人恶之。

《荆州占》曰：客星入尾，天下大振，一东一西，一南一北，男不得耕，女不得织。

## 客星犯箕七

《黄帝占》曰：客星守箕，多土功事。又曰：守箕北小熟，守箕东大熟，守箕南小饥，守箕西大饥。石氏曰：客星守箕，天下饥，色赤则为兵。

郝萌曰：客星入箕，民流亡；若出箕，宫人出。

《荆州占》曰：客星入箕，多风暴雨，宫女不安，或外国有使来，一曰官木用。

武密曰：客星入箕，则有风雨。

《天文总论》曰：客星入箕，有土功事，守箕则秋冬水灾。

《天文录》曰：客星出于箕，民饥，大臣有见弃者；入箕，北夷饥。

## 卷七十九 客星占三

### 犯北方七宿

#### 客星犯南斗一

甘氏曰：客星干犯南斗度，其国必乱，兵大起，期一年。

陈卓曰：客星干犯南斗，王者疾病，臣谋其君，子谋其父，弟谋其兄，是谓无理，诸侯不通，天下易政，期百八十日，远不出一年。

黄帝曰：客星入南斗中三尺，三日不去，城郭闭，道不通，贵人坐之。又曰：入铁钺，外兵擒，士卒杀伤其将，外国来降。《北官侯》曰：国来而不降。

《河图》曰：有星入南斗，有君来见吾君者。

《圣治符》曰：小赤星气交入南斗建中，此扬见精者，宫人子方生，非其子也。

石氏曰：有星入南斗，诸侯客有来见天子者，出斗，天子使人之诸侯。色青皆言忧，赤皆言兵，黄皆言土，白皆言义，黑皆言凶。客星入南斗中三日三夜，天下有赦，期三月。

巫咸曰：客星入南斗，诸侯不通天子，且有举兵伐父者，弟攻其兄。

夏氏曰：客星入南斗，诸侯相攻伐。

郗萌曰：客星入南斗，多盗贼。以十一月四月入斗中，天下赦无馀囚。期六十日，远期六月。

陈卓曰：客星入南斗中，谷不登，人相攻。

石氏曰：客星出南斗，兵革大起，有大水，天下饥，人相食。一曰关梁不通，期二年。

《宋书·天文志》曰：晋孝武太元二年三月，客星在南斗，至六月乃没，占曰有兵，一曰有赦。是后雍、兖、冀常有兵役。十二月正月大赦，八月又赦。

郗萌曰：赤白星暴出南斗魁前，宫室兵起。中魁神，将军坐之，戮死。

《帝览嬉》曰：客星居南斗，道不通。

黄帝曰：客星守南斗，五谷登，贱，贵于后冬。

《文耀钩》曰：客星守南斗，五十日，大臣有谋，兵大起，国易政，王者有忧，期三年。

黄帝曰：客星守南斗，其君不亲信其臣，有兵兴。

石氏曰：客星守南斗，天下有喜福，五谷熟。

郗萌曰：客星守南斗，诸侯谋王者，役军人皆走。又曰：火旱，宫庙有火之忧，人多疾疫。又曰：客星守南斗，天下易政。一曰兵官忧。一曰以水饥。

班固《天文志》曰：元帝初元元年四月，客星大如瓜，色青白，在南斗第二星东可四尺。其五月，渤海水大溢。

《荆州占》曰：客星守天库，兵革起。

## 客星犯牵牛二

陈卓曰：客星犯牵牛，有牺牲之事。

石氏曰：客星中犯牵牛，吴越兵自立，三年而灭，期不出一年，远三年中。

《彗要占》曰：客星干犯牵牛，中国起兵。

黄帝曰：客星入牵牛，诸侯有兵。又曰：入天鼓，外国来降。

郗萌曰：客星入牵牛，大臣外交诸侯。赤黄白，成，青黑，败。又曰：有星入牵牛，诸侯客有来以四足虫为币者，出牵牛，君使之诸侯，以四足虫为币。色青皆道疾，黑死不至。

《荆州占》曰：客星入牵牛，有兵发而行。

甘氏曰：客星出牵牛，有兵起，大将出，若关梁不通，若地大动，马牛贵三倍，期二年。

巫咸曰：客星出牵牛，其国兵起，大将出，若关梁不通，多死，期不出一年。

陈卓曰：客星出牵牛，兵北行。

郗萌曰：客星舍牵牛，臣谋其主，五谷不登。

《续汉书天文志》曰：孝明永平九年正月戊申，客星出牵牛，长八尺，历建星，至房南灭，见五十日。牵牛主吴越，房心为宋，后广陵王荆与沈凉楚王英颜忠各谋逆事觉，皆自杀。广陵属吴，彭城古宋地。

石氏曰：守牵牛，越有善象献中国。

甘氏曰：赤星守牵牛，人民为乱。

郗萌曰：客星守牵牛，王者外其大臣。又曰：客星守若入牵牛，盗贼在江海，岁多水。案司马彪《天文志》曰：孝顺永建六年十二月壬申，客星芒气长二尺餘，西南指，色苍白，在牵牛六度。后一年，会稽海贼曾於等杀长吏，拘夺吏民。扬州六郡逆贼章何等犯四十九县，大攻吏人也。

《地轴占》曰：客星守牵牛，地大动。

《海中占》曰：客星出入守牵牛，马贵，价三倍。

### 客星犯须女三

陈卓曰：客星干犯须女，邻国有以奇女来进侍者，妾进为后。

石氏曰：客星入须女，诸侯有进女侍者。

陈卓曰：客星入须女，麻贵，诸侯有兵，江淮道路不通。

郗萌曰：客星入须女，留不去，天下诸侯王有不通者。一曰父子不通。

《荆州占》曰：客星入须女，有嫁女娶妇事，多丝帛，絮贵。

《帝览嬉》曰：客星出须女，宫人有谋，女主忧，兵起宫门，若贵人有死，期一年，远二年。

石氏曰：客星出须女，有嫁女事，黄白吉，青黑凶，赤忧。

郗萌曰：客星暴出须女，女主戮罪，期一年。又客星舍须女，留不去，有奇令。

《百二十占》云：他星出须女，御女有出者。

黄帝曰：赤星守须女，女子之丧。

《孝经内记》曰：客星守须女，有奇女降，丝絮布帛贵。

甘氏曰：赤星守须女，人民为乱。

甘氏曰：客星守须女南，有献女，贱女暴贵。

郗萌曰：客星守须女，女子乱其国，亡其政。赤星守须女，有急兵食，贵人自卖者。一云女妾为妻。

陈卓口：客星守须女，余贵。

《北官侯》曰：青星人须女，多以兵事死者。

《百二十占》云：他星人须女守之，天下有内美女者。

《荆州占》曰：有黑星出须女，有丧。

#### 客星犯虚四

郗萌曰：客星干犯虚中，哭泣之事，有井田之法，改制之事。

黄帝曰：客星入虚，有军在外大饥，将离散，卒死亡，天下有大令。

石氏曰：客星虚中，主出将。有二客星，天下无处主。客星入虚中，色赤，有游客入国。色黄白吉，色青黑有凶事。

郗萌曰：客星入虚，种贵，余大贵。又曰：天府有德令，



期十一月。客星入虚中三日，环之，有赦，期七十日。客星入虚，大人当之。客星入虚危，色赤，有赀客来者，色白，有无币客来者。赤星入虚，余贵，人有自卖者。

《荆州占》曰：客星入虚，天下大乱，政急，大人忧，其国饥。

《百二十占》曰：他星入虚危，青若黑，有以丧事使者。

石氏曰：有星入虚危，色青黑，有哭泣之事。客星出虚，大臣为乱，兵大起，国有丧，天下有哭泣之事，期三年。案司马彪《天文志》曰：孝安永初三年十一月甲午，客星见西方，色苍白，在虚危南，至胃昴。至建光元年三月癸巳，邓太后崩。

郗萌曰：客星入虚，君使人之诸侯，赤无币，青黑有告丧者。客星出入虚，天子自将兵于野。客星舍天府，天下有急行，期十月。

石氏曰：夏三月视虚中，有奇星，一在虚，邦不居；其处有奇星二，将死；有奇星三，相死；有奇星四，将军败；有奇星五，大凶。

司马彪《天文志》曰：客星在虚危为丧。

《孝经章句》曰：客星守虚，臣乱其上而不知。又曰：国君死，或有德令。

甘氏曰：客星守虚，其国兵。

《玉历》曰：客星守虚，三十日不去，其国君死，若大臣有戮，兵丧并起，期百八十日，远一年。

《百二十占》云：他星守虚，有谋。

巫咸曰：客星出虚而守之，其国君死，若大臣有戮，期百八十日，远一年。

石氏曰：客星犯守虚，近一年，远二年，当有哭泣之事。

郗萌曰：国有哭临之事。

陈卓曰：客星犯守虚，天下有谋。

## 客星犯危五

郗萌曰：客星犯危，国有哭泣之事。案《宋书天文志》曰：魏明帝景初二年十月癸巳，客星见危，逆行，在离宫北、滕蛇南，三年正月，明帝崩。一曰多雨水，五谷不收，人相食于道。

《荆州占》曰：客星入危，有土功，王者筑宫室，不出一年大水，不出三年大饥，万人无食。

《百二十占》曰：他星入危，有盖屋之事，色赤大变，青忧。

甘氏曰：客星出危，大臣被刑，法官有忧，国多水灾，有土功，王者筑宫室，期不出年。

甘氏曰：赤星出危，以火废国。

郗萌曰：客星出危中，大水，一曰大饥。

甘氏曰：客星守危，王者迁都，其国更立侯王。

郗萌曰：客星守危，天下必有易政更令。客星守危，人主失势夺土，强臣专国，命在台族。又曰：具有大风，有所危败。又曰：不出三年，王者盖屋治宫，天下匠工起，多土功。又曰人流亡。

郗萌曰：客星守危，国政危。

巫咸曰：客星入守危，众大贵，不出三年。

《荆州占》曰：客星守危，若彗星干之，王侯有薨者，王改服，不出百八十日。《黄帝占》曰：以日入命其国。

黄帝曰：客星入守危若出危，大饥，人食，贵为后年。

郗萌曰：客星守坟墓，人主有哭泣之声。

## 客星犯营室六

郗萌曰：客星犯营室，国且有宗庙哭泣事。

黄帝曰：奇星入营室中者，天子有忧。

《河图》曰：客星入营室，顺行有德，逆行凶。

《圣谕符》曰：黑星起庙南，入庙北，女主有死者，死者废庙之事。若出庙以北行，中人有鸩死者，或曰庙祭之事。黑星出月入庙，人主有药死，不然有药人主者。

巫咸曰：客星入营室，天下有兵。又曰：人民流食千里。

《海中占》曰：客星入营室，有军，军中大饥，将离散，士卒死亡。

郗萌曰：客星入营室，外夷兵起，货仓多饥死者。客星入营室，边外起兵，此为外夷之事。客星入营室，国乱，去其主。奇星入营室，不盗即贼，大乱。又曰：无兵兵起，有兵兵罢，星大军皆大，星小军皆小。黑星起庙北而南入，女主恶之。客星从东壁入西壁，庙若城郭有起者。赤星入庙，人臣谋主。

《荆州占》曰：他星入营室，诸侯有来使者，出营室，君使人之诸侯。色赤皆言兵，白皆言义，黄皆言土，青皆有忧，黑皆凶。又奇星入营室，有阴雨，垣墙无立者。又黑星出入庙，庙上有死者，不死者见血。起庙北而南入，女主有死者，有庙废之事。

《圣谕符》曰：白星出庙正南，廷有兵。或曰赤亦然。客星出营室，国有土功，人大饥，大臣为乱，兵大起，士卒亡。齐伯曰：期一年，不二年。

《春秋纬》曰：星赤黄出营室中，名曰怪获，主奇去其国，贵人有死者。上旬见，其年发半白，来月上旬死；中旬见，其年鬓白，来月中旬死，偏任后雄烈之毒也；下旬见，其年盛壮，来月下旬死，将用事，毒害流。

郗萌曰：客星出西壁若东壁，城郭有坏。者赤星出庙上正南抵庭，有兵作，庙上有兵。白星出庙以北，中人有受赐者。

黄帝曰：赤星从东壁之西壁，臣有戮其主。

《圣治符》曰：赤星在营室，有死者，不死者见血。

郗萌曰：客星舍营室，其国且作宗庙，多土功事。留不去，匈奴有兵来。

石氏曰：客星守离宫，兵起，人君有忧，一曰有急。

甘氏曰：客星守营室，有军者客降，主得人地。

郗萌曰：客星守营室，乱出其城郭之事。有奇星守东壁，天子为军自守。一曰天下摇动，在四方。

黄帝曰：客星人若守东壁，诸侯相谋。

郗萌曰：客星人若守东壁，天下且有大丧，白衣满野。

## 卷八十 客星占四

### 犯西方七宿

#### 客星犯奎一

石氏曰：客星犯奎，国有沟渎之事。

黄帝曰：客星犯入奎，破军杀将。

《甄耀度》曰：客星乱芒而角入奎，有破军杀将，王者有忧，人主当之，期三年。

石氏曰：客星人奎，外夷起兵，麻象贵。

甘氏曰：客星人奎，强国夺地，变争兵起，白衣自立，扰中国。

郗萌曰：客星人奎，刀剑布帛贵。赤星人奎，兵起，期十年。一曰出奎国兵出，一曰数入奎国兵聚。客星人奎，西夷有兵来到而还。客星人奎，诸山水涸。

《荆州》曰：客星人奎，边兵大动，土功大起。

陈卓曰：客星人奎，武库之臣且有罪。

《西官候》曰：客星入奎，赤，边兵大动；黑，天下沟渠之事；黄，土功大起。

石氏曰：有星入奎，有无所受命而来使者。

《荆州》曰：有星入奎，有陂渎之事于国中；出奎，有陂渎之事于国外。黄星入奎，宫有土功事，宫中有变。

《西官候》曰：赤星入奎，兵聚，有败军。

巫咸曰：客星出奎，边兵大起，白衣立为王，刀剑大。出奎国兵出，入奎国兵聚。

《荆州》曰：星赤黑出奎，有败军。

《西官候》曰：赤星出奎，外夷动兵。

石氏曰：有星出奎，有无受命矫使者。

巫咸曰：赤星逆行，从娄至奎，有兵。

郝萌曰：客星舍奎，留不去，饥。一曰缙帛贵。

黄帝曰：赤星守奎，余贱。

郝萌曰：客星守奎，余贱，贼臣在侧，其事败。又曰谋臣有巧伪惑天子者。一曰国以佞亡。又客星守奎，天下修兵，臣有国者。客星守奎，有杀霜不时下者。一曰牛疾疫。一曰六畜贵。

《荆州》曰：客星守奎，王者忧，大人当之。又曰鲁国起兵。

《玄冥占》曰：客星守奎，强国争起兵，有白衣自立动国。

## 客星犯娄二

石氏曰：客星干犯娄，国有大兵，四时纪祠。娄主苑牧给享，祠天以奉宗考，王者以承天，诸占远不出三年。

黄帝曰：客星入娄，余大贵，在后年。

石氏曰：客星入娄，外夷兵起，有聚众之事。

郗萌曰：客星入娄中三日，环之，天下有赦赎作，期七十日。赤星入娄，兵起，期十年。

《荆州》曰：客星入娄，旱千里，有火灾，其国燔烧，金银用，仓库虚，天下人民多疾病。

《百二十占》：他星入娄，有聚众于国内。

石氏曰：客星出于娄，边城和。

《荆州》曰：客星出娄，有罢众之令。

《西官候》曰：有星出娄，有白服众事。

《百二十占》：他星出娄，有罢众于国外。

石氏曰：客星守娄，人民乱。一曰有聚众之事。

郗萌曰：客星守娄，天下大虚，臣有惑天子夺主之权者，岁多狱讼，布帛贵。又曰：有从诸侯来附其君不成。一曰多狱讼。又曰：客星入若守娄，其国且燔烧困仓。

《海中占》：客星出娄而守之，天下欲有分夺国者。一曰客欲夺王国，边境侵地，期一年，远二年。

郗萌曰：客星守犯娄，天下欲分社稷者，白衣自立者，牛马贵。一曰有白衣之聚。

### 客星犯胃三

石氏曰：客星干犯胃，五谷不成，仓库空虚。

《海中占》：客星犯胃，有军发之事。

陈卓曰：客星犯胃，仓粟用。

石氏曰：有星入胃，有葆食之事人，出胃，葆食之事出者。又曰：客星入胃，王者有仓之事，其有出胃中，有出谷粟事。

郗萌曰：客星入胃中，三日一环之，期七十日，赦。又曰：五谷大贵，天下无聚物。

《荆州》曰：有星入胃，王者有廩仓之事。

《百二十占》：客星入胃，饮食之事入，出之，饮食之事出。

黄帝曰：客星出胃入廂，人主食药死。一曰有药人主者。

《荆州》曰：客星出胃，有出谷粟事。

《玄冥占》曰：客星出胃，王者备四夷，强臣陵国，有大兵天下发粟金铜之事，期百八十日，远年。

《孝经章句》：赤星守胃，国无事。

甘氏曰：客星守胃，强臣陵国。

郝萌曰：客星守胃，留不去，天下饥。

《荆州》曰：客星守胃，天下有发粟事，金铜贵。

郝萌曰：有星入若守胃，有奇令。又曰：客星乘灭若守胃，国官之仓有大兵，焚烧其仓。

#### 客星犯昴四

《黄帝占》：客星入天狱中二月，天下有赦，期五月。

石氏曰：客星入昴，有白衣之会于国内。又曰贵人有系囚者。昴浊之间，天街也，若客星守之，天下有谋虑。

郝萌曰：客星入昴，天下且有大丧。又曰：众狱，且妄杀不辜以误主上。客星入昴毕间，诸侯有谋上者。又曰：留三日，赦，不留有忧。客星从昴阳入，有客。

《荆州》曰：客星入天狱中，有德令，水泉出，民去本土，就丘邑。

《西官候》曰：客星暴出胃，入昴中，国大人暴死，期一年。

《百二十占》：他星入昴，贵人有德令；若出昴，兵众满野。

司马彪《天文志》曰：孝明永平十四年正月戊子，客星出昴，六十日。昴主边兵，后汉遣奉车都尉显亲侯窦固等将兵三

千余人击匈奴。

石氏曰：有星出昴，兵众满野，非丧则会也。

郗萌曰：客星从昴阴出，有走主。客星居昴北，有别离之国夺地死者。客星入若留昴，王者绝嗣，同姓有起入为主者。客星舍昴不去，天下囚多，则盗贼并起。若留十余日不去，回纥内相贼，国家兵起，回纥来降。有星入舍昴南，采一贵一贱。

《圣治符》曰：他星守昴，渔猎起。

石氏曰：客星守昴，万民乱。

甘氏曰：客星守昴，有诈称王命者，不出百八十日。

郗萌曰：客星守昴，谗臣有蔽主德者。又曰有谋以药害上者。又曰囚徒有聚兵弩攻狱者。

《西官候》曰：客星守昴，执法臣诛。

《客星占》曰：客星守昴，朔地殃，天下多乱狱。

《百二十占》：他星守昴，万民忧。

《文耀钩》：客星出昴，若犯守之，当有诈称王令，谪命中国，若有妄言谗谀者，必有自败。

郗萌曰：有星入守昴，金器刀剑贵。

《荆州》曰：客星犯守昴，谗谀贼臣在内，诸侯谋上。一曰有白衣徒聚谋虑。

### 客星犯毕五

黄帝曰：有星入毕中而复出，其星小小赦，星大大赦。

《圣治符》曰：客星入毕，顺行有德，逆行凶。

石氏曰：客星入毕，人主猎。一曰有以猎惑人主者。一曰兵起，边兵大动。一曰羊贵。又曰大赤星入毕口，天下大赦，期十五日。若三十日六十日，将相有大忧。

郗萌曰：客星入毕，多狱事。一曰贵人有系囚者。黄星入



毕，三夜常见，相死，九十日后死，百二十日大人当之。客星入毕中二月，天下有赦除责，期五月。客星入毕口，与两股齐者，有走主。又曰：期四十日兵发，率一日而十日兵罢。其去也视其东南西北所往，及其所近宿或受兵。客星入毕中，与两股齐，期四十日兵发，直一星，期二十日兵发，居，期十日兵发。

《荆州》曰：客星入毕，四夷兵起，并为盗。

《西官候》曰：客星入毕中，率一日为十日，诸侯女主当之，君有忧，先起兵者亡。

《百二十占》：他星入毕，有兵革谋。

《春秋纬》曰：赤星出浊，大卒出。

《孝经章句》曰：客星出浊，中国人为乱，有走君；在浊傍，有谗臣在傍者；入浊兵起。

巫咸曰：客星出毕，边兵为乱，四裔兵起，疆宇靡宁，天下饥，必有亡国，近一年，远二年。

郗萌曰：客星出毕，边有兵，车马有急行。

《荆州》曰：客星出毕，人主好畋猎。

郗萌曰：客星从毕赤黑阴出，有走主。

《西官候》曰：客星居毕中，不时出，主丧。

郗萌曰：客星入毕中，留不去，马贵，一曰牛贵。

黄帝曰：客星守毕，岁大饥。

石氏曰：客星守毕，大臣有谋者，边有谋臣。一曰谗臣蔽主之德。

甘氏曰：客星守毕，外国称王诈来，不可信，外臣谋叛，与近臣通奸。

郗萌曰：客星守毕，大臣忧，多阴谋，其事不成。一曰有土功，风雨不时，谷贵。又曰有走主。客星飞守毕，有德令。客星守毕，天子绝嗣无后。案《宋书天文志》曰：晋惠帝永兴元年

五月，客星守毕，光熙元年，惠帝崩，终无继嗣也。又曰：星守毕，后族可收者。一曰霜火下，一曰诸侯有谋虑，一曰沟水大出。

《荆州》曰：客星守毕，王者大将出。

黄帝曰：客星入若守毕，有福，有德令。

陈卓曰：客星犯守毕，大臣有诛者，无兵，兵罢。石氏曰：视其东西，知其往国受兵。河海盈溢，人民多流亡。

郝萌曰：客星守附耳，兵。一曰边兵尤甚。

### 客星犯觜觿六

《荆州》曰：客星干犯觜觿，其国破亡。

黄帝曰：客星入觜觿，车马有急，期四月五月。

郝萌曰：客星入觜觿，有大丧。

《荆州》曰：有星入觜觿，色青凶，亦有丧，黄若白吉喜，黑死，若有水灾，谷余百倍。

黄帝曰：赤白星入觜觿，若暴出觜，中臣与外臣谋弑其王。星游行，先觉，不得成；不行不明，不觉，期一月。石氏曰：星明期三月。

《百二十》占：他星入觜觿，有葆旅之事于国内，星出觜，有葆旅之事于国外。一曰兵罢。

巫咸曰：客星出觜觿，国有大丧，若有侵土欲为君王者，若有水灾，谷贵，余百倍，人多饿死，期不出三年。

陈卓曰：客星食觜觿，食大贵。

石氏曰：客星守觜觿，魏有良臣辅国主，在西南二千里。

甘氏曰：客星守觜觿，西戎动侵土，欲为君王者，崇礼以制义则国安。

郝萌曰：客星入守觜觿，牛马有急行。

郝萌曰：客星犯若守觜觿，其国破亡。一曰食贵，一曰有大丧。

## 客星犯参七

黄帝曰：有星入参中央，星色白，县令有赐若伐，色青黑，县令有罪。

夏氏曰：客星入参，五谷贵。

《百二十占》：他星入参，有衡石之事于国内；星出，有衡石之事于都外。色青黑，不出一年兵大起，国之边境坏。

石氏曰：客星入参中，边有暴兵起，边地围而坏。

郗萌曰：客星入伐，有兵，不足以伤。又曰：入天尉中十日，宫中有自杀者。入其阳为男，入其阴为女，皆期三十日。

郗萌曰：有星入伐，有斩刈之事于国内；若出伐，有斩刈之事于国外。色赤以兵斩刈，色白白衣斩刈。

石氏曰：赤星出参中央星，边有兵，县令自将兵。客星出参，边有暴兵起，边城有围，客军人国，若有战，期不出二年。

郗萌曰：有星出参中者，大臣有忧。一星出则一人有忧，二星出则二人有忧，三星出则三人有忧。客星出参，斧钺兵出；人，斧钺兵入。

《荆州》曰：客星出参而环绕之，边城兵起。

石氏曰：赤星出参，武卒用；若守之天尉中，媵嫡相距。客星在伐，色黑为水。

郗萌曰：客星在伐，色黄为土功，色白为丧。

甘氏曰：客星守参，亡地。

郗萌曰：客星守参，有小兵，大臣有执主之命者，若谗臣有女子惑天子者。一曰老人多死，马贵。又曰：更易君，色白为死，赤为兵，黄为易位，黑为忧，苍为小喜。又曰旱，余贵。

石氏曰：客星守参，魏多君子。

巫咸曰：客星入守参，诸侯国当之。

郗萌曰：客星守伐，诛大臣。

## 卷八十一 客星占五

### 犯南方七宿

#### 客星犯东井一

郗萌曰：客星犯东井，国有土功事，小儿妖言。客星犯乘守东井，此日国乱兵起。

《荆州》曰：客星干犯东井，其国用兵，大臣诛，期八十日。

黄帝曰：客星入东井，五谷不收，余大贵。客星出北斗入东井，有邑将治陂堤及水事。

《孝经章句》曰：客星入天渠，道途不通，以水为败。

司马彪《天文志》曰：孝安永初元年八月戊申，客星在东井弧星西南，是时羌反，断陇道，遣帅将左右羽林北军五校及诸郡兵征之。是岁郡国四十一郡三百一十五所雨水四渎溢，伤秋稼，坏城郭，杀人之甚也。

石氏曰：有星入东井，有客以水令来者。

郗萌曰：客星出柳入井，主浮船。又曰：入东井，君失政，臣为乱，大人当之。一曰宫中有大忧。

《荆州》曰：客星入东井，贵人死，若有奇令，多失火，火神从天下，妖祥自地出。

《西官候》曰：客星入东井，贵人有疾者。

《百二十占》：他星入东井，有水事于国内。

黄帝曰：客星出东井，宫中火起，大人为乱，兵大起，将

军有忧，若白衣有自立者，其国必破，期三年。

《百二十占》曰：他星出东井，有水事于邦外。

郗萌曰：客星出东井，水潦且至。

《荆州》曰：客星经绝东井，名水有绝者。

黄帝曰：客星入东井中，留十日而成勾己，有贖罪之令，期十月。客星守东井，水。

石氏曰：客星守东井，有旱虫，人多疾。一曰贵人死，以其国占之。

甘氏曰：客星守东井，有白衣自立者，其国破，不出年中。

巫咸曰：客星留守东井四十日已上，贵人女有怀子而化为水者。

郗萌曰：客星守东井，多失火者。一曰大臣为乱。一曰三十日已上，贵人女有怀子而死者。一曰百川皆溢。又曰天子以酒为忧，贵人有族者。男子不得耕，女子不得织。

《荆州》曰：客星守东井，贵人有疾者。

《玉历》曰：客星守东井左右，秦以饥，相有罪咎，齐以闻，梁有火灾。

《西官候》曰：客星守东井，色赤，宫中忧。留二十日，贵人女有死不得子者。色黑为大水舟船事，有水令。

巫咸曰：客星出东井而守之，宫中火起，大人为乱，王者以舟船为急，河海溢，土功并起，人无食，白衣有自立者，其国破，期三年。

焦延寿曰：客星入越，大臣多斩者。

## 客星犯與鬼二

甘氏曰：客星犯與鬼，国有非次自立者必败亡。

石氏曰：有星入與鬼，有诅盟鬼神祠祀之事于国内。《南

《南官候》曰：于国外。

夏氏曰：客星入天尸，帝王亡，天下多病。

郗萌曰：客星入天尸，民多死。一曰有大丧。客星入舆鬼，人相食。他星入舆鬼，铁钺用，大臣诛。客星入天尸金玉府中，三日一环之，有赦。

陈卓曰：有星入舆鬼，有军，若大人忧。

《百二十占》曰：他星入舆鬼，有祀事于国内；出鬼，有祀事于国外。

巫咸曰：客星出舆鬼，其国有丧，出南为人君，出北为女主，左为太子，右为庶子。若守四星，随其所犯发之，期不出三年。

《荆州》曰：客星入舆鬼，留三十日以上，天下金玉用，易钱。

黄帝曰：客星守舆鬼，人君有大忧。一曰贵人有忧。

《孝经章句》曰：客星守舆鬼，在其中央，主丧亡，棺木贵，倍其价。

石氏曰：客星守舆鬼，秦有奸臣，欲危其主。

甘氏曰：客星守舆鬼，五十日不去，国有大丧，兵大起，将军战于野，多有死者，期不出一年。

巫咸曰：客星守舆鬼南，男子多死，守北，女子多死，守西，长老贵人多死，守东北一星，棺木贵，铁器鱼盐大贵，皆三倍。

郗萌曰：客星守舆鬼，马贵。一曰牛贵。又曰：多土功事，皆变易更政，男子不得耕，女子不得织。

《荆州》曰：客星守舆鬼东北星，棺木贵；守东南星，五谷贵；守西南星，金钱贵；守西北星，铁器鱼盐百倍。

《玉历》曰：客星守舆鬼，秦有疾。

《南官候》曰：客星守舆鬼，入铁钺，有兵罢。客星守舆

鬼，阵兵不战。

黄帝曰：客星出若守與鬼西，若从西入與鬼，老人死，出若守东，若从东入，丁少年死。

黄帝曰：客星出若守與鬼南，若从南入與鬼，男子死；出若守北，若从北入，女子死。

《荆州》曰：客星干犯守與鬼，天下有大丧，阳为君，阴为后，左为太子，右为贵臣。

### 客星犯柳三

《荆州》曰：客星干犯柳，周国当之，期九十日。

黄帝曰：客星入柳，道路不通。

郗萌曰：客星入柳，兵从泽起。又曰大师有丧，色黄有喜。

《荆州》曰：客星入柳，兵大起，人大恐，布帛绵絮贵。

《南官候》曰：客星入柳，有兵发行，色赤怒左右，地大动。

《百二十占》曰：他星入柳，名木有来入者。

《孝经章句》曰：苍星出柳，诸侯有死者。

郗萌曰：赤星出柳，执法者遇贼。苍星出柳，杀边诸侯。

《荆州》曰：客星出柳，兵大起，诸侯有死者，其国当之。一曰有大水，人主游船，天下大饥，人民流亡，不出年，远二年。

《百二十占》曰：他星出柳，名木有出者。

郗萌曰：客星出入柳，人多移徙。又曰：出入天相，天子变更其令。柳中有奇星，臣蔽主明，有北军之耻。客星舍柳，天下有大兵，期二月若五月。

《荆州》曰：客星经柳，山林有不伐者。

！ 黄帝曰：客星守柳，库兵大发，天下人为王者治道。

《孝经章句》曰：客星守柳，库兵发，诸侯有死者。

郗萌曰：客星守柳，南宫有变。一曰牛贵。又曰羌夷起变，天下弓弩聚。

《荆州》曰：客星守柳，天下丝麻羊贵。

《百二十占》曰：客星守柳，大人弃其粮。

郗萌曰：客星舍柳，先得地，后失之。又曰：犯守柳，王者赐边客。

### 客星犯七星四

《荆州》曰：客星干犯七星，其国有大兵，不出百八十日。

石氏曰：有星入七星，有客以急事来使者；出七星，君使人以急事出者。星色青言忧，色赤言兵，黄言土，白言义，黑皆使者凶。

郗萌曰：客星入七星，有立太子者，若有奇令。又曰：色青为疾，白为丧。

《玉历》曰：客星守七星，布帛麻枲贵，津梁绝。

《南官候》曰：客星守天都，山水会，河水决，水且至，人流亡去其乡。

《百二十占》曰：他星守柳，天下变更。

郗萌曰：客星出入天都，人多流亡。一曰止水溢。又曰：黑星结若就七星，大人忧。

司马彪《天文志》曰：客星居七星，为死丧。

郗萌曰：客星舍七星，留不去左右，宫中以火为忧。一本云：国家喜，天雨五谷，在宫中也。

郗萌曰：客星舍天都，五谷不成。

黄帝曰：客星守七星三十日，天下变更，水大出，道路不通。



石氏曰：客星守七星，周有大贤。

郗萌曰：客星守七星三十日，天子忧，廷中有贼，必易政。一曰有德令。又曰其国显。一曰必有客事，有土功，菽麻不收，若小豆贵。一曰马贵。一曰盐贵。客星守七星，天子必易政。一曰兵大起。又曰道路多水潦。又曰沟渠道路不通。一曰水大出。

《荆州》曰：客星守七星三十日，河水决，人去其乡。

石氏曰：客星出七星而守之，甘氏曰：守三十日。族欲自立，王者不亲其子。客星若不时去，人主有忧，大臣有诛，期不出年。

### 客星犯张五

《孝经章句》曰：黄星出张中，君且猎，黑星就之，君死。

石氏曰：有星入张，有赐客之事；出张，军使赐诸侯。又曰：入张，国治宗庙，期二十日，国有忧，男子有急。

巫咸曰：客星入张，人迁徙，天下变更令，余贵。

郗萌曰：客星入张，诸侯有来赐吾君近臣者；出张，赐诸臣。

《荆州》曰：客星入张，政急，人民苦死边。

《春秋图》曰：客星出张，白衣同姓有自立者，天下更令，有徙人，若使人于诸侯。

郗萌曰：客星出入张，兵起，期百八十日。一曰天子改政令。客星舍张，留不去，前将军谋，有阴兵起。

黄帝曰：客星守张，天下人远去。一曰人有千里之行。

《孝经章句》曰：客星守张，在其中，余石三百；游在其旁，石百，有急令。

石氏曰：客星守张，楚、周有隐士。

《海中占》：客星守张不去，满三十日，有亡国死亡，臣杀其主，小人谋贵，祸及嗣子，期三年。

郗萌曰：客星守张，小人有欺君者，祸及嗣子。又曰：先起兵者利，后起兵者不利。一曰食中有毒，邻国有来献食物者，天子酒大出，天子以为忧，败。一曰客有忧。又曰弓大贵。一曰彘大贵。一曰粟贵。一曰人忧食，国大饥。

《玉历》曰：客星守张，邑多变在外。

《南官候》曰：客星守张，五谷贵，有赐之事。

甘氏曰：客星出张，若守之，白衣同姓自立者。

郗萌曰：客星入若守张，有亡国死王。又曰相忧。一曰相大疾。

陈卓曰：客星犯守张，天子以酒为忧。

### 客星犯翼六

《荆州占》曰：客星干犯翼，国有用兵，大臣有忧，远百八十日。

《孝经章句》曰：苍星出翼，五谷风凋。

石氏曰：有星出翼，使人于负海之国；有星入翼，负海客有来使者。皆以鸟为币，色黄白无故，青道病，黑死不至。

巫咸曰：客星出翼，将军谋反，兵大起，必有战，边有大急，同姓诸侯有自立者，若大水，五谷伤，人民饥，去其乡，期三年。

《百二十占》曰：他星出翼，倍海国有受赐者。

郗萌曰：客星出入翼，多风雨，河决，水且至，道路不通。一曰五谷不成，人多流亡。

《孝经章句》曰：客星守翼，人多流亡，水且至，道途不通，兵大起。

石氏曰：客星守翼，君弱臣强，四夷王。

郗萌曰：客星守翼，将军谋反，兵大起。一曰国更其服。又曰有大令，若边有大急。一曰有一国之战。一曰名山有崩者。一曰五谷雨伤。一曰岁大风大水。一曰有大令。

《荆州》曰：客星守翼，岁大饥。

《南官候》曰：客星守翼，有自立者，同姓王侯必有权臣。客星明大守翼，大水，江河决溢，道路不通，鱼龙游于陆道。客星守翼，羽毛旗帜贵。

### 客星犯轸七

《海中占》：客星干犯轸，近期百八十日，远期一年。

黄帝曰：赤星入轸，轻车入；出轸，轻车出。

石氏曰：有星入轸，诸侯有来使者，以车为币；出轸，君使人之诸侯，皆车为币。

郗萌曰：客星入轸，有土功，若五谷大贵。

《百二十占》曰：他星入轸，有使者，以车为币，贵人多系者。一曰无处车系马，或曰野无车马。

《文耀钩》曰：客星出轸，若有白衣自立者，大国多害，若有丧，兵革起，天下有逃主，近期不出一年，远三年。

《荆州》曰：赤星出轸，军出。

《百二十占》曰：他星出轸，有使者，以车马为币，以冬三月视轸中。

黄帝曰：赤星守轸，车马有急行。客星守轸，车马贵。

石氏曰：客星守轸，川谷不通而车贵。一曰守轸轳若长沙，车官使有忧。

甘氏曰：客星守轸，国有自立者，大国多害。

郗萌曰：有星守轸，为车事。客星守轸，兵大起，边境尤甚。一曰名山有崩者。一曰若白黄，有外忧，苍为臣。一曰赤黄外忧，黑苍谗臣。一曰有土功之事。一曰五谷大贵。

石氏曰：客星犯守轸，天下有山崩，若水溢出之地中。

郗萌曰：客星入长沙，天下无处士。一曰天下有逃王。一曰兵尽散出之。

## 卷八十二 客星占六

### 客星犯石氏中宫上

#### 客星犯摄提一

郗萌曰：客星入摄提座，谋臣在侧，圣人受制。

郗萌曰：客星当摄提口，将受主俸，不为主用。

郗萌曰：客星舍摄提角不去，国家有喜。一曰天下必有开仓者。

《河图圣谕符》曰：客星出摄提若守之，天下大乱，人君自将兵，君臣谋，兵起宫中，不出其年。

#### 客星犯大角二

甘氏曰：客星出大角，大兵起，天下乱。若守之二十日以上，王者恶之，国易政，期三年。

《海中占》曰：客星出入大角，天下乱兵大起，臣谋其主，不则天下出水，入城郭，煞人民，期百日。郗萌曰：期三十日。

郗萌曰：客星入中大角天角，天子之席有奇令。

郗萌曰：客星舍抵大角，留不去，国家有大责。

石氏曰：他星守大角，诸侯有谋上者。

郗萌曰：客星守大角，天下有忧。

郗萌曰：客星守大角，太子耗衰。

郝萌曰：客星入座，谋臣在侧，圣人受制。

### 客星犯梗河三

《海中占》曰：客星干犯梗河，天子慎边，四裔不靖。

《荆州占》曰：有星入天矛，天下兵起。

陈卓曰：客星入梗河，天下兵起。

石氏曰：黄白星出天矛，天子用兵。

《玉历》曰：客星出梗河，北，兵为乱，侵陵中国，人主有忧，期二年。按司马《天文志》曰：孝明帝永平四年八月辛酉，客星出梗河西北，指贯索，七十日去梗河，为北兵至。五年十一月，北匈奴七千骑入五原塞，又入云中，至原阳也。

石氏曰：黄白星走天矛正中之，有军兵罢，无军天子有献兵者，星赤，兵内起，大将为乱，苍白，将有疾，黑，将死，三夜不去，天子多戮者。

石氏曰：客星舍梗河，主在东之君，人民相师长，强者为虎狼，小民为鱼肉。

《海中占》曰：客星舍梗河，阴阳不和，天下大风，树木皆倒。

《天官书》曰：客星守天矛若出之，北兵大动，有丧。

石氏曰：客星出入若守梗河，朔兵大起。

### 客星犯招摇四

石氏曰：客星干犯招摇，朔兵大来，不出一年。

韩杨曰：客星入招摇，南夷王，且操奇物来降国者。

《黄帝占》曰：客星出招摇，朔兵来。一曰夷狄胜，若旱多风。

石氏曰：客星出招摇，兵革大起，朔兵为乱，若单于死，期一年。

黄帝曰：客星当天库，天下兵革。

石氏曰：客星当天库，将受主命，不为主用。

石氏曰：客星走招摇，北兵来。

黄帝曰：客星居招摇间，北兵起。

郗萌曰：客星舍匈奴星，按招摇无匈奴之名。郗萌曰：此当以招摇主北兵，以入招摇占，中国兼录之也。人面龙身，留十余日不去，占主内相贼，国家兵起，敌人来降。

石氏曰：客星守招摇，北主死，其民乱。

石氏曰：客星守招摇，蛮夷君死民乱。

班固《天文志》曰：客星守招摇，蛮夷有乱。

### 客星犯玄弋五

陈卓曰：客星干犯玄弋，占单於大败，期二年。

《黄帝占》曰：客星出玄弋，敌兵大败，若有死王，期二年。

《荆州占》曰：客星守玄弋，天子死。

石氏曰：客星守玄弋，北兵来。

### 客星犯天枪六

郗萌曰：客星入天枪，天下有饥兵。

《荆州占》曰：客星入天枪，有大战。

石氏曰：客星出天枪，边外有急，机枪用，有兵起，大将出，期一年。

### 客星犯天棓七

石氏曰：客星干犯天棓，兵大起，期二年。

焦延寿曰：有星入天棓，大兵当起。

《玉历》曰：客星出天棓，兵大起，下谋上，大人有戮。

者，期二年。

### 客星犯女床八

石氏曰：客星干犯女床，贵人暴诛，期百八十日。

郗萌曰：有星入女床，有异女来误我王。

《荆州占》曰：客星入女床，若动摇，女有大行，若天下女子有忧。

甘氏曰：客星出女床，若守之，强臣执政，贵人有暴诛者，期百八十日。

《荆州占》曰：客星守女床，后宫女凶。

### 客星犯七公九

《河图圣诒符》曰：客星出七公及守之，将相有忧，御臣受戮，若议人有罪，直言者凶。

《黄帝占》曰：客星守七公，为饥民，君不安。

### 客星犯贯索十

石氏曰：客星干犯贯索，不有大赦，必有大狱，民叛篡弑君，不过三年。

石氏曰：客星入贯索，天下多死人。

石氏曰：他星入贯索二日，有丧。

《荆州占》曰：黄星入贯索，诸侯有以地坐法者。

《黄帝占》曰：有星出贯索中，有赦，星大大赦，星小小赦。

《荆州占》曰：客星出贯索，其国亡土邑。

齐伯曰：客星入贯索，大臣有谋，下有反者，贵人多下狱。一曰守之十日，有大赦，期一年。按司马彪《天文志》曰：孝明皇帝永平四年八月辛酉，客星出梗河西北，指贯索，七十日去。贯

索贵人之牢，陵乡侯梁松怨望，悉飞书诽谤朝廷，下狱死，妻子家属徙九真也。

### 客星犯天纪十一

《黄帝占》曰：客星入天纪，有拘主。

《黄帝占》曰：客星入天纪，诸侯举兵，国政乱。

《甄耀度》曰：客星出天纪，大臣执权兵宫中，人主有忧，若强臣相戮，期不出二年。

郗萌曰：客星行纪星，有饥民，君不安。

石氏曰：他星守纪星，君不安，有饥民。

### 客星犯织女十二

石氏曰：客星犯织女，天子女诛死。

陈卓曰：客星干犯织女，后族为乱，贵女有诛者，期三年。

郗萌曰：客星入织女，为旱。

郗萌曰：客星入织女、贯索、须女者，皆等。须女主帛絮，贯索主麻缕，织女主布帛及五彩，皆贵，各守其价十日，一倍，二十日，再倍，三十日，三倍，皆以四时相执。守南南方贵，守北北方贵，守西西方贵，守东东方贵，守中中贵，所守其国皆贵，其余星皆仿此。

《荆州占》曰：奇星入织女，有兵，十年乃解。一曰人主攻一家一国，若族之。

石氏曰：赤星入织女，主攻一国残之。又曰：接客来，黄星入，女子受地者，黑星入，淫妇忧，青星入，以忧来者。

石氏曰：客星入织女，有女使者，若中守乘犯之，女君诛，若有妇女之事。

石氏曰：黑星出织女，女子多怀子死。



《海中占》曰：客星出织女，若入之，后族为乱，若诛臣。一曰贵女有诛者。各以五色占，白为丧，赤为兵，黑为水，黄为旱，青为饥。

《荆州占》曰：客星出织女，宫人逃。一书曰青星。

《黄帝占》曰：客星出入织女，丝絮布帛贵，在后年。

石氏曰：客星出入郝萌曰守织女，有诛臣降王。

郝萌曰：客星在织女下，兵起必战，不出十日。

郝萌曰：客星舍织女后宫，有以药死者。

石氏曰：他星守织女，女有忧，若有嫁娶之事。

石氏曰：他星守织女，乍出乍入，前后左右回惑其色，色青为饥，赤为兵，黄为旱，白为丧，黑为水。

郝萌曰：客星守织女，山摇地动，若牛疾。

《荆州占》曰：客星守织女，有女子使来者，色青忧以来，赤有奇客来，黄白宫女有喜。

### 客星犯天市垣十三

《文曜钩》曰：客星入天市垣，兵大起，斧钺用，大臣当有斩者，近期一年，远期三年。

石氏曰：客星入天市垣，色黑市使死。

石氏曰：客星入天市，黄白市使忧，黑死，以日占何国。

石氏曰：客星入天市，聚者皆起。或不得耕食，大兵横流，期三年。

石氏曰：客星入天市，大臣诛，有戮卿。一曰有戮王，皆期一年，远三年。按班固《天文志》曰：孝宣地节元年七月癸酉，客星入天市，芒炎东南指，其色白。是时楚王延寿谋逆自杀。地节二年，故将军翟告夫人显、将军霍禹、范明友、奉车霍山及诸昆弟嫖婚为侍中诸曹九卿郡守皆谋反，夷族，伏其辜也。

郝萌曰：客星入市中，兵犯外城。

郗萌曰：客星入天市中，余石三百；居市门者石五百五十。亦曰游市旁者石百。

郗萌曰：赤星入天市，弃市满天下。

郗萌曰：黄白星入天市，嗇夫不迁即赐。

郗萌曰：客星遁，或若填星所发入市中而出外，死罪复生。

郗萌曰：赤星长寻集天市中，有兵。

郗萌曰：青黑星出天市，嗇夫不死即免。

司马彪《天文志》曰：孝灵中平五年六月丁卯，客星如三升碗，出贯索西南南行，入天市至尾，占曰：为贵人丧。明年四月，宫车晏驾。

谢承《后汉书》曰：吴郡周敞师事京房，房为石显所谮系狱，谓敞曰：吾死后三十日，客星必出天市，即吾无辜也。后果如言，敞上书陈其枉。

《荆州占》曰：客星出入天市旗，兵大起，人将斩。

《玄冥》曰：客星出天市，执令者死，大臣诛，有贵人多市死者，期二年。

郗萌曰：客星入若守天市，执令者死。

郗萌曰：太白星入若守天市，天下乱。

郗萌曰：太白星入若守天市，度量不平，市乱。

#### 客星犯帝座十四

石氏曰：客星干犯帝座，人民大乱官，朝徙大臣，期三年。

《荆州占》曰：客星入帝座，留不去，则有贵人变更令。

《荆州占》曰：赤星入帝座，朝廷有兵。

《河图帝览嬉》曰：客星出帝座，若守之不去，则有贵人变更法令，大臣为乱，人主不安。

### 客星犯天候十五

《荆州占》曰：客星入天候星，士卒罢，人有急行。

石氏曰：客星出候星，天下乱，人民相攻，士卒出，有急行。

石氏曰：客星守候星，候者忧。

石氏曰：客星守候星，外客欲为主也。

《荆州占》曰：客星守候星，天下大乱。

### 客星犯宦者十六

石氏曰：客星干犯宦者，宦者灭亡。

郝萌曰：客星舍宦者星，左右贵人有不长者。

《玉历》曰：客星出守宦者星，左右贵人有不废者，不能守其贵。一曰有让位者。

### 客星犯宗人十七

《河图圣谕符》曰：客星出宗人，帝族亲多死者。一曰王者不亲宗族。

郝萌曰：客星舍宗人，留不去，有贵人死者。

### 客星犯宗正十八

《荆州占》曰：客星守宗正，更号令。

甘氏曰：客星出宗正。守之不去，左右宗族群臣多死，不出其年。

### 客星犯宗星十九

《圣谕符》曰：客星出宗星，帝族亲多死者。一曰王者不亲宗族。

石氏曰：客星守宗星，宗人不和。

### 客星犯东西咸二十

齐伯曰：客星出东西咸，女主自恣若淫佚。一曰贵人女有忧，若有黜者，不出其年。

《荆州占》曰：客星守东西咸，人主淫佚失道。

### 客星犯天江二十一

《黄帝占》曰：客星入天江，河津关绝，道不通。一曰河津吏有忧。

《甄曜度》曰：客星出天江，有大水，河海溢，津关塞，民多饥。

陈卓曰：客星干历天江，大兵攻王国，王者以赦除之则国丰年。

《黄帝占》曰：客星守天江星，一曰津河吏有忧。

### 客星犯建星二十二

陈卓曰：客星干犯建星，王失道，忠言者诛，贤士逃亡。

《海中占》曰：客星入建星，郗萌曰守。有熹福，谷大熟。

郗萌曰：客星入建星，君不亲其大臣。

郗萌曰：赤星入建星，人主谋兵兵罢，出建星，军乃战。

郗萌曰：赤星入建星，津河水大出，桥梁不通。

《海中占》曰：客星出建星，君不亲其大臣，上下相疑，主令不行。

郗萌曰：客星舍建星，留不去，即有大兵，马大贵。

郗萌曰：客星守建星，人民安。

郗萌曰：客星入守建星，人臣自临府事。

《玄冥》曰：客星中而守之，天下道塞，多有盗贼，关梁

不通，期二年。

### 客星犯天弁二十三

《文曜钩》曰：客星出天弁，若守之，有囚徒，兵起。一曰五谷伤，大贵。

### 客星犯河鼓二十四

《黄帝占》曰：客星入河鼓，色赤，有兵，黄则天下安，苍则不用。

郗萌曰：有星入河鼓，有兵，三军出之野。

郗萌曰：大星入河鼓，有兵，三将军出。

郗萌曰：大星入河鼓，天下鼓出。

郗萌曰：大赤星入河鼓星，大将惊，苍黑忧，黄更地，黑人之死。

《荆州占》曰：客星入河鼓，兵吏惊。。

《黄帝占》曰：客星出河鼓，兵出；入河鼓，兵入。

巫咸曰：客星出河鼓，旗鼓大用，有兵起，将军立旗帜。一曰谷贵，军绝粮，不出其年。

石氏曰：大赤星若出河鼓，所守之国将惊，若受令出。

郗萌曰：客星舍河鼓中，国有钟鼓之音，若立旗帜。

石氏曰：客星守河鼓，三将军食绝。

郗萌曰：客星守河鼓，将军战亡，有夺鼓者。

《荆州占》曰：客星守河鼓，兵革起，旗鼓用。

《黄帝占》曰：客星中犯乘守河鼓，所中犯者诛，若有罪。

### 客星犯离珠二十五

《荆州占》曰：客星犯离珠，后宫凶。

《玉历》曰：客星出离珠，若守之，后宫凶，若宫人有罪诛者，期二年。

### 客星犯匏瓜二十六

石氏曰：客星干犯匏瓜，政乱，近臣相譖，宫有戮死者，以赦除咎。

《黄帝占》曰：客星入匏瓜，有大忧，若鱼盐价十倍。

石氏曰：客星色青，入匏瓜，诸侯有来献果者，中有药不可食。

石氏曰：客星色赤入匏瓜，人主攻一邑，族之。

石氏曰：客星色白入匏瓜，有丧。

石氏曰：有星色黑入匏瓜中若外，皆为鱼盐贵，出匏瓜，君使人赐诸侯果。

《黄帝占》曰：客星色赤出匏瓜，天下有游兵而不战。

《黄帝占》曰：客星白出匏瓜，君使人遗诸侯果。

甘氏曰：客星出匏瓜，人主忧备毒药，若诸侯献果，中有药不可食，防备之，若食忧，期三年。

《黄帝占》曰：有星出入匏瓜，若在其下，皆为食官有忧。

《黄帝占》曰：客星守匏瓜，山摇。

《黄帝占》曰：有星守匏瓜，有食有忧。

石氏曰：客星守匏瓜，山谷多水。

《黄帝占》曰：客星入若守匏瓜，备奸人献食物有毒药也。

### 客星犯天津二十七

石氏曰：客星干犯天津，贼断王道。

《黄帝占》曰：客星入天津中若守之，津河道不通。

《圣谕符》曰：客星出天津，天下关绝不通，若津吏有忧罪者。

郝萌曰：客星入天津，诸侯不通，天下备道修桥梁。

郝萌曰：客星入河中，贵人有溺死者。

郝萌曰：客星守天津，水道不通，若船贵。一曰津河吏有忧。

《荆州占》曰：客星守天津，津不可渡。

石氏曰：他星守犯天津，津河为败。

### 客星犯螣蛇二十八

《荆洲占》曰：客星守螣蛇，水雨为灾。

石氏曰：他星守犯螣蛇，水物不成，水虫为败。

### 客星犯王良二十九

郝萌曰：客星入王良，将士皆亡。

《甄曜度》曰：客星出王良，天下有急，关津不通，兵起，若马多死，期二年。

石氏曰：客星守王良，津河不通。

郝萌曰：客星守王良，天下有急，马大动，一曰疾病。

郝萌曰：赤星守王良，兵起。一曰守王良，天下大水，桥梁不通。

《海中占》曰：客星入王良而守之，天下兵起，车骑行，人主忧，将军有死者，期三年。

### 客星犯阁道三十

陈卓曰：客星干犯阁道，王者居正殿不私行，则灾自消。

《玄冥》曰：客星出阁道，有惊戒之事，若道中有伏兵，人主备左右，慎女兵。

### 客星犯附路三十一

陈卓曰：客星干犯附路，道不通，天下半隔，期一年。

焦延寿曰：有星入附路，兵火起。

郗萌曰：有星入附路，马贱。

巫咸曰：客星出附路若守之，太仆有忧，若以马罪。一曰马当贱，期不出一年。

### 客星犯天将军三十二

《河图帝览嬉》曰：客星出将军，将军有忧若黜者，若军吏不忠有过罪者。

石氏曰：有星守天将军，大将军有忧。一曰军吏不安，以饥为败。

### 客星犯大陵三十三

《荆州占》曰：客星入大陵，若守之，君有大陵功之令。

《黄帝占》曰：客星出大陵，有土功坟陵之事。若犯积尸，国有大丧，人主当之，期三年。

石氏曰：他星若入守大陵，有土功事。

### 客星犯天船三十四

郗萌曰：客星入天船，水大至。

石氏曰：客星出天船，天下大水，舟船用，若有船事，期不出年。

郗萌曰：客星守天船，有兵。一曰王船有事，不出一年。

### 客星犯卷舌三十五

《玉历》曰：客星出卷舌，若守之，天下有妄言惑其君



者，君信谗臣，罪无辜者。按班固《天文志》曰：元帝二年五月，客星见昴，分居卷舌东可五尺，青白色，炎长三寸。其年十二月，巨鹿都尉谢君男诈为神人，论死，父免官。孟康注曰：姓谢名君，男儿也，不纪其名，直言男者也。

### 客星犯五车三十六

石氏曰：客星干犯五车，兵满野，天下半倾，百姓徙居去其土，期三年。

《黄帝占》曰：客星入五车，色黄，人主受贺，色白言义，色赤言兵，色青言忧，色黑大人当之。

《海中占》曰：客星入五车，所守土谷贵。

郗萌曰：客星入五车，余倍价。一曰车倍价。皆为后年。

郗萌曰：客星入五车，为赦。

《荆州占》曰：客星入五车，人相食，若大水，沟渎溢。

《黄帝占》曰：有星出五车，色白，君使人诸侯以车为戒；色黄受贺；赤言兵，车骑满路；色黑多死者，以其日占期。

郗萌曰：客星出五车，兵出；入五车，兵入。

玄冥曰：客星出五车，天下兵起，车骑满野，将相有忧，五谷大贵，人民饥，期百八十日，中一年，远三年。

郗萌曰：客星出入五车，以守五车可取者，客星出入箕车，取箕，出入麦车，取麦，出入豆车，取豆，出入黍粟车取黍粟，出入稻米车取稻米。出以其行为粟。其出入中行，石二百；出入外行，石百钱。

《黄帝占》曰：客星守五格休左者，军大发，守休右留十日，天下有丧，大乱。

郗萌曰：客星守五车，兵革起。

《海中占》曰：客星入五车，犯守之，大人有忧，车骑发

用，将军出令，国易政，期三年。

### 客星犯天关三十七

《黄帝占》曰：客星入天关，诸侯不通，民多相攻，且有兵，子伐父，弟伐兄，是谓不理，各去其乡。

郝萌曰：客星入天关，民多疾病。

郝萌曰：有星入天关，天下有急。一曰关市不通。

《荆州占》曰：客星入天关，多盗贼，道路不通。

石氏曰：他星入天关，兵战不胜。

石氏曰：客星出天关门，天下起兵不战。

《孝经章句》曰：客星守天关，羊马牛大贵，不出三年，有德令。

《荆州占》曰：客星守天关，诸侯不通，期十二日。又曰民饥，又有自卖者。

### 客星犯南河界三十八

石氏曰：客星出南河界，有男丧事于外；入南河界，有男丧事于内。

石氏曰：客星出南河，有丧事于外，皆为男丧。晕三重，必有降城。一曰客星干犯两界间，天子出走，大臣执威，王者以赦除咎，群臣尊负天子以寡。

《黄帝占》曰：客星守南河界，有水。

《荆州占》曰：客星守南河界，民多温病。

齐伯曰：客星出南河若守之，蛮夷兵道不通。一曰入南河界为旱灾，天下大饥，期二年。

郝萌曰：客星行南河界中，若守之，皆为旱。

郝萌曰：客星入北河界，从东入，九十日有兵，从西入，六十日有丧。

郗萌曰：客星他所来入北河界间，诸侯有奸。

《甄曜度》曰：客星出北河，朔兵动，关道塞，其国有忧。一曰入北河，为水饥，期一年。

《黄帝占》曰：北河界多客星，朔兵起。

郗萌曰：北河界下多小星者，民不治，将不明，多有失职。

郗萌曰：客星若赤星守北河界，臣贼主。一曰大臣诛。

《荆州占》曰：客星守北河界，后有乳疾。

郗萌曰：客星见南北河界间，奸人在中。

《帝览嬉》曰：大客星居两界间，天下有难，道在天门中，邦家不通。

### 客星犯五诸侯三十九

石氏曰：客星干犯五诸侯，王室大乱，兵起，天子宗庙不祀。

《海中占》曰：客星出五诸侯，大臣有忧，若执法者有罪。一曰议臣有黜者。

郗萌曰：客星守五诸侯，天下大乱。

郗萌曰：客星守五诸侯，天子亲属失位，大水行，五谷大贵，天下民多死于道旁者，秦国尤甚。

《荆州占》曰：客星守五诸侯，诸侯亡地。一曰诸侯有忧，秦国受重殃。

### 客星犯积水四十

石氏曰：客星干犯积水，兵起，宫门宗庙毁绝，大臣有忧。

巫咸曰：客星出积水，天下大水，沟渠溢，有攻堤防之事，期不出年。

### 客星犯积薪四十一

石氏曰：客星干犯积薪，有乱臣在宗庙。

石氏曰：客星出积薪，有忧，若以薪蒿之事而致罪者。

### 客星犯水位四十二

石氏曰：客星干犯水位，水道不通，伏兵在水中，以水为害。

《荆州占》曰：客星守水位而川流溢。

《玉历》曰：客星出水位，天下以水为令，法官有忧，若臣下有谋兵起，期三年。

## 卷八十三 客星占七

### 客星犯石氏中官下

### 客星犯轩辕四十三

石氏曰：客星干犯轩辕，近者诛灭宗族，王者以赦除咎。按司马彪《天文志》曰：孝明帝永平十四年正月戊子，客星出昴六十日，在轩辕右角，稍灭轩辕。右角为贵相，昴为狱事，客星守之为大狱。是时考楚事未竟，司徒虞延与楚王英党与交，皆伏诛也。

郗萌曰：有星入轩辕，有远来者。

郗萌曰：有星入东陵，有夷从外来降者。

郗萌曰：客星入轩辕，有女子惑天子者。

《荆州占》曰：客星入轩辕，美人有经死者。

焦延寿曰：青黑星出入轩辕，皆为诸夫人有子不成。

司马彪《天文志》曰：客星出轩辕，后宫失势。

郝萌曰：客星舍轩辕之旁，美人有悬死者。

《荆州占》曰：客星守轩辕，狱中有女子饮药死者。

郝萌曰：客星守轩辕，女主不安。一曰有忧。

《洛书甄曜度》曰：客星出轩辕若守之，各随其所守，后妃嫔夫人近者当之。一曰守之三日，美人有经者。按司马彪《天文志》曰：孝和永元十三年十一月乙丑，轩辕第四星间出客星，色青黄。轩辕为后宫，星出之为失势。其十四年六月辛卯，阴皇后废。

石氏曰：客星出轩辕，若犯守之，发五将之兵。

石氏曰：他星守轩辕，所起者有忧。

齐伯曰：客星犯守轩辕大星，女主逆天子，若女主与傍人通，宜防之。

#### 客星犯少微四十四

石氏曰：客星干犯少微，白衣聚者凶，术士不显，智者逃亡，期三年。

郝萌曰：有星入少微，奸臣乱。

石氏曰：客星出少微，道术士用，用功者随其能，王者用之。

郝萌曰：客星守少微，处士忧。

《黄帝占》曰：客星入中犯乘守少微，宰相易。又曰女主有忧。

石氏曰：客星入中犯乘守少微，五官乱，宰相有忧。

#### 客星犯太微四十五

郝萌曰：客星中犯左右执法，左右执法诛，若有罪。

《黄帝占》曰：客星入端门，出西门，天下大水，民人饥。

石氏曰：客星入端门，其国有臣谋。

石氏曰：客星入端门，出东门，天下大旱，五谷不成。

甘氏曰：客星入端门，仍出端门，其国有大患，天下大乱易主。以色占。出左掖门其国有忧，出东门其国旱，出右掖门其国大乱，出西门其国大水。

郗萌曰：有星入端门，贼钞主，称王命。

石氏曰：客星入左掖门，出右掖门，其国有丧。

石氏曰：客星入右掖门，其国有客。

石氏曰：客星入左右门，出东西门，国有大丧，贵臣有死者。

甘氏曰：客星入太微右掖门，出端门，小国亡。出左掖门，其国有小事；出东门，其国大亡；仍出右掖门，其国有客，为刑事；出西门，大国以微亡。

《荆州占》曰：客星入左掖门，出端门，其国灭亡；仍出左掖门，其国大伤；出东门，其国大丧；出右掖门，其国大逆无道；出西门，其国流血百里。

石氏曰：客星入东西门，出左右掖门，其国有兵，军有出者，幸臣有忧，皆不出一年。

甘氏曰：客星入东门，出端门，其国有忧；出左掖门，其国所作不成；仍出东门，其国有臣结谋；出右掖门，其国大亡；出西门，其国有殃。

《荆州占》曰：客星入东门出东门，其国有大丧。

《黄帝占》曰：客星入西门出东门，其邦兵起，臣谋主；入东门出西门，大国微亡，守之不去，楚国凶殃。

甘氏曰：客星入西门，出端门，其国大乱；出左掖门，其国不为用；出东门，其国不祥；出右掖门，其国大败；仍出西门，其国有兵。

郗萌曰：客星入西门出端门，一书云出左掖门。其国大不熟。

郗萌曰：客星入太微西门出东门，有忧丧。

郗萌曰：他星入太阴门，后宫有贼。

《荆州占》曰：客星入太阴西门，出太阴东门，其国大水，天下大乱。

《荆州占》曰：他星入太阴门，兵起，动天下。

《荆州占》曰：客星入西门，出西门，其国有兵谋。

陈卓曰：客星入干太微，帝宗后族为乱，亡社稷。

《河图帝览嬉》曰：客星入太微廷中，出端门，天下大乱，王者忧，国易政，期三年。按何法盛《中兴书》曰：晋安帝元兴元年十月，有客星色白如粉絮，出太微垣西，至十二月，入太微，占曰兵入天子庭。二年十二月，桓玄肆逆，放帝后于寻阳。

石氏曰：他星入太微，色白而泽者赦。

石氏曰：客星入太微宫二旬若三旬，有小赦，期六月。

石氏曰：他星入四辅，臣为乱。

《海中占》曰：客星入太微中，火大起，有客贼来入国。守之十日不去，其灾成，在阳为男主，在阴为女主，不出四十日。

郗萌曰：赤黄星状如帚，入太微，妇女喜；出太微，天子赐诸侯美女。

郗萌曰：客星入天子宫，丞相忧疾。

郗萌曰：客星入天子宫，十日而成钩己，天下有大赦，奴婢下贱人妻妾长庸，期三月若六月。

《荆州占》曰：客星入太微宫中一旬，宫中有自煞者，期四十日，在阳为男，在阴为女。阳，黄座南也，阴，黄座北也，入二旬，有赦，期六月。

《荆州占》曰：青星入太微，有客来。

《荆州占》曰：星正赤入太微中，兵起。

陈卓曰：星正赤入太微中，庙有兵。

《荆州占》曰：赤黄星润泽入太微中，天子有喜，以其所抵，率言抵座星也，如剑者男子喜。

《荆州占》曰：客星入太微庭中，有一星，天子出将兵；有二星，天下无处主；有三星，天下散亡。

《荆州占》曰：客星入太微，所中乘守者有殃。

《玄冥占》曰：客星入太微庭中，帝宗后族为乱，欲谋杀主，宫门有伏兵，期三月。

《天官书》曰：客星出天庭，有奇令。

《荆州占》曰：赤星出庭中，有立王若徙王。又曰火起。

《荆州占》曰：赤黄星出太微中，天子用金钱赐诸侯王。

《荆州占》曰：星黄如兽，出太微中，天子用畜赐诸侯王。一曰气类兽及蜚，皆客喜也。

《荆州占》曰：有星如拳正圆，出太微中，天子用璧玉赐诸侯王。

陈卓曰：客星出太微，有兵丧。按《宋书天文志》曰：魏文帝黄初三年九月甲辰，客星见太微左掖门内，十月，孙权叛命，帝自南征，前驱临江，破其将吕范等，是后累有征。后七年五月，文帝崩。甘露四年十月丁丑，客星又见太微中，转东南行历轸宿，积七日灭。景元元年，高贵被害。

《黄帝占》曰：凡客星出入太微，各以其日占知州国所出，皆不出百日，中一年，远三年，灾必应。

《黄帝占》曰：客星出入太微，人主有忧，大臣为谋，有反者兵起宫中。一曰执政臣有戮者，期一年。

《海中占》曰：客星入太微，天下大乱，兵大起，臣谋其主，不则天下大水，入城郭，煞人民。郝萌曰：期三十日。

《荆州占》曰：客星出入太微，大水入城，伤人民，期三十日。

《荆州占》曰：客星舍太微宫，天下有圣女子在燕代。



《荆州占》曰：客星舍太微南蕃留不去，鲁有谋者；舍西蕃留不去，王者泄妖言在楚国。

郗萌曰：客星中太微宫者，不出三十日，一本云三日也。必有大赦。

《黄帝占》曰：客星守太微东蕃若西蕃将相星者，皆为人君有忧。

石氏曰：客星守太微宫，臣煞主。

《玉历》曰：客星出太微犯守将相，左右执法随其所守犯皆有诛，期二年。

甘氏曰：太微中有一客星，天子自将兵；有二客星，天下乱，民散走；有三客星，天下大乱。守之三十日，君死国亡，期三年，远五年。

### 客星犯黄帝座四十六

《文曜钩》曰：客星入太微，犯黄帝座，天子有忧，臣谋主。至座而远，谋不成，反受其殃。守犯三十日已上，臣谋成，期不出一年。

《荆州占》曰：客星舍五帝座，有圣人与君并治，在蜀秦。

石氏曰：苍白星抵座，天子有丧忧，抵座旁，臣有反之者。按《幽明录》曰：汉武帝常微行，过主人家，家有婢国色，帝悦焉，仍留宿，夜与婢卧。有书生亦家宿，善天文，忽见客星移掩帝座甚逼，书生大惊惧，连呼咄咄，不觉声高。仍见一男子操刀将欲入户，闻书生声急，谓为己故，遂缩走，客星应时即退。帝闻其声异而召问之，书生具说所见，乃悟曰：“此人是婢婿，将欲肆其凶于朕。”乃召羽林，语主人曰：“朕天子也。”于是擒奴而伏诛，厚赐书生。《后汉书》曰：严遵字子陵，会稽余姚人，世祖为书生时，与遵游学。乃即位，见遵，遵长揖不拜。上留遵俱寝，遵以足加世祖。其夜客星犯天子宿，明晨太史奏其

异，诏曰：“朕友人严遵与朕俱卧之耳。”

石氏曰：有赤星锐如剑，抵座星，天子以兵惊。一曰灾惊。

《荆州占》曰：黑星抵座左右旁，大臣有死者。

《荆州占》曰：黄白星大如拳，正圆，抵座旁者，臣有献美人者。

郝萌曰：黑星抵留座星者，曰天子恶之。

### 客星犯四帝四十七

巫咸曰：客星犯四帝，辅臣有乱，若有反。一曰若左右辅臣有谋，期百八十日。

### 客星犯屏星四十八

石氏曰：客星有中犯乘守屏星者，为君臣失礼，而辅臣有诛者，若免罢去。

### 客星犯郎位四十九

陈卓曰：客星干犯郎位，大臣失势。

《黄帝占》曰：客星入郎位，大臣为乱。

石氏曰：客星入郎位，多死者。

《荆州占》曰：赤星入郎位，兵起，若大忧；出郎位，多用兵远出者。

《荆州占》曰：黑星入郎位，多有罪者。

《荆州占》曰：苍白星入郎位，有乱者。

《荆州占》曰：苍白黑星出郎位，多死者。

《玉历》曰：客星出郎位，守卫臣有谋者，人主有忧，将相有诛者。一曰外夷有反者，期二年。

《荆州占》曰：客星入中郎位，大臣为乱，戒左右。

《黄帝占》曰：客星守郎位，元士有忧。又曰名官位不死必去。

《荆州占》曰：客星守郎位，其将忧也。

### 客星犯郎将五十

《黄帝占》曰：有星人郎将，色青黑，嗇夫不死则免，黄则迁，白则受赐。

《荆州占》曰：有星人郎将，大臣乱，政不行。

石氏曰：客星守郎将，大臣为乱。

甘氏曰：客星出郎将，辅臣有诛，将相有罪若有黜者，期一年。

甘氏曰：客星人犯守郎将，将诛。

### 客星犯常陈五十一

石氏曰：他星犯常陈，王者诛之，近期百八十日，远期三年。

《圣治符》曰：客星出常陈，守卫者有诛，若左右兵起，王者有忧，期不出年。

### 客星犯三台五十二

石氏曰：黄白星人三能，贵人有赐爵者，苍星出三能，贵人夺爵。按司马彪《天文志》曰：孝安永安四年六月甲子，客星大如李，苍白，芒气长二尺，西南指上阶星，降，太尉张璠，司空张敏皆免官也。

郗萌曰：有星出三能，爵令行。

郗萌曰：客星舍三能，左右群臣有不正者，露当降也。

郗萌曰：客星舍三能，留十余日不去，王侯有不通者，深渠当修，城郭决，此三台之过也。

《黄帝占》曰：客星入三台若守之，大臣多戮，若贵人多病疟死者。

《帝览嬉》曰：客星出三台若守之，主诛大臣，贵人有死者，不出百八十日。

郗萌曰：客星守天柱，大人戒左右，趣治兵弩。

郗萌曰：他星犯守三台，有兵丧。一曰水为灾害。

石氏曰：有星入司命，色苍，民忧丧事，白润泽，妇女多伤，黑，婴儿死。

甘氏曰：有星入司命，近臣抵罪者，色青有忧，黄白无故，黑死。

石氏曰：苍星出司命，王者病死。

甘氏曰：青若黑星入司命中，奸人有出者。

石氏曰：有星入司禄，大臣争荣。

甘氏曰：有星入司禄，色黄若白，近臣有易爵者；出司禄，色青，近臣有抵罪而走者，黑则死。

### 客星犯相星五十三

陈卓曰：客星干犯相星，辅相忧，不出一年，天下变更其令，民多移徙。

### 客星犯天牢五十四

《黄帝占》曰：有星入天牢，斧钺用，诸侯有献地者，出天牢，王赐诸侯地，色青皆以兵，黄白皆以好，一曰星出南为献地。

《海中占》曰：客星入天狱，有德令。

郗萌曰：有大星入天牢，有赦，期二十日。

郗萌曰：客星入天牢，必有戮卿。

《荆州占》曰：客星入天牢，贵人有系者，有戮君。

《荆州占》曰：客星入天牢，其国得邑土；出天牢，为亡邑土也。

石氏曰：有奇星守天牢二十日已上，天下大赦。

石氏曰：客星守天牢一年，大鱼死。一曰人相食。

《荆州占》曰：客星守天牢，铁钺用，以其初守日占国。

巫咸曰：客星出天牢，若守之，有贵臣多下狱者，期不出一年。

郗萌曰：常以五子日候天牢中，有变星，期不出十日，赦。

### 客星犯文昌五十五

石氏曰：客星干犯文昌，则附臣受殃，近期三年，远期六年。

韩杨曰：客星入文昌，有女子惑天子者。

《文曜钩》曰：客星出文昌，其国失政，人主有忧，臣受其殃。

石氏曰：客星出文昌，其国失君政。

石氏曰：客星守文昌，有兵，君不安。

《黄帝占》曰：有星人将星，色苍，将有忧。一曰故臣有抵罪。

《黄帝占》曰：黄星人将星，受封，黑，将死。

《黄帝占》曰：大赤星人将星，提鼓之将惊。

《黄帝占》曰：有星人相星，色黄若白，皆为故臣有赐爵者。

《荆州占》曰：有星人司命中，色苍，廷臣有忧，黄，故臣有赐爵者，白，近臣有抵罪者，黑，近臣死。出司命，色赤，王者疾困。

《黄帝占》曰：客星出司命、司中、司禄，近臣抵罪走

者，色黄白无故，青忧黑死。

郗萌曰：客星出司命，有加命于群生。一曰有下命者。

石氏曰：有星入司命中，为内乱。

《黄帝占》曰：有星入司命中，色苍，近臣有忧。一曰近臣有弃捐者。

《荆州占》曰：有星入司中，色苍者有贼。

郗萌曰：青黑星若入司中，奸人有人者；出司中，奸人有出者。

石氏曰：有星入司禄中，色黄若白，近臣有赐爵者。

郗萌曰：客星入司禄，色青黑，近臣有夺爵者。

郗萌曰：客星出司禄，有下赏者。

### 客星犯北斗五十六

郗萌曰：客星入北斗魁上若下，色青黑，人主大忧，赤有大客，境外与中国争兵，黄白，人主有贺，期皆六十日若百二十日，人主避舍东方十日，而赐功应之。

郗萌曰：有星入北斗魁中，大人有系者。一曰人主左右有囚者。色黄白无故，色青黑有忧死，不出，色赤，亡。

《荆州占》曰：有星出庭入北斗魁中，二千石有系者，色青忧，黑死，赤有斩事。

《荆州占》曰：大星入北斗，贵臣诛若系者。

《黄帝占》曰：客星出北斗魁中，天子自将兵，国忧倾危，社稷不安，民多苦，期一年。

石氏曰：有星集北斗旁，不入北斗中，名贵人有忧，以五色占之。

郗萌曰：有星出北斗魁，天下赦，星大赦大，星小赦小，期九十日当至。

齐伯曰：客星出北斗旗间，兵大起，车骑行，若贵臣有

诛，人主忧。旗者紫宫北斗两间。

《海中占》曰：客星出入北斗，天下大乱，兵大起，臣谋主，不则天下大水，入城郭，煞人民，期百日。郗萌曰：期三十日也。

郗萌曰：有星离北斗柄中央，色青相有忧，赤者兵事，黄白有赦，若相遇贼，黑者死。

甘氏曰：客星见北斗魁中，色赤楚当之，青齐当之，黄卫当之，黑燕当之，白秦当之，各以五色知其分野吉凶。

《荆州占》曰：有星见北斗魁中，有死者，色赤楚君当之。

《荆州占》曰：变星见北斗魁中，天子当之。

石氏曰：大星去北斗中，如赤鸟，其头黑，天下有兵。

《甄曜度》曰：客星居北斗旁，帝主有忧，若有不出者，兵大起，士卒用，各以五色占。去北斗一尺，期一年，二尺期二年。

郗萌曰：客星守北斗，天下必有大事若大变。守斗后，道不通水。

郗萌曰：客星守北斗七星，人君大变。一书云有忧。

《荆州占》曰：有星入正星，大人遇贼；出正星，为政者易。

《荆州占》曰：有星抵正星，有客，色青以禽兽为币，黄以绶罗为币，赤以钱为币，白以人若兵剑为币，黑以金为币，色白苍以羊为币。正星上左右，以马牛鱼盐为币，色黑左右，以五谷为币。

《荆州占》曰：有星出法星若入法星，主当之。

郗萌曰：有星入令星，执法者死；出令星，执法者逐于诸侯。

《荆州占》曰：有星入伐者，蛮夷以水兵至；出伐星，天

子与蛮夷和。

《荆州占》曰：有星抵伐星而舍之者，人多死。

《荆州占》曰：有星抵伐星有光，女主疾；有光而环伐星，君疾。

郗萌曰：有星入煞星，大臣主马者死，期一旬；出煞星，大臣走。

《荆州占》曰：有星入危星，易政；出危星，天子出令不行。

《荆州占》曰：有星入部星，诸侯兵起，子攻父，弟攻兄。

郗萌曰：客星入辅星，有善令。

《荆州占》曰：有星入辅星，色青，相有罪若免，色赤，相受兵若将兵，黄白，相有赐若有喜，黑，相死若免。

### 客星犯紫微宫五十七

《玉历》曰：客星犯紫微宫，有大丧；若守之十日已上，灾必应期百二十日。按《洪范天文星辰变占》曰：汉昭元凤四年九月，客星在紫微宫中枢极间，后三年，昭帝崩也。

石氏曰：客星入紫微宫，天子有急，兵起宫中，必有死王，若有逃走之主，期不出百八十日。按班固《天文志》曰：宣帝黄龙元年三月，客星居王良东，广可九尺，长丈馀，西指出阁道间，至紫宫。其十二月，宫车晏驾。司马彪《天文志》曰：孝章元和元年四月丁巳，客星晨出东方，在胃八度，长三尺，历阁道，入紫宫，留四十日灭。阁道紫宫，天子之宫也，客星犯，谓之大丧。后四年，章帝崩。《宋书天文志》曰：晋太康元年四月，客星在紫宫，太康末，武帝耽晏游，多疾病，是月乙酉帝崩。永平元年，贾后诛杨骏及其党与，皆夷三族，杨太后亦见煞。是年又诛汝南王亮，太保卫瓘，楚王伟，海西。太和四年二月，客星见紫宫西垣，至七月乃灭。六年，桓温废帝也。



《荆州占》曰：客星入紫微宫，国有大变。一曰为兵起得地。按班固《天文志》曰：孝昭元凤四年九月，客星去紫微宫中枢极间，其五年六月，发三辅郡国少年济北军也。

《荆州占》曰：赤星入紫宫，天下乱。一曰为天下无人，其中列大夫多死罪者；入其旁，有乱臣。

《荆州占》曰：黄星入紫宫，人主益地，天下有喜，期十日。

《荆州占》曰：有赤星若黑星入紫宫，从其阳入，有客兵，期六十日至，从其阴入，有走王。

《黄帝占》曰：客星出紫宫，天下大乱，臣煞其主，王者有忧，国有大变，期不出年。

石氏曰：有星如拳正圆，及如兽状，出紫宫，天子用璧玉赐诸侯王。

石氏曰：客星守紫宫，臣煞主。

《荆州占》曰：客星在旗间，车骑起。

### 客星犯北极勾陈五十八

石氏曰：客星入北极，天下道塞。

《黄帝占》曰：客星出北辰，天子出德令，安天下。

《黄帝占》曰：赤星出天枢，天下兵盈野罢。

郗萌曰：客星出北极，而所之国大败，四方皆然。

石氏曰：他星见北极，帝王惊，宗室乱，王者修郊祀，奉宗庙，大赦天下，则灾消。

《荆州占》曰：客星舍极，四夷若胡王有丧。

《荆州占》曰：客星守极，大臣诛。

《荆州占》曰：客星一本云赤星。守天枢极，兵聚一国，有更君易币。

石氏曰：客星守天枢，国有大忧。

石氏曰：客星出北辰，犯守大星，天下道塞，兵大起，臣欲谋主，兵聚一国，人主有变，期不出年。

《黄帝占》曰：客星犯乘守北辰主星，大人当之。一曰有大丧。一曰有反者。

《荆州占》曰：客星犯乘守太子星，太子有罪若死。

《荆州占》曰：客星中犯乘守庶子星，庶子有罪若死。

石氏曰：赤星入勾陈，兵内乱，大司马戮死；出勾陈，大战，有功。

石氏曰：黑星入勾陈，大司马溺军中。

石氏曰：黄白星入勾陈，将不战，兵去外，罢。

石氏曰：苍白星入勾陈，大司马有丧；出勾陈，军破，将有忧。

《荆州占》曰：赤星入勾陈，必有迫劫主者。

《荆州占》曰：客星入正妃，国有大忧。

陈卓曰：客星入正妃，有大丧。

《荆州占》曰：客星入黄龙之位，有黜妃，臣煞主。

齐伯曰：客星出勾陈，国有大变，后妃有忧，若女主有黜者，不出一年。

石氏曰：客星入勾陈，若犯之，宫中有变，臣杀其主，王者有忧。

### 客星犯天一太一五十九

《荆州占》曰：客星入天一座，五谷大贵。

《甄曜度》曰：客星出天一太一，五谷贵，人民饥。一曰若有旱灾。

《黄帝占》曰：他星历天一，则宫门闭，王者内不安，近臣乱，不出三年。

## 卷八十四 客星占八

### 客星犯石氏外官

#### 客星犯天库楼一

《黄帝占》曰：客星入天库，以饥兵起。

石氏曰：客星入天库，余大贵；为后年。

《天官书》曰：客星入天库，边郡之兵起，此为外夷之事。

郗萌曰：客星犯天库，五谷大贵；入库中，余石百，处其旁，石五十。

郗萌曰：客星入天库，牛马有行。

郗萌曰：客星入天库，兵起，十年乱。

《荆州占》曰：客星入天库，有兵发行。

《黄帝占》曰：客星出库楼，兵车用，若守之，边兵大起，库兵出，车骑行，期二年，远三年。

《荆州占》曰：客星入若守之天库，外夷兵起。一曰官兵忧。

《黄帝占》曰：客星入若乘守天库，兵车出用。

#### 客星犯南门二

石氏曰：客星出南门若守之，关梁塞，道路不通；人民忧。

石氏曰：南门中有小星三芒者，则兵车出。

司马彪《天文志》曰：孝灵中平二年十月癸亥，客星出南门中，大如半筵，五色熹怒稍小，至后年六月乃消。占曰为兵

至。六年，司隶校尉袁绍诛灭中官，大将军部曲将吴匡攻煞车骑将军何苗，死者合数千人。

### 客星犯平星三

石氏曰：客星出平星，赋敛之臣忧而有过罪者。若库吏不忠，当有废出，期不出一年。

### 客星犯骑官四

石氏曰：他星入骑官，有喜。

《玉历》曰：客星出骑官星，若守之，有兵起，将军有出者。

石氏曰：客星守骑官，将出有忧。

《荆州占》曰：客星守骑官，士卒发用。

### 客星犯积卒五

石氏曰：他星守积卒，主兵臣诛。

石氏曰：客星出守积卒，兵士为乱，近臣有诛，士卒多死。

### 客星犯龟星六

郝萌曰：客星入龟星，小忧，无伤也。又曰天下大仓发。

甘氏曰：客星出龟星，珠玉贵，宝物不入，若守之，君臣不和，上下乖离。

### 客星犯傅说七

《圣治符》曰：客星守傅说，王者后宫少子孙，若有绝后者。

### 客星犯鱼星八

齐伯曰：客星出鱼星，盐鱼贵再倍；若守之摇动，大贵五倍。一曰有大水，期不出一年。

### 客星犯杵星九

《甄曜度》曰：客星出杵星而守之，天下兵起，有税米粟之事。

### 客星犯鳖星十

《黄帝占》曰：客星守鳖星，有白衣之会。

石氏曰：有星入鳖星，有水令。

《海中占》曰：客星出守鳖星，有白衣之众聚，若天下有水，水物不成，期百八十日，远一年。

### 客星犯九坎十一

郗萌曰：有星入九坎，天下有忧。

玄冥曰：客星出九坎，有水旱之灾，出阳则旱，出阴则水。

### 客星犯败臼十二

《文曜钩》曰：客星守败臼，天下兵起，有军粮之急，米粟之忧，期二年。

石氏曰：他星守败臼，以饥兵起。

### 客星犯羽林十三

郗萌曰：客星守羽林若天阵，兵大起。

郗萌曰：客星守天阵，将兵吏忧。

郗萌曰：赤星守羽林二十日，臣弑主。

郗萌曰：客星入垒壁，有兵。

石氏曰：黄白星入天军南，天子立后。

巫咸曰：客星出羽林，兵大起，有亡国。若守之久，将军有谋，主者有忧，期不出三年。

#### 客星犯北落十四

石氏曰：黄白星入北落，天子有喜。

石氏曰：黄星出北落，天子使出。

石氏曰：赤星出北落，中兵起。

石氏曰：客星出北落，边夷虏兵起，来入关塞，若关吏有忧。

郗萌曰：客星中犯乘守若北落，星斗，光芒相及者，为兵，覆军，煞大将。

#### 客星犯土司空十五

《荆州占》曰：客星入土司空，多土功，男不得耕，女不得织，天下大疾。

韩杨曰：客星入土司空，有土徭之事。

《玉历》曰：客星出土司空，外臣有忧，夷狄兵起，若土功之事，人民饥苦多病。

郗萌曰：客星守土司空宫，有土功若哭泣之事。

石氏曰：客星入守土司空，旱。

#### 客星犯天仓十六

《黄帝占》曰：客星入天仓，余石一千五百，谷如玉。

郗萌曰：客星入天仓，余石千，岁大饥，五谷如金玉，能有谷为君卿。

郗萌曰：客星入天仓，匈奴王且操奇物来进中国。

郗萌曰：周伯星流入天仓，余贱，以春入，夏贱，以夏入，秋贱，秋入冬贱，冬入春贱。

郗萌曰：老人星流入天仓，余大贵，春入夏贵，夏入秋贵，秋入冬贵，冬入春贵。

石氏曰：客星入天仓，粟发出，兵满野，期三年。

《黄帝占》曰：客星出入天仓，有发粟之事，出之有出粟，人之有人粟，不出其年，必有兵。

郗萌曰：客星在天仓，天下贫，仓粟出。

《黄帝占》曰：客星当天仓户，将吏受主俸，不为主用。

石氏曰：客星守天仓，马大贵。

郗萌曰：客星入若守天苍，有兵，道不通。

### 客星犯天囷十七

郗萌曰：客星入天囷，匈奴且操奇物来进中国。

齐伯曰：客星出天囷，若守之，天下大旱，民饥，人相食，若有粟令，期二年。

### 客星犯天廩十八

石氏曰：有星入天廩中，色青，天下多忧，赤，大旱，有火，黄白，岁熟。

甘氏曰：客星出天廩，天下粟贵，民以饥流亡去其乡，粟当出廩，期一年，远二年。

石氏曰：客星守天廩，马大贵。

石氏曰：他星犯天廩，天下乱。

郗萌曰：客星守天廩，粟发用。

## 客星犯天苑十九

郗萌曰：客星入天苑，畜多伤。

《荆州占》曰：客星入天苑，禽兽多死。

《玉历》曰：客星守天苑，畜物不孳，禽兽多死，以马起兵，边贼入境。一曰牧马多死，期三年。

石氏曰：他星犯守天苑，兵起马死。按司马彪《天文志》曰：孝顺阳嘉元年闰月戊子，客星气白，广二尺，长五尺，起天苑西南，东北指，历天苑，抵参伐。天苑主马牛，为外军，色白为兵。是时燉煌太守徐由使疏勒王磐等二万人入于关界，虏获斩首三百餘级，乌桓校尉耿种使乌桓亲仆都尉戎朱魔等出塞，抄鲜卑，斩首，获生口财物，鲜卑怨恨，抄辽东代郡，杀伤吏民。是后西戎北狄为寇害，以马牛起兵，马牛亦死伤于兵中，十餘年乃息也。

## 客星犯参旗二十

郗萌曰：客星入天官，天下有变，弓弩皆张。

《黄帝占》曰：星出入天弓，必有削主。

《河图圣谕符》曰：客星出守参旗，天下兵起，大将军行，出弓弩用，人主忧，期百八十日，远期一年。

石氏曰：客星守参，负海不安，兵起。

## 客星犯玉井二十一

《黄帝占》曰：客星入玉井中者，皆为强国失地；出玉井，强国得地。

郗萌曰：客星入玉井，天下有丧。

《荆州占》曰：客星出玉井，将出。

齐伯曰：客星出玉井，其军已出为忧，若有水败。若入守之三日，其岁大水。



## 客星犯屏星二十二

石氏曰：客星入天屏，四足大疾。

《海中占》曰：客星出天屏，辅臣有忧，若人民多疾病，四足畜多死。

石氏曰：客星出入天屏，大人疾，主污辱。

郗萌曰：客星出入天屏，人民疾疫。

## 客星犯天厕二十三

《黄帝占》曰：客星入天厕，天下大饥，人相食，民移去，国君子卖衣，小人卖妻妾。一曰卖子而食。

《黄帝占》曰：客星入天厕，主病带下。

石氏曰：黄白星入天厕，天子有喜，奇物见。

石氏曰：苍白星入天厕，天子有阴病。

石氏曰：有星入天厕，色青有忧，赤有兵，白为旱，黑为凶。

石氏曰：赤星入天厕，有内兵起。

石氏曰：黑星入天厕，天子当之。

郗萌曰：周伯星流入天厕，岁余大贱，民有馀食，以春入夏贱，夏入秋贱，秋入冬贱，冬入春贱，终岁同焉，余无处也。

郗萌曰：老人星流入天厕，为饥，以春入秋饥，秋入冬饥，冬入春饥。

郗萌曰：客星入天厕，若有流水，水大出。

《玄冥》曰：客星出天厕，王者有忧，厕中有谋，兵若大人陷厕，宜防备之。

### 客星犯天矢二十四

石氏曰：客星出天矢而守之，天下民多病若多死，以五色占之，色黄吉，青白疾，黑死。

### 客星犯军市二十五

郗萌曰：客星入军市，大饥，将离散，士卒死亡。

《荆州占》曰：他星守军市，兵起。

《玉历》曰：客星出军市，若入守之军市中，人饥，将离散，士卒死亡。期一年。

### 客星犯狼星二十六

石氏曰：客星守狼弧，夷狄将来降。

郗萌曰：客星守狼弧，邦失大臣，色赤者得，青黑者亡也。

《荆州占》曰：客星守狼星，狗大贵。

《荆州占》曰：客星守狼星，色黄润，有大喜，黑有大忧。

《荆州占》曰：客星守狼星，有围城之急，以入日占何国。

甘氏曰：客星出狼星，若守之，天下起兵，多盗贼，将相多死，若有千里之行。期一年，中二年，远三年。

### 客星犯弧星二十七

郗萌曰：客星入弧星，将有南夷来降中国者，亦为蜀。

石氏曰：他星守弧，野将死。

石氏曰：客星守弧，主将弱。

郗萌曰：客星守弧，外夷大饥。又曰有兵。若弧星张，先

起兵者利，后起兵者不利。

郗萌曰：客星出弧，兵出；入弧，兵入。

郗萌曰：客星舍弧，秋雨，五谷不成。又曰：舍弧，左右群臣有伺其君者。

巫咸曰：客星出弧，若入之，其国有兵，大人惊，贵人多死，士卒出行，不出其年。

### 客星犯老人星二十八

石氏曰：他星犯老人星，天下老者忧，兵起。

郗萌曰：有星人老人，为政不和。

《黄帝占》曰：客星出老人星，有兵起，老人不安，若老人者行。若守之久，命曰扶老人，其国安，老人昌。

石氏曰：客星人若守老人星，天下民疾。一曰兵起，老人行。

### 客星犯天稷二十九

石氏曰：有星人天稷，有祀事于国内；出天稷，有祀事于国外。

《海中占》曰：客星守天稷，五谷散出，其岁忧，人民饥。一曰守之久，社稷不安。

### 客星犯甘氏中官二

#### 客星犯五帝内座一

郗萌曰：客星犯紫宫中帝座，大臣犯主。

#### 客星犯天理二

《荆州占》曰：客星犯天理，天下多狱，廷尉亦坐之。

郗萌曰：有星入天理，禁不明。

《荆州占》曰：有星入天理，大臣有诛者。

### 客星犯内阶三

《黄帝占》曰：客星犯守内阶，奸臣在左右。

### 客星犯天厨四

《荆州占》曰：客星守天厨，天下大饥，人相食，若流亡去其国，君子卖衣，小人卖妻。又曰食官有食变。

### 客星犯策星五

陈卓曰：客星近策星，王者不出宫，下有谋乱，不过七十日。

### 客星犯传舍六

《黄帝占》曰：客星守传舍，备奸使。

《雒书摘亡辟》曰：客星守传舍，邦有忧，大使转粟相食，天下苦。若自河之东，受剑戟之客。

### 客星犯造父七

郗萌曰：有星入造父，材官骑士出。

郗萌曰：赤星入造父中，车马贵。

《黄帝占》曰：客星守造父，兵起。

郗萌曰：客星守司马，地大动。

### 客星犯人星八

焦廷寿曰：有星入人星，天下有诏符传相惊。

### 客星犯杵臼九

石氏曰：客星守杵臼，岁饥，民费其财。

《黄帝占》曰：客星守杵臼，天下会聚米粟。一曰民失杵臼。

石氏曰：有星人杵臼，天下有急。

郗萌曰：有星人守杵臼，兵起人聚。

### 客星犯天鸡十

《天官书》曰：客星人天鸡，西北之夷且来下降。

郗萌曰：客星守天鸡，鸡夜鸣，天下尽有惊。

《荆州占》曰：客星守天鸡，山摧，若大水。

### 客星犯亢池十一

郗萌曰：客星守亢池，有盗宗庙者。

### 客星犯天田十二

郗萌曰：客星人天田，天焦旱，五谷不登，多虫蝗。

### 客星犯天门十三

郗萌曰：客星人天门，诸相有谋虑。

### 客星犯平道十四

郗萌曰：客星守平道，诸侯不朝，奸人横行。

### 客星犯酒旗十五

《春秋纬》曰：客星守酒旗，饮食失度。

《荆州占》曰：客星守酒旗，天下大酺，有酒害，财物若

賜爵宗室。

### 客星犯天高十六

《荊州占》曰：客星入天高，有奇令。又曰：入天高中十日，成勾巳，有贖罪之令。

郗萌曰：客星从天高阴出，有兵。一曰有走主亡臣，从阴入，有賜害之殃。一曰有客兵入者。

郗萌曰：客星守天高，宫中有火忧，有火神从天下，若妖祥自地出。

### 客星犯砺石十七

《荊州占》曰：客星守砺石，兵动，百工用。

### 客星犯八谷十八

石氏曰：客星入八谷，天下谷大贵，以饥战，主失位。

### 客星犯五潢十九

《黄帝占》曰：客星入五潢，兵起，车道不通，天下大乱，易政。一曰贵人死。

郗萌曰：有星入五潢，兵大起。

郗萌曰：客星留天潢中，人主以水为害，若井为害，以入日占国。

### 客星犯咸池二十

《黄帝占》曰：客星入咸池，大人忧。

《荊州占》曰：客星入咸池，人君死，天下水。

### 客星犯天街二十一

郝萌曰：客星入天街，内有贼人。

### 客星犯甘氏外官三

#### 客星犯青丘一

《荆州占》曰：客星守青丘，土官有事。

#### 客星犯车骑二

《天官书》曰：客星入车骑星，西羌且来降。

#### 客星犯狗国三

韩杨曰：客星入狗国，其王且操奇物来下中国。

郝萌曰：客星犯守狗国，皆为天下有大道。

#### 客星犯天田四

郝萌曰：有星入天田，天下有变。

#### 客星犯哭泣五

郝萌曰：客星守哭泣星，人主有哭泣之声。

#### 客星犯八魁六

郝萌曰：有星入八魁，天下多盗贼。

#### 客星犯天濶七

郝萌曰：有星入天濶，上潮下蒙。

### 客星犯九州殊口八

郗萌曰：有星入九州殊口，九州之民忧水事。

《黄帝占》曰：客星守九州口，负海国不安，兵起。

郗萌曰：客星守九州口，天下凶。

### 客星犯天节九

郗萌曰：客星入天节，奚、契丹有忧。

《荆州占》曰：客星守天节，臣有忧。

### 客星犯九游十

《荆州占》曰：客星守九游，忧，诸侯之兵若禽兽多疾。

### 客星犯军井十一

《荆州占》曰：客星守军井，军以水为忧。

《黄帝占》曰：客星入守天井，大水。

### 客星犯水府十二

《荆州占》曰：客星守水府，江河决溢。

郗萌曰：有星入水府，天下洪水。

### 客星犯天狗十三

《黄帝占》曰：客星入天狗，中国多大暴风雨。又曰北夷人饥来降。

《荆州占》曰：客星入天狗，多土功，北夷大饥。

《荆州占》曰：客星守天狗，守御之臣作乱。



### 客星犯丈人十四

郗萌曰：有星人丈人，明臣不得通。

### 客星犯天社十五

《黄帝占》曰：有星人天社，有祠事于国内；出天社，有祠事于国外。

### 客星犯天纪十六

《荆州占》曰：客星守天纪，国政乱。

### 客星犯天庙十七

甘氏曰：客星犯守天庙，军道不通。一曰有兵。又曰马多死。

甘氏曰：客星中犯乘守天庙，有白衣之会。

《荆州占》曰：客星中犯乘守天庙，祠官有忧。

### 客星犯东瓠十八

甘氏曰：客星入东瓠，其王且操金玉来下中国。

### 客星犯巫咸中外官四

#### 客星犯天相一

郗萌曰：客星出入天相，天子变更其令。

#### 客星犯长垣二

郗萌曰：赤星入长垣，胡人大凶。

### 客星犯军门三

《荆州占》曰：客星犯军门，军道大通。

### 客星犯阳门四

郗萌曰：有星入阳门，五兵藏。

### 客星犯钩星五

《荆州占》曰：客星守钩星，地动。

### 客星犯天桴六

《荆州占》曰：客星守天桴，度数改、漏刻失时。

### 客星犯天渊七

《荆州占》曰：客星守天渊，天下水出地动，若海鱼出。一曰守三渊，水与城等。

### 客星犯天垒城八

郗萌曰：客星入天垒城，北夷王且操奇马进中国。

### 客星犯铁钺九

《黄帝占》曰：客星入铁钺，外兵擒杀其将，士卒乱伤，外国来降。

郗萌曰：有星入铁钺，诸侯有来献地者；出铁钺，则献地诸侯。色青皆以忧，赤皆以兵，黄皆以好。

郗萌曰：客星入铁钺星，铁钺用，以日占其国。

郗萌曰：客星中犯乘铁钺，皆为兵将忧。

## 客星犯天厩十

《黄帝占》曰：有大星入天厩，马有惊。

郗萌曰：客星入天厩，不满三日，马为之贱。

郗萌曰：有星入天厩，厩车出行。

郗萌曰：客星入天厩之中，满三日而去，有赦。

《黄帝占》曰：客出若守天厩，有惊戒之事。

## 卷八十五 妖星占上

### 妖星所主一

《黄帝占》曰：妖星者，五行之气，五星之变，如见其方，以为灾殃，各以其日五色占知，何国吉凶决矣。以见无道，国失礼，邦为兵为饥，水旱死亡之徵也。

《黄帝占》曰：凡妖星所出，形状不同，为殃如一。其出不过一年若三年，必有破国屠城，其君死亡，天下大乱，兵士行，战死于野，积尸纵横，馀殃尽为水旱兵饥疾疫之殃。

石氏曰：妖星之状不相类，其殃一也，其出不过三月，必有破国乱君，伏死其辜，殃之不尽，当有旱饥暴疾疫矣。

甘氏曰：凡妖星出见长大，灾深期远，短小，灾浅期近。三尺至五尺，期百日；五尺至一丈，期一年；一丈至三丈，期三年；三丈至五丈，期五年；五丈至十丈，期七年，十丈以上，期九年。审以察之，其灾必应。

### 天棓占二

《河图》曰：岁星之精，流为天棓。

甘氏曰：天棓一名觉星。

甘氏曰：天棓本类星，末锐长四丈。

班固《天文志》曰：岁星羸而东南。孟康曰：岁星见东方，行疾则不见，不见则变为妖星也。

石氏曰：见彗星。

甘氏曰：不出三月乃生彗，本类星，末类彗长二丈，盈而东北。

石氏曰：见觉星。

甘氏曰：不出三月，乃生天棓，本类星，末锐长四丈也。

《春秋纬》曰：天棓主灭兵。

《春秋潜潭巴》曰：天棓主奋事。《河图》曰分争。

甘氏曰：天棓出其国，凶，不可举事用兵。又曰：期三月，必有破军拔城。

《潜潭巴》曰：棓枪出仲孟，芒交若相棓，宰将伐主，天下大乱。

甘氏曰：天棓出，期三月，必有破军拔城，人君伏死其罪。

甘氏曰：客天棓见，女主用事，其本者为主人。

### 天 枪 三

《河图》曰：岁星之精，流为天枪。

《春秋合诚图》曰：天枪主捕制。

《春秋纬》曰：岁星退而其南三月，生天枪阳沈，变萌，战乱兵行，诸侯大横，所见国无用兵。

班固《天文志》曰：岁星缩而西南。孟康曰：岁星当伏西方，行迟早没，变为妖星也。

石氏曰：见撓云如牛。

甘氏曰：不出三月，乃生天枪，左右锐长数丈。缩西北。

石氏曰：见枪云如马。

甘氏曰：不出三月，乃生天枪，本类星，末锐长丈。

《河图》曰：天枪主改修。

甘氏曰：天枪在西北，本类星，末锐一丈。

甘氏曰：天枪见则女主有用事者，其本为夫人。

巫咸曰：天枪出，国有功。

班固《天文志》曰：孝文后二年正月壬寅，天枪夕出西南，占曰为兵丧乱。其六年十一月，匈奴入上郡、云中，汉起三军以卫京师。按刘向《洪范》曰：文帝崩，吴楚七国反者也。

## 天 猗 四

《河图》曰：岁星之精，流为天猗。

《河图》曰、《春秋纬》曰：天猗主招乱者。

《春秋纬》曰：人主自恣，不备古王，逆天暴物，则天猗起，如众马斗于邦，地跃殃曰反光。

## 天 冲 五

《河图》曰：天冲，岁星之精流为之。

刘向《洪范》曰：天冲，其状如人苍衣赤首不动，其名曰天冲。

《春秋潜潭巴》曰：天冲主灭位。

《春秋运斗枢》曰：冲星出，臣谋主，武卒废，天子亡。

《运斗枢》曰：天冲抱拯泣帝前，血浊雾下，天下冤。宋均曰：抱犹向也，极，北辰也，泣言有泪众也，帝，大帝，即北辰也。血浊如雾，雾浊如血。

## 国 皇 六

《河图》曰：岁星之精，流为国皇。

《春秋运斗枢》曰：机星散为国皇。

巫咸曰：国皇之星大而赤，类南极老人星也。

《春秋纬》曰：国皇主灭奸。

《春秋合诚图》曰：国皇主内寇，一曰主内难。

《春秋考异邮》曰：国皇星见，则兵起，天下急。

司马彪《天文志》曰：孝灵光和中，国皇星见东南角，去地一二丈，如炬火状，十馀日不见，占曰：国皇为内乱外，内有兵丧。其后黄巾贼张角烧州郡，朝廷遣将讨平，斩首十馀万级。中平年，宫车晏驾，大将军何进令司隶校尉袁绍私募兵千馀人，阴射洛阳城外，窃呼并州牧董卓，使将兵至京都，共诛中官，对战南北宫及阙下，死者数千人，燔烧宫室，迁都西京。及司徒王允与将军吕布诛卓，卓部曲将郭汜、李傕提兵攻长安，公卿百官吏民战死者亦且万人，天下之乱，皆自内发。

巫咸曰：国皇星所指，其下起兵兵强。或曰其卫不利。

石氏曰：国皇星入天库，兵起亡地。

《荆州占》曰：国皇入紫宫，国有大变，兵起。又曰人主有忧。

《荆州占》曰：国皇星入紫宫，兵起得地。

## 反 登 七

《河图》曰：岁星之精，流为反登。

《春秋纬》曰：反登主夷分。

《春秋纬》曰：皆少阳之精，司徒之类，青龙七宿之域，有谋反若恣虐为害，主失春政者，以出时冲为期，皆主君徵也。

## 析 旦 八

《河图》曰：荧惑之精，流为析旦。或曰昭旦。

《春秋纬》曰：析旦主弱符。

《春秋纬》曰：析旦横出，浊百尺，为相诛灭。

## 蚩尤旗九

《河图》曰：荧惑之精，流为蚩尤旗。按《皇览冢墓记》曰：蚩尤冢在东郡寿张县阚乡城中，高七丈，民常十月祠之，有赤气出如绛帛，民名为蚩尤旗。《述征记》曰：须昌县阚乡有蚩尤冢，或云上代民以十月旦祠之，辄有赤气如一匹绛，谓蚩尤旗也。《汉书》武帝建元六年、元狩四年，并有长星见。班固《五行志》曰：为蚩尤之旗也。

《春秋运斗枢》曰：旋星散为蚩尤旗。

《说苑》曰：蚩尤旗，五星盈缩之所生也。

巫咸曰：蚩尤之旗，类彗而后曲象旗。

夏氏曰：四望无云，独见赤云，蚩尤旗也。

《荆州占》曰：蚩尤星如箕，可长二丈，末有星。

《吕氏春秋》曰：乱国之主，众邪并积，有云若桓囊，以长，黄上白下，其名曰蚩尤旗。

《春秋纬》曰：蚩尤旗诛逆国。

《春秋纬合诚图》曰：蚩尤之旗出，平四野。

《河图提》曰：帝将怒，则蚩尤旗出。

《论语摘辅象》曰：虐王反度，则蚩尤旗出。

《雒书》曰：旗刳旋，主备臣，边雄侯之贤主过，出兵马惊。

《黄帝占》曰：蚩尤旗本类星，而后委曲，其象旗幡，长可二三丈，见则王者鼓旗大行，征伐四方，兵大起，不然国有大丧，王者亡。期三年，中五年，远七年。按洪范《五行传》曰：武帝建元六年八月，长星出东方，长竟天，占曰：是蚩尤旗，见则王者征伐四方。自是之后，兵讨四夷，连二十年。元狩四年四月，长星复出西北，是时击胡狄。司马彪《天文志》曰：孝献初平三年九月，蚩尤旗长十余丈，色白，出角亢之南，其后丞相曹公征伐天下且三十年。

《魏志》曰：高贵乡公正元元年十一月，有白气出南斗侧，广数丈，长竟天，景王问王肃，肃对曰：蚩尤之旗也，东南其有乱乎！二年正月，毋丘俭等据淮南以叛，大将军司马师讨平之，自后征淮南，西平、巴蜀。是岁，吴主孙亮五凤元年。太平三年，孙琳盛兵图宫，废亮为会稽王，孙琳主淮南，江东同扬州地，故于时变见吴楚之分，则魏之淮南多与吴同灾，是以毋丘俭以为己应，遂起兵而败。三年，即魏甘露二年，诸葛诞又反淮南，吴遣朱吴救之，及城陷，诞众诛灭，《魏氏春秋》曰：正始元年十一月，蚩尤旗见于箕，东吴兵死没各数万人，车骑将军黄权薨之兆也。

《黄帝占》曰：蚩尤旗出北斗，长二三丈，本有星，其上委曲，见则天下乱，大兵起，天子自将兵，旗鼓用，不然国有大丧，期百八十日，中一年，远三年。

《春秋纬》曰：蚩尤之旗见则山崩。

《春秋纬》曰：蚩尤之旗，五精离芒，天运大兵，垂其彗，后曲而前长，四方并乱，天下灭兵，群猾动帝座于堂，见则五寇行，主不正暴，必有反兵，期五年，天子忧，不以亡，则九年凶加于斗宿，天子嚚嚚，出于列位，勉正四方。

《春秋纬》曰：蚩尤伐矜诛逆天患，蚩尤起天下之兵，合祸纷纷。

《春秋纬潜潭巴》曰：蚩尤之旗主伐叛。又曰主惑乱。

《春秋运斗枢》曰：蚩尤之旗见，则山崩，后族擅权。

《春秋运斗枢》曰：蚩尤旗干大，微法式，灭帝死于野。

《春秋纬考异邮》曰：蚩尤旗见，则王者伐枉逆。

《钩命决》曰：旗割瘳咄咀，出匿谋合。旗，蚩尤旗也。

夏氏曰：蚩尤旗所见之方，其下有兵，四方尽有，天下有兵。

郝萌曰：蚩尤旗守軫，赤哭礼。

《荆州占》曰：蚩尤旗见则兵大起，不然有丧。



## 昭 明 十

《河图》曰：荧惑之精，流为昭明。荆州占曰：填心之变为昭明也。

《黄帝占》曰：昭明者，五星之变，出于西方，名曰昭明，金之气也。

《春秋合诚图》曰：赤彗分为昭明，昭明灭光也。宋均注曰：灭主之光明也。象如太白吐芒，故以为起霸之徵，期七年。

《春秋运斗枢》曰：机星散为昭明。

《黄帝占》曰：西方有星，望之去地可丈而白，有光，其类太白数动，察之中赤，是谓西方之野星，名曰昭明，出，兵大起。其出也，下有丧，出南则西方邦失地。

《黄帝占》曰：昭明星出入毕中，有屠国。

《河图》曰：昭明蕝心，天子三公杀主必成。

《雒书兵铃势》曰：昭明见，霸者生。

《春秋运斗枢》曰：昭明有角，亡徵也。

《春秋纬》曰：昭明改德。

《春秋纬合诚图》曰：昭明所起，期七年，天子夺于州牧，去所出下发。

《春秋纬考异邮》曰：昭明星见则国灭，贤主立。

《春秋纬考异邮》曰：昭明如太白不行。

《春秋纬潜潭巴》曰：昭明起有德。

巫咸曰：昭明所起，国起兵，多变。

巫咸曰：西方有星，大而白，有角，目下视，名曰昭明。金之精出，则兵大起，若守房星，国有大丧，必有屠城。昭明下则为天狗，所下者大战流血。星出非其方，有兵冲则不利，期不出三年。

郗萌曰：昭明星见，大人凶。

郗萌曰：昭明出，兵大起。

郗萌曰：昭明星守心，大有丧。

郗萌曰：昭明星见虚中，天下无兵兵起，有兵兵罢，大臣为谋。

《天官书》曰：昭明大而白，无角，乍上乍下，孟康曰：形如三足几，上有九彗上向也。所出国起兵多变。

《荆州占》曰：昭明星出营室中，大臣为乱，无兵兵起，有兵兵罢。

## 司 危 十 一

《河图》曰：荧惑之精，流为司危。

《春秋合诚图》曰：白彗之气，分为司危。司危平非也，以为乖事之徵。

《春秋运斗枢》曰：机星散为司危。

孟康曰：司危星大而有毛，两角。

《荆州占》曰：司危类太白，类动，察之赤。

《洛书》曰：司危出，强国盈。

《春秋纬潜潭巴》曰：司危主击强侯兵也。

《合诚图》曰：司危如太白有目，以为乖事之徵，见则主失法，期八年，豪杰起，天子以不义失国，有声之臣行主德也。宋均注曰：声，名称也。

《春秋纬考异邮》曰：司危见则其下国残贼。

《天官书》曰：司危星出正西方之野，星去地可六七丈而白，类太白。一曰见兵起强。

《天官书》曰：司危出非其方，下有兵冲，不利。

《荆州占》曰：司危出则兵起，其下为丧。

## 天 揅 十 二

《河图》曰：荣惑之精，流为天揅。

《春秋纬》曰：岁星退如西北三月，生天揅。

郗萌曰：星出其状白，小类动，是谓揅星，一名斩星。

孙炎曰：揅枪，妖星别名也。尸子曰：彗星为揅枪也。

《春秋纬潜潭巴》曰：天揅主煞时。

甘氏曰：天揅见，女主用事者，其本为主人。

甘氏曰：天揅出西南，长数丈，左右锐，出而易处。

巫咸曰：天揅出，其国内乱。

京房曰：天揅出，其下相揅，为乱为兵，赤地千里，枯骨藉藉。按班固《天文志》曰：孝文后二年正月壬寅，天揅夕出西南，后匈奴入上郡、云中，汉起军以卫京师也。

郗萌曰：揅星出，即出兵，起出于东方，国益乡皆然。

班固《天文志》曰：天揅出，为兵丧。

《河图》曰：太阳之精，赤乌七宿之域，有谋反，若悖心为虐害，主失政者，期如占，皆以类名也。

## 五 残 十 三

《河图》曰：五残主奔亡。

《河图》曰：填星之精，流为五残。

《春秋运斗枢》曰：旋星散为五残。

《春秋合诚图》曰：苍彗散为五残，如辰星出角，阳失德，故生角。五残者，五分也。故为残毁败之徵。宋均曰：五残五分彗，一本而五枝也。期九年奸兴，三九二十七，乱大不可禁。

《黄帝占》曰：五残者，五行之变，出于东方，名曰五残木之气也。宋均曰：五残一曰五锋。

巫咸曰：五残星出正东方之野，星状类辰星，可去地六七丈，大而白。

《春秋合诚图》曰：五残主乖亡。

郗萌曰：五残，兵星也。

《黄帝占》曰：东方有星，望之去地可六丈，大而赤，察之中青，孟康曰：星表青气，如有晕也。其类岁星，是谓东方之野，星名曰五残，出则兵大起。其出也，下有丧，北出则东方邦失地。

《河图》曰：五残出，则宰司马之辈萌。

《河图》曰：五残出，四蕃虐，天子有急兵。

《雒书雒罪级》曰：五残六贼出，祸合天下，逆侵关枢。

《雒书兵铃势》曰：五残起，野乱成。

《雒书》曰：五锋星出，白帝亡也。

《尚书纬运期授》曰：白帝亡也。五残出。

《春秋纬考异邮》曰：五残备急。

《考异邮》曰：五残见则主诛，政去伯。

郗萌曰：五残见则国残，起奔系亡。

《天官书》曰：五残所出非其方，为其下有兵冲不利。

《荆州占》曰：五残大而赤，数动，察之而青。

《荆州占》曰：五残出则兵起，其下为丧。

## 六 贼 十 四

《黄帝占》曰：六贼者，五行之气，出于南方，名曰六贼，火之气也。

孟康曰：六贼星形如彗。

《黄帝占》曰：南方有星，望之去地六丈，赤而数动，察之有光，其类荧惑，是谓南方之野星，名曰六贼，出则兵起，其国乱。其出也，下有丧，出东方则南方邦失地。

巫咸曰：六贼星见，出正南方之星，去地可六丈，大而赤，数动有光。

《天官书》曰：六贼星所出非其方，为其下有兵冲不利。

### 狱 汉 十 五

《河图》曰：填星之精，散为狱汉。

《春秋运斗枢》曰：权星散为狱汉。

《黄帝占》曰：咸汉者，五行之气，出于北方，名曰咸汉，水之气也。

班固《天文志》曰：狱汉一名曰咸汉。

《天官书》曰：狱汉星出正北，北方之野星，去地可六丈，大而赤，数动察之中青。

孟康曰：狱汉青中赤表，下有三彗纵横。

《春秋合诚图》曰：狱汉主逐王。

《春秋潜潭巴》曰：狱汉主刺王。

《黄帝占》曰：北方有星，望之可去地六丈，大而赤，数动，察之中青黑，其类辰星，谓北方之野星，名曰咸汉。出则兵起。其出也，下有丧，出西则北方之邦失地。

《雒书兵铃势》曰：狱汉动，诸侯惊。

《春秋运斗枢》曰：狱汉出，阴精横。

《天官书》曰：狱汉所出非其方，为其下有兵冲不利。

《荆州占》曰：狱汉出则兵起，其下为丧。

### 大 贲 十 六

《河图》曰：填星之精，散为大贲。

《河图》曰：大贲出，主暴冲也。

## 炤星十七

《河图》曰：填星之精，散为炤星。

《河图》曰：炤星主灭邦。又曰：炤星见，主灭亡。

## 绌流十八

《河图》曰：填星之精，散为绌流。

《春秋纬》曰：绌流主伏逃。

《河图》曰：绌流动，天下嗽主自理，无所逃。

## 萑星十九

甘氏曰：萑星出东南，本有星，末类萑，所当之国是受其殃。

京房曰：萑星三角三年消，五角五年消，七角七年消，九角九年消。

## 卷八十六 妖星占中

### 旬始占二十

《河图》曰：填星之精，散为旬始。

《春秋运斗枢》曰：枢星散为旬始。

《说苑》曰：旬始五星，盈缩之所生也。

《广雅》曰：旬始，妖气也。徐广曰：旬始，蚩尤也。

巫咸曰：旬始出于北斗傍，伏如雄鸡，其怒青黑，象伏螯。李奇曰：怒当为孛。晋灼曰：孛，雌也，或曰怒则青色。按司马长卿《大人赋》曰：垂旬始以为惨兮，樛彗星以为髡。谓此星也。

《春秋合诚图》曰：黄彗分为旬始，旬始者，令起也，状

如雄鸡，土含阳，以文白接精，象鸡，故以为立主之题，十年圣人起伏。宋均注曰：接，理也，题，识也，土含文采，故其气理为鸡，取其知时。土，数十也，起作也。

《春秋合诚图》曰：旬始主争兵。

《春秋考异邮》曰：旬始主乱。

《春秋潜潭巴》曰：旬始主招横。

《春秋考异邮》曰：旬始其下，必有灭亡，五奸争治，暴骨积骸，以子续食，见则臣乱兵作，诸侯为虐。

《黄帝占》曰：常以戊戌丑咸日戊己视五车中，有奇怪曰旬始，状如鸟，有喙而见者，明则兵大起攻战，当其首者破死，欲为之左右勿逆。

《黄帝占》曰：旬始见天库中，所向兵弗能当。

《黄帝占》曰：旬始出见北斗，圣人受命，天子寿，主者有福。

《文曜钩》曰：旬始见行起北斗傍，期六十日，兵大起，上将军出，帝自临兵，期不出年。

《春秋纬》曰：众变并集旬始，昭天下有灭主，五奸争治。

《春秋纬运斗枢》曰：辟之失枢，旬始出于五诸侯。

《孝经章句》曰：有妖星在东井阴，名曰旬始。旬始出，主失国，入井则霜。

郗萌曰：旬始出建星，水灾并行，边境起兵者，备水盗贼。

班固《天文志》曰：旬始如鳖见，群猾横盗。

《玄冥占》曰：有星状如雄雉，其色赤黄，名曰旬始，见则天下有兵，其国不宁，期三年。

石氏曰：常以戊戌日，（一曰戊己）视天军中，有旬始星，状如鸟，见者兵大起攻战，向其首者破，为之左旋乃战，

常勿逆也。

### 击咎二十一

《河图》曰：填星之精，散为击咎。

《河图》曰：击咎出，臣弑主。一曰臣禁主。

《河图》曰：击咎主大兵。

《文曜钩》曰：击咎守軫，耀百尺，为相诛灭。

《河图》曰：土精斗七星之域，以长四方八卦之内，司空之位有谋反，若盗虐者，期如上占。

### 天杵二十二

《河图》曰：太白散之精为天杵。

石氏曰：天杵主牂羊。

### 天拊二十三

《河图》曰：太白之精，散为天拊。

《河图》曰：天拊主击殃。

### 伏灵二十四

《河图》曰：太白之精，散为伏灵。

《河图》曰：伏灵主领谗。

郗萌曰：伏灵出，天下乱复治。

### 大败二十五

《河图》曰：太白之精，散为大败。

《河图》曰：大败主开冲。

韩杨曰：大败出，击咎谋。



## 司奸二十六

《河图》曰：太白之精，散为司奸。

《河图》曰：司奸主见妖。

## 天狗二十七

《河图》曰：太白之精，散为天狗。

《黄帝占》曰：天狗者、五星气合变，出西南，金火气，合名曰天狗。

孟康曰：天狗星有毛，旁有短彗，下有如狗刑者。按《三秦记》曰：骊山西有白鹿原，周平王时白鹿出是原，原上有狗枷保。秦襄公时有天狗枷来下，民保，其上有贼，天狗则吠而护之，故一保无患也。

《抱朴子》曰：有黑气如牛马人其军者，名天狗，下食血，其军必败。《广雅》曰：天狗，妖气也。

《河图》曰：天狗主候兵。

《春秋纬》曰：天狗主讨贼。

《春秋纬》曰：天狗流，五将开。

石氏曰：西北有星，长三丈而出水金气交，名曰天狗。

《荆州占》曰：西北三星大而白，名天狗，见则大兵起，天下饥，人相食。按辛氏《秦州》记：乞伏乾归猎于康狼州，见天上如有十丈绛绛直下，山川草木皆赤。相气者云：天狗下。后遂破吕保足也。

石氏曰：天狗所下之处，必有大战，破军杀将，伏尸流血，天狗食之，皆期一年，中二年，远三年，各以其所下之国以占吉凶。

郗萌曰：西北有三大星出，如日状，名曰天狗。天狗出，人相食。一曰昭明下则为天狗，天狗所下，兵大起流血。

郗萌曰：星出其状赤白有光，下即为天狗，其下小小

足，所下之地必流血，国易政。按《山海经》曰：金门之山有赤犬，名曰天犬，其所下有兵。郭璞注曰：《周书》云：天狗所止地，盖顶馀光飞天为流星，长数十丈，其疾如风，声如雷，走如电，吴楚七国反时，过梁野，《鸿范五行传》曰：七国之兵战于梁地，故狗先降梁垒，以见其象也。狗者守围之类也，天狗所降以戒守围。班固《天文志》曰：孝文帝后二年八月，天狗下梁野，是岁诛反者周殷长安市，吴楚攻梁，梁王坚守，遂伏尸流血其下也。七年六月，文帝崩。

班固《天文志》曰：哀帝定平元年正月丁未，日出时有著天白气，广如一疋布，长十馀丈，西南行，喧如雷，西行一刻而止，名曰天狗。《传》曰：言不从则有狗祸到。其四年正月二月三月，民相惊动，喧哗奔走，传行诏祷祠西王母。

《兵书》曰：两敌相望，其云气如牛马状，头低尾仰，名曰天狗，勿与战。

《荆州占》曰：天狗犯弧星，大将有千里之行，若贵人多死。

### 天残二十八

《河图》曰：太白之精，散为天残。

《春秋纬》曰：天残主贪残。

### 卒起二十九

《河图》曰：太白之精，散为卒起。

《河图》曰：卒起见，祸无时，诸变有萌者，臣运柄。

《河图》曰：卒起主虐亡河，少阴之精，大司马之类，白虎七宿之域有谋反。若戾虐为害，主失秋政者，期如上占祸应之。

## 枉矢三十

《河图稽耀钩》曰：辰星之精，散为枉矢。

《荆州占》曰：填星之精，变为枉矢。

《春秋运斗枢》曰：几星散，为枉矢。

《说苑》曰：枉矢之星，盈缩之所生也。

《鸿范五行传》曰：枉矢者，弓弩之象也，枉矢之所触，天下之所伐，灭亡之象也。

巫咸曰：枉矢类大流星，色苍黑，蛇行，望之如有毛，目长数丈著天。

《春秋合诚图》曰：枉矢主反萌，黑彗分为枉矢。狂矢者，射星也，水流蛇行，含明，故有毛目，阴合于四，故长四，又水生木，其怒青黑，水灭火，其精沉，故以为谋反之徵。在所流受者灭，皆为天子之祥，阴道于六期六年，萌二十四年，天子以兵亡，所已议见起。

《春秋纬》曰：枉矢主射愚。又曰：枉矢流射所谋。

《河图》曰：枉矢东流，天下恐。

《洛书》曰：枉矢出，夏桀灭。

《尚书中侯》曰：夏桀无道，枉矢射。

《河图真纪钩》曰：人君邪暴专己，则枉矢动。

《洛书说徵示》曰：枉矢射心，山崩，火燔宫。

《维书维罪级》曰：枉矢射，主以兵去。

《易纬辨终备》曰：枉矢流，隐谋合，国雄逃。

《诗纬》曰：枉矢流，天降丧乱。

《诗纬含神务》曰：白之亡，枉矢流。

《尚书运期授》曰：白之亡也，枉矢射参。

《尚书纬》曰：枉矢流，天射王。

《春秋纬》曰：黄之亡，有枉矢下流到地，上属天，下以

兵亡，天子凶。

《春秋纬》曰：枉矢芒，臣不忠，民不良。

《春秋纬》曰：枉矢或东或西，五谷不升，民流亡。

《春秋潜潭巴》曰：枉矢或南或北，无聚众，伐敌国。

《春秋潜潭巴》曰：枉矢守虚，卑国以实，尊国虚。

《春秋潜潭巴》曰：枉矢守填星，民多事，其大芒也，黄德昌。

《春秋潜潭巴》曰：枉矢黑，军士不勇，疾流肿。

《春秋纬运斗枢》曰：枉矢出，射所诛。

《春秋运斗枢》曰：黄帝行失，则枉矢出，射所谋，谋易失枢之主，故以枉矢射之。

《春秋考异邮》曰：枉矢见则谋反之兵合。

《考异邮》曰：枉矢而流射，伐秦以亡。

《春秋汉含孳》曰：枉矢流，主见射。

《春秋佐助期》曰：枉矢流射，黜灭不祥。

《孝经钩命决》曰：乱蒋蒋，枉矢出。

《孝经援神契》曰：枉矢射，匿谋强。

《论语摘辅像》曰：虚王反度，则枉矢合。

《海中占》曰：枉矢类流星，望之有毛目，长可一疋布，皎皎著天，则大兵起，大将出，弓弩用，期三年。

石氏曰：枉矢射心，地陷备虚狼。

郝萌曰：枉矢出东井，边境起兵，火灾并行，受者备火盗贼。

《说苑》曰：秦二世立，枉矢夜光。

郝萌曰：枉矢射参，秦以亡，一曰帝亡。

班固《天文志》曰：枉矢所触，天下之所伐射，灭亡之象也。按《宋书天文志》曰：晋元帝大兴三年四月壬辰，枉矢出虚危，没翼轸。永昌元年三月，王敦率江荆之众来攻京都，六军距战，败绩，于

是杀护军将军周顗、尚书令刁协、骠骑将军戴弼，又镇北将军刘隗出奔。四月，又杀湘州刺史璆王承、镇南将军甘卓。闰十一月，元帝崩。间一年，数亦彗，枉矢之应。

班固《天文志》曰：枉矢流，以乱伐乱。按《宋书天文志》曰：晋元康六年六月丙午夜，有枉矢在斗魁东南行，是后赵王杀张华，废贾后，以理太子之冤，遂自篡以至屠城。光熙元年五月，枉矢西南流，是时司马越西破河间，奉迎大驾，寻收缪胤、和缓等，肆其无君之心，天下恶之。及死而石勒焚其尸柩也。

班固《天文志》曰：项羽救钜鹿，枉矢西流。占曰：枉矢所触，天下之所伐射，灭亡象也。物莫直于矢，今蛇行不能直，矢而枉者，执矢者亦不正，以象项羽执政乱也。羽遂合从，坑秦人，屠咸阳。

司马彪《天文志》曰：孝灵中平中夏，流星赤如火，长三四尺，起河鼓，入天市，抵触宦者星，色白，长二三尺，后尾再屈，食顷乃灭，状似枉矢。占曰：枉矢流，发其官射，所谓矢当直而枉者，操矢者邪枉人也。中平六年，大将军何进谋，尽诛中宦，中宦觉，于省中杀进，俱两破灭，天下由此遂大坏乱。

### 破女三十一

《河图》曰：辰星之精，散为破女。

《河图》曰：破女见，群臣皆诛。

《河图》曰：破女主胜之符。

### 拂枢三十二

《河图》曰：辰星之精，散为拂枢。

《河图》曰：拂枢动乱，骇扰无调时。

《河图》曰：拂枢主制时。

### 灭宝三十三

《河图》曰：辰星之精，散为灭宝。

《河图》曰：灭宝起，相得之。

《河图》曰：灭宝主伐之。

### 绕纒三十四

《河图》曰：辰星之精，散为绕纒。

《春秋纬》曰：绕纒主乱尊。

### 惊惶三十五

《河图》曰：辰星之精，散为惊惶。

《河图》曰：惊惶主相署。

### 大奋祀三十六

《河图》曰：辰星之精，散为大奋祀。

《河图》曰：大奋祀主招邪。

韩杨曰：大奋祀出，主安之。

《河图》曰：太阴之精，玄武七宿之域，有谋反，若恣虐为害，主失冬政者，期如上占祸应之。

《春秋纬》曰：五精潜潭，皆以类逆，所犯行失时指下，臣承类者乘而害之，皆灭亡之徵也。入天子宿，主灭诸侯五伯谋。

### 天锋三十七

宋均曰：天锋彗象矛锋者也。

《春秋合诚图》曰：天锋主纵横。

宋均曰：天下横纵，则天锋星见。

《洪范五行传》曰：汉昭帝始元元年，彗星出西方，出天市东门，行过河鼓，入营室中，占曰：有乱臣戮死，后左将军上官桀、子驃骑将军安与燕王谋反，诛死。

### 烛星三十八

石氏曰：烛星状如太白，其出也不行则见，不久而灭。

孟康曰：烛星上有三彗上出。

石氏曰：烛星所出邑反。

甘氏曰：烛星出东方，其所出者兵不胜；出南方，有兵，王者亡地；出西方，其国有丧，兵胜，出北方，其所出者兵胜。

《天官书》曰：烛星所烛者城邑乱。

《荆州占》曰：烛星所出，有大盗，不成。

《荆州占》曰：烛星青，有忧事，不吉，赤有华事，黄盖地，白有欢事。

班固《天文志》曰：孝昭五年四月，烛星见奎娄间，占曰有土功，胡人死，边城和。六年筑辽东玄菟郡，二月度辽将军范明友击乌丸还。

### 蓬星三十九

《荆州占》曰：蓬星一名王星，状如夜火之光，多即至四五，少即一二。一曰蓬星，在西南，修数丈，左右锐出而易处。

《圣谕符》曰：有星其色黄白，方不过三尺，名曰蓬星，见则天下道术士当有出者，布衣之士贵，天下太平，五谷成，人民宁，期一年，远二年。

甘氏曰：蓬星出北斗，诸侯有夺地，以地亡，有兵起星所房者，期不出三年。

郗萌曰：蓬星出太微中，天子立王，期不出三年。

班固《天文志》曰：汉昭帝始元中，汉宦者梁成恢及燕王侯星者吴莫如见蓬星出西方天市东门，行过河鼓，入营室中，恢曰：蓬星出六十日，不出三年，下有乱臣戮死于市。

班固《天文志》曰：孝景中三年六月壬戌，蓬星在房南，去房可二丈，大如二斗器，色白；癸亥在心东北，可长丈所；甲子在尾北，可六丈，丁卯在箕北近汉，稍小，且去时大如桃，壬申去，凡十日。占曰：蓬星出，必有乱臣。房心间，天子宫也，是时梁王欲为汉嗣，使人杀汉诤臣袁盎，汉诛梁大臣，斧钺用，梁王恐惧，布车入关，伏斧钺谢罪，然后得免。

《荆州占》曰：蓬星出北斗魁中，王者坐贼死，若大臣诸侯有受诛者。

《荆州占》曰：蓬星出见于东方东南东北，不大旱则大水，五谷不收，余贵十倍，人相食。

《荆州占》曰：蓬星出司命，王者疾死。

何法盛《中兴书》曰：晋孝武太元二十年九月，有蓬星如粉絮，东南行，历女虚危，至哭星，明年而烈宗崩。

韩杨曰：蓬星出北斗中，大臣诸侯有受兵者。

## 长庚四十

司马迁《天官书》曰：长庚如一疋布著天。此长庚非《诗》所谓西有长庚者。

司马迁《天官书》曰：长庚见则兵起。

## 四填四十一

巫咸曰：四填星出阳，去地六丈馀。

司马迁《天官书》曰：四填出地，可四丈。

《荆州占》曰：四填星大而赤，去地二丈，当以夜半子时



出。

《荆州占》曰：四填星见十月而兵起。又曰：四填星见，四隅皆为兵起其下。

### 地维藏光四十二

《黄帝占》曰：地维藏光者，五行之气出于四季土之气也。

《荆州占》曰：有星出，大而赤，去地二三丈，如月始出，是谓地维藏光。

《黄帝占》曰：四隅有星，望之可去地四丈，而赤黄摇动，其类填星，是谓中央之野星，出于四隅，名曰地维藏光。出东北隅，天下大水；出东南隅，天下大旱；出西南隅，则有兵起；出西北隅，则天下乱兵大起。

《天官书》曰：地维藏光见，下有乱者亡，有德者昌。

### 女帛四十三

《黄帝占》曰：女帛者，五星气合之变，出东北，木水气合也。

石氏曰：东北有星，长三丈而出水，水气交，名曰女帛，见则天下兵起，若有大丧。

《荆州占》曰：东北有三丈星出，名曰女帛，女帛出，天下有大丧。

### 盗星四十四

《黄帝占》曰：盗星，五星气合之变，出东南，木火气合也。

石氏曰：东南有星，长三丈而出，木火气交，名曰盗星。

《荆州占》曰：东南有三星出，名曰盗星，见则天下有大

盜，多寇賊。

### 积陵四十五

《黄帝占》曰：积陵者，五星气合之变，出西北，金水气合也。

石氏曰：西南有星，长三丈而出，《荆州占》曰：有三星，乃大星出。金水气交，名曰积陵，见则其下陨籍，兵水并起，五谷不成，人民饥。《荆州占》曰：天下谷十倍。

### 瑞星四十六

《黄帝占》曰：瑞星者，五星气合之变，出与金木水火合于四隅也。

石氏曰：四隅有星，大而赤，察之中黄，数动，长可四丈，此土之气，效于四季，名曰四隅瑞星，所出兵大起，有土功。正月出，十月起兵；二月出，十一月起兵；三月出，七月起兵；四月出，九月起兵。皆期三年，中五年，远七年。

### 昏昌四十七

《黄帝占》曰：有星出西北，气青赤，以环之，中赤外青，名曰昏昌，见则天下兵起，国易政，先起者昌，后起者亡。高十丈，乱一年；高二十丈，乱二年；高三十丈，乱三年。

### 华星四十八

甘氏曰：有星出西北，状如有环，名之曰华星。华星见西南，诸侯有失地，西北国。

## 白星四十九

郗萌曰：有如星非星，状如削瓜，有胜兵，名曰白星。白星出，为男丧。

## 菟昌星五十

石氏曰：西北菟昌之星，其有青赤环之，有殃，青为水，此星见，天下易。

## 格泽五十一

《黄帝占》曰：格泽者，炎火之状，《天官书》曰：格泽，星也。上黄下白，从地而上，下大上锐，见则不种而获，《天官书》曰：不有土功，必有大客至，必有大客邻国来者，期一年，远二年。

《广雅》曰：格泽，妖气也。

《玉历》曰：格泽气赤如火，炎炎中天，上下同色，东西结天，若于南北，长可四五里，此荧惑之变，见兵起其下，伏尸流血，期三年。

《史记天官书》曰：格泽星者，如炎火之状，黄白，起地，而下大上锐，其见也，不种而获，不有土功，必有大客。

## 归邪五十二

巫咸曰：如星非星，如云非云，名曰归邪。李奇曰：邪音蛇。孟康曰：有两赤蜺上向，上有盖，状如气，下连星。

司马迁《天官书》曰：归蛇见，必有归国者。

## 濛星五十三

萧子显《晋书》曰：明帝大明三年十二月，夜有赤气如牙

旗，长短四面，西南最多。按天文占，此为濛星，一曰刀星，乱之象。大兴末及此再见，王敦、苏峻之祸，其应切矣。

《宋书天文志》曰：宋孝武大明三年正月夜，通天薄云，四方生赤黄气，长三尺，乍没乍见，寻皆消灭。占曰：名濛星，一曰刀星，天下有兵，战斗流血。时南兖州刺史竟陵王诞寻据广陵反，遣车骑大将军沈庆之领羽林劲兵，及豫州刺史宗谷、徐州刺史刘道降众军攻战及屠城，城内男女，道降枭斩靡遗。七年正月夜，又通天薄云，四方合，有八气，苍白色，长二三尺，乍见乍没，亦名曰濛星，一名刀星。占曰天下有兵。后二年，帝崩，大臣将相诛灭，皇子被害，昭太后崩，四方兵起，公遣诸军推锋外讨。

## 卷八十七 妖星占下

### 天垣 一

天垣星，在角宿中，出月左方，日在甲寅，岁星将出而不出，其与日合二十日，其未出二日，必有灾，云苍赤黑色，三物厌日之光，青色之星有两青，方在其旁出而生。天垣之星所指之国消主死，政星变色而青，期三年。

### 天楼 二

天楼星，在亢宿中出月左方，日在甲寅，岁星将出而不出，其与日合三十日，其未出三日，必有灾，云苍赤黑色，三物厌日之光，青色之星有两青方在其旁出而生。天楼之星长八十尺，一本八丈。所指之国谷余大贵，法星变色而青，期三年。

### 天 棣 三

天棣星，在氐宿中。出月左方，日在甲寅，岁星将出而不出，其与日合四十日，其未出四日，必有灾，云苍赤黑色，三物厌日之光，青色之星有两青，方在其旁出而生。天棣星一本长十丈所宿之国，有立王，一本云地。令星变色而青，期三年。

### 首 若 四

首若星，在房宿中。出月左方，日在甲寅，岁星将出而不出，其与日合五十日，其未出五日，必有灾，云苍赤黑色，三物厌日之光，青色之星有两青方在其旁出而生。首若之星六七尺，一本六丈。所指之国亡地，煞星变色而青，期二年或三年。

### 天 荆 五

天荆星，在心宿中。出月左方，日在甲寅，岁星将出而不出，与日合六十日，其未出六日，必有灾，云苍赤黑色，三物厌日之光，青色之星有两青方在其旁出而生。天荆之星所指之国亡，战不胜，主死，伐星变色而青，期三年。

### 天 根 六

天根星，在尾宿中。出月左方，日在甲寅，岁星将出而不出，其与日合七十日，其未出七日，必有灾，云苍赤黑色，三物厌日之光，青色之星有两青方在其旁出而生。天根之星所指之国大亡地，战败，星变色而青，期三年。

### 天 枪 星 七

天枪星，在箕宿中。出月左方，日在甲寅，岁星将出而不出

出，其与日合八十日，其未出八日，必有灾，云苍赤黑色，三物厌日之光，青色之星有两青方在其旁出而生。天枪之星长数丈，所指之国有兵，大军破，应星变色而青，期一年。

### 端 下 八

端下星，在斗宿中。出月左方，日在壬寅，辰星将出而不出，其与日合二十日，其未出二日，必有灾，云黑黄青色，三物厌日之光，黑色之星有两黑方在旁出而生。端下之星所指之国大破，将死，政星变色而黑，期六月。一本云或十二月一月。

### 商 若 九

商若一本云天蒿星，在牛宿中。出月左方，日在壬寅，辰星将出而不出，其与日合二十五日，其未出二日，必有灾，云黑黄青色，三物厌日之光，黑色之星有两黑方在其旁出而生。商若之星长三四尺，所指之国大水，败，兵起，法星变色而黑，期一年。

### 天 杵 十

天杵一本云天林星，在女宿中。出月左方，日在壬寅，辰星之变而不出，其与日合三十六日，其未出三日，必有灾，云黑黄青色，三物厌日之光，黑色之星有两黑方在其旁出而生。天杵之星长七八尺，所指之国军破将死，令星变色而黑，期一年。

### 天 麻 十 一

天麻星，在虚宿中。出月左方，日在壬寅，辰星将出而不出，其与日合三十五日，其未出五日，必有灾，云黑黄青色，三物厌日之光，黑色之星有两黑方在其旁出而生。天麻之星长

七八尺，一本云四五尺。所指之国破亡，煞星之变色而黑，期六月。

### 天杖十二

天杖一本天社星，在危宿中。出月左方，日在壬寅，辰星将出而不出，其与日合四十日，其未出四日，必有灾，云黑黄青色，三物厌日之光，黑色之星有两黑方在其旁出而生。天杖之星长十餘丈，勾曲所指之国兵，主死，伐星变色而黑，期二年。

### 天搀星十三

天搀星，在室宿中。出月左方，日在壬寅，辰星将出而不出，其与日合四十五日，其未出四日，必有灾，云黑黄青色，三物厌日之光，黑色之星有两黑方在其旁出而生。天搀之星长五六尺，所指之国破亡，危星之变色而黑，期三年。

### 天英十四

天英星，在壁宿中。出月左方，日在壬寅，辰星将出而不出，其与日合五十日，其未出五日，必有灾，云黑黄青色，三物厌日之光，黑色之星有两黑方在其旁出而生。天英之星长一十丈，所指之国军破亡地，应星变色而黑，期三年。

### 白旧十五

白旧星，在奎宿中。出月左方，日在庚寅，太白将出而不出，其与日合十日，其未出一日，必有灾，云白赤黑色，三物厌日之光，白色之星有两白方在其旁出而生。白旧之星所指之国，亡地主死，政星变色而白，期一年。

## 星 十 六

星在娄宿中出月左方，日在庚寅，太白将出而不出，其与日合二十日，其未出二日，必有灾，云白赤黑色，三物厌日之光，白色之星有两白方在其旁出而生。星所指之国亡，必有大丧，有水灾，法星变色而白，期一年。

## 彗 星 十 七

彗一本墙星星，在胃宿中。出月左方，日在庚寅，太白将出而不出，其与日合三十日，其未出三日，必有灾，云白赤黑色。三物厌日之光，白色之星有两白方在其旁出而生。彗星长十餘丈，一本丈余。所指之国内乱，令星变色而白，期一年。

## 林 若 十 八

林若一本作彗星，在昴宿中。出月左方，日在庚寅，太白将出而不出，其与日合四十日，其未出四日，必有灾，云白赤黑色，三物厌日之光，白色之星有两白方在其旁出而生。林若之星长十餘丈，一本七尺。所指之国破亡死丧，煞星变色而白，期一年。

## 若 彗 十 九

若彗星，在毕宿中。出月左方，日在庚寅，太白将出而不出，其与日合五十日，其未出五日，必有灾，云白赤黑色，三物厌日之光，白色之星有两白方在旁出而生。若彗之星长七八尺，所指之国内乱亡地，伐星变色而白，期三年。

## 帚 星 二 十

帚星，在觜宿中出月左方，日在庚寅，太白将出而不出，



其与日合六十日，其未出六日，必有灾，云白赤黑色，三物厌日之光，白色之星有两白方在其旁出而生。帚星长四尺，所指之国内乱亡地，危星变色而白，期六月。一本六年。

### 若星二十一

若星，在参宿中。出月左方，日在庚寅，太白将出而不出，其与日合七十日，其未出七日，必有灾，云白赤黑色，三物厌日之光，白色之星有两方在其旁出而生。若星所指之国大败，战不胜，应星变色而白，期二年。

### 蚩尤二十二

蚩尤星，在井宿中。出月左方，日在丙寅，荧惑将出而不出，其与日合三十日，其未出三日，必有灾，云赤青黄色，三物厌日之光，赤色之星有两赤方在其旁出而生。蚩尤之星长十七丈，一本丈餘，其下有大战，政星变色而赤，期二年。

### 赤若二十三

赤若，在鬼宿中。出月左方，日在丙寅，荧惑将出而不出，其与日合四十日，其未出四日，必有灾，云赤青黄色，三物厌日之光，赤色之星有两赤方在其旁出而生。赤若之星其下有死亡流血战败，法星变色而赤，期二年。

### 天雀二十四

天雀，一本赤雀，在柳宿中。出月左方，日在丙寅，荧惑将出而不出，其与日合五十日，其未出五日，必有灾，云赤青黄色，三物厌日之光，赤色之星有两赤方在其旁出而生。天雀之星所指之国败亡，令星变色而赤，期三年。

## 天惑二十五

天惑，在星宿中。出月左方，日在丙寅，荧惑将出而不出，其与日合六十日，其未出六日，必有灾，云赤青黄色，三物厌日之光，赤色之星有两赤方在其旁出而生。天惑之星三角，一本四角。长三尺，下旱，有兵起，所指之国亡，煞星变色而赤，期一年，远二年。

## 官张二十六

官张星，在张宿中。出月左方，日在丙寅，荧惑将出而不出，其与日合七十日，其未出七日，必有灾，云赤青黄色，三物厌日之光，赤色之星有两赤方在其旁出而生。官张之星三角，而勾所指之国主死，伐星变色而赤，期一年。

## 晋若二十七

晋若之星，在翼宿中。出月左方，日在丙寅，荧惑将出而不出，其与日合八十日，其未出八日，必有灾，云赤青黄色，三物厌日之光，赤色之星有两赤方在其旁出而生。晋若之星所指之国破亡，危星变色而赤，期三年若四年。

## 天阴二十八

天阴星，在轸宿中。出月左方，日在丙寅，荧惑将出而不出，其与日合九十日，未出九日，必有灾，云赤青黄色，三物厌日之光，赤色之星有两赤方在其旁出而生。天阴之星所指之国亡，应星变色而赤，期三年。

## 折若二十九

折若，（一本云彗）出月左方，日在戊寅，填星将出而不出

出，其与日合四十日，其未出四日，必有灾，云黄赤青色，三物厌日之光，黄色之星有两黄方在其旁出而生。折若之星长五尺，所指之国亡，政星变色而黄，期六年，远九年。

### 天拂三十

天拂星，出月左方，日在戊寅，填星将出而不出，其与日合五十日，其未出五日，必有灾，云黄赤青色，三物厌日之光，黄色之星有两黄方在其旁出而生。天拂之星所指之国兵，法星变色而黄，期三年。

### 天翟三十一

天翟星，出月左方，日在戊寅，填星将出而不出，其与日合六十日，其未出六日，必有灾，云黄赤青色，三物厌日之光，黄色之星有两黄方出其旁而生。天翟之星四角而勾，中央有星长四尺五尺，所指之国小败，令星变色而黄，期二年或三年。

### 天枢三十二

天枢星，出月左方，日在戊寅，填星将出而不出，其与日合七十日，其未出七日，必有灾，云黄赤青色，三物厌日之光，黄色之星有两黄方在其旁出而生。天枢之星三角，而勾所指之国战败，煞星变色而黄，期一年或二年。

### 天从三十三

天从星，出月左方，日在戊寅，填星将出而不出，其与日合八十日，其未出八十日，必有灾，云黄赤青色，三物厌日之光，黄色之星有两黄方在其旁出而生。天从之星长六七尺，一本云七八尺。所指之国亡，伐星变色而黄，期二年或三年。

## 天罚三十四

天罚或作伐星，出月左方，日在戊寅，填星将出而不出，其与日合九十日，其未出九日，必有灾，云黄赤青色，三物厌日之光，黄色之星有两黄方在其旁出而生。天罚之星所指之国中见大败，危星变色而黄，期二年或五年。

## 天社三十五

天社一本天上星，出月左方，日在戊寅，填星将出而不出，其与日合一百日，其未出十日，必有灾，云黄赤青色，三物厌日之光，黄色之星有两黄方在其旁出而生。天社之星天下大乱，所指之国亡，应星变色而黄，期一年。

## 卷八十八 彗星占

### 候彗孛法一

《黄帝占》曰：候彗星之法，当以五寅之日视瓮水中，见两方气在日旁，则彗将出矣。其与北斗之星各有所主，乃视气之五色相象而定之。其彗星之出，又寅日见日旁，有青方气在日旁，此岁星之精，将欲为彗。以寅日见赤方气在日旁，此荧惑之精，将为彗。各以五色气候之，是则五星将欲为彗之变。先见其气，后见其彗。彗星见而长，天子死，五都亡，贱人昌，无道之君受其殃，期不出三年。

石氏曰：候彗灾应之法，各以十二辰所出之地，各属相连冲破之，下当有兵，诛假令。彗星出室壁而依戌地，奎本鲁分，室壁卫分，冲于寅尾，箕燕分，破于辰，角亢郑分，明鲁有兵诛于此国，他皆仿此。

巫咸曰：岁星行东行南，六十日不还，以初去日六月；彗星出东北，六十日不还，以初去日六月；棊星出西北，六十日不还，以初出日六月；撝星出西南，六十日不还，以初去日六月；枪星出，乍东乍西，乍南乍北，天狗出，必有兵革。

巫咸曰：辰星出四季，彗星出。

郗萌曰：太白与日共舍，同舍七十日，生彗星。

郗萌曰：荧惑守箕三月，彗星出。

《荆州占》曰：岁星逆行过度宿者，则生彗星。一曰天棊，二曰天枪，三曰天撝，四曰彗星。此四者皆为彗。

陈卓占曰：荧惑守心，期三十日，彗星出。

陈卓曰：填星守荧惑，期三十日，彗星出。

齐伯曰：填星出入以舍斗五十日不下，彗星出。

## 彗孛名状占二

《春秋文耀钩》曰：辰星散为彗。

《说苑》曰：撝枪彗彗，皆五星盈缩之所生。

《荆州占》曰：彗星者，君臣失政，浊乱三光，五逆错变气之所生也。

《吕氏通纪》曰：彗星者，天地之旗也。

《淮南鸿烈》曰：彗星者，天之忌也。

《春秋演孔图》曰：海精死，彗星出。

《春秋考异邮》曰：鲸鱼死，彗星合。《淮南子》曰：彗星出。宋均曰：是将有兵相煞之祥也。

《春秋考异邮》曰：臣之恣，地动星孛。

京房曰：君为祸，则彗星出。

郑玄曰：彗星主扫除。

石氏曰：凡彗星有四名，一名孛星，二名拂星，三名扫星，四名彗星。其状不同，为殃如一。其出不过三月，必有破

国乱君，伏死其事，馀殃不尽，当为饥旱疾疫之灾。其星日行一尺，二十日而入，此彗星之行也。

文颖注《汉书》曰：孛彗长三星其占略同，然其形象小异。孛芒短，其光四出，蓬蓬孛孛也；彗其光芒长，参参如扫彗；长星其光芒有一直指，或竟天，或十丈，或一二丈，无常也。大法孛彗星多为除旧布新，改易君上，亦为火灾，长星多为兵革。《史记淮南王传》曰：建元六年，彗星见，淮南王安心怪之。或说王曰：先吴军起时，彗星长数尺，然尚流血千里，今彗星长竟天，天下兵当大起。王心以为上无子，天下有变，诸侯并争，愈益治攻战具，遂谋反。

《黄帝占》曰：彗星出见，本类星，长可二三尺，其炎如气，黄白，孛孛然，名孛星，见则天下兵起，臣谋其主，必有亡国，期不出三年。

《黄帝占》曰：彗星出见，本类星，长可一丈，其炎头散下垂，状如毛拂，名曰拂星，见则天下乱，兵大起，强臣有谋，有走主，其君失地，近一年，中三年，远五年。

《黄帝占》曰：彗星出见，可二丈至三丈，形如竹木枝条，名曰扫星。三丈已上至十丈，名曰彗星。彗扫同形，长短有差，殃灾如一，见则扫除凶秽，必有灭国，臣弑其君，大兵起，国易政，无道之君当之，期三年，中五年，远九年。

石氏曰：扫星者，逆气之所致也，枝条长短如彗星之形，出居二十八宿及中外官，三日七日或三十日或五十日常不灭，彗孛出而即灭，扫除凶秽，除故布新，故言扫星。

董仲舒曰：孛星者，彗星之属也。

《偏指》曰：彗芒气四出，曰孛孛者，孛孛然也，谓之孛者，言其暗昧不明之貌也。一说云孛即彗也，彗星所蔽为孛，《春秋》言星孛者皆彗蔽也。按《史记》曰：齐景公三十二年，彗星见，景公坐柏寝叹曰：堂堂谁有此乎！君臣皆泣。晏子笑，公怒。晏

子曰：臣笑君臣谀甚。景公曰：彗星出东北，当齐分野，寡人以忧。晏子曰：君高台深池，赋敛如弗得，刑罚恐弗胜，孛星将出，彗星何惧乎！公曰：可禳否？晏子曰：使神可祝而来，亦可禳而去也，百姓苦怨以万数，而君令一人禳之，安能注众口乎？推此言，则孛之为灾，逾于彗也。

刘向《鸿范传》曰：孛星者，非孛星恶气之所生也，内不有大乱，则外有大兵。其所以孛孛暖暖者，乱之象也，不明之表，又参然孛焉，兵之类也，故圣人名曰孛。孛者，犹有所妨蔽，有所伤害也。

《荆州占》曰：彗星其象如竹彗树木枝条，长短无常。

《黄帝占》曰：彗星出行犯守外舍，当先知逆顺，入宿深浅，去之远近久速，观其五色，察其动静，及以喜怒扬变色，皆为殃咎。守之去速灾轻，守之久灾重，各随所在之宿命其国以占吉凶。

《黄帝占》曰：彗孛所干历百日以上，期三年；百五十日以上，期五年；二百日以上，期七年。

《黄帝占》曰：彗星出见其国，大人亡。见一句，期三月，十日见三十日，将当之，期三年；见五十日，相当之，期五年；见七十日，人主当之，期七年若九年，灾必应。

《春秋纬》曰：诸彗内官皆为内谋，曝骨将将，死尸满溪，血流千里，出外宿不加内官，祸小起。

《巫咸占》曰：彗星入列宿中外者，各以其所部舍官名为其事，所之者为其谋，其下之国皆受其祸，以所守之舍为其期，以五气相贼者为其决。

《海中占》曰：彗长五尺以至一丈，期三月若十月；一丈以至三丈，期三年；三丈以至五丈，期五年；五丈以至十丈，期七年；十丈以上，期九年。

《荆州占》曰：彗星见久，灾深大；其短浅为灾小。

《黄帝占》曰：彗星者，所以除旧布新，扫灭凶秽，其象若竹彗树木枝条，长大而见则灾深期远，短小而见则灾浅期近，皆为兵饥水丧亡国之殃。按班固《天文志》：始皇之时，十五年间彗星四见，久者八十日，长或竟天，后秦遂以兵内兼六国，外攘四夷，死人如乱麻。

韦昭《洞纪》曰、《洛书兵铃势》曰：彗星出，野骨捐。

《春秋演孔图》曰：彗星出则国枢蹶。

《演孔图》曰：彗星东出，长八丈，天下更政。

《春秋文曜钩》曰：彗星孛填街塞路，九州粉击，庶人为主。

《春秋运斗枢》曰：彗星见，后曲象旗，则王者伐枉逆。

《春秋运斗枢》曰：星之孛，臣威孽，兵粉击，灭国谋。

《春秋保乾图》曰：星孛备强圉，黜臣所欲。又曰星孛兵变。

石氏曰：彗星出而长，名曰白旗，丧气也，当视旗之所指所扫，冲破之下，必有兵丧，其国灭亡，大人受殃，各以冲互为期。前互为近期，冲破为中期，后互为远期，皆不过五七九，灾必应。

石氏曰：扫出，状如上有鸟，赤色，此谓有忧，黑者群臣有贼，扫所在之下，主亡国。

石氏曰：扫出状如小木，长三丈，其本有黑，二三丈，其本有赤，见居四维，此谓为谋，其岁兵发。

石氏曰：扫出状如直竹，长二三丈，其尾锐，白色，此谓天下丧，天子死，亡国朝不庆，诸侯亡。

石氏曰：扫出状如直竹，长二三丈，赤色，尾锐，此谓出急令，兵战以见，诸侯不德。

石氏曰：扫出，诸侯诛，皆在其国受殃，指亦然。

石氏曰：蓬扫出见者饥，有兵，亡地。四方蓬扫出，其状



如太白，蓬长三丈，指。乐扫见兵起大乱；蕞扫见者，禾稼就；蒲扫见，兵起于境上，军战不胜；杵扫出，大将起反，人主凶；竹扫见，为兵。

甘氏曰：彗见则女主有用事者，其本为女人。

甘氏曰：彗扫水之精，出则不过一年，天下水，及有饥，星所在宿其邦尤甚。

甘氏曰：彗星春夏出为饥，水，秋冬出为人主自将兵，若大丧。又曰：冬春见为小凶，夏秋为大凶。

甘氏曰：彗星其枝条长为兵为丧，短为水为饥，其见一旬，期三月。

京房曰：彗星出为饥兵，臣下失中和，故出彗扫除之。按韦昭《洞纪》曰：汉安帝三年，彗星见，四年，勃海鲜卑磨怀反，掠辽东三县地，平原贼起，攻官寺长吏，西羌匈奴侵辽，又旱也。

刘向《鸿范传》曰：彗星者，天所以去无道而建有德也。按《春秋左氏传》曰：昭公二十六年，齐有彗星，齐侯使禳之，晏子曰：无益也，祇取诬焉。天道不谄不戴，其命若之何禳之？且天之彗也，以除秽也，君无秽德，又何禳焉，若德之秽，禳之何损。乃止。

郝萌曰：彗星短为饥为兵，向下为土功，所见之邦当之。

《荆州占》曰：彗星昏见，其国受兵。一曰必亡国灭军。不然必有死主。按《晏子春秋》曰：景公谓晏子曰：寡人闻彗星出，其所向之国当之，今彗星向吾国，我是以悲。晏子曰：君穿池欲深广，为台欲高大，诛戮如仇讎，又将出彗星，宁可拒乎？公乃填陂池，灭台榭，薄赋敛，缓刑罚。三十七日彗星亡矣。韦昭《洞纪》曰：周贞定王七年，彗星见，八年，贞定王崩。周元王二年，彗星见，其年鲁哀公卒。《幽明录》曰：晋太元末，长星见，孝武心恶之，夜在华林园中饮酒，因举杯属星曰：长星劝尔一杯酒，自古亦何时万岁天子耶！帝亦寻崩也。

《荆州占》曰：彗星出，必有反者，兵大起，其国乱亡。

一曰不出一岁，天下大水，其邦尤甚。

《荆州占》曰：彗星见则敌国兵起，得人者胜。按《尉察子》曰：昔楚将芊城父子公子心与齐人未合战，其日夜彗星出，柄在齐，柄之所在胜不可击。子心曰：彗星何冲，以彗斗者，周知而列之，明日与齐人战，大破之。

《玉历》曰：彗星出见，是谓天地相靡，其分受兵，必有亡国，若有死主，期不出三年。按韦昭《洞纪》曰：周赧王十年十二年十九年，彗星见，后秦取周之地，彗星之应也。

《巫咸占》曰：彗星有出者，皆是五星之象，以其所出宿以命，五行所属之象出于木宿，岁星之象出于火宿，荧惑之象出于土宿，填星之象出于金星，太白之象出于水宿，辰星之象见于二十八宿。中外官变色扬芒，怒而与五星合斗，此皆大兵之冲，破国之殃，臣凌其君，下不伏上，天下不顺，故致此灾。审以五色察之，决知存亡之事。

《海中占》曰：凡彗有色，白黑为男主，赤黄为女主，皆为人君女主死之之殃。

《河图》曰：苍彗主火不义，少阳之精，司徒之类，苍龙七宿之域有起反，若恣虐为害，主失春政者，以出时冲为期，皆主君之败也，大人灭。

《春秋纬》曰：苍彗木精出见而生芒，主逆阳，失天常，则日蚀明消，此星出，期三年，五侯破，天子若兵。

《春秋纬合诚图》曰：苍彗破神明。

《河图》曰：黑彗主涿州，太阴之精，玄武七宿之域，有谋反若恣虐为害，主失冬政者，期如上占，祸应之。入天子之宿，主灭诸侯位五伯谋。

《春秋纬》曰：彗水精，贼起，则水决江河，期二年，其出赤，世以水害，亡水害者以类发难也。近四远八，以其祸行。

《河图》曰：白彗主斩强，少阴之精，大司马之类，白如上占，祸应之。

《春秋纬》曰：白彗金精，如锋利，长四丈，见则将军逆，期二年兵作。

《春秋合诚图》曰：白彗主臣权，一曰专权。

《河图》曰：赤彗主灭五卿，太阳之精也，朱鸟七宿之域，有谋反若恣虐为害，主失夏政者，期如上占，皆类名之。

《河图》曰：赤彗火精，如火耀，长七尺，贼起，强国恣虐，期三年。

《春秋合诚图》曰：赤彗灭五卿。

《河图》曰：黄彗主女乱，皆土精，斗七星之域以张四方，八卦之内，司空之类，有谋反若恣虐为害者，期如上占。

《春秋纬》曰：黄彗如正见，一本云如重云。则主女害，妃嫔有以色擢上，夺于后妃，期一年。彗星孛，见于四方。

《黄帝占》曰：彗星出东方，诸侯有起霸者，皆有兵饥。按韦昭《洞纪》曰：汉武元狩三年春，有星孛于东方，匈奴入右北平、定襄，然掠数千人。后元二年七月，有星孛于东方，冬，匈奴入朔方，然掠人民。《吴志》曰：嘉禾五年十月，彗星见东方，都阳贼彭旦等为乱。《晋朝杂事》曰：武帝太康二年九月，彗星见东方，十一月，鲜卑磨怀反，掠辽东三县地。

《河图》曰：彗星出东方，河逆决，将相代主，有与天子并治者。按古洪范天文星辰凶占：鲁哀公十三年冬十一月，有星孛于东方，其后楚灭陈国，田氏篡齐，六卿分晋也。

《易坤灵图》曰：彗星自东方出，苍萌动功。

《春秋纬》曰：彗星出东方，争明，光见金代苍，北，皆天子之异，大小之类，各应其邦。

《春秋感精符》曰：星孛于东方，言阴夺阳，臣代主；以兵相灭，以势相乘，天下变易，帝位久空，人人侥幸，布衣纵

横，祸未定息，主灭乱起，阴动争明之异也。按韦昭《洞纪》曰：汉武建元六年八月，有星孛于东方，长竟天门，后越王邪攻南越，赵王恢击之，未至，越人杀邪。

《春秋保乾图》曰：彗星出东，君臣争明。

《春秋纬》曰：星孛于东方，将军谋主，主兵去，代主治，行天子之权。

巫咸曰：彗星出东方，其下发兵与天子争，人主亡。

京房曰：星孛于东，则骨肉欲篡，近北边，国人于西，则兵大起，蛮貊战，经东西方，民病不救之，则致日蚀，既下谋。

《荆州占》曰：彗星出东方，将军有谋人主者。

《黄帝占》曰：彗星出北方，将军有谋欲代其主，若臣行不顺而致。《洪范天文星辰变占》曰：汉武建元六年六月，有彗孛于北方，及淮南王安反，服诛。

《易坤灵图》曰：彗星自北方出，色黑动功。

《春秋纬》曰：彗扫星出北方，诸侯起霸。

郗萌曰：彗星出北方，长八九丈，名勉功。勉功出，天下更致。

石氏曰：扫在北，状如鸡，圣人受兵，强国发兵，诸侯争权，人主凶。

《黄帝占》曰：彗扫孛出西方，天下有兵，夷狄大胜，中国大败。按《宋书天文志》曰：晋成帝咸和四年七月，星孛于西北，二十三日灭。十二月，郭默杀江州刺史刘胤，荆州刺史陶侃讨默。明年斩之。石勒又始僭号。

《易坤灵图》曰：彗星自西方出，白萌动功。

《春秋运斗枢》曰：彗星出西方如钩，长可四丈，名曰天梭。

《晋书》曰：彗星出西方，长可二三丈，名曰天枪，受之

者其国方有土功。

《洪范天文星辰变占》曰：汉宣帝地节元年正月，有星孛于西方，去太白二丈所，占曰：太白为大将军，彗孛加之，扫灭象也。明年，大将军霍光薨。后二年，光家夷灭。

《荆州占》曰：彗星出西方，命曰天棓。

《黄帝占》曰：彗扫星出南方，天下大乱，无有君上，兵饥并起。

《易绅灵图》曰：彗星自南方出，赤萌动功。

石氏曰：彗星出东南，其本类星，末类彗，长可二三丈至一丈，名曰天枪，受之者其国内乱，兵起宫中，王者忧之。

甘氏曰：彗星出东南方，状拂，长一丈，所受之者其国有丧，内乱。

甘氏曰：彗扫东，东南国大人死，七十日主当之，五十日相当之，四十日将当之。

《荆州占》曰：彗星出东南，长二丈以上，为其国内乱。

《春秋运斗枢》曰：彗星出东北，名曰天棓。

石氏曰：彗星出东北，其本类星，末类星，长可四五尺若一丈，名曰天撓，受之者其国有戮死者，大臣贵人当之。

甘氏曰：扫星见东北，名曰天棓，受之者其国君有戮。

石氏曰：彗星出西北，本类星，末类彗，长可四五尺至一丈，名曰天棓，受之者大乱，兵大起，若女主有忧，有大水，其年民饥。

巫咸曰：彗星出西北如钩，长可四五丈，名曰天撓，受之者国内乱。

《荆州占》曰：彗扫出西北，其本类星，末类帚，长三丈以上，其内乱。按《魏志》曰：毋丘俭为镇东都督日，与扬州刺史文钦善。正元二年正月，有彗星数十丈西北竟天起于吴楚之分，俭钦喜，以为己祥，遂矫太后诏罪状大将军司马景王，移诸郡国降兵大反。

石氏曰：彗星出西南，本类星，末类彗，长可二三丈，名曰扫星，受之者其国兵大起，将相有死者，邦易政，人主有忧。按韦昭《洞纪》曰：汉景二年，有星孛于西南，四月壬午，太后薄氏崩也。

石氏曰：扫出西南，有本类星，末类彗星，长三丈以上，其国有土功。

《春秋纬》曰：彗星出中央，正在人上，一本长四丈也。命曰天罚，受者国有丧。

石氏曰：彗星出中央，正在人上，其本类星，末类彗，长可五六尺至一丈，名曰天戈，天下兵也，人主亡，受者其国有大丧，人民饥亡。凡五彗出见，皆期三年，中五年，远七年九年。

《荆州占》曰：彗星见中央，正出人上，长三四丈以上，其国内丧。

魏氏图曰：帚星东去，西南指，海中兵起，欲败中国也；西去而东指，羌胡入界，煞人灾也；南去而北指者，天下人死半邦也；北去而南指，天下水没城郭，地陷崩也。

魏氏图曰：东行西指，越兵大起，得所出国，民排患也。

魏氏图曰：南行西北指者，其国大丰。

《孝经内纪》曰：彗星东北行西南指者，所出国中大要为乱也。

魏氏图曰：西行东指者，国塞外兵入国，为大起兵。

魏氏图曰：北行南指者，其国中祸大起也。

魏氏图曰：西行东南指者，国中大恶为乱。

《孝经雌雄图》曰：彗星四出，按图文横如十字而四尾并散也。满天下有知之士就高而居之也，无知之士流为粪土，耕于山胁。

《彗星图》曰：彗星出，天下大旱，赤地五百里，无生

草也。而彗俱见，彗有芒角五。

《孝经雌雄图》曰：两彗俱见者，天子岁再赦。一曰北向指者，一岁再赦也。

《孝经内记》曰：二彗星起南指者，所出国大血流道。

《洛书摘亡辟》曰：三彗俱起，海内少男子。

《春秋元命包》曰：彗星四出，灭六王。

《洛书摘亡辟》曰：彗星四出，灭六王。

《荆州占》曰：彗星四出竟天，人主亡徵也。

《洛书》曰：五彗并出，太白入午，白虹贯能，主省尚可治。

《春秋纬》曰：五彗俱出，圣君起，则获麟执授纪。

巫咸曰：五彗俱出，侯称王，天下大乱，兵起四方，诸侯同谋，人主亡，除旧布新，扫去凶殃，更立明君，天下大昌。期百八十日，远一年。又曰：五彗出东方，人主坐之，圣人起亦然。

《荆州占》曰：五彗俱出天下，兵起，人主亡。

《春秋纬》曰：彗星五芒，祸之极效之徵也。

《春秋考异邮》曰：彗星之芒临京都，主以赏罚不行，偏任见犯。

## 卷八十九 彗星占中

### 彗星昼见一

《彗星图》曰：彗星昼见，所临国下当为河，天地合矣。

按孙盛《晋阳秋》曰：惠帝太安元年夏四月，彗星昼见，不行其占也。

## 彗星犯日二

《孝经雌雄图》曰：彗在日傍，子欲杀父。又曰：四彗在日中，君有德，天下欢，以大丰盛也。

石氏曰：彗星守日侯精星也，天下大乱，兵革大起，群臣并谋，天子亡，期不出三年。

《玉历》曰：彗星贯日，臣杀君，子谋父，贯日过，事必然，期百日，远一年。

## 彗星犯月三

《河图圣谕符》曰：彗星入月中，必有破军死将，兵大起，其国以火灾，此三年大饥。

《洛书》曰：彗星入月中，必有亡军亡将，起以北国。

《海中占》曰：彗星入月中，兵大起，有臣欲弑其君者，十二年大饥。

《海中占》曰：彗星入月中，星无光，不出其年，亡国星出，亡国复立。

《河图》曰：彗星角袭月，臣弑其主。按《战国策》曰：唐雎谓秦王曰：专诸判王僚，彗星袭月也。

甘氏曰：彗星在月首，必有大兵起者，将军死，有失地君，不出二年。

《文曜钩》曰：彗星之行掩月，五星拂而过，兵大起，必有战有死，将臣专政，逐其主，王者忧，期三年。

《孝经雌雄图》曰：彗星在月中，臣当坐君子死忧。

齐伯曰：彗星贯月，天下有大兵，臣杀主，若女主当之，期一年，远二年。



## 彗星犯五星四

《黄帝占》曰：彗星出入太白，长可五六丈，金火之兵大用，大战流血，天下更政，期三年，远五年。

石氏曰：扫星出守五星，侯称皇，天下起兵，诸侯并谋，天子亡。

## 彗星犯东方七宿五

### 角彗孛犯角

甘氏曰：彗孛干犯两角间，白者军起不战，邦有大丧；其色赤，战芒所指，必有破军侵城，期七十日或三年。按《宋书天文志》曰：魏甘露二年十一月，彗星见角，色白。景元元年，高贵乡公帅左右兵袭晋文王，未及战，为成济所害。哀帝兴宁元年八月，有星孛于角亢，入天市。三年正月，皇后王氏崩。二月，哀帝崩。三月，慕容攻洛阳，沈劲等战死。

石氏曰：彗星出角，天下大乱，更政易王，暴兵起，必有战，期三年，中五年，远九年。

陈卓曰：彗星出角，天子起兵王廷，谷大贵，大疾疫。

韩杨曰：彗星出角，后党恣，外连祸。

郝萌曰：彗星出入角，长可七八尺，天下更政，金火之兵大用。

### 亢彗孛犯亢

《黄帝占》曰：彗孛星干犯亢，国有昏乱，释旧布新，易帝王，近期百八十日，远一年。

甘氏曰：彗孛干犯亢，中国不安，兵起政乱，期一年。

巫咸曰：彗星出亢，天下大饥，其国有兵，人民多疫，人

相食，期不出三年。按檀道鸾《晋阳秋》曰：孝武帝宁康二年三月丙戌，彗星出氐亢，移及角轸翼张，长十丈，东北指。十一月，天门逆贼攻郡，杀吏民。威远将军桓石虔攻羌贼姚萇于垫江。三年正月丁未。八月，大赦天下。太元二年九月，苻坚屠凉州，虏刺史张天锡，车骑冲发，三州吏民移，诸流民悉居淮南也。

《荆州占》曰：彗星出亢，天子失德，天下大饥，有水兵疫。按《宋书天文志》曰：魏景元三年十一月壬寅，彗星见亢，色白，长五丈，积四十五日灭，钟会、邓艾伐蜀，克之，会、艾反乱。

陈卓曰：彗星出亢，为兵丧，五谷不成。

### 氐彗孛犯氐

《黄帝占》曰：彗孛干犯氐，大臣杀其主，兵大起，更政，近期百六十，远期一年。

陈卓曰：彗孛干犯氐，大赦，天子失德，余人贵。

甘氏曰：彗孛干入氐中，后宫有乱，暴兵，不出百八十日，远三年。

《黄帝占》曰：彗星入氐房间，绮绮索索，如冬木无叶从风而倚，此星出为兵戎，此岁星之变见，不过一年。

石氏曰：彗星出氐，天子不安，有大赦，中宫有乱，暴兵起，不出百八十日。

石氏曰：彗星出氐中，天下大赦；其灭，民大疾恶，余人贵，有兵事。

石氏曰：彗星起氐中，天子不安，宫移徙，必失座。

按《宋书天文志》曰：宋少帝景初元年十月戊午，有星孛于氐北，尾长三四丈，西北指，贯摄提，向大角东行，日长六七尺，十馀日灭，明年五月，徐羨之等废帝。

## 房彗孛犯房

甘氏曰：彗莠干犯房，王国兵起，民饥，骨肉相残也。

石氏曰：彗从房出，天子绌，行为无道，诸侯举兵守国。

甘氏曰：彗星出房，大兵起，水旱不调，人多饥死，去其宅田。一曰人相食。期不出二年。

郗萌曰：彗星出房中，国大饥，有兵擅兴在道旁，矛戟在野，战斗不止，蜚虫横下。

陈卓曰：彗星出房，山崩。

《尚书中侯》曰：星孛房，四邦灾。按《春秋》鲁昭公十年冬，有星孛于大辰，鲁大夫申须曰：诸侯其有大灾乎！明年五月，宋卫陈郑四国同日火。

《考异邮》曰：彗孛贯房，王室大乱。

《荆州占》曰：彗孛星于房，赤帝之后受命，人主凶，有亡国。

郗萌曰：彗星如房，后百二十日火。

《甄曜度》曰：彗星守房，天下有丧，戴麻锵锵，天子亡，不出其年。

《春秋纬演孔图》曰：彗星守房心，天下有丧。一曰天子亡。一曰大人忧。

《诗纬含神务》曰：苍之亡，彗出房。

石氏曰：彗孛干犯钩钤，王宫大乱，不出三年。

## 心彗孛犯心

《尧图变书》曰：大辰有孛生谋见煞，必有立王，相射伐。

《春秋纬》曰：星莠干大辰，国分为二，大夫制君。

《春秋纬潜潭巴》曰：有星莠干大辰，受命之君大振，兵

旅争于野。

《春秋纬演孔图》曰：彗星贼起，入大辰，天帝谋易王。

《春秋感精符》曰：孛星贼起，光入大辰者，将有阴谋，以邪犯正，与天子争势居位者，大臣谋主，两王并立，周分之异也。

《易纬》曰：彗星守大辰，东方之疫，天子亡。

《春秋纬》曰：彗星守大辰，天子哭。按《宋书天文志》曰：魏青龙四年十月甲申，有孛星于大辰，长三丈。景初元年，皇后毛氏崩。

《黄帝占》曰：彗星出心，兵起宫中，剑戟交锋，大臣相疑，有戮死者，近七日，中七十日，远八十日。

《春秋运斗枢》曰：孛星守心，主位分，大臣谋上，天子凶。

《玄冥》曰：彗星出心，若守之，天子有丧，德令不出，蝗虫大起，民大饥，流亡去其乡，期一年，远二年。司马彪《天文志》曰：孝桓延禧四年五月辛酉，客去营室，稍顺行，生芒，长五尺，所至心一转为彗，为大丧。后年，邓后以忧死也。

《宋书天文志》曰：安帝义熙十一年五月甲申，彗星出天市，扫帝位，在房心北，房心宋之分野。占曰：得彗柄者兴，除旧布新，宋兴之象也。

《玄冥》曰：彗星出心，若守之，大水，五谷不成。

石氏曰：彗孛犯守心宫，钟大鸣，剑戟交横，大臣相疑，天下兵起，心变期急，近期七日，中期七十日，远期百八十日。

### 尾彗孛犯尾

《合诚图》曰：扫出尾箕间，状如蓬首，扫臣专权。

陈卓曰：彗星出尾宿，兵革罢弊，天下大饥，君子卖衣，

小人卖妻，岁多大风大雨。

《海中占》曰：彗星出入尾后，相贵臣诛，兵起宫门，宫人走出，国易政，期一年，中二年，远三年。按《洪范天文志》曰：《星辰变占》曰：汉文后七年九月，星孛于西方，其本直，尾箕末指虚危，长丈餘，及天汉，十六日不见。后三年，吴楚七国同时皆反也。

石氏曰：彗星孛干犯守尾后，有以珠玉簪珥惑天子者，诸谗大起，后相贵臣诛，宫人出走，兵起宫门，多土功，近期百八十日，远一年。

### 箕彗孛犯箕

石氏曰：彗星出箕，夷狄为乱，大兵起，天下大旱，余贵十倍，人多饿死，死者大半，期二年。

《海中占》曰：彗星出箕，天下大饥，大臣有见弃捐者。

《河图圣谕符》曰：彗星出入箕，天下大旱，谷贵，人民饥死，十有五死。

《圣谕符》曰：彗星守箕，东夷下湿与水军将为乱。

### 彗孛犯北方七宿六

#### 斗彗孛犯南斗

甘氏曰：彗孛干犯南斗度，其国必乱，兵大起，期一年。

陈卓曰：彗孛长干犯南斗，王者病疾，臣谋其君，子谋其父，弟谋其兄，是谓无理，诸侯不通，天下易政，大乱兵起，期百八十日，远不出一年。按《宋书天文志》曰：晋武帝太康八年九月，星孛干南斗，长数十丈，十餘日灭。太康末，武帝耽晏游，多病疾，是月乙酉，帝崩。永平元年，贾后诛杨骏及其党与，皆夷三族，杨太后亦杀。是年又诛汝南王亮，太保卫瑾，楚王伟，王室兵丧之应也。

《春秋纬》曰：彗星出南斗，天下有势皆谋。

《孝经雌雄图》曰：彗星出南斗中，宫中失火烧宝。

甘氏曰：彗星出南斗，大臣谋反，兵水并起，天下乱，将军有战若流血。星若灭斗，其国主亡，若星明，反臣受殃，近三年，中五年，远七年。

《荆州占》曰：彗星出南斗，天下皆谋上。

石氏曰：彗星拂于斗房，赤帝之后受令，人主凶，有亡国。

### 牛彗孛犯牛

甘氏曰：彗拂干犯牵牛，吴越兵自立，三年而灭。陈卓云：期一年，远三年。

《彗要占》曰：彗拂干犯牵牛，中国起兵。

《荆州占》曰：彗入天鼓，有兵。

《荆州占》曰：彗星干牵牛须女之间，状如彗，其本有四星垒然，此星出为兵，此辰星变见，不过一年，兵大起，国饥。

《海中占》曰：彗星出牵牛，四夷兵起，边境为乱，来侵中国，人主有忧，期一年，中二年，远三年。司马彪《天文志》曰：孝章建初元年八月庚寅，彗星出天市，长二尺，所行稍入牵牛三度，积四十日稍灭，彗出。天市为外军，牵牛为吴越，是时蛮夷陈纵等反，安夷长宋延为西羌所杀，校尉马防行车骑将军征西羌。又阜陵王延子男魴谋反，大逆天道，得不诛，废为侯。

陈卓曰：彗星牵牛，改元易号之象也。按班固《天文志》曰：哀帝建平二年，彗出牵牛七十餘日。传曰：彗所以扫旧布新也，牵牛日月五星所从起，历数之元，三正之始，彗而出之，政更之象也，而出久者，其事大也。其六月甲子夏，贺良等建言当改元易号，增漏刻，诏书改建平二年为大初元德元年，号曰陈圣刘太平皇帝，漏刻以百二十为度。八月丁巳，悉复蠲除之，贺良及党与皆伏诛流放。其后卒有王莽

篡国之祸。《宋书天文志》曰：晋惠帝永康元年十二月，彗出牵牛之西，指天市，明年，赵王篡位，改元，寻为大兵所灭也。又曰：多兵，余贵，牛大死。

《春秋圣治符》曰：彗星牵牛，北夷骄奢，治将为乱。

### 须女彗孛犯须女

石氏曰：彗孛干犯须女，邻国有以奇女来侍者。

石氏曰：彗孛干犯须女，其邦兵起，女为乱，若妾迁为后，王者无信，大乱，期不出三年。退女所亲，天下安宁矣。

《感精符》曰：彗星出须女，其国大兵起，女主为乱，王者恶之，将军戮死，若以战亡，期不出三年。按檀道鸾《晋阳秋》曰：孝武宁康二年正月丁巳，有星孛干女虚，芒长四尺，西南指。太元二年五月，苻坚遣伪帅毛当、苻寇逼西凉州，虜刺史西平公张天锡送于坚所。冬十月，车骑桓冲遣咨议参军淮南太守刘波沈舟淮泗，乘虚设计以送凉州，又发三州官吏移救，流民悉置淮南也。

巫咸曰：彗星出须女之间，辰星之变也。

陈卓曰：彗星出须女，帝以女亡，有水灾，余大贵，盐贵。

### 虚彗星孛犯虚

郗萌曰：彗星干犯虚中，有哭泣之事，墙垣无立者，有井田之法，改制之事。

《荆州占》曰：彗星干犯虚，宗庙起兵。

陈卓曰：彗星孛犯干虚，其国野战流血，星芒角所指，兵所积也。

甘氏曰：彗星孛干虚，其国亡。

《帝览嬉》曰：彗星出虚，兵大起，天子自将兵于野，大战流血，其芒炎所指，国必亡，期三年，远五年。

《春秋纬运斗枢》曰：彗孛出虚危间，大司空行诛。

郗萌曰：彗星出虚危间，天下乱。

《荆州占》曰：彗星出虚危间，司空行谋。

陈卓曰：彗星出虚，大水，期三年。

《玉历》曰：彗星出虚危之间，其国有叛臣，兵大起，将军出行，国易政，期三年。按《宋书天文志》曰：晋惠帝永康二年四月，彗星见齐分，是时齐王冏起兵讨赵王伦，伦天阙，拥兵不朝，专权淫奢，明年诛死。宋武永初三年二月辛巳，有星孛于虚危，绕河津，扫河鼓，占曰为兵丧。五月宫车晏驾，明年遣军救青司。二月太后萧氏崩。

### 危彗孛犯危

石氏曰：彗孛干犯危，其国有叛者，兵起，大将军出。

甘氏曰：彗星出危，天下乱，司空行诛，有土功之事，兵大起，期二年。

玄冥曰：彗星出危，其国有叛臣，兵大起，将军出，国易政，若大水，民饥，期三年。

陈卓曰：彗星出孛于危，帝必易，有大水，众大贵。

### 营室彗犯室

甘氏曰：彗孛干犯营室，先起兵者弱，不可以战，战必亡地，主将必亡去之，近期百八十日，远二年。

《圣谕符》曰：彗星出营室，有大水。按韦昭《洞纪》曰：汉成建始元年正月，有星孛于营室，三年秋，关内大水也。

《圣谕符》曰：彗星出营室，天下兵大起。

齐伯曰：彗星出室壁间，兵大起，若有大丧，有亡国死王，期不出三年。按司马《天文志》曰：孝顺帝永和六年二月丁巳，彗星见东方，长六七尺，色青白，西南指营室，及坟墓星。后四年，孝



顺帝崩。宋《天文志》曰：宋武永初三年十一月戊午，有星孛于室壁，少帝景平元年正月乙卯，有星孛于东壁南，白色，二丈余，拂天苑，二十日灭。是年兵救青司，二月太后萧氏崩。

《黄帝占》曰：彗星出营室，天下乱，易政。按《宋书天文志》曰：魏嘉平三年十一月癸亥，有星孛于营室，积九十日，正元二年二月，李丰、丰弟宛州刺史翼、后父光禄大夫张缉等谋乱，皆伏诛，皇后亦废。其九月，帝废为齐王，高贵乡公代立也。

郗萌曰：以五色占其吉凶。

《黄帝占》曰：孛见营室中，后宫且有乱。一曰有德令。按《洪范天文志星辰变占》曰：汉成建始元年正月，有星孛于营室，青白色，长六七丈，广尺余，占曰：营室为后宫怀妊之宫，彗星加之，将害人性。其后许皇后坐祝诅废，赵飞燕为皇后，弟为昭仪，害两皇子，卒皆伏辜，家属徙于辽西也。

郗萌曰：诸孛气在营室，民人疾疫死亡。

《河图》曰：彗起芒，临营室，以告咎。

《荆州占》曰：彗星干守营室，则五校三军动，兵不战，牛马惊，不出七十日。

石氏曰：彗星犯守营室，先起兵者不可以战，必亡地，期三年，远六年。

### 壁彗星孛犯东壁

石氏曰：彗弗干犯东壁，其国起兵，火灾庙堂，四门流血，天下隔。

《荆州占》曰：彗孛干犯东壁，文章者死。

郗萌曰：诸孛气入东壁，人民疾疫，多死亡。

巫咸曰：彗星出东壁，王者起兵，毁坏宗庙，四门伏兵，流血滂滂，人民惶惶，莫知其殃，近期一年，中期三年，远五年。

《荆州占》曰：彗星出东壁，大水，民流于道。

## 彗孛犯西方七宿七

### 奎彗孛犯奎

甘氏曰：彗星干犯奎度，其国君出战，大饥，人相食，国无继嗣，近期一年，远三年。

石氏曰：彗星出，西北举兵伐中国，其下食石千钱，天下大水。

《海中占》曰：彗星出奎，有大兵起，四夷来伐中国，郡君出战，天下大饥，有水灾，期三年，远五年。

《河图》曰：杵彗出贯奎，库兵悉出，祸在强侯，外夷相应首谋，期三年，远九年。按《宋书天文志》曰：晋惠帝元康五年四月，有星孛于奎，到轩辕太微，经三台大陵，占曰：奎为鲁，又为库兵，轩辕为后宫，太微天子廷，三台为三公，大陵有积尸死丧之事。明年，武库火，西羌反，后五年，司空张华遇祸，贾后废死，鲁公贾谧诛。又明年，赵王伦篡位，于是三公兴兵讨伦，士民战死十餘万人也。

《荆州占》曰：彗星守奎，鲁国兵起。

《宋书天文志》曰：晋成帝咸康二年正月辛巳，彗星夕见西方，在奎，占曰为兵丧。奎又边兵。四年，石虎伐慕容晃，不克，既退，晃追击之，又破麻秋。时晃称藩，边兵之应也。

### 娄彗孛犯娄

石氏曰：彗孛干犯娄，国有大兵，四时绝祠，远不出三年。

陈卓曰：彗孛干犯娄，臣夺君位，近期一年，远三年。

《海中占》曰：彗星出娄，国有大兵，四时绝祠，有亡国，先旱后水，人民饥死，五谷大贵，余无价，期一年，远二

年。

陈卓曰：彗星出娄，六畜疫。

### 胃彗孛犯胃

石氏曰：彗茀干犯胃，五谷不成，仓库空虚。

甘氏曰：彗干犯胃，其国兵起，不出三年。

《黄帝占》曰：彗星出胃昴之间，状如竹竿而细，此星出为兵戎，此太白之变见，不过一年，其国兵起，若有丧。

巫咸曰：彗星出胃，大臣为乱，天下兵起，五谷不升，人民饥饿，京都困仓悉皆空虚，期三年，中五年，远七年。

郗萌曰：彗星出胃昴之间，状如竹彗，为兵灾若火。

《荆州占》曰：彗星出胃昴之间，火国起兵。

### 昴彗孛犯昴

甘氏曰：彗星孛干犯昴度，大臣乱，国兵大惊，期一年。

《春秋运斗枢》曰：彗星孛出昴毕间，大邦起王。

甘氏曰：彗星出见昴，有丧。

巫咸曰：彗星出昴，大臣为乱，君弱臣强，边兵大起，天子忧之，人民惊恐，国有忧主，期一年，中二年，远三年。按司马彪《天文志》曰：光武建武十五年正月丁未，彗星见昴，稍西北行，入营室，犯离宫，三月乙未至东壁灭，见四十九日。彗星为兵，又除秽，昴为胡兵。至十一月，定襄都尉阴承反，太守随诛之，卢芳从匈奴入居高柳，至十六年十月，芳降，上玺绶。一曰昴为狱事，是时大司徒欧阳歙以事系狱，逾岁死。离宫妃后之所居，彗星犯之，是除宫也。是时郭后已疏，至十七年十月，遂废为中山太后也。

郗萌曰：彗星出昴，色赤，边有大兵谋反，天子有忧。

郗萌曰：彗星出昴，赦。

### 毕彗孛犯毕

《荆州占》曰：彗孛犯毕，必有死丈夫数万人。

甘氏曰：彗孛干犯毕，边兵寇，中国亡，近期一年，远期五年。

《荆州占》曰：彗星干犯毕，边军大战。

陈卓曰：彗孛干犯毕，中原流血。

《黄帝占》曰：彗星毕觜之间，小而长，状如直竿，上有星垒垒然，此星出为兵戎，此镇星之变见，不过一年，兵起宫中，女主有殃。

石氏曰：彗星出毕，大兵起，马贵。其星内指，边兵胜；其星落地，兵破。

巫咸曰：彗星出毕，突厥为寇，乱中国，边兵战，有流血，若有亡主死将，期三年，远五年。

《黄帝占》曰：彗孛守毕柄，侯邑益土。守毕口中，邦相为乱，邑易政，邑君大臣当之。

《黄帝占》曰：彗星出附耳，庶雄起，陪臣反。

司马彪《天文志》曰：孝献建安五年十月辛亥，有星孛于大梁，冀州分也。时袁绍在冀州，其年十一月，绍军为曹公所破，七年夏，绍死，后公遂取冀州。

### 觜彗星孛犯觜

石氏曰：彗星干犯觜觿，国兵起，天下动扰，期一年，远三年。

《荆州占》曰：彗星干犯觜觿，其国兵起破亡。

甘氏曰：彗星出觜觿，其国兵起，有失地死王，天下民流，大臣出战，下有亡国，期三年，远五年。

石氏曰：彗星出觜觿，谷大贵，大臣出战，期七月。

刘向《洪范传》曰：彗星见觜觿，必有破国乱君，伏死其辜者。按《汉书天文志》曰：景帝中二年三月丁酉，彗星夜见西北，色白，长丈，在觜觿，旦去益小，十五日不见。觜觿梁也，是时梁王恐惧，伏斧钺谢罪，然后得免也。

### 参彗孛犯参

石氏曰：彗孛干犯参，其国边兵大败，其君亡，近期一年，远期三年。

《黄帝占》曰：彗星出参伐，天子更政。

甘氏曰：彗星出参，大兵蔽地，大臣谋反，后有忧，天子躬甲，斧钺大用，兵马驰道，弓弩恒张，期三年，远五年。《汉书五行志》曰：元延三年，星孛及摄提大角，从参至辰，并亡世嗣王莽篡也。

《荆州占》曰：彗出于参东井之间，上桂煞，伐长吏。

《黄帝占》曰：彗星与荧惑并见于参，天子更政。一曰天子受政。

石氏曰：彗星见参伐，大国君不吉。

郗萌曰：彗孛星流入参若出参，其年兵起。按班固《天文志》曰：元帝初元五年四月，彗星出西北，赤黄白色，长八尺，所后数日，长丈餘，东北指参分，后二年餘，西羌反，左将军奉世击平之。

### 彗孛犯南方七宿

#### 东井彗孛犯东井

《黄帝占》曰：彗孛干犯东井，大使出野，有两军相当，不出三年。

甘氏曰：彗星干犯东井，其国兵起。按车频《纂书》曰：蒋坚九年四月，有客星出尾箕，长十餘丈，状如彗而末曲，或名蜚尤旗。

拂于东井，自夏及冬不灭。太史令张益孟光奏彗起尾箕，尾箕燕分，而拂东井，东井秦分，燕首兆乱于秦，东胡鲜卑历世称燕，今慕容氏父子兄弟亡处而不报，圣朝取爵鳞次，执权乘势，驰轮跃马，贵荣莫与为二，宜少抑，退除其渠帅，夫螭蛇螫手，壮夫解腕，玄象告兆，事应无差。坚不纳，后慕容氏遂称王于燕也。

《荆州占》曰：彗星干犯东井，则大臣谋，其国用兵，期百八十日。

石氏曰：彗星出东井，其国兵大起，车骑满野，有军大战，将军有死者，若大臣有诛，期三年，中六年，远九年。

《郗萌占》曰：扫出东井，上茎煞渐渐长，上白下赤，状如矛刃，此为兵灾，乃太白之变。

陈卓曰：彗星出东井，民人谗言，国政崩坏，天下大水。

陈卓曰：彗在东井，大人死，见三十日，兵将当之，见五十日，相当之，时见七十日，主当之。

### 鬼彗孛犯舆鬼

石氏曰：彗孛干犯舆鬼，大兵横行，近期一年，远三年。天子小赦除咎。

石氏曰：彗星出舆鬼，国有大兵，战死于野，骸骨满坑，人民疾病，死者纵横，期不出三年。王者以赦除咎则灾消矣。

石氏曰：彗星出舆鬼，名曰丧楼，皆以赦解应之。

《荆州占》曰：彗星出舆鬼，有丧。

陈卓曰：彗星出舆鬼，人民疾病，死者半，棺木贵。

### 柳彗孛犯柳

甘氏曰：彗孛干犯柳，国诛大臣，兵丧并发，外臣凌主，天下倾危，期三年。按班固《天文志》曰：孝武建元三年三月，有星孛于注张，历太微，干紫宫，至于天潢，其后济东胶西江都王皆坐法削

黜自杀，淮南衡山谋反而诛之。

《荆州占》曰：彗星干犯柳，周国当之，期九十日。

《黄帝占》曰：彗星出张注之间，状如吹之火且燃，此星出，有兵灾，此荧惑之变见，不过一年，兵起国亡。

巫咸曰：彗星出柳，国诛大臣，兵丧并起，强臣凌主，天下倾危，其国大旱，民以饥死，期三年，远五年。

陈卓曰：彗星出柳，有兵，臣凌主，大旱，谷贵。

《诗纬含神务》曰：彗星守味，南夷将为乱。按司马彪《天文志》曰：孝明永平八年六月壬午，长星出柳张三十七度，犯轩辕，刺天船，大陵微气，至上阶，凡五十六日去。柳周也，是岁受雨水郡十四，伤稼。

### 七星彗星犯七星

甘氏曰：彗星干犯七星，邦有乱臣，国主不定，兵起宫殿，贵臣戮，大臣相疑，近期七十日，远期百八十日。

《荆州占》曰：彗星干犯七星，其国有大兵，不出百八十日。

《河图》曰：彗孛出七星，天子与圣叶，期三年，圣人出。

甘氏曰：彗星出七星，国有叛臣，人主不安，兵起宫中，大臣戮死，贵人当诛，若有水灾，民饥，期不出三年，远三年。按《宋书天文志》曰：魏齐王正始六年八月戊午，彗星见七星，长二丈，色白，进至张，积二十三日灭。七年十月癸亥，又见轸，长一丈，积一百五十六日灭。九年二月，又见昴，长六尺，色青白，芒西南指。七月又见翼，长三尺，进至轸，积四十二日灭。嘉平元年，司马懿诛曹真兄弟，及其党与皆夷三族，京师严兵实始。前魏三年，诛楚王彪，又袭王陵于淮南，淮南东楚也，幽魏诸王子邨。

郝萌曰：扫星出七星张之间，状如布，从风如靡，此星为

兵戎，荧惑之变也。

郗萌曰：彗星出七星张之间，状如数之火，且燃为兵，荧惑之变也。

### 张彗孛犯张

甘氏曰：彗孛干犯张，其国外内用兵，王徙宫，天下半亡。

石氏曰：彗星出张，天下大乱，有兵，王者徙宫殿，天下半亡，人民惶惶，无有聊生。见五十日，期三年；七十日，期五年；百日，期七年；百五十日，期九年，必发。按司马彪《天文志》曰：王莽地皇三年十一月，有星孛于张，东南行五日不见，后一年正月，光武起兵舂陵，会下乡新市贼张卬、王常及更始兵亦至，俱攻破南阳，斩莽前队大夫甄阜、属正梁丘赐等，然其士众数万人，更始立为天子，至河南，都洛阳，西入长安，败死。光武兴于河北，复都洛阳。

陈卓曰：彗星出张，大旱，谷石三千，粟尤甚。

宋《天文志》曰：魏明帝景初二年八月，彗孛星见张，长三尺，逆西行，三十一日灭，占曰为兵丧。张，周分野，洛邑恶之，其十月斩公孙渊。明年正月，明帝崩。晋武帝太康二年八月，有星又孛于张，四年三月戊申，孛于西南，四年三月癸丑，齐王攸薨，四月戊寅，任城王陵薨，五月己亥，瑯琊王伷薨，十一月戊午，新都王该薨。

### 翼彗孛犯翼

《黄帝占》曰：彗星干翼，国用兵，大臣有忧，远期百八十日。

甘氏曰：彗孛干犯翼，其国有大兵，亡所指降伏，近期三年，远期七年。



《孝经钩命决》曰：天子失礼则孛于翼。

《黄帝占》曰：彗星出翼轸之间，天下皆谋，上国有大丧，人主死亡，必有大兵，期不出三年。

《春秋运斗枢》曰：孛扫于翼轸之间，天下有势皆谋。

石氏曰：彗星出翼，其国有丧，以水为饥，民多流亡，视芒所指，必有降伏，期三年，远六年。按《宋书天文志》曰：魏明帝太和六年十一月丙寅，有星孛于翼，近太微上将星。明年，孙权有辽东之败。权又自向合肥新城，遣全琮攻六安，皆不克而去。又明年，诸葛亮入秦州，据渭南，司马懿距之。孙权遣步骘、诸葛瑾等临江夏江口，孙韶、张承等向广陵淮阴，权以大众围新城，以应亮。于是帝自东征，权及诸将乃退。太和六年十二月，陈王桓薨，青龙元年夏，北海王蕤薨，三年正月，太后郭氏崩也。

郗萌曰：彗莠出翼轸之间，状如布，从风而靡，为兵灾荧惑之变也。

石氏曰：彗星守翼，大臣谋反，五谷贵。

甘氏曰：彗孛干犯轸，兵丧并起，期百八十日，远一年。按《宋书天文志》曰：晋武帝太始四年正月丙戌，彗星见轸，青白色。二月，皇太后王氏崩，十月，吴将施续寇江夏，或寇襄阳，后将军田章，荆州刺史胡烈等破却之。司马彪《天文志》曰：孝献建安十二年十月辛卯，有星孛于轸首，荆州分野。时荆州牧刘表专据荆州，益州从事周群以为荆州牧将死而失主。明年秋表卒，子琮自代。曹公将攻荆州，琮惧，举军诣公降也。

### 彗孛犯轸

巫咸曰：彗星出轸，天子崩，兵丧并起，满宫门，车马无主，民无定君，期三年，中五年，远九年。王者以赦除咎则消矣。

## 卷九十 彗星占下

### 彗孛犯石氏中官一

#### 彗孛犯摄提一

石氏曰：彗星出摄提，天下乱，帝自将兵于野，兵起宫中，王者有忧，期不出二年。

郗萌曰：彗星出摄提，主迷惑，群下争起。

#### 彗孛犯大角二

齐伯曰：彗孛出大角傍，可六七丈，天下大乱，兵大起，国易政，期三年，中五年，远七年。

按《洪范五行传》曰：秦始皇帝三十七年五月，彗星出于大角，其长七尺，以东北入于女御，有一大星与星斗于宫中三月。五月，彗星尽，大星乃亡。始皇以六月乙丑死于沙丘，及西南行至咸阳，乃祸诸子女，官及九卿皆死以兵，天下大乱，起而攻秦，遂亡。又曰：五月彗星出于鹑首十五餘日，汉三年十月，有彗星出于大角，旬餘乃入，是时项籍为楚王，霸主诸侯，天下归心于汉，楚将灭，故彗除位也。

郗萌曰：彗星出入角，可七八丈，天下更政。

《钩命决》曰：天子失仁，则彗守大角。

黄帝曰：彗星犯守大角，大兵起，国不安，天子失御，有亡国，更政令。

《雒书说微示》曰：彗星贯坐乱起。

《荆州》曰：彗星孛大角，人主亡。

### 彗孛犯梗河三

《海中占》曰：彗孛干犯梗河，天子慎边防，乱中国。

陈卓曰：彗孛干犯梗河，北兵为败。

巫咸曰：彗星出梗河，四夷兵为败，中国有边患，若守之，王者诛四夷，期三年。

### 彗孛犯招摇四

陈卓曰：彗孛干犯招摇，边兵大动，期一年。

石氏曰：彗星出招摇，突厥入寇，守之胜。

石氏曰：彗星守招摇，犯北主，期出三年。

班固《天文志》曰：汉孝武大初中，星孛于招摇，其后汉兵击大宛，斩其王。

### 彗孛犯玄戈五

陈卓曰：彗孛干犯玄戈，主战单于大败，期二年。

《玉历》曰：彗星出玄戈，北方兵起，单于大败，其国破亡，期一年，远三年。

### 彗星犯天枪六

甘氏曰：彗星出天枪，王者备四夷，防捍边境，若有惊恐，人民忧。

陈卓曰：彗星守天枪，铁钺大用，诛杀不当，多梟首之民。

### 彗孛犯天棓七

《圣谕符》曰：彗星出天棓，兵大起，五仗用，国有忧，期二年。

陈卓曰：彗星守天棓，兵四起。

### 彗孛犯女床八

石氏曰：彗孛干犯女床，贵人暴诛，期百八十日。

齐伯曰：彗星犯女床，贵人有忧，若有暴诛者。一曰贵女有罪者，期百八十日，远一年。

### 彗星犯七公九

《甄曜度》曰：彗星出七公，忠言者凶，议人下狱，政令不行，王者信谗，邪臣在侧，其国忧败。

### 彗孛犯贯索十

《春秋纬》曰：彗星出贯索，大臣忧，有反者。

《海中占》曰：彗星出贯索，必有反臣杀君，若有大赦，期百日，远一年。

《孝经内记》曰：彗星在天狱，诸侯作祸。

### 彗孛犯纪星十一

陈卓曰：彗星犯纪星，天下国相击，若地震。

按班固《天文志》曰：孝武建元三年四月，星孛天纪，四年十月而地震。

《宋书天文志》曰：青龙四年十一月己亥，彗星犯天纪，景初元年六月地震。

《玄冥占》曰：彗星出天纪，大臣相戮，兵起宫中，主后忧若出走，期二年。

### 彗星犯织女十二

陈卓曰：彗孛干犯织女，后族为乱，贵女有诛者，期三

年。

《文曜钩》曰：彗星出织女，后党为乱，贵女有诛者，若有女变，期百八十日。

按班固《天文志》曰：孝武建元三年四月，有孛星于天纪，至织女，其后陈皇后废。

甘氏曰：彗星出见织女，有降主。

《运斗枢》曰：彗星出织女，女主之党反。

### 彗孛犯天市十三

石氏曰：彗孛犯天市，所犯者诛。

巫咸曰：彗星出天市，豪杰内外俱起，执令者死，大臣有诛，期三年。

司马彪《天文志》曰：孝献初平四年十月，孛星出两角间，东北行，入天市中而灭，占曰：彗除天市，将待帝，将易都。是时上在长安，后二年东迁，明年七月至洛阳，其八月，曹公迎上都许。

何法盛《中兴书》曰：哀帝兴宁元年八月，有星孛于亢，入天市，后有龙相诛宝之乱。

车频《秦书》：苻坚建元八年五月，遣少弟阳平公融镇邺，停灞东，苟太后以融少子忧甚，比发，三出送之，垂半夜，窃往，内外莫知，太史令魏述夜奏天市南门内有后妃移动之像，坚检而知之，惊曰：天道与人何其不远！遂重星占。

### 彗孛犯帝座十四

石氏曰：彗孛犯帝座，民人大乱，宫朝徙治，大臣不臣，期三年。

《帝览嬉》曰：彗星出帝座，大臣为乱；守之不去，贵人有变更政令。

### 彗孛犯侯星十五

石氏曰：彗孛干犯侯星，兵起帝宫，大国易治，期三年。若出侯星，天下乱，宗人相败，若相攻，士卒有急行，不出其年。

### 彗孛犯宦者十六

《玉历》曰：彗孛出宦者，左右贵人有罪，若刑于市者，不出二年。

按《宋书天文志》曰：魏青龙四年十一月己亥，彗星犯宦者。刘向《五纪论》曰：宦者在天市，为中外有兵。景初元年九月，吴将朱然围江夏，荆州刺史胡质击走之，二年正月，讨公孙渊。

### 彗孛犯斗星十七

《圣谿符》曰：彗星出斗星，天下乱，民不从市，外不用事，人民饥。

### 彗孛犯宗正十八

甘氏曰：彗星出宗正，宗主有事，若左右亲族有死者，期百八十日，远一年。

### 彗孛犯宗人十九

齐伯曰：彗星出宗人，王者同姓臣罪，若亲族有谋者，期不出一年。

### 彗孛犯宗星二十

《甄曜度》曰：彗星出宗星，主恩薄，以亲为疏，简宗

庙，则彗出之。

《春秋纬》曰：彗星出宗星，族人反。

### 彗孛犯东西咸二十一

《文曜钩》曰：彗星出东咸，女主淫佚自恣，宫门不禁，若贵女有忧。

### 彗孛犯天江二十二

巫咸曰：彗星出天江，天下大水，舟船用，五谷不登，其岁人相食，期三年。

陈卓曰：彗孛干历天江，大兵攻王国，王者以赦除之则国丰平。

### 彗勃犯建星二十三

陈卓曰：彗孛干犯建星，王失道，忠言者诛，贤士逃亡。

黄帝曰：彗星出建星，道路不通，多盗贼，子攻父，弟攻兄。守之，则有大兵，将军出行，期一年，远三年。

### 彗孛犯天弁二十四

《帝览嬉》曰：彗孛出天弁，宝玉大贵，若余贵五倍，万物不兴，其国饥。

郝萌曰：彗星入若守天弁者，皆为囚徒起兵。

### 彗孛犯河鼓二十五

郝萌曰：彗星入河鼓，且有兵。

黄帝曰：彗星出河鼓，天下兵起，大将出谋，旗鼓立。若守之，有死将。守中星，大将死，守旁两星，小将死。期一年，中三年，远五年。

《春秋纬》曰：彗星出河鼓，鼓鸣，武士发，天子赋。

### 彗孛犯离珠二十六

石氏曰：彗孛犯离珠，后宫为乱，若宫人有诛。守之阳为大旱，阴为大水，五谷不登，人民饥。

### 彗孛犯匏瓜二十七

石氏曰：彗星干犯匏瓜，政乱，近臣相谮，宫有戮死者，王者以赦除咎。

《玉历》曰：彗星出匏瓜，人主因食瓜而亡，若果中有药害其君，若食官忧。

《玉历》彗星守匏瓜，鱼盐贵十倍，果物不成。

### 彗孛犯天津二十八

石氏曰：彗星犯天津，贼断王道。

郗萌曰：彗星干犯入汉中，有亡国，当其野者变之。

甘氏曰：彗星出天津，关津不通，若关吏有忧。若守之，天下大乱，津河隔塞，有旱灾，期三年。

《雒书摘亡辟》曰：彗星见汉中，亡君之戒。

何法盛《中兴书》曰：安帝隆安四年十一月，星孛于贯索，及天市中天津，其时元显辅政，刑罚不中，故扫贯索，发徭无度，故扫天市，建土失节，故扫天津，天津关通万川，利关梁也，天市货财帛，周百姓也，贯索平察刑狱，无枉滥也，而元显皆反之，天若曰：扫除秽恶，令改革也。显不悛，遂致覆灭。

### 彗孛犯王良二十九

《运斗枢》曰：彗星出王良，好游驰，奉车反。



齐伯曰：彗星出王良，兵马大动，车骑行，天下有急，马多死。一曰水道不通，津关塞，期二年，远三年。

《宋书天文志》曰：魏陈留王咸熙二年五月，彗星见王良，丈馀，色白，东南指，积十二日灭，占曰：王良天子御驷，彗星扫之，禅伐之表，除旧布新之象；白色为丧，王良东壁宿，又并州之分野。八月晋王薨，十二月帝逊位于晋。

### 彗孛犯螣蛇三十

陈卓曰：彗孛干犯螣蛇，水道不通，天下隔，期二年。

《圣谕符》曰：彗星出螣蛇，以水雨为害，大水出，万物不成，民人饥。一曰水虫为败。

### 彗孛犯阁道三十一

陈卓曰：彗星干犯阁道，王者居正殿，不私行，则灾自消。

《甄曜度》曰：彗星出阁道，天下津不通，兵起，御道有伏兵，欲谋其主，王者宜备之。

### 彗孛犯附路三十二

陈卓曰：彗孛干犯附路，道不通，天下半隔，期一年。

《海中占》曰：彗孛出附路，天下大饥，车骑满野，道中纵横，人主临兵，期三年。

### 彗孛犯天将军三十三

《玄冥占》曰：彗星出天将军，兵大起，将军出，旗陈立。若守之，大将死，若有诛，期不出二年。

### 彗孛犯大陵三十四

《文曜钩》曰：彗星出大陵，国有大丧，有土功坟陵之事。若守之，天子崩，明审，期不出三年，远五年。

《春秋纬》曰：彗星出大陵，天子以不慈见犯，复出之将死。

### 彗孛犯天船三十五

《春秋纬》曰：彗星出舟星，外夷侵。

巫咸曰：彗星出天船，天下大水，舟船用事，若外夷来侵，水兵起，期一年。

按司马彪《天文志》曰：汉孝明帝永平三年六月丁卯，彗星出天船北，长二尺所，稍北行至亢南，百三十五日去。是岁，伊雒水溢到津城门，坏伊桥，郡七、县三十二皆大水。

《宋书天文志》曰：晋穆帝升平二年五月丁亥，彗星出天船，在胃宿中。四年五月，天下皆大水。

### 彗孛犯五车三十六

石氏曰：彗孛干犯五车，兵满野，天下半倾，百姓徙居去其土，期三年。

黄帝曰：彗星出五车，兵大起，车骑行，有攻战，余大贵，人民饥。彗若守之，先起兵者昌，后起兵者亡，期三年。

《春秋纬》曰：彗星出五车，谷霜兵起，主卖位，天下贤名起。

### 彗孛犯卷舌三十七

《帝览嬉》曰：彗孛出卷舌，人主用谗言，诛忠臣，贵人，有戮死者。一曰民多言讼，不出年。

《春秋纬》曰：彗星出卷舌，主以听谗之，主遇杀，大臣反。

按《宋书天文志》曰：宋文帝元嘉二十八年五月，彗星见卷舌，入太微，过帝座，犯上相拂屏，出端门，灭翼轸。三十年，天子巫蛊咒诅事觉，遂以杀逆害朝臣。孝建元年，荆江二州反，皆夷灭。卷舌咒诅之象，彗之所起，是其应也。

### 彗孛犯天关三十八

石氏曰：彗星出天关，兵大起，道路不通，民多盗贼，必有关塞之事，人主有忧。

《玄冥占》曰：彗星出天关而守之，天下道绝，国多盗贼，关梁不通，人主有忧，期一年，远二年。

### 彗孛犯南北河戒三十九

《海中占》曰：彗星出南河，蛮越兵起，边域有忧，若关吏有罪者。

郝萌曰：彗星出天高，庙臣反，名侯王起。

《海中占》曰：彗星守南河，为大旱，出北河，夷为乱，来侵中国。若守，胡军败。又曰：守北河，为大水，期不出三年。

石氏曰：朝鲜之伐，星拂河戒。

按班固《天文志》曰：汉武帝元封中，星孛干河戒，其后汉兵击拔朝鲜北，为乐浪、玄菟郡。

石氏曰：彗孛干两戒间，天子出走，大臣亲盛亡，王者以赦咎。

### 彗孛犯五诸侯四十

石氏曰：彗孛干犯五诸侯，王室大乱，兵起，天子宫庙不

祀。

《春秋纬》曰：彗星出五诸侯，州牧反，九州合谋。

《玉历》曰：彗星出五诸侯，执政臣有谋，若有被戮者，贵人当之，人主有忧，期一年，远二年。

司马彪《天文志》曰：孝献建安十七年十二月，有星孛于五诸侯，时周群以为西方专据土地者皆将失亡。是时益州刘璋据益州，汉中太守张鲁别据汉中，韩遂据凉州，宋建别据枹罕。明年冬，曹公遣偏将击凉州，十九年，获宋建，韩遂逃于羌中病死。其年秋，璋失益州。二十年秋，公攻汉中，鲁降也。

#### 彗孛犯积水四十一

石氏曰：彗星干犯积水，兵起宫门，宗庙毁绝，大臣有忧。

#### 彗孛犯积薪四十二

石氏曰：彗孛干犯积薪，有乱臣在宗庙。

#### 彗孛犯水位四十三

石氏曰：彗孛干犯水位，水道不通，伏兵在水中，以水为害。

甘氏曰：彗孛出水位，天下以水为忧，有兵起，五谷不成，人民饥。

#### 彗孛犯轩辕四十四

石氏曰：彗孛干犯轩辕，近臣诛，灭宗族，王者以赦除咎。

黄帝曰：彗孛出轩辕，皇后有忧若失势，宫人不安，人主

有忧。

《春秋纬》曰：彗星入轩辕，后族乱。

《运斗枢》曰：彗孛出轩辕，女妃为寇。

石氏曰：彗星犯轩辕，天下大乱易王，以五色占期。

《黄帝占》曰：彗星入轩辕，若守之，天下大乱，易王，宫门当闭，若女主死，期三年，远五年。

### 彗孛犯少微四十五

石氏曰：彗孛干犯少微，白衣聚者凶，术士不显，智者逃亡，期三年。

巫咸曰：彗星出少微，多能臣有死者，若上臣有罪。一曰法令臣有诛者。

石氏曰：彗星出少微，士夫起。

《宋书天文志》曰：魏黄初六年十月乙未，有星孛于少微，历轩辕，占曰：孛彗为丧，除旧布新之象。是时帝军广陵，辛丑，亲御甲冑，跨马观兵。明年五月，文帝崩。

### 彗孛犯太微四十六

《春秋纬》曰：彗星莧干太微，天子乱。

陈卓曰：彗孛干人太微，帝宗后族为乱，亡社稷。一曰所犯者亡。

《圣谕符》曰：彗星入太微庭中，臣谋主，有兵起，王者灾，社稷其国忧，期百八十日，远一年。

郝萌曰：赤黄星状如帚，入太微，妇女喜心，出太微，天子赐诸侯美女。

《春秋纬》曰：彗若出犯执法，御史反。

《运斗枢》曰：彗孛出若干太微，法式灭，帝死于野。

《春秋纬》曰：彗星出而莧太微，天下乱，不过三五，必

易政，以色占期。

按司马彪《天文志》曰：孝灵光和五年七月，彗星出下台，东南行，入太微，至太子幸臣，二十餘日而消。彗入太微，天下易主。至中平六年，宫车晏驾。孝献建安二十三年三月，彗孛晨见东方，三十餘日，夕出西方，犯历五车、东井、五诸侯、文昌、轩辕、后妃、太微，锋炎指帝座。二十五年正月，魏文帝受禅。

《玉历》曰：彗星出太微，帝宗后族为乱，大臣弑主，谋在亲戚御臣，王者有忧，期三年。

石氏曰：彗星出太微，中宫火大起，杀人。

甘氏曰：彗星出太微天庭中，有立王若徙王。

《孝经雌雄图》曰：彗在太微，君害臣。

《玉历》曰：彗星犯太微，天子妃后去，宫人不安，女主有忧。

#### 彗孛犯黄帝座四十七

石氏曰：彗孛如粉絮，入太微，犯守帝座，国有崩丧，大臣立主，石氏曰：王者以赦除咎。天下大乱，兵起。若犯守四帝，辅臣有诛，执政者亡，期三年。

石氏曰：彗星如粉絮，犯座星，兵丧并起。又大彗孛干犯座星，王者亡，子孙不昌，王者循孝于天，奉宗庙郊祠，则灾除。

《雒书说微示》曰：彗指帝座四旁中，大乱。

《荆州占》曰：星锐如剑，正赤直抵座星，天子惊兵。一曰惊火。又云：星如苴帚，抵座星旁，左右诸臣兵起内乱。

陈卓曰：星状如帚，正赤，抵圣座星，妇女兵。

### 彗孛犯屏星四十八

《玉历》曰：彗星出屏星，守卫臣有谋若有罪，执法者当之。

### 彗孛犯郎位四十九

陈卓曰：彗孛干犯郎位，臣失势。

《运斗枢》曰：彗出郎位，郎官谋反，天子因官郎位所主之官也。

《玉历》曰：彗星出郎位，左右守卫为乱，若有谋者，人主惊备之。

### 彗孛犯郎将五十

《玉历》曰：彗星出郎将，大将有诛若有罪。一曰大臣为乱，有兵起。

### 彗孛犯常陈五十一

甘氏曰：彗星出常陈，若守之，王者出，诛左右守卫之臣。一曰若防守者有死。期三年。

### 彗孛犯三台五十二

黄帝曰：彗星出上台司命，有兵起，大臣三公有自出者，若守之，贵臣有诛，上公有忧，期百八十日，远一年。

黄帝曰：彗星出中台司中，奸臣有谋，兵大起，贵人当出，彗若守之，中公有罪若忧，诛。

黄帝曰：彗出下台司禄，近臣有罪若忧，死，若守之，贵人多死，下公当之，将忧，皆不出三年。

《运斗枢》曰：彗星出三台西，相反；出其中，太尉反；

出其东，大司马反。

按韦昭《洞纪》曰：汉灵帝光和五年，彗星出下台，十月，太尉许盛免。

《孝经内记》曰：彗在三台，臣害君者也。

《宋书天文志》曰：晋惠帝大安二年三月，彗见东方，指三公，占曰：兵丧之象。三台为三公。是年冬，成都河间攻洛阳。三年正月，东海王越、长沙王反，张方讨之。

《雌雄图》曰：彗星出三台，有阴谋，奸轨起。一曰宫中火起。一曰臣害君，祸大起。

### 彗孛犯相星五十三

陈卓曰：彗孛干犯相星，辅相忧，不出一年，天下变更，其令民多移徙。

### 彗孛犯天牢五十四

《雌雄图》曰：彗星出天牢，诸侯作祸，相贼害。

《荆州》曰：彗星出天牢，豪杰中外俱起。

齐伯曰：彗星出天牢，贵人多下狱者，若大臣有戮，其国亡，期百八十日，远一年。

### 彗孛犯文昌五十五

石氏曰：彗孛干犯文昌，则辅臣受殃，近期三年，远期六年。

《运斗枢》曰：彗星出文昌上将星，大将军反；出次将，左右将军反；出贵相，大司徒反；出司禄，得势大臣反；出司命，天下有权者俱反，乱尤甚。

《合诚图》曰：彗星出而弗文昌，天下大乱政，以色占。

甘氏曰：彗星出文昌，若守之，天下大乱，大臣受殃，国



易政，各以五色占之，近期一年，中二年，远三年。

### 彗孛犯北斗五十六

《春秋纬》曰：星彗于北斗中，有雄圣人受命天子。

《潜潭巴》曰：星孛于北斗璇玑，更授天子起走。

《感精符》曰：孛贼入北斗中者，大国结谋伐天子。运枢行之主号，诸侯争权，天下皆叛，兵合祸构，逆乱之变也。

《辨终备》曰：彗入北斗，帝宫空。

按韦昭《洞纪》曰：顷王六年，彗星入北斗，晋赵有率诸侯平周乱，立王子班，是为匡王。

《宋书天文志》曰：义熙十四年五月壬子，孛于北斗魁中，癸亥，彗星出太微西柄，起上相星，下芒衡长至十餘丈，进扫北斗紫微中，占曰：彗出太微，社稷亡，天下易王。入北斗紫微，帝宫空。一曰得圣主。是年，宋高祖受宋公。恭帝元熙元年七月，晋帝逊位，高祖入宫也。

《感精符》曰：星孛入北斗，兵大起，将有以外制权，以兵为政者。

《坤灵图》曰：至德之萌黄星孛于北斗，必以戊己日，其光无芒，文行无武，动事莫之敢拒者。

《汉含孛》曰：彗星入北斗，强国乱。

《钩命决》曰：周襄王不能事其母，孛入北斗。

甘氏曰：彗彗流入北斗魁中，得名人；其不入北斗魁，失名人。

刘向《鸿范传》曰：孛入于北斗，邪乱之臣将弑其君。

京房曰：星孛入北斗，则大臣叛。

郝萌曰：赤星入北斗，中国使匈奴。

《荆州占》曰：彗星流入北斗，诸侯戮，春夏期三月，秋冬期一年。

黄帝曰：彗星出北斗，长可八九尺，天下更政易王，暴兵卒起，期百八十日若一年。

《春秋纬》曰：彗星出北斗九星中，九卿反，如星所主，其政毁，其人乱。

《潜潭巴》曰：彗星芒出于斗枢，天子亡，诸侯息。

《雌雄图》曰：彗星出北斗中，宫中火起。

石氏曰：彗星出北斗，长可七八尺，天下大乱，国易政，有兵起若大战，先起者亡，中起者殃，后起者昌。期三年，中五年，远九年。

《海中占》曰：彗星出北斗，大臣谋反，兵大起。

按《洪范天文星象变占》曰：汉武建元三年三月，有星孛于王良，芒自太微经斗内，至天汉，其后济东王、胶东王、江都王皆坐法削黜自杀，衡山王反，诛之也。又曰：若入斗魁，大臣诛死，若被诛，三日乃占，春夏期三年，秋冬期一年。

《魏氏图》曰：帚星出于斗中者，宫中失火烧宝。

郝萌曰：彗星出北斗，长可八九丈，名曰勉功，勉功出，天下更政。

《荆州占》曰：彗星出北斗之中，反而入北斗后，将得大臣；其出北斗，亡大臣。其一西一东，害于侯公；一南一北，戒在金革；一入一赢，天下不宁。

《荆州》曰：彗星出北斗中，圣人受命。

《玄冥》曰：彗星出北斗，必有大战流血。若入斗中，得名将；不入斗中，失名将。各以其日占知其国，不出其年。

石氏曰：孛星出北斗中，大臣诸侯有受地。

巫咸曰：彗星见于北斗，天下更政。

《洪范传》曰：孛星见北斗中，大臣诸侯有受诛者。一曰受兵。

《甄曜度》曰：彗孛贯北斗，下有杰王，五军合。

《演孔图》曰：彗星守北斗，天帝谋易王。

《春秋纬》曰：彗星守北斗，强国发，诸侯争天下。

《海中占》：彗孛守北斗，强国发兵，大臣争权，大人有忧，国易其主，天下不宁。守之三日以上，大臣当诛，期三年，远五年。

按《左氏传》：鲁文公十四年七月，星孛于北斗，周内史叔服曰：不出七年，宋齐晋之君皆将死乱。后十六年，宋襄夫人使昭公田孟诸而弑之；十八年，齐閻职反，邴歆弑懿公于申池；宣公二年，晋赵穿弑灵公于桃园。杜预曰：史服但言事，不论其占。服虔曰：晋赵盾弑灵公也。

《春秋纬》曰：彗星出辅星，庶雄起，陪臣反。

### 彗孛犯紫宫五十七

《感精符》曰：星孛于紫宫，将有阴谋反者。

陈卓曰：星孛于紫宫，有大变，拔兵上殿。一曰：入紫微宫，有奇令。

《春秋纬》曰：彗星入紫微宫，其国谋反。

黄帝曰：彗星出而抵紫宫，天下大乱。

《荆州》曰：彗星出长垣，边反。又曰：彗星而抵紫宫，天下易政。

按司马彪《天文志》曰：孝灵中平五年二月，彗星出奎，逆行入紫微宫，复出，六十餘日乃消。占曰：天下易主。明年，宫车晏驾。

韦昭《洞纪》曰：汉黄龙元年三月，有星孛于王良阁道，入紫宫，十二月宣帝崩。

《黄帝占》曰：彗星出紫宫，入守之，宫中有兵，天下大乱，有亡主，国易政，以五色占其国，期百八十日，中一年，远三年。

按司马彪《天文志》曰：孝献建安九年十月，有星孛于东井舆鬼，入轩辕太微，十一年正月，有星孛北斗，首入斗中，尾贯紫宫及北辰，占曰：彗扫太微紫宫，人主易位，其后魏文帝受禅。

司马彪《天文志》曰：孝章建初元年十二月戊寅，彗星出娄二度，长八九尺，稍入紫微宫中，百六十日消灭，大人忌。后四年六月癸丑，明德皇后崩。

《荆州》曰：彗星守天子宫，有乱天子之政者。

### 彗孛犯北极钩陈五十八

《春秋纬》曰：彗星入枢，名人起相诛，天下乱。

《玄冥》曰：彗星出北辰，臣谋弑主，有自立王。彗耀刺下，为寇害，期一年。

《春秋纬》曰：彗星入枢，期八年，五霸起，帝主亡。

《荆州》曰：彗星刺天枢，五精之类谋。

黄帝曰：彗星入守北辰，除旧布新，三王立，五旗生，有端命之应，名人起兵，天下大乱，君臣相诛，期不出百八十日，中一年，远三年。

石氏曰：彗星出钩陈，臣弑其主。若入守钩陈，幸臣乱宫，若有诛者，期不出一年，远三年。

### 彗孛犯天一太一五十九

黄帝曰：彗孛干历天一，则宫门不闭，王者内不安，近臣乱，不出三年。

## 彗星犯石氏外官二

### 彗孛犯天库楼一

《春秋纬》曰：彗孛出天库楼，兵动惊主，泣血，下不听。

石氏曰：彗星出库楼，天下兵起，车骑满野，库兵用。一曰民以饥兵起，期三年。

### 彗孛犯南门二

《玉历》曰：彗星出南门，有兵起，兵器用，若道路不通。

### 彗孛犯平星三

齐伯曰：彗星出平星，执法臣忧，政令不行，国失纲纪。

石氏曰：彗星犯平星，主以峻法为过，海内乱。

### 彗孛犯骑官四

《春秋纬》曰：彗星出骑官，英雄起，天子忧。

甘氏曰：彗星出骑官，士卒发用，兵骑出。若守之，将军若有死者，期三年。

### 彗孛犯积卒五

《甄曜度》曰：彗星出。积卒，为谋星。去疾，谋不成。若守之，主将有忧。

《春秋纬》曰：彗星出积卒，卫士并为乱，祸不成。

### 彗孛犯龟星六

《文曜钩》曰：彗星出龟星，珠玉有出者，宝物大贵。若守之，君臣不和，上下乖离。

### 彗孛犯傅说七

《春秋纬》曰：彗星出傅说，主以祠非其神，失礼，为内外所谋，巫祝起，天下匿，谗在宫中。

石氏曰：彗星出傅说，王者后宫少子孙。若守之，有绝祀之君。

### 彗孛犯鱼星八

《春秋纬》曰：彗星出鱼星，后党反。

《玉历》曰：彗星出鱼星，天下大水，海鱼出，名水溢。若守之，天下大旱，鱼行人道，不出其年。

### 彗孛犯杵星九

甘氏曰：彗星出杵星，岁大饥，有兵起，民以米粟为忧，若绝军粮。

### 彗孛犯鳖星十

《圣谕符》曰：彗星出鳖星，有大水，白衣之会，若有水令。若守之。其国大旱。

### 彗孛犯九坎十一

齐伯曰：彗星出九坎，有水旱之灾，出南则大旱，出北则大水。

### 彗孛犯败臼十二

《甄曜度》曰：彗星出败臼，天下有急兵，当于米粟之事，国有忧，期二年。

### 彗孛犯羽林十三

《春秋纬》曰：彗星出，羽林军人谋反。

《海中占》曰：彗孛出羽林，兵起宫中，臣弑其主，大人被甲，有亡国。若守之三十日，国破主亡，期三年。

《春秋纬》曰：彗星出垒城，校尉以反军成。

### 彗孛犯北落十四

《玄冥占》曰：彗星出北落，若守之，兵起大战，若杀大将，人主自将兵于外，四夷作乱，期三年，远五年。

### 彗孛犯土司空十五

《文曜钩》曰：彗星出土司空，兵大起，有土功事，若营室。一曰大将忧，期一年。

### 彗孛犯天仓十六

巫咸曰：彗星出天仓，兵革大起，粟大出，天下民饥，以粟为忧，若有转输之事。

《海中占》曰：彗星出天仓，天下粟出。若守之久，国无储粮，人民饥，期三年。

### 彗孛犯天囷十七

巫咸曰：彗星出天囷，仓库虚空，无储积，有出粟，天下大饥，人民流移，期二年。

### 彗孛犯天廩十八

《帝览嬉》曰：彗星出天廩，其国大饥，仓粟出廩，人饥死，其分兵起，期不出三年。

### 彗孛犯天苑十九

《春秋纬》曰：彗星入天苑，都护反。

黄帝曰：彗星出天苑，兵大起，马多发，牧畜不蕃，多有死者。一曰禽兽獐鹿多死。

按司马彪《天文志》曰：孝安永初三年十二月乙亥，彗起天苑南，东北指，长六七丈，色苍。天苑为外兵起，是后羌兵讨贼杜季贡，又使乌丸击鲜卑，又使中郎将任尚、护羌校尉马贤击虏，皆降之。

### 彗孛犯参旗二十

《春秋纬》曰：彗星出天弓，暴骨将死，死尸满谿，流血千里。

石氏曰：彗星出参旗，天下大乱，兵起，弓弩用，大将出有变。一曰弓弩大贵，期三年。

### 彗孛犯玉井二十一

《玉历》曰：彗星出玉井，兵大起，强国失地。一曰彗守玉井，天下大水，河海溢流，民多没死。

### 彗孛犯屏星二十二

甘氏曰：彗星出屏星，大臣有戮，国有忧。一曰彗守屏，人民疾疫，有移国。



### 彗孛犯厕星二十三

《圣谕符》曰：彗孛出厕，大人有忧，若厕有谋，兵欲害主。一曰彗星入厕，天下饥，人相食，期二年。

### 彗孛犯矢星二十四

齐伯曰：彗星出矢星，若守之，贵人多患腹而死，若人民多死，以五色占，黄则吉，青白疾，黑死。

### 彗孛犯军市二十五

《甄曜度》曰：彗孛出军市，大兵起，军粮绝，天下大饥，将士离散，兵多死亡，期二年。

### 彗孛犯野鸡二十六

《海中占》曰：彗星守野鸡，大将死，军市破，诸侯相攻，有亡国。期三年。

### 彗孛犯狼星二十七

黄帝曰：彗星出狼星，国有急兵，名将出行，将军有忧。若守之，必有千里之行，大战流血，死者大半。期三年，中五年，远七年。

《运斗枢》曰：彗星出狼弧，主以恣侵为过，外夷反。

### 彗孛犯弧星二十八

石氏曰：彗星出弧星，弓矢大用，大兵起，其国乱惊，人民不宁，多盗贼。

按司马彪《天文志》曰：孝灵光和三年冬，彗星出狼弧，东行至于张反去。后四年，京都发兵击黄巾贼。

### 彗孛犯老人星二十九

巫咸曰：彗星出老人，其色黄，王者昌。若守之，赤彗三芒，人主受殃，老者不康。

### 彗孛犯天稷三十

《海中占》：彗星出天稷，岁大饥，五谷不成，人民流亡，社稷不安。

### 彗星犯甘氏中官三

#### 彗星犯天理一

《春秋纬》曰：彗星出天理，大司空斩将逐天了。

#### 彗孛犯策星二

彗孛星近策星，王者不宜出宫，下有谋乱，不过七十日。

#### 彗星犯造父三

陈卓曰：彗星入造父，若守之，仆御谋弑主，有斩死者，兵尽起。

#### 彗孛犯卧星四

《春秋纬》曰：彗星出卧星，尚书反，人星一名卧星也。

#### 彗孛犯扶筐五

陈卓曰：彗星出扶筐，将作反。

### 彗星犯酒旗六

《春秋纬》曰：彗星出酒旗，主以酒过为相所害。

### 彗孛犯诸王七

《春秋纬》曰：彗星出诸王星，诸侯称王皇，以南吴楚北燕赵东齐宋西秦晋。

### 彗孛犯怪八

《春秋纬》曰：彗星出司怪，主多妖祥，僻伪起，大臣侯王代主位。

### 彗星犯天高九

《春秋纬》曰：彗星出天高，庙臣反，名王起，改号。

### 彗孛犯天演十

《春秋纬》曰：彗星出天演，但闻之将反。

### 彗孛犯天街十一

《运斗枢》曰：彗星出天街，五侯并起，天子自理。

《海中占》曰：彗星出天街，内有贼人。

### 彗孛犯甘氏外官四

### 彗孛犯铁钺一

《春秋纬》曰：彗星出铁钺，淫兵多，主以妄诛，将钺之臣反。

### 彗孛犯阙丘二

《春秋纬》曰：彗星出阙丘，帝灭。

### 彗孛犯巫咸中外官五

#### 彗孛犯长垣一

甘氏曰：彗星出长垣，大臣谋反，兵起宫中，天下有乱，亡国，人主有忧，期不出二年。

《春秋纬》曰：彗星出长垣，边反。

#### 彗孛犯天厩二

陈卓曰：彗星出天厩，守之，天下名厩有失火者，若移徙。一曰天下厩车马有怪。

《春秋纬》曰：彗星出厩官，法令违，法度数起变，臣执主势。

## 卷九十一 风占

### 候 风 法

凡候风，必于高平畅达之地，立五丈竿，以鸡羽八两为葆，属竿上，候风吹羽葆平直则占。亦可竿首作盘，作三足乌于盘上，两足连上而外立，一足系下而内转，风来则乌转，回首向之乌口衔花，花旋则占之。羽必用鸡，取其属巽而能知时。羽重八两，以相八风；竿长五丈，以法五音。乌者日中精，巢居知风，乌为其首也。今按古书云：立三丈五尺竿，以鸡羽五两系其端，羽平则占，然则长短轻重惟其适宜，不在过

泥，但须出众中，不被隐蔽，有风即动，直而不激，便可占候。羽毛必须五两以上，八两以下，盖羽重则难举，轻则易平。时常占候，必须用乌，行军权设，取使用羽。作葆之法，取鸡羽中破之，取其毛多处，以细绳紧缚，内中夹之，长三四尺许，属竿上，其触鹿扶摇，四转五复之风，各以形状占之。

### 风 名 状

《尔雅》曰：风而雨土曰霾，阴而风曰𩇔，日出而风为暴，回风为飘，焚轮谓之颓，扶摇谓之飙。

李淳风曰：按占风之家，多云发石折木，扬沙走石等语，若每占中俱着此语，其文至繁，今辄以一家例之。古云发屋折木，扬沙走石，今谓之怒风，多为不吉之象。一日之内三转移，方古云四转五复，今谓之乱风。乱风者，狂乱不定之象。无云晴爽，忽起大风，不经刻而止绝，绝复忽起，古云暴风。卒起乍有乍无，今谓之暴风，暴风主有卒暴事。鸣条摆树，萧萧有声，今谓之飘风，善恶依经旨。迅风触尘蓬勃，古云触尘蓬勃，今谓之勃风。回旋羊角，古云扶摇羊角，今谓之回风。回风者，旋风也，回风卒起而圆转，扶摇有如羊角，向上转轮，有自上而下者，有自下而上者，或平条长，或磨地而起，总谓之回风，亦专有占。古云清凉温和，尘埃不起，今谓之和风。古云暗冥昏浊寒克者，今谓之霾𩇔。

凡风和畅清悦，温凉适时，埃尘不起，人情恬淡，是谓祥风。天色晦冥，云气昏浊，风声寒惨，埃壅蓬勃，是谓灾风。风势纷杂交乱，乍起乍止，深藏莫测，其声聒耳，是谓小人魅惑风。风势暴起，南北不定，离合氛埃，是谓上下不宁风。风势冥冥，白日阴惨，黄雾四合，是谓政化未明风。风势戚戚，南北杂乱，高下蓬勃，是谓大兵将至风。风势凜烈，人怀战栗，是谓刑罚惨刻风。风声啾唧惨切，令人悲惨，为大丧风。

风声歔歔，如火奔驰，乍起乍息，为旱火风。连风冥晦，四日五日，人皆悲伤，为大水杀人风。

凡吉祥之风，日色清明，风势和缓，从岁月日時德上来，或乘王相而来，去地稍高，不扬尘沙，人心喜悦，是谓祥风，人君德令下施之应。

凡凶灾之风，日色白浊，天气昏寒，风声叫怒，飞沙卷尘，乘刑杀而至，当详五音，定八方，观其起止占之。今略诸家寒克白浊为例，诸称寒克白浊，今谓之灾气。诸称清明温和，谓之和风。诸称大风寒，冥冥日无光，沉没雾气，今云昏气。

### 诸 例

《黄帝占》曰：凡风之动，皆不安之象也，若在山川海滨，空穴之间，风所出处，皆不可占之，以为常式。若在宫宅城营之内，战阵之所，风势异常，扬沙走石，日光昏浊，则必占之。

凡人君理顺四时，则春无凄风，夏无苦雨。先王之治，以天下为家，兆民为子，风起异常，用意察之，若纷错交横离合，氛埃相注，此风之应，必在人主。

李淳风曰：巽为风，风占灾异最验。凡候风，须筑高二十四尺，于上设竿，令其四达无隐，则远近皆知，期克不爽矣。

凡鸣条以上，怒风起止，皆详其五音与岁月日時刑德合冲墓杀，五刑生克，王相囚死，以言吉凶，仍以六情推之，万不失一。

凡年月日時四杀五墓，风从上来，白昼昏寒，皆为凶风。其日三刑最急，坐不及起，有贼来暴至，若行即防伏兵，平时无兵，防人谋害。

凡年月日時刑杀五墓风起，日色白浊，日气昏寒，兴兵动

众，逢之急，整武备。

凡两军相当，以分主客，以日辰所得纳音为客，以时下十二时辰与风所来方为主。若日辰纳音能克时辰及方，为客胜；时下支神及风来方能克纳音，则客败，主人胜。寻常家居，亦以此分内外。

凡恶风黑风三刑冲破墓杀风，当日有大雨，及三日内有大雨，其灾皆散。一曰宫日风，当日雨，徵风三日雨，羽风五日雨，商风七日雨，角风九日雨，但依日数得雨皆解。

凡风自冲来，为殃为丧，为火为兵，为大人死，以占何国。若当时有大雨，即不占。

凡风滚雨及风后降雨，皆雨气也，不占。

凡风从太岁上来，鸣条摆树，而天色清爽，日光明盛，着体清凉温和者，祥风也。天子有德令，法不私，大臣畏慎，国昌民安之象。若风势蓬勃，扬尘蔽天，着人寒惨，日白无光，兼刑带杀，则为国有暴令。月建为大臣。日为令长。时来为民。

凡风温热，逼人著地，走石吹沙，鸣条落叶，为囚风，以日辰占何国，饥荒，人不安。

风势和缓，不扬尘土，气色清温，日光皎洁，以日辰占何国，岁美人安。

凡风起岁月日時德上，鸣条落叶，及宫日宫时天门乾上发风，皆吉风。五音之日，风起岁月日時刑上，黑色，勃勃然，经刻冥冥，不见人形，是谓妖风。宫日为君，以下四日为大臣，死其分，下不熟，民灾，以日占国。

## 干 德

甲丙戊庚壬为阳，阳德自处。甲德在甲。丙德在丙。戊德在戊。壬德在壬。此谓自处。

乙丁己辛癸为阴，阴德在阳。乙德在庚。丁德在壬。己德在甲。辛德在丙。癸德在戊。此谓在阳取合为德也。

### 支 德

岁月日时在巳，德在子。在丑德在午。在寅德在未。在卯德在甲。在辰德在酉。在巳德在戌。在午德在亥。在未德在子。在申德在丑。在酉德在寅。在戌德在卯。在亥德在辰。以次顺行，前五辰是也。

### 月 干 德

寅午戌月德在丙。亥卯未月德在甲。申子辰月德在寅。巳酉丑月德在庚。

### 三 合

申子辰。亥卯未。寅午戌。巳酉丑。

### 六 合

寅亥。子丑。卯戌。辰酉。巳申。午未。

### 德 干 合

甲己。乙庚。丙辛。丁壬。戊癸。

### 岁月日时杀

寅午戌杀在丑。巳酉丑杀在辰。申子辰杀在未。亥卯未杀在戌。

### 吟 呻 杀

四孟月在酉。四仲月在巳。四季月在丑。



## 岁月日時刑

子刑卯，卯为刑下，子为刑上。丑刑戌，戌为刑下，未为刑上。寅刑巳，巳为刑下，申为刑上。卯刑子，子为刑下，卯为刑上。辰刑辰。巳刑申，申为刑下，寅为刑上。午刑午。未刑丑，丑为刑下，戌为刑上。申刑寅，寅为刑下，巳为刑上。酉刑酉。戌刑未，未为刑下，丑为刑上。亥刑亥。

凡刑下来者祸浅，刑上来者灾深。自刑者兼刑上刑下，其灾尤深。谓之三刑者，刑上刑下自刑也。

## 五 墓

亥卯未木墓在未。寅午戌火墓在戌。申子辰水墓在亥。巳酉丑金墓在丑。土墓在辰。

## 干 刑

甲刑戊。乙刑己。丙刑庚。丁刑辛。戊刑壬。己刑癸。庚刑甲。辛刑乙。壬刑丙。癸刑丁。

## 冲 破

十二支冲子冲午，午冲子。丑冲未，未冲丑。寅冲申，申冲寅。卯冲酉，酉冲卯。辰冲戌，戌冲辰。巳冲亥，亥冲巳。

## 五音六属法

五音，一言宫，三言徵，五言羽，七言商，九言角。六属，庚属震，辛属巽，戊属坎，己属离，丙属艮，丁属兑，子午属庚，丑未属辛，寅申属戊，卯酉属巳，辰戌属丙，巳亥属丁。

乾主甲子壬午。甲为阳日之始，壬为阳日之终，子为阳辰

之始，午为阳辰之终，乾初在子，则四在午，乾主阳，内子外午，内为始，外为终也。

坤主乙未癸丑。乙为阴日之始，癸为阴日之终，丑为阴辰之始，未为阴辰之终，坤为初，在未，四在丑，坤主阴，故内主未，外主丑。

震主庚子庚午。震为长男，乾初九主甲，对于庚，故震主庚，以父授子，故主子午，与父同也。

巽主辛丑辛未。巽为长女，坤初主乙，乙与辛对，故巽主辛，以母授女，故主丑未，与母同也。

坎主戊寅戊甲。坎主中男，故主中干中辰。

离主己卯己酉。离为中女，亦主中干中辰。

艮主丙辰丙戌。艮为少男，乾上主壬对丙，故主丙辰，丙戌是第五配。

兑主丁巳丁亥。兑为少女，坤上主癸对丁，故主丁巳，丁亥是第六配。

以地十二辰合十干，以十干所属者命之，以其言数纳其音，以主一日，日辰相配，共得一音，此纳音之法也。

## 纳 音

甲子壬申，甲午庚辰，壬寅庚戌，为阳商。乙丑癸酉，辛亥乙未，辛巳癸卯，为阴商。丙寅戊子，甲辰甲戌，丙申戊午，为阳徵。丁卯己丑，乙巳乙亥，丁酉己未，为阴徵，戊辰庚寅，壬午壬子，戊戌庚辰，为阳角。己巳辛卯，癸未癸丑，己亥辛酉，为阴角。庚午丙戌，戊申戊寅，庚子丙辰，为阳宫。辛未丁亥，己酉己卯，辛丑丁巳，为阴宫。甲申壬辰，丙午甲寅，丙子壬戌，为阳羽。乙酉癸巳，丁未丁丑，乙卯癸亥，为阴羽。凡言宫商角徵羽日皆依此。

## 地十二辰五音法

子主阳宫，土主帝王。丑为阳徵火，主旱，主火灾，主宫寺，主口舌。寅为阳徵火，主旱，主火，主烽燧。卯为阳羽水，主雨霖，主水，主雾。辰为阳商金，主大将军，主吏士。巳为阳角木，主疾病，主忧患。午为阳宫土，主后妃。未为阴徵火，主庶人，主土功，主蜚虫，主诏诰，主书檄，主旱。申为阴徵火，主邮驿尉候，主旱火。酉为阴羽水霜雪，主雷电，主沉阴，主雹。戌为阴商金，主小将，主兵刃。亥为阴角木，主死丧哭泣。

李先生曰：自午至巳，皆为阴律所生，故为阳。自午至亥，皆为阳律所生，故为阴。

## 五音相动风占

宫日风从子午宫来，为宫动宫，主人君出行，急风暴起，急出有急令，慢风慢出有喜令，以干占知远近。宫日风从阳宫来，山陵崩坏，人君出行，地动，旱，有土工；风从阴宫来，地震裂，若后出行。又为旱。又曰阳宫之日，风从子午宫来，君出行。阴宫之日，风从子午宫来，后出行。宫日风从子午宫来，时加子午，为重宫，君欲行，大臣走，又为风雨不调。

宫日风从丑未寅申徵来，为宫动徵，有火烛，有土功宝物出，有兵。

时加徵为重徵，有义兵行，有土功，有诏令，谓之义风。

宫日风从卯酉来，为宫动羽，且有大雨，不则大臣出走，若复为旱。宫君羽臣，君怒臣走，宫土羽水，土盛水衰，水衰则火起，故复为旱也。

时加羽为重羽，即有雨，五谷成。

宫日风从辰戌商来，为宫动商，有兵行，且有客兵来。时

加辰戌，为重商，有兵殃。宫日风从巳亥角来，为宫动角，有兵战，人主忧，客兵伤，有丧。从阳商来，边兵战，有大丧。宫为土为君，角为木，土动木不胜，故君凶，木主哭泣，故主丧。

时加己亥为重角，君不昌，有大丧。

宫日大风从乾来，有暴雨涌水，若风不扬尘，气色和畅，日光明盛不寒惨者。国有善令。艮来山陵崩坏，人君出行，水涌地裂。巽来蝗虫生，害五谷。坤来有土功，走兽为害，巳上时加宫则占。

徵日风从阳宫来，土功起，大旱，火灾顿起宫寺。风从阴宫来，太子有疾。

时加徵为重徵，有土功，火灾起。

徵日风从丑寅阳徵来，有火灾，君有恐，走兽为人害，宫寺多焚。从壬相来，岁大旱，又多火灾。风从未申阴徵来，人君忧，走兽为火灾。一曰六畜多死。

时加丑寅未申为重徵，国四门闭，为火事。

徵日风从阳商来，有急兵，人主出，以兵自守，期七日若七十日。从阴商来，有急兵战。一曰风从阳商来，辅臣强，大臣死，民有殃，以日占国。

徵日风从阳羽来，四邻有事，宝物出，阴盛于阳，且有雷电霜雹，诸侯大臣多失多火，四夷有兵。从阴羽来，宝物出，多震雷，四夷有事。

徵日风从阳角来，有兵，边有急。金克木，木子火反克金，故有兵，亦为有丧。从阴角来，边有惊火。一曰边兵大起，春有丧。

羽日风从阳宫来，人持财物聚，君有吏令，边兵起，土功兴，将受命，有集会，有寒雪雹。风从阴宫来，暴寒伤物，有水，有土功，兵集。

羽日风从阳宫来，国有兵，有急令，臣有忧，关梁塞，道路不通。从阴徵来，边兵忧。

羽日风从羽来，有白衣聚，有大丧大寒雪雹，期五日若五十日，且有大雨，雨从南方来，国有忧，人多病，雨从北方来，贼聚水中，且有雪雹。阳羽日应，阴羽夜应。

羽日风从商来，有兵围城不战，边有急，关梁不通，大雨，客兵不利。金水子母和，故不战。羽为角，除害，象臣为君讨贼，故动必大雨，不出战，故也。

羽日风从角来，边有兵，围城城破。一曰兵不解，时加己亥为重角，有围城，有大丧。

商日风从阳宫来，戒太子忌怒，人臣有急兵，宫土商金，母忧其子，故为太子，亦为人主有疾。从阴宫来，庶子有忧，有急变，兵起北方。

商日风从徵来，国邑受令，兵行，将在外，兵还不战，臣受兵令而行。徵为号令，商为兵，商受徵克，故兵退。一曰小旱。时加徵为重徵，有火，有大旱。

商日风从羽来，大雨水，岁大荒，国忧乱，有兵起东方。羽水从金生，故有大兵大水之事。

商日风从阳商来，有白衣聚众，且有大水，关梁不通，大将出，忌外兵，邑有小寇，人主忧，国门四闭，兵在西方。

从阴商来，国有大殃，粟贵，国有兵，风怒，期七日、七十日，有急令，兵大起。商为金，二金并行，故有大丧，一曰商日风从商来，大臣死。

商日风从阳角上来，有猝兵，有急令。从阴角上来，有丧，土功作。

角日风从阳宫上来，兵从中起，君忧，国门四闭。从阴宫来，有大丧，贵人多疾病，有土功。宫为君，角主丧死，故有大丧。

角口风从徵上来，大臣灾，亦防火虫生，粟贵。一曰吏捡人财，有兵，仓粟宝物出。

角日风从羽上来，有大雨，土功兴，边有兵，卿大夫多口舌疾病，亦为夷人相夺。

角日风从商来，有急兵。一曰臣不忠。

角日风从阳角来，边兵起，人主忧，有贼至，战不胜，多死。从阴角来，有兵，有大丧。一曰远丧至。时加角，有丧，有边兵战，盗贼起，粟贵民饥，野多死人。角主死丧，重角尤甚也。

## 卷九十二 雨占

雨者，阴阳和而天地气交之所为也。太清之世，十日一雨，雨不破块。京房曰：太平之时，一岁三十六雨，是为休徵时若之应。凡雨三日以上为霖，久雨谓淫。

### 杂 占

天无云而雨，谓之天泣，其占为国易政，若出军逢之，其军必不还。《河图》曰：主急悲怒，则无云而雨。《抱朴子》曰：无云而雨，是谓雨血，将军当扬兵讲武以应之。雨大，军中尤甚者，将军败死。京房曰：人君进无德树为功，则无云而雨。

### 正 月

一日有风雨，三月谷贵。一曰正月一日风雨，其年大恶，微风小雨，年小恶。风悲鸣，疾作灾起。又曰正月一日风雨，米贵蚕伤。风雨从四方来，兵起。正月一日无风而雨，岁中下，田麦成，禾黍小贵。正月上旬雨卯，谷贵一倍；中旬雨

卯，谷贵十倍。正月晦日雨风兼至，余贵禾恶。

## 二 月

一日风雨，谷贵禾恶。二日七日八日九日，当雨不雨，道中有饿死人。九日至十五日，当雨不雨，兵起。十七十八日，当雨不雨，虫冬不蛰。十九二十日，当雨不雨，三月大旱。二十六日至二十八日，当雨不雨，有逆风从东来，损物。二月晦日风雨，多疾病死亡。

## 三 月

一日雨，井泉空。二日雨，泽无余。三日雨，水旱不时。四日雨，变易治。五日雨，沟渎滂。六日雨，坏垣墙。七日雨，决堤防。八日雨，乘船行。九日雨，难可期。三月一日风雨，民疾病百虫生，其日雷雨，有旱。三月一日至三日，当雨不雨，秋多大雾，道有饿死人。七日当雨不雨，谷贵。九日至十五日不雨，兵在外者罢。十八日至二十日，当雨不雨，角虫死，天下民有恐。二十三日至二十七日，当雨不雨，冬虫不蛰，民病。三月辰日雨，百虫生；未日雨，百虫死。三月三日小雨。蚕善，大雨，蚕恶。三月十六日雨，桑柘贱。

## 春

甲寅乙卯日雨，入地五寸，谷小贵。若不贵，至夏大贵。

春甲申至己丑日雨，庚寅至癸巳日雨，皆为谷大贵。

春甲申雨，其年五谷熟；春甲乙日俱不雨，民不耕。

## 四 月

一日风雨，米贵麦恶，赤地千里。四月二日三日有雨，其年五谷熟。四月四日至七日，当雨不雨，蛰虫冬出，民自恣，

不安其处。十一日至十四日，当雨不雨，岁恶。十八日当雨不雨，大旱，冬温。二十一日当雨不雨，兵起东北千里。三十日当雨不雨，有大风伤屋。四月四日雨，五谷贵。五日六日雨，宜旱麦。四日至七日风，大豆熟。四月晦日雨，至五月朔，大饥，其年大水，麦恶蝗生。

## 五 月

一日风雨，米大贵，人食草木。一曰牛贵。五月四日至七日，当雨不雨，大旱虫生。十一日至十七日，当雨不雨，西方千里外人疫病。二十日当雨不雨，草木枯死。二十三日当雨不雨，乳母多病。二十六日当雨不雨，大旱，风，至秋九月多雨。二十九日三十日当雨不雨，大暑热。五月上辰日有雨，蝗虫发，一曰虫随雨下，食禾。巳日雨同。五月晦日风雨，米贵，不则在其冲。

## 六 月

一日有风雨，米贵。六月三日四日六日，当雨不雨，角虫多死。四日至二十日，当雨不雨，牛贵。二十日至二十二日，当雨不雨，下田水，人少食。二十三日至二十四日，当雨不雨，合冻。二十七日当雨不雨，下田水，人饥。六月晦日风雨，来年春谷贵。

## 夏

甲乙丙丁日俱无雨，人不耕。甲申至己丑日雨，麦贵。

夏甲申日雨，米大贵。夏丙寅丁卯日雨，秋谷贵一倍。夏三月内辰日雨，百虫生；未日雨，虫死。夏甲子庚辰辛巳日雨，虫死，有雷亦然。



## 七 月

一日大风雨，米贵，人多疾疽者。一曰来春谷贵。七月七日大雨，余倍贵；小雨，余大贱。七月二十二日当雨不雨，有大水。二十三日二十四日，当雨不雨，大风害物。二十五日当雨不雨，兵起外国。七月晦日风雨，谷贵。

## 八 月

一日风雨，谷贵。其日阴雨，宜麦，布贵，麻子大贵，占至三日而止。其日晴无云，麦不实。八月一日当雨不雨，有大雷风。二日至五日，当雨不雨，秋大霜，民病。八日至十五日，当雨不雨，多大寒。十九日当雨不雨，民多妖言。二十一日当雨不雨，牛贵二倍。二十六日当雨不雨，冬多大雷。八月九日有雨，牛贵一倍。八月晦日风雨，来年有水有旱。京房曰：八月晦日昏而雨，缙帛贵。人定时雨，贵人贱，贱人贵；夜半雨，米贵，婴儿多损；鸡鸣雨，兵起。一曰：夜半雨，雨所建，寇贼起；鸡鸣雨，兵事急，民徙其乡。

## 九 月

一日雨，麻子贵十倍。二日雨，贵五倍。一曰九月一日风雨，来年春旱夏水。九月一日当雨不雨，霜早降杀物，人弃妻子。十二日当雨不雨，民多死。二十日当雨不雨，天下有恐。九月晦日有风雨，有水，岁恶。

## 十 月

一日有风雨，年内旱，来年夏多水，麻子贵。一曰其岁恶。一曰十月一日大雨，米大贵，小雨小贵。十月二日雨，麻子贵五倍。十月三日当雨不雨，兵起西北方。七日至十日，当

雨不雨，江河决，水逆流。十三日至十五日，当雨不雨，多大风寒。十九日当雨不雨，小儿病。二十五日当雨不雨，冬温无水，连年疾病。十月晦日风雨，谷贵五倍，人多死。

## 十一月

一日风雨，人多死。十一月四日当雨不雨，大旱。八日至十一日，当雨不雨，乳母多死。十六日当雨不雨，民多死亡，贫者富，富者贫。十一月晦日风雨，春旱，谷贵五倍。京房曰：十一月雨水横流，天下饥。又曰：冬大雨水，君死国亡。

## 十二月

一日风雨，来年春旱，夏多雨，谷贵。二日四日至六日，当雨不雨，大旱。九日至十三日，当雨不雨，多人雾。二十日当雨不雨，有角虫为贼。二十七日当雨不雨，有大风雷。十二月晦日风雨，春旱。

## 冬

壬寅癸卯日雨，春谷大贵。甲申至己丑日雨，米大贵。  
庚寅至癸巳日风雨，米贱，收谷者折阅。

## 干支占雨

春雨，甲子六十日旱；夏雨，甲子四十日旱；秋雨，甲子四十日涝；冬雨，甲子二十七日寒雪。

春雨甲申，五谷熟。夏雨甲申，五禾大美。秋雨甲申，六畜死。冬雨甲申，人多死。

春雨乙卯，夏余贵。夏雨丁卯，秋余贵。秋雨辛卯，冬余贵。冬雨癸卯，来春余贵。《黄帝占》曰：春不欲雨乙卯，夏不欲雨丁卯，秋不欲雨辛卯，冬不欲雨癸卯，以此四日占民安

否。若其日雨，则疾疫起。

凡四时卯日雨，皆主谷价。雨一卯，斛百文；雨二卯，斛二百文；雨三卯，斛三百；雨四卯，斛金一斤。

正五九月，杀在丑；二六十月，杀在戌；三七十一月，杀在未；四八十二月，杀在辰。以此日雨，雨所建，贼犯之，期六十日。

凡壬戌癸亥日雨，以乘甲子旬乃止，贱人伐贵者。京房占曰：诸寅卯日有小雨，小急，大雨大急。丙午日雨，有围城。戊午日雨霖，三日止，其下大战。乙卯日雨，旱，有兵起东方。丁卯雨，旱，有兵起南方。己卯雨，旱，有兵起中央。辛卯雨，旱，有兵起西方。癸卯雨，旱，有兵起北方。

## 立 春

雨，复五谷。

## 立 秋

雨，害五谷。

## 天 镜 占

天雨三日以上不绝，阴谋兴。汉《五行志》：文帝后三年，大雨，昼夜不绝，四十五日以上不绝。其后新垣平谋反。凡雨作于四时旺相之日，草木得之，莫不荣茂。其死囚休废之日，虽有雨，不能生物也。

凡泰和之世，雷雨必作于巳午阴生之后，至夜而止者吉；若作于子丑寅卯，至丙而晴者，为乱为兵，亡民失国。凡先风后雨为顺，先雨后风为逆。雨止而风雷不止，云雾不散者，国乱人灾。

凡先雷后雨，其雨必小；先雨后雷，雨必大也。

《易候》：凡占雨，以晦朔弦望云气四塞者皆雨，东风则当日雨。黑气如牛彘者，有暴雨。黑气如水平，不出三日大雨。黑气如群羊，奔如飞鸟，五日必雨。黑云气如浮船，雨。苍黑云如栉棉蔽日月，五日内雨。云如两人提鼓持桴，有暴雨。四望见青白云，名曰天塞之云，雨之徵也。《尚书大传》曰：五岳之云触石而出，皆不崇朝而雨。

京房曰：诸六甲日无云，一旬少雨。月离毕之阴则雨，离毕之阳无雨。日傍有赤云如冠珥，不有大风必有大雨。

### 东方朔占

子日东风卯日雨，丑日东风辰日雨，寅日东风巳日雨，卯日东风午日雨，辰日东风未日雨，巳日东风申日雨，午日东风即日雨，未日东风申日雨，申日东风子日雨，酉日东风丑日雨，戌日东风寅日雨，亥日东风辰日雨。

又曰：甲子日雨，丙寅止。乙丑雨，丁卯止。丙寅雨，即日止。丁卯雨夕止。戊辰雨夜半止。己巳雨立止。庚午日雨辛未止。辛未日雨戊寅止。壬寅日雨即日止。癸酉日雨甲戌止。甲戌日雨即时止。己卯日雨立止。庚辰日雨即止。辛巳日雨癸未止。壬午日雨即日止。癸未日雨甲申止。甲申日雨即止。乙酉日雨丙戌止。丙戌日雨夕止。丁亥日雨即时止。戊子日雨庚寅止。己丑日雨壬辰止。庚寅日雨即时止。辛卯日雨夕止。壬辰日雨辛丑止。癸巳日雨夕止。甲午日雨即时止。乙未日雨丁酉止。丙申日雨夕止。丁酉日己亥止。戊戌日辛丑止。己亥日即止。庚子日壬辰止。辛丑日壬寅止。壬寅日即止。癸卯日即时止。甲辰日即止。乙巳日丙午止。丙午日即止。丁未日即时止。戊申日庚戌止。己酉日辛亥止。庚戌日即止。辛亥日癸丑止。壬子日癸丑止。癸丑日即时止。甲寅日即止。乙卯日丙辰止。丙辰雨丁巳止。丁巳雨即时止。戊午日即止。己未日即

止。庚申日即止。辛酉日即时止。壬戌日即止。癸亥日即时止。子日雨立止，不止寅日止。丑日丙寅日止，不止至卯止。寅日雨即止，不止卯止。卯日即止，不止巳止。辰日雨已止。巳日雨未止，不止申止。午日雨立止，不止至十日阴。未日雨申止，不止戌止。申日雨夕止见日，不见日久阴。酉日雨立止，不止久阴。戌日雨立止，不止久阴。亥日雨立止，不止久阴。此其大概也。

## 卷九十三 候星善恶云气占

### 元日祥瑞

汉魏鲜正月朔旦。《八风占》云：风南来，大旱。西南来，小旱。西来有兵，西北来有胡兵，胡豆成。北方来为中岁。东北来为上岁。东来大水。东南来人病，岁恶。

八风各与其冲对课，多胜少，疾胜徐。自旦至食时为麦，食时至日昃为稷，昃至晡时为黍，晡时至下晡为菽，下晡至日没为麻。

风从北来宜客，南来为主吉，西来宜客，东来宜主，西北来宜客，东南来宜主，西南来有谋不成，东北来主客俱不利。若风热冷异常，或暴急昏浊，又当以八卦暴风占之。京房占：正月朔日，候八风从乾来，有忧兵；坎来有大水；艮来人疾疫，岁内有虫蝗；震来阳气干，岁大旱，有丧；巽来年内多风，伤五谷；离来岁旱，大热，多火灾；坤来有疾疫，道上多死人；兑来有兵事。

### 八节日气候

立春正月节，其日晴明少云岁熟，阴则旱虫伤禾豆。风从

乾来，暴霜杀物，谷猝贵。坎来，冬大寒，胡兵内扰。艮来五谷熟。震来气泄，物不成，巽来多风虫。离来旱伤物。坤来春寒，六月水，人多愁土功。兑来早霜兵起。

春分二月中，其日东方有青云，岁熟，晴明，物不成。风从乾来，岁多寒，金铁倍贵。坎来，豆菽不成，民饥病。艮来，夏不热，米贵一倍。震来，五谷成，亦无盗贼。巽来，虫生四月，多暴寒。离来，五月先水后旱。坤来小水，人多疟疾。兑来春寒，八月国有忧有兵。

立夏日南方有赤云，岁丰，清明则旱。风从乾来，其年凶饥，夏霜，麦不刈。坎来，多雨水，鱼行人道。艮来，山崩地动人疫。震来，雷不时击物。巽来，其年大熟。离来，夏旱禾焦。坤来，万物天伤。兑来，蝗虫大作。

夏至日南方有赤气则熟，晴明则旱。风从乾来，寒，伤万物。坎来，寒暑不时，夏日多寒。艮来，山水暴出。震来，八月人多疾。巽来，九月风落草木。离来，五谷熟。坤来，六月雨水横流。兑来，秋多雨霜。

立秋日有白云及小雨则吉，晴明物不成。风从乾来，其寒多雨。坎来，冬多雪，多阴寒。艮来，秋气不和。震来，秋多雨雹，人不和，草木再荣。巽来，内兵猝起。离来，兵戎不利，多旱。坤来，五谷熟。兑来，兵起将行。

秋分日西方有白云则善，晴明物不成。风从乾来，人多相掠。坎来多寒。艮来，十二月多阴寒。震来，人疫再，花不实。巽来，十月多风。离来，兵动国南七百里。坤来，土功兴。兑来，五谷大收。

立冬日晴明小寒，人君吉，天下喜。风从乾来，君令行，天下安。坎来，冬雪杀走兽。艮来，地气泄，人多病。震来，人不安居，多寒。巽来，冬温，明年夏旱。离来，明年五月大疫。坤来，水泛滥，鱼盐倍多。兑来，妖言为幻，兵在山泽。

冬至日有云雪寒，明年大丰，晴明物不成。风从乾来，强国有忧，多寒。坎来，岁美人安。艮来，正月多阴。震来，雷不发，大雨并。巽来，百虫害物。离来，冬温，乳母多死，水旱不时，人疫。坤来，虫伤苗，多水。兑来，明年秋雨，兵起。

立夏巽卦，王风从乾来，为一逆，小凶。立春艮卦，王风从坤来，为二逆，兵起。立秋坤卦，王风从艮来，为三逆，谷无实。立冬乾卦，王风从巽来，为四逆，人去其乡。秋分兑卦，王风从震来，为五逆，带刀入市。冬至坎卦，王风从离来，为六逆，人民溃散。夏至离卦，王风从坎来，为七逆，臣子为乱。春分震卦，王风从兑来，为八逆，殿上有刺客。

## 七十二候当候不候

### 正 月

是月也，东风解冻，蛰虫始振，鱼陟负冰，獺祭鱼，候雁北，草木萌动。孟春行夏令，则雨水不时，草木早落，国时有恐。行秋令，则其民大疫，焱风暴雨总至，藜莠蓬蒿并兴。行冬令，则水潦为败，雪霜大挚，首种不入。

### 二 月

桃始华，仓庚鸣，鹰化为鸠，玄鸟至，雷乃发，声始电。仲春行秋令，则其国大水，寒气总至，寇戎来征。行冬令，则阳气不胜，麦乃不熟，民多相掠。行夏令，则国乃大旱，暖气早来，虫螟为害。

### 三 月

桐始华，田鼠化为鴽，虹始见，萍始生，鸣鸠拂其羽，戴

胜降于桑。季春行冬令，则寒气时发，草木皆肃，国有大恐。行夏令，则民多疾疫，时雨不降，山陵不收。行秋令，则天多沉阴，淫雨早降，兵革并起。

#### 四 月

蝼蛄鸣，蚯蚓出，王瓜生，苦菜秀，靡草死，麦秋至。孟夏行秋令，则苦雨数来，五谷不滋，四鄙入保。行冬令，则草木早枯，后乃大水，败其城郭。行春令，则蝗虫为败，暴风来格，秀草不实。

#### 五 月

螳螂生，鷓鴣始鸣，反舌无声，鹿角解，蜩始鸣，半夏生。仲夏行冬令，则雹冻伤谷，道路不通，暴兵来至。行春令，则五谷晚熟，百螬时起，其国乃饥。行秋令，则草木零落，果实早成，民殃于疫。

#### 六 月

温风至，蟋蟀居壁，鹰始挚，腐草为萤，土润溽暑，大雨时行。季夏行春令，则谷实解落，国多风咳，民乃迁徙。行秋令，则丘隰水潦，禾稼不熟，乃多女灾。行冬令，则风寒不时，鹰隼早鸷，四鄙入保。

#### 七 月

凉风至，白露降，寒蝉鸣，鹰乃祭鸟，天地始肃，禾乃登。孟秋行冬令，则阴气大胜，介虫败谷，戎兵乃来。行春令，则其国乃旱，阳气复还，五谷不实。行夏令，则其国火灾，寒热不节，民多疟疾。



## 八 月

鸿雁来，玄鸟归，群鸟养羞，雷始收声，蛰虫坏户，水始涸。仲秋行春令，则秋雨不降，草木生荣，国乃大恐。行夏令，则其国乃旱，蛰虫不藏，五谷复生。行冬令，则风灾数起，收雷先行，草木早死。

## 九 月

鸿雁来宾，雀入大水为蛤，菊有黄华，豺乃祭兽，草木黄落，蛰虫咸俯。季秋行夏令，则其国大水，冬藏殃散，民多飢餓。行冬令，则国多盗贼，边境不宁，土地分裂。行春令，则暖风来至，民气解惰，师兴不居。

## 十 月

水始冰，地始冻，雉入大水为蜃，虹藏不见，天气上升，地气下降，闭塞而成冬。孟冬行春令，则冻闭不密，地气上泄，民多流亡。行夏令，则国多暴风，方冬不寒，蛰虫复出。行秋令，则霜雪不时，小兵时起，土地侵削。

## 十 一 月

鹖鸣不鸣，虎始交，荔挺出，蚯蚓结，尘角解，水泉动。仲冬行夏令，则其国乃旱，氛雾冥冥，雷乃发声。行秋令，则天时雨汁，瓜瓠不成，国有大兵。行春令，则虫螟为败，水泉咸竭，民多疾疢。

## 十 二 月

雁北乡，鹊始巢，雉雊鸡乳，征鸟厉疾，水泽腹坚。季冬行秋令，则白露蚤降，介虫为妖，四邻入保。行春令，则胎夭

多伤，国多痼疾，命之曰逆。行夏令，则水潦败国，时雪不降，冰冻消释。

## 卷九十四 云气杂占

### 帝 王 气

天子气内赤外黄，正四方郁郁葱葱，所发之处，当有王者。若天子欲有游往，其地亦先发此气，远近数里。如法计之吉凶，以日辰生克决，期以支干数法。

又曰：天子气如城门隐隐在气雾中，又多在晨昏见。

又曰：天子气如千石仓在气雾中。

又曰：天子气五色如山镇。又曰：天子气如高楼在雾中。又曰：气象青衣人垂手在日西，天子气也。又曰：敌上气如龙马，杂色，郁郁冲天者，帝王之气，不可击。若在吾军，必得天助。又曰：气如龟如凤，五色，随王时发者，天子气出。范增曰：吾使人望沛公，其气冲天，五色相糅，皆为龙虎，此非人臣气也。

《洛书》曰：苍帝起，青云扶日；赤帝起，赤云扶日；黄帝起，黄云扶日；白帝起，白云扶日；黑帝起，黑云扶日。

一曰苍帝气如人向日，拳手而俯首，一手在后。赤帝气如象火光，如覆蓂状，立在日下。黄帝气如马在日下。白帝气如虎在日下。黑帝气如船在日下。青紫气自地属天，其地有贵女。凡帝王气发，常以四时王相时日相生之日，相生之日，其国大昌。

### 贤 人 气

贤人气，视四方常有大云，五色具者，其下贤人隐也。青

云润泽蔽日，在日西北，为举贤良。

## 将 军 气

将军之气，如龙如虎，在杀气中。两军相当，若发军上，则其将猛锐欲动也。吉凶以日辰决之。若无军在外，亦当有暴兵起。城营上气如火烟，或如山林竹木，或白色而有赤气绕之，或紫黑如门楼，或上黑下赤如旌旗，或如张弓弩，或如尘埃，本大而高，首锐而卑，或如困仓，正白，见日益明，或白如粉沸，或如夜火光照人，此皆猛将气也。军上气黄白而转泽者，将有盛德，不可击。军上气发，渐渐如云，变作山形者，将有深谋，不可击。若在吾，速战大胜。

军上气黑，下赤气在前者，将精悍不可当。军上气如交蛇向人，此猛将气也，不可当。若在吾军，战必在胜。

赤气上与天连，军中必有良将。

军上气青白而高者，将勇大战；前白后青而高者，将弱而士勇；前大后小，将怯不明。军上气青而疏散者，其将怯弱可击。

## 兵 气

胜兵气上与天连，或如火光，或如山堤上有林木，或如埃尘粉沸，其色黄白，或如旌旗无风而扬，挥势指敌，或白气粉沸如楼，缘以赤气，或如人持斧向敌，或如蛇举头向敌，或如埃尘，前卑后高，或如牛马，头低尾昂，或如旌旗，如锋利向人，或有人如牵牛，或如乳虎，或如正帛，或如覆舟，或气似堤覆，前后皆白，此皆雄兵猛士之气，不可击。若在我军上，急战大胜。

军上气黄白色，润泽重厚者，胜。

军上发黄气，将士精勇不可击。若在吾军，可战。

军营上有赤黄气上达于天者，不可击。军上有五色气，上与天连，此天应之军，不可击。军上气上小下大，其军士日增益，不可击。军上气遥望如斗鸡，赤白相随，在云中，得天助，不可击。

军上气上锐，其色黄白，圆而泽者，其将勇猛，士卒能强战，不可击。云如日月而有赤气绕之，似日月晕，或有光者，所见之城邑不可攻。云气如伏虎居上，或如华盖，或如杵形向外，或如赤马，或如山岳，皆不可攻。敌上有气或云如中天至而及我军，常有此而不变者，不可攻。军上常有气者难攻。有云状如鸟飞去者，其国战胜。两军相当，敌上有气如飞鸟徘徊，或来而高者，兵精难击。夜视彼军上有黑气出，上有赤气临我军上，彼强我弱，弱能破强，小能击大，大战大胜，小战小胜。望四方有赤气如乌在黑气中，或如黑人在赤气中，或如赤杵在乌气中，或如人十十五五有行列，或状如旌旗在乌气中，有赤云气在前者，其兵精锐，不可当。云气三匹帛，前横后大，在军上者，战胜。

败兵气因废枯散，如马肝色，或如死灰，或如偃鱼，或如偃盖，或乍见乍聚乍散，如雾始起，或如群羊如群猪在气雾中，皆衰乱也。军上气如死蛇，如系牛，如双蛇垂头，如蜚鸟四散，如决堤垣，如坏屋，如人无头，如人相指，如惊鹿相逐，如两鸡相向，或如人头，如扬灰，如卷席，如县衣，如匹布乱攘，如人相随，或如粉如尘，勃勃如烟，或五色杂乱，东西南北不定，或如群鸟乱飞，或纷纷如转蓬，或如败船，或如卧人无手足，或如覆车杂乱不起者，皆败军之气，击之必克。

军上气上大下小者，士卒日减。军上十日无气发者，其军必败。十日无气而忽有赤白气乍出即灭者，外声欲战而实欲退散。黑云气如坏山堕军上，名曰营头之气，其军必败散。军上气如火光夜照人者，军士散乱。军上气出而半绝者，欲败渐尽。

者走。一绝一败，再绝再败，三绝三败。在东发白气者灾深。军上有气如双蛇守日，急往击之，大胜勿疑。军上有赤气炎降于天，士卒众乱将死。

赤气如火光从天流下入军，军乱将死。军上气苍苍，须臾散，击之必胜。若在我军，宜严备固守。

军上气前高后卑者败。军上有黑气如牛形，或如马形，从气雾中渐渐入军，名曰犬狗食血，其军败散。军上气苍黑乱者，士卒饥。两军相当，十里之内，三里之外，望彼军上气高而前后白青散者，败气也，急击之。

云气如人头临军上，战大败，流血满谷。

云如鸡如兔临营上者，军败走。云气盖道蔽濛昼晦者，饭不暇食，炊不暇熟，宜急去之，不然必败。

军上气黑而卑如楼状，军不移必败。军上气先青而渐变黑者，其将欲死。散军之气，如燔生草之烟，前虽锐而后必退，得便击之胜。黑气临营，或聚或散，如鸟将宿者，必有云如鸟，其出如虫，其国战不胜。敌上有云气如丹蛇者，击之胜。有云气如尾在气雾中临军上者，中人与外人通。军行有白气如猪来临者，军大惊，宜备之。日晕有气如死蛇，属晕者将死，两军相当，不利先举。日晕旁有赤云如县钟，其下将死。日月晕有背气，所临者败。

军上有白虹及曲蜺者败。白虹及蜺入营者败。日晕气薄恶及后至先去，其下军败。日晕有四缺在外，军悉败散。凡日月晕与气，以先有者为发，先去者为散。军上有日旁虹蜺，不可逆之，若得其逆，宜徙去之。降气如人十十五五皆低叉手，或如人叉手相向，或气如黑山，以黄为缘者，皆降伏之气也。白气如鸟，趣入屯营，连络不绝而须臾下者，当有他国来降。暴兵气白，如瓜蔓连结，部队相逐，须臾罢而复出，或至八九而来不断者，有急贼猝至，宜防之。白气如仙人衣，千万连结，

部队相逐，罢而复兴，如是者当有千里兵来，宜备之。黑气从彼来之我军者，欲袭我也，敌人吉，宜备不宜战，敌还从而击之，必得小胜。天色苍茫而有此气，依支干日数内无风雨，则所发之方时则凶，时克日则自消散，此气所发之方，当有使告急，一人来则气一条，依数计之，若散满一方，则有众来依，日支干数内有风雨则伏。

气如人持刀盾，或有云如坐人，赤色，所临城邑有猝兵至，惊怖，须臾去。赤气如人持节，兵来未息。

云如方虹，或如赤虹，其下有暴兵。云气如旌旗，其下兵暴起。云气如虎跃，如人行，色白而悴者，暴兵起。云如人行，止而不崩，左显丘，右显丘，内气如带道旁下，左显丘，候敌气上。

穰，大风将至，视所从来避之，云甚厚而润大，雨必暴至。四始之日，有黑云气如阵厚重而润者，多雨。日始出，有晕气如车盖在日上者，其日雨。日上下有黑云气如蛟龙者，必有风雨。云气如黑蛇冲日，其下有大雨水。

月初生，色黄者多晴，色青多雨，色润白者大雨。

苍云气入北斗，多大风。黄云气蔽北斗，明日雨。白气掩北斗，不过三日雨。青云气掩北斗，五日内雨。

天无云而白斗上下独有云，五日内大雨。日入后有白光如气，自地至天，直入北斗，所历星皆失色，其夜必有大风。太白出气，长数丈，多风雨，所指处兵大起。辰星出气，长一丈，大雨水。

### 九 土 异 气

海旁蜃气象楼台。广野气成宫阙。自华以南，气上黑下赤。嵩高三河气正赤。恒山之北气青。渤海之间气正黑。江淮之间气皆白。东海气如笄簪。河水气如引布。江汉气劲如杼。济水气如黑纯。渭水气如狼白尾。淮南气如白羊。一曰如帛。少室气如白兔青尾。恒山气如黑牛青尾。东夷气如树。西夷气如室屋。南夷气如阁台，或如舟船幡旗。北夷气如群羊，如穹庐。

韩云如布。周云如车轮。秦云如行人。卫云如犬。魏云如鼠。齐云如绛衣。越云如龙。蜀云如困。宋云如车。吴云如日，当其地而见者不占。

## 卷九十五

### 角宿云气干犯占

云气如刀剑出两角间，有阴谋，天子无出殿庭，期不出三十日。青气入角，天子有疾，出之祸除。赤气入左角兵起，右角国兵惊，战不利。赤气入角而波扬者，有火灾。如行者，将奔命。赤气从两角过入亢，有过兵。赤气从北斗直过两角间回，有过兵。白气出入两角，战不胜，白气从两角过入亢者，有过客。苍气入左角，有兵兵败。苍云气出右角，兵在外者，战有忧。苍白云气出入两角，兵有大败，黑云气出入两角，用兵偏将败，有水灾。黑气从两角过入亢，有过兵。黄气入两角间，天子有祠祀事。黄白气润泽入角，王者得地。

### 亢宿云气干犯占

云气青色入亢，人疫。出氐入亢，人君有疾。黑云气入亢，有水灾。一曰有使出外，言水事。《荆州占》曰：人多疟疾。黑气出氐入亢，君有疾死。赤云气入亢，廊庙间有陈兵。赤而扬波，大人忧，大疫。黄白云气入亢，有治事。白云气入亢，有土功，人疾病。

### 氐宿云气干犯占

云气入氐，黄白色，有土功。黑色大水。赤有内兵。苍白色，疫疹大行。白色，天下疫久不散，宫中有女丧。黑气入氐房间，天子遣使于诸侯，有口令。



### 房宿云气干犯占

云气入房，赤黄润泽，名宝人；出房，国宝有出者。黄云气入房，外国人贡。黑云气出房，宫中有忧。黑气入房，诸侯有使来，言口令之事，且有大水。赤云气入房，宫中内乱，大兵起。赤云状如人，入房，后有娠，不然奸事起。赤云气如波扬，入房，宫中火灾，兵起庙廷，人主机桮不安。红云气入房，诸侯王有死者，期三年。苍白云气入房，将相忧。白气如大道，入房，委蛇入汉，国有大水，兵起宫中，人民流亡饥死路旁，尸骸不收。不过二年，帝王崩，妇女佣客不还。云气如带，经两角间入房，关门闭；再经之，兵起；三经之，天下不通。

### 心宿云气干犯占

云气出心，青色，天子使人于诸侯。赤色有兵将出。赤黄气出心，王就国。黑云气入心，天子忧，入左星庶子忧；入右星太子忧。一曰黑气入心右星，庶子受赐禄。白气入心，天子左右臣作乱，兵起。白气入心左星，太子受赐。赤气入心，有立王。赤气出心南行，天子左右有亡去者。赤云气锋锐正刺心，天子忧。苍白气入心中星，天子忧。黄气入心，天子有子孙喜；入右星，太子喜。黄白云气润泽如匹布，正抵心下，外国有来归者。云气状如彗帚，色赤如血，入心，天子遇贼，出心，天子有杀伐。若出远则谷贵，杀伐人于千里之外。

### 尾宿云气干犯占

青云气入尾，故臣有来归者；出尾，臣有死者。白气入尾，故臣有谋来归而受诛者。黑气入尾，故臣有来归骸骨者。赤黄气入尾，有使来言兵事。黑气出尾，人民流亡。青气出

尾，臣作乱。赤黄气出尾，君遣使干诸侯言兵事。

### 箕宿云气干犯占

黄白云气入箕，蛮夷有使来。黄云气入箕，有献美女者。变而色黑，道死不至，色苍，道上为风所覆。苍白云气入箕，其国有灾，出之灾除。黄白云气出箕，天子使者出。一曰宫中美人有出者。赤云气出箕，兵出，人之兵入。

### 斗宿云气干犯占

苍白云气入南斗，多大风。赤云气入斗，兵起；如波扬，大旱，多大灾。黄白云气入斗，诸侯来见天子，不则有使者来贡。黑气入斗，宗庙中有大忧。赤气入南斗，外兵入；出斗，内兵出。黄白气出斗，天子使人于诸侯。赤气入北斗，还向南斗，不出一年，其下有流血，将死营空，客胜主人。

### 牛宿云气干犯占

苍白云气入牛，牛多死，出之则灾消。苍白云气横贯牛宿，有兵丧，除旧布新。黄白云气入牛，牛蕃息。一曰诸侯有以四足虫入贡者。黑云气入牛，天下牛多死。赤云气入牛，牛马多以漕挽死者，出之则兵出。赤云气如波扬，入牛，有兵大战，牛马大损。白气入牛，有兵丧。

虹出牵牛之度，有崩城，期二年。

### 女宿云气干犯占

云气黄白色入女，国有嫁娶事。苍白云气入女，天下女子多疾病，出之则灾消。赤云气入女，妇人多产死者。一曰多兵死。白气入女，女子多疾疫。黑气入女，天下多女子之丧。黄云气出入须女，天下女子多喜事。

### 虚宿云气干犯占

云气入虚，苍白色，有哭泣，出之祸除。黄云气入虚，天子以喜起庙祀祠。黄白云气入虚，享气也，天子敬祀宗庙。赤云气入虚，有火灾，一曰有兵在庙中；出虚，有兵庙外。白气入虚，有无币之客来；出虚，有使出外。黑气入虚，有水灾。一曰庙圯。云气如立虹，出虚，天下大虚，多火灾。

### 危宿云气干犯占

苍白云气入危，天子大造宫室。青气入危，国忧，有损屋。赤云气入危，有土功盖屋之事大作。一曰宫中有兵忧。赤气出危，以火发屋。一曰有火灾。黑气出危，北乡大水，人流亡；东乡其国君死，百草不实；西乡人主忧，死丧；南乡有疾疫。期不出其年，远明年。黑气入危，自北来大水，西来死君，东来稻粟不实，南来有兵，皆不出一年。白气出入危，其国有兵。黄云气出入危，皆为土功兴。一曰黄气出危，国有喜。白气及黑气入危者，皆有死丧哭泣事。青黑气出入危，有水灾。

### 室宿云气干犯占

黄云气入室，有土功事。苍白云气入室，大人忧丧。黄白云气润泽入室，诸侯有使来；若出室，天子有使出外，皆言宗庙之事。赤气入室，有兵。赤云气如大道，来室上下，人主不可出宫，有逆臣，有疾病，不出三年，其土大饥，有军在外，则有大战，流血暴尸。赤气如波扬，入室，兵入宫，有亡国。黑气入室，大人有死丧。青气入室，其国忧。杂气入室，人多暴死。有气明润光泽，如日月之彩，出入室中，男子之祥。黄气光明润泽，出入室，国有喜。

### 壁宿云气干犯占

苍白云气入壁，大人忧，死丧，出之祸除。赤云气入壁，有兵。赤云气入壁，如波扬，兵火并起，大臣有烧死者。赤气从西壁入东壁，兵气也，天子手杀其臣。黑气入壁，有破国亡主。一曰有大水。黄云气入壁，天子裂土建侯。陈卓曰烈士出。青云气入壁，有兵起。黄白云气入壁，外国入贡。一曰天子立庙，期一年。

### 奎宿云气干犯占

苍白云气出奎，有兵；入奎，天下妇人多灾。赤云气临奎，有兵入；出之兵出。一曰有疾病。赤气入奎，有伪使。一曰有无所受命而来者。赤气出奎，有诈出使者。黄云气入奎中，有贡珠玉珍宝者。一曰天子纳后夫人。黄气出奎，珍宝有出者。一曰有出宫人，不则后妃有黜者。赤气入奎，天下妇人多血疾。黑气入奎，有疾疫，三日夜不出，大人忧之，出则祸除。

### 娄宿云气干犯占

青黑云气入娄，有兵疫，出之则祸除。白气入娄，人民受赐。黄气入娄，贵人受赐。黑气入娄，有水，有白衣之会。黑气出娄，纷纷如转蓬，始至大人食中毒。一曰大水且至。赤云气如剑锋，入娄，宗庙苑牧中兵起。青气入娄，有兵忧。

### 胃宿云气干犯占

苍白云气入胃，国以丧彙粟。青黑气出胃，兵起。赤云气出胃，以兵出粟。黑气入胃，仓粟败腐。苍白气出胃，以丧出粟。黑气如转蓬，出胃，大人食中毒死，且有大水。黄白云气

明泽入胃，大人入国，仓库充实；出之，有出粟赈民之事。赤云气入胃，以兵余粟。

### 昴宿云气干犯占

苍白云气入昴，人疾疫多死，妖言大起，出则祸除。黑气入昴，北地灾。苍赤云气入昴，人疾疫，多妖言；不则龙见。赤云气入昴，有军令，白衣将兵。一曰天子自将，民聚鼓下。赤气出昴，军在野处。青黑气出昴，有兵，且有大水。黄白气润泽入昴，天子白衣会；出昴，白衣会罢。

昴黑有珥，兵息。

### 毕宿云气干犯占

苍白云气入毕，岁不收，出则祸除。赤云气入毕，兵起。赤气如波扬，大旱，有火灾。黄白气入毕，其风岁美，出毕则授民田。一曰黄气带白入毕，天子有太子喜，兵在外者解。一曰其岁有大人生。黄白气出毕，有拜将。赤气出毕，将军兵出。黑气入毕，相乱政，将死。白气入毕，相死，出则祸除。赤气入附耳，兵起；出之，将军兵出。苍白气入附耳，将军死。黄白气入附耳，天下无兵，安。黄白气出附耳，有拜将。黑气入附耳，将死。

### 觜宿云气干犯占

苍白云气入觜，天子有葆旅之事，出之则祸除。赤云气入觜，兵起。赤气如扬波，入觜中，兵入国，火随之；出觜，则兵随之出。黄白气润泽入觜，有神宝入。一曰有负宝玉来献天子者。白气入觜，民食葆旅。白气出觜，有葆旅之事于国外。黑气入觜，大人忧，边将戮，赵地有灾，出之祸除。黄云气出觜，国兵随之出；入觜，国兵入。

### 参宿云气干犯占

苍白云气入参，臣为乱。苍白气出参伐而环绕，天子自将兵巡边。苍白云气入伐，大将忧，有斩刈之事。苍白气出伐，以白衣行斩刈事。苍气入参，边境有忧。赤云气入参，内兵起，将军为乱诛。赤云气如波扬，入参，边城仓库焚。赤气出参中央，边有大兵。赤气入伐，有斩刈，将军忧。黑气入参，大水，将军死。气锐如锋，大人当之。黑气出参，有兵，有水灾，将军忧。黑气出伐，以水伐国。白气入参，天下用兵。一曰天子有阴病。黄白气入参，大将受赐。黄气出伐，将军战胜。

### 井宿云气干犯占

青云气出井，大如井口，上拂参而行入河中，大水没城郭，期二十日，远三十日。苍白气出井，有水令；入井，民大疫。黑气入井，民疾病，多死丧，天下大水，道无行车。黄白云气入井，有客来言水泽事。赤云气入井，大水，不则疾疫，亦为旱。苍白云气入井，有丧，女主恶之。白气入井，大雨。赤气入井，有兵。一曰水贼起。赤气入井，天子以水行兵。黄气出井，天子以泽泉之利养民。恒以正月朔夜候东井中，或上下有云气润泽，则其岁多潦。

### 鬼宿云气干犯占

黑气入鬼，大人皇后皆有忧。白气入鬼，人疾病。赤云气入鬼，大旱，有火灾。黄气入鬼，有土功。

### 柳宿云气干犯占

赤云气入柳，有火灾；出柳，大旱。黄云气入柳，期五十

日有赦。一曰黄气入柳，天子造宫室，土木大兴。黄气出，有赦。黑气入柳，天子宫庙木腐败。黑气如锋刃刺柳，三夜不散，大人忧。白气出柳，国有忧，兵出。白气入柳，天子造宫室。苍白气入柳，有忧。黄白气出柳，天子出美木作室；入柳，得美木。

### 星宿云气干犯占

苍白云气入七星，大人忧。苍白云气出七星，天子有急使出。其气回曲而不正，有亡臣。赤云气入七星中，兵气也，若有客来，必有兵随之。赤云气如波扬，入七星中，火气也，宫中有火灾。四曲五曲，后妃恶之。赤气出七星，天子使出，亦有兵随之出。黄气仿佛入七星，外有贡献。黄气出七星，天子有赐于诸侯。气见而大风随之者，有赦。黄白气润泽入七星，远人来贡。黑气入七星，贤人多死，出之祸除。白气入七星，国有死丧。云如蜚鸟啄七星，大人有忧。

### 张宿云气干犯占

苍白云气入张，庭中觴客，有忧变，出之祸除。赤云气出入张，天子用兵赐物。白气入张，大客有忧。黄气润泽入张，天子因喜赐客。黄白气出张，天子命使，赐诸侯。赤黄气入张，有忧；出张，天子用兵。黑气入张，徘徊而散，其分有水灾。黑气入张而转绕之，或如刀剑刺之，天子防客。赤云气如扬波，入张，天子宫中大哭。

### 翼宿云气干犯占

赤云气入翼，有暴客入国境。赤气出翼，其国兵出，随气所之。苍白气入翼，太常之官忧之。黄气润泽入翼，诸侯来贡物。黄气出翼，天子遣使于诸侯。黄白气入翼，外国入贡，一

曰白气若黑气入翼，正抵其星，三夜不去，宗庙有忧，大人恐，兵大起。

### 轸宿云气干犯占

苍白云气入轸，王者不可行幸宫观，出之其祸除。苍云围轸，亡国之戒。黄白云气润泽入轸，诸侯入贡，以车为币；出轸，天子以车赐诸侯。赤云气入轸，兵从中起。赤云气如波扬，入轸，车库火灾，兵且起，有大丧。赤气出轸，将出兵行。白气入轸，有大丧。黑气入轸，大人忧。黑气如鼠入轸中，天子有坠车堕马落床之厄。黑气四散入轸，及回绕之，天下大水，车不用。

## 卷九十六 云气犯列宿占

### 大 角

黑气奄大角，久而不散，主命者恶之。苍白气入角，有大丧。黄白气如月近大角，乍明乍暗，青云一道，如千寻枪竿冲大角而过，天子栋梁折。

### 进 贤

苍白气入进贤，相黜，野逸忧。白气入，贤士丧。黑气入，贤士忧。黄气入，贤士有恩赐。

### 库 楼

赤气直如千寻枪竿冲库楼，天子自将兵，兵大动，中外震惊，武库官忧，天下不安。



## 拆 威

苍白气入拆威中，大臣为乱，兵起，天子失威，出之则祸除。赤气入拆威中，大臣反，天子出将兵。黄白气入拆威，外国有来求和亲者，出拆威，天子有德令。黑气入，天子恶之，出则祸除。

## 阳 门

赤气入阳门，边兵起，有战。

## 骑 官

苍白气入骑官，骑将死。赤气出，骑兵大出。赤气入，骑士忧。黑气入，军中有疾病。

## 从 官

黄气入，巫医受爵。

## 天 江

赤气出天江，将军出野。青气入天江，大水。黄白气入天江，天子用兵，出之兵罢。

## 傅 说

赤气入傅说，巫祝之官受戮。

## 鱼 星

赤气入鱼星，车骑满，军大动，将军忧。黄气出鱼星，天子用事起兵，人之兵罢。

## 龟 星

赤气入龟星，巫卜之官有诛。

## 鳖 星

赤黑气入鳖星，有白衣会，天下易政。

## 九 坎

赤云气入九坎，天下大旱。黑气入，大水。

## 河 鼓

苍白气入河鼓，将有忧，军在外则天子之军败，将死，出之则祸除。赤气入河鼓，兵起，客军入。赤气出河鼓，军出，将军战不胜。黄白气入，有以众来降者；出之，将有喜。黑气入将死。青气入，将忧。

## 织 女

苍白云气入织女，女主忧病。一口人主忧。出则祸除。赤气入，有以女子故而家受诛者。赤气入，女子多死外兵。黑气入，王者为女所害。一曰女子多病死。白气入，女有丧。黄白气入，天子以女幸一家；出之，天子外得美女。

## 天 津

苍白气入天津中，君有水忧。赤气入，大旱。黄气入，天子有德令。赤气出，兵起。黑气入，大水。天津汉中有黑气独居，大若席，名曰云汉，不满三日，迟不出五日，大雨。黑气状如舡，若一疋布，维河津间，不出十日大雨。

## 败 白

赤气入败白，人主凶。黑气入，天下人灾。

## 瓠 瓜

苍白气入瓠瓜，瓜果不可食；出瓠瓜，其祸除。赤气入，天子攻一邑，残之。黄白气出，天子以果赐诸侯。黑气入，天子食果致害。

## 天 皇 城

赤气奄入皇城，北夷惊，有疾疫。

## 羽 林 军

苍白气入羽林，军有忧。入其南，若入羽林直南出，皆为后有忧。入其北，诸侯忧。出之则祸除。赤气出羽林，兵随之，凶。赤气入，兵起。入其东，后起兵；入其西，太子起兵；入其北，诸侯起兵。黄气入，天子入军中。黄白气羽军南，后有所献；出其北，太子有献。黑气入，兵起大战。入其南，天子忌之；入其西，太子忌之；入其北，诸侯忧。

## 北 落 师 门

苍白气入北落，有疾疫。赤气出，兵出。赤气入，外兵入。黄气入，中使至军，有喜。黑气入，将死。

## 滕 蛇

黑气出入天蛇，天下大水。

## 天 厩

苍白气入天厩，马有惊。

## 王 良

苍白气入王良，天子忧，坠车马，奉车忧，出之祸除。赤气入王良，太仆奉车诛。赤气中驷马，内乱兵起。赤气出，车骑满野。黄气入，奉车拜赐，天子有喜，诸侯有献马者。一曰有神马见。黄气出，奉车受命行德令。一曰天子出车马赐诸侯王。黑气入，奉车太仆死。

## 附 路

苍白气入附路，太仆忧之；出附路，祸除。赤气入，太仆有铁钺之诛。赤气出，兵起。黄白气入太仆，拜赐出之，有德令。黑气入，太仆死。

## 阁 道

白气入阁道，有急事在内。白气出，人主有疾病。黄气入，天子有喜。

## 天 大 将 军

苍白气入天将军，军中有疾疫，兵多将死。赤气出，兵多出。赤气入，兵将皆有凶，军在外，防客兵来。

## 土 司 空

黄云气入土司空，土工失作，有建国徙都之事。

## 天 仓

苍白气入天仓，岁不熟，出之祸除。赤气入，兵内起，有火灾。赤气出，以兵出粟。赤气如波扬，入之，大旱，火大起。黄白气入，天下火熟。苍黑气入，天下不熟。

## 天 廩

赤气入天廩，大旱，有火灾。黑气入廩，粟腐败。黄白气入，岁丰。黄白气出，天子出粟赈民。黑气出，大水伤谷。苍白气入，虫大生，出之则祸除。赤气出，天子以用兵出粟。

## 大 陵

苍白气入大陵，天下多死丧。赤气入，天下兵起，多以兵死。黑气入，大疫。

## 积 尸

黑气入积尸，天下人大疫死。

## 天 舡

赤气入天舡，不出一年，有自立者。一曰不出九十日，水中兵战。赤气出，水兵起。苍白气入，有殃，天子不可乘舡，出之祸除。赤黑气入，天子戒乘舡。黄白气入，天子幸舡有喜，必有神状，若光景处舡上者，青气或黑气，舟师勿行。

## 天 橐

赤云气入天积，积中火起。赤气入，天子用火出散货。黄白气入，天子自喜，多出货财；出之，天子有喜，出货财。

## 天 苑

苍白气入天苑，牛马畜兽疫，出之则祸除。赤气入，牛马多死伤。赤气出，牛马以兵事出。黄白气入，牛马禽兽蕃息。黑气入，牛马死，出之祸除。

## 五 车

苍白气入五车，兵大起，民流亡。赤气入，兵起大战。

## 天 潢

苍白黑气入天潢，有死丧忧，出之则祸除。赤气入，兵内起。赤气出，兵出战。赤气出入如扬波者，兵库焚。黄气入若出之，天子有喜，有兵则兵罢。

## 咸 池

苍白气入咸池，水虫多死。一日池中鱼多飞亡。黑气入，大水。赤气出，旱。黄白气入，天子有喜，出则有神鱼见。

## 天 关

黄气入天关，四方来贡玉帛。

## 天 高

白气出天高，早霜伤稼。

## 参 旗

赤气出参旗，不出一年，西戎来，欲盗中国，若侵地。不出三年，天下烦扰，百姓多忧。青气出入同上。

## 天 园

白气出天园，兵起。

## 玉 井

青气从参下入井玉中，不出三年，人不饮食井。黄气入三日不去，军在外绝水。白气入，兵起。赤黄气润泽入之，有军来降。

## 屏 星

黑气入屏星，大疫。

## 天 厕

苍白气入天厕，天子有阴病。青气入内，兵起。黑气入，天子忧。白气入，天子有阴病。赤气入，有兵。赤云气出天厕，祸除。黄白气出入，皆为有喜。

## 南 北 两 河

苍白气入两河戒间，兵大起，道不通，出河戒则祸除。入北河则边兵动，又为疾疫，夷王死。赤气出两河间，天子用兵于诸侯。黄白气入河戒间，随河行，天子出德令，天下有难，道路不通。

## 五 诸 侯

苍白气入五诸侯，诸侯有黜死者。

## 积 水

苍白气入积水，天下水灾。

积薪

赤气入积薪，火焚积聚。

水位

黑气入水位，大水。赤气入，大旱。

军市

赤气入军市，军中大惊。

阙丘

赤气入阙丘，宫中火灾，天子不安其居。

狼星

赤气入天狼，胡兵入塞，民大恐忧。

弧矢

赤气入弧矢，天下惊恐。一曰边陲有警。黑气入弧，胡中疫作。

老人

白气奄入老人，王者国绝。

天纪

黑气奄入天纪，禽兽大疫，六畜死耗。

燿星

赤气入之，天下烽火举动。



## 酒 旗

赤气入酒旗，天子以酒丧身。

## 轩 轅

苍白气入轩轅，后宫忧，有疾疫。赤气入宫，忧火。

## 天 相

黄气入天相，相臣有喜。黑气入天相，相臣死，不则有疾病。苍白气入，相臣忧。赤气入，相臣忧。赤气出，相出师。

## 器 府

赤气入器府，天下乐废。

## 石氏中外官占

## 大 理

黄云气入大理，刑法官有迁。巫咸曰有赦。黑气入大理，决狱不平刑受诛。

## 六 甲

黄云气入六甲，术士用。黄白气入，太史受爵赐。黑气入，太史忧。

## 内 厨

黑气入内厨，饮食防毒。

## 北 斗

云气五采入北斗，天子立太子，近期百日，远二年。

## 辅 星

黄白云气集辅星，相有喜。赤气入辅星，相受斧钺之诛。苍白气入辅星，相有忧。白气入辅星，相黜。黑气入辅星，相死。

## 天 理

赤云气入天理，兵大起，相出师。

## 相 星

黄白气入天相，将相有喜。黑气入，将相忧死。

## 势 星

黄气入势，中官受赐。赤气出入，中官反。黑气入，中官忧。

## 三 台

黄气入，将相喜。赤气入，多败伤。黑气入，三公忧，将相死。

## 天 棓

黄气入，天子先驱有拜赐者。赤气入，大人忧。

## 天 枪

赤气入天枪，天子惊恐。一日失位。苍白气入，兵起。

## 玄 弋

黑气入弋，胡兵退。苍白云气入，胡人大疫死。赤气出，胡兵大起。

## 招 摇

赤气入招摇正中，有兵内起，人将为乱。赤气出于招摇，兵起大战。黄白气出，天子以喜用师。

## 梗 河

黑气出梗河，兵起大战。赤气出梗河，国兵大出；入梗河，大战。苍白气入，将死。

## 贯 索

苍白气入贯索中，天子忧，亡地，出则祸除。赤气入，有内乱，兵起。赤气出，内兵出。黄白气入，天子有喜。黑气入，大人恶之。赤白气入，狱多枉死者。

## 女 床

黄气出入女床，后宫有子喜。白气入，后宫有丧。黑气入，有死者。青气入，有病。赤气入，宫中兵起。

## 宦 者

黄气入，宦者受赐。赤气入，宦者诛。黑气入，宦者死。赤气出，宦者作奸蔽主。

## 郎 位

苍白气入郎位，中兵起。——曰中郎有内乱，出则祸除。赤

气入，兵起；出郎位，多用兵，远出行。黄白气入，中郎受赐。

### 灵 台

青黑气入，有大风雨，期三日，远七日中。黄气入，太史喜。赤白气入，太史有忧。

### 少 微

苍白气入少微，贤士忧。一曰大臣黜。赤气入，宰臣谋叛。

### 长 垣

苍白气入长垣，胡兵起。赤气入，胡兵入，有火灾。赤气出，边兵起。

### 摄 提

青云气入摄提，九卿有忧。黄气入，九卿有赏。赤气入，戈盾用事。黑气入，大臣诛。

## 卷九十七 猛将军阵胜负云气占

太公曰：凡兴军动众陈兵，天必见其云气，示之以安危，故胜则可逆知也。其军中有知晓时气者，厚宠之，常令清朝若日午察彼军及我军上气色，皆须记之。若军上气不盛，加警备守，辄勿轻战，战则不足，守则有余。察气者，军之大要，常令三五人参马登高若临下察之，进退以气为候。

## 贤将气

凡兴兵动众，忌大风雷而阴不见日。凡气初出如甑上气，勃勃上，积为雾，雾为阴，阴气为虹霓若晕珥之属，如不积不结，散漫一方，不能为灾，必和杂杀气，森森然疾起，乃可论占。常以平旦下晡日出没时候之，期内有风雨灾不成，或有黑气如幢，出于营中，上黑下黄，敌欲来求战，无诚实言，及九日内必觉，备之吉。或日月阴沉无光，不雨，或十日昼夜无光，不见日月，名曰蒙。日久阴不雨，下谋上也。凡敌军上气黄白润泽者，将有威德。或军上气发，渐渐如云，变作山形，将有深谋。或敌上气黑中赤在前者，将精悍，皆不得击。凡气上与天连，军中将贤良也。

## 猛将气

凡气如龙如虎，或如火烟之形，或如火光之状，或如山林，或如尘埃，头尖而锐，或气黑如门上楼，皆猛将气也。凡敌上气青而疏散者，将怯弱，若前大后小者，将怯不明。

凡军上气浑浑圆长，赤气在其中，或有气如赤杵在黑云中，皆有伏兵，或两军相当，赤气在前后左右者，有伏兵，随气所在防之。或有云绞绞绵绵，此以车骑为伏兵；或有云如布席之状，此以步卒为伏兵；或有云如山岳，在外有伏兵，不可不审也。

## 降城气

凡降城之气，如人十十五五，皆叉手低头，降之象。或有气上黄下白，名曰喜气，所临之军欲求和退。若风不蓬勃，旌旗晕晕，顺风而扬举，或向敌终日，军行有功胜候也。

## 胜 军 气

凡敌军上气如山堤上林木，不可与战。在吾军大胜。或如火光，亦大胜。或敌上白气釜沸如楼，缘以赤气者，兵劲不可击。在吾军必大胜。或敌上气黄白厚润而重者，勿与战。或遥视军上云如斗鸡，赤白相随在气中，得天助，不可击。两军相当，上有气如蛇，举头向敌者，战必胜。

## 军 营 气

凡军营上有五色气，上与天连，此应天之军，不可击。有赤黄气于天，亦不可攻。或有云如日月，而赤气绕之如日晕状，有光者，所见之地大胜，不可攻也。敌上如虎状，其军亦不可攻也。若逆风来，应气旁勃，牙旗阴折不见日，旌旗激扬败候也。若云气从敌所来，终日不止，吾军不可出，出则不利。若风云俱来，此为败候在急也。

凡敌上气色如马肝，如死灰，或类偃盖，败徵。或黑气如坏山堕军上者，军必败。或军上气昏发，连夜照人，则军士散乱。或军上气有五色杂乱，东西南北不定者，其军必败。或军上有赤气炎炎降天，将死众乱。或军上有黑气如牛马形，从气雾中下渐入军，名曰天狗下食血，败军也。或有云气盖道，蒙蔽尽山，此候也。

## 城 中 气

凡城中有白气如旗者，不可攻。或有黄云临城，有大喜庆。或有青色如牛头触人者，其城不可攻屠。或城中气出东方，其色黄，此天钺也，不可伐，伐者死。或城上气如火烟，主人欲出战，其气无极者，不可攻。或气如杵从城中向外者，内兵突出战，主人胜，不可攻。或城上有云分为两彗状者，攻不

可得。

## 围 城 气

凡攻城围邑，过旬日不雷雨者，城有辅助，疾去之勿攻也。此皆胜气。

凡攻城围邑，赤气在城上，黄气四面绕之，城中有大将死，城降。城上有赤气如飞鸟，击之可破矣。或有气出入者，人欲逃。或有气如灰气出如覆其车上者，士多病，城屠。或城上无云气，士卒散。或城营上有赤云状如众人头，下多死丧流血。凡攻城，有白气绕城而入者，急攻可得。若有曲蛇从城外入城者，三日内城屠。此皆败气。凡敌上有云如车盖，不可击。若有云如双青蛇，云去可击，大胜。

## 伏 兵 气

伏兵气如幢节，在黑云中转高，锐不可击。城营上见有云如雄鸡，城必降。边城云如蛟龙，所见处军将失魄。敌上有云长如引素如阵前锐，或白黑色有谋，青色有兵，赤色有反，黄色急去。敌上有气如牵牛，未可击，有云如坐人，赤色，所临必有卒兵来至，惊恐，须臾而去。

## 军 气

凡占军气，与敌相对，将当访军中善相气者，厚宠之，留令清朝若日中时察彼军及我军上气，皆纸笔录记上将军。将军察之，若我军上气不善，但警备镇守，勿接战。敌在东在南在西在北，每庚子日及辰戌午未，登五丈高台，去一里，占，百人以上便有气。气如尘埃，前卑后高者，将士精锐，不可击。气如堤阪，前后摩地，避之勿击。见彼军上气如尘埃粉沸，其色黄白，如旗幡晖晖然，无风而动，将士勇猛不可击。我军如

此，亦不用战。凡对敌，或有气来甚卑，不阴覆人，上下掩搆盖道者，大贼必至，食不及饱，严备之。

### 军 胜 气

凡云起王相者吉，凶死者凶，有胜无，实胜虚，高胜下，泽胜枯，长胜短，厚胜薄。我军在西贼军在东，西高东下，西厚东薄，西泽东枯，西长东短，则我军胜也。

### 两 军 气

两军相对，遥见军上有气纷纷勃勃，如烟如尘，贼凶败。军上下日无气者，其军必败。若我军无气，将修德，抚士众，存问寒暑，警诫固守。有赤色气如火从天下入军，军乱将死。有黑气如牛猪者，瓦解之气，军必败。有白气如瓜蔓连结，部队相随，须臾罢而复出，及至八九而不断者，贼必至，严守之。若雨气蒙蒙围城有人处者，外兵当败入，若有出者，内兵当突出。凡气安则军安也，气动摇则军不安，气散去，军破且败，其气如群羊，击之必大克。两军相当，有气如飞鸟，徘徊在我城上，或来而高者，兵锐不可击。两军相去十里内三里外，军上无气，是死兵，击之必大胜也。两军欲战，视彼军气氛氲如焚，生军之烟者，初必精锐不可当，待其气散，击之必胜。其气黑出如山带黄，是谢气，敌人自降。

### 败 军 气

军败之气，如群鸟乱飞，疾伐之，必大胜。气乍明乍暗，皆有诈谋。气过旬不散，城有人辅，疾去之勿攻。凡敌上气如双蛇飞鸟，如缺垣，如坏屋，如人无头，如惊麋，如走鹿相逐，如鸡相向，皆为败军杀将之气。敌上气如囤仓正白，见日益明者，将士猛锐，不可击之。敌上气黑中有赤气在前，精悍



不可当。敌上气如转蓬者，击之立破。

### 游 兵 气

游兵气如彗云扫除，或数百丈，万万无根本。败军之气，如破车，如人无足无臂。若下轻其将，妖怪并作，众口相惑，当修德审令，缮砺锋甲，勒诫誓士，以避天怒，然后复择吉日，祭牙旗，具太牢之饌，震鼓铎之音，诚心启请，以备天问，观其祥应矣。若人马喜跃，旌旗皆前指，金铎之声扬以清，鞀鼓之音宛以鸣，此得神明之助，持以安众心，乃可用矣。

## 卷九十八 虹蜺占

《元命包》曰：阴阳交为虹蜺。

《汉书天文志》曰：虹蜺，阴阳之精。

如淳曰：雄曰虹，雌曰蜺。又曰：色著为虹，色微为蜺。

《月令》曰：季春之月，虹始见。

《尔雅》曰：蜺蜺谓之虹也。

京房曰：虹，日旁气也。

蔡氏《月令章句》曰：虹，蜺蜺也。阴阳交接之气著于形色者也。雄曰虹，雌曰蜺。常依阴昼见于日冲，无云不见，太阴亦不见。虹常依象阳见于日旁，白而直者曰蜺。凡日旁者，四时常有之，惟虹起季春见，至孟冬乃藏。

《尔雅》曰：蜺为挈贰。郭注云：蜺雌虹也，挈贰，蜺别名也。

《说文》曰：蜺屈虹青赤或白色，阴气也。

《合诚图》曰：虹蜺主惑心。

《潜潭巴》曰：虹蜺主内淫。

《春秋纬》曰：虹蜺者，斗乱之精也，主失度，主惑誉。又云：虹蜺见，雨即晴，旱即雨。注云：谓久雨虹见即晴，久旱蜺，见即雨也。

京氏曰：凡蜺者，阴挠阳，后妃无德，以色亲也。

《杂卦》曰：蜺出不言，内妒乱。

京氏曰：蜺三出，三巳三辰除之，除即日雨。韦昭注曰：三辰，从寅至辰也。

《诗》曰：蜺在东，莫之敢指。朝济于西，崇朝其雨。毛氏曰：夫妇过礼则虹气盛。

《元命包》曰：世惑臣谋，虹舒照。

高宗《八节虹气占》曰：虹以立春四十六日内出正东，贯震中，春多雨，夏多火灾，冬多海贼，秋多水，民流亡。虹以春分四十六日内出东南，贯巽中，春大旱，灾北起。虹以立夏四十六日内出正南，贯离中，大旱，火为灾，麻独甚。虹以夏至四十六日内出西南，贯坤中，小水虫为灾食谷，鱼不滋。虹以立秋四十六日内出正西，贯兑中，秋多水冬旱。虹以秋分四十六日内出西北，贯乾中，秋多水，虎为灾食人，逆贼生。虹以立冬四十六日内出东北，贯艮中，春多旱，夏火，粟贵。

京氏曰：虹春出西方，黑云覆之，夏大水。白云覆之，夏多寒，民病疰若温病者。赤云覆之，夏多旱。黄云覆之，夏大旱，谷不熟。虹夏出西方，黑云覆之，秋多雨。白云覆之，冬多风。青云覆之，冬多寒，民病疰若病瘟。赤云覆之，秋大旱。黄云覆之，秋大收。虹秋出西方，黑云覆之，冬多雨。白云覆之，冬多风，又多寒，民病疰若病瘟。又赤云覆之，冬大旱。若黄云覆之，冬余大贱。

京房氏传曰：虹冬出西方，黑云覆之，春多雨。白云覆之，春多狂风。青云覆之，春多寒，民病疰若病瘟。赤云覆之，春大旱。黄云覆之，春雨和调。虹出南方，无春夏秋冬所

见之处，不出三年，民流亡，不归收葬，风雨不时，民饥。虹出北方，雨阴阳不调，当雨反旱，当旱反雨，冬夏不调，万人愁，所照之国必有卖幼孙者，其岁多病疾，夏小雨，冬荒，不出三年，所照之国民守其仓，暴骨惶惶，哭泣相望，童子行，大旱二百八十日乃雨，所照之国尤甚。

《易飞候占》曰：虹凡相有五法，苍无胡，虹也；赤无胡者，蚩尤旗也；白无胡者，蜺也；冲不屈者，天杵也，直上不诘者，天棓也。此五虹以甲乙出东方，岁若谷大贱，犬食人食；丙丁出南方，天下大旱；庚辛出东南，甗釜不充，釜食多空，户五步六死人。虹以四月五月六月出西，麦贵，七月八月出西，菜贵，九月出西，大小豆贵，十月出西，尽贵，一出一倍，再出再倍，三出三倍，四出四倍，五出五倍，饥民千里。十月虹出东北者，其国亡。虹出横至上，反入又不曲正直者，不出九十日，民多病死，不出三年，大旱，民流亡，所照之国尤甚。虹出直，上行，名曰章，所出之处，民多病而死，民多瘟者，不然大旱千里，民多妖言，所照之国尤甚。又曰：温而不雨，虹出无处者，下精不功之事也。温而虹出家人屋，妊妇多死。夫王道之始，先正夫妇，夫妇正则父子亲，父子亲则君臣忠，君臣忠则化行。王道之兴，无不以德，衰无不以危。天见变异以为戒，欲其觉悟，故为虹蜺之异，所以谴告人君也。后专夫权，民苦刑杀，人妖君之行，故虹蜺五色也。

《韩诗》曰：蜺，刺奔女也。蜺在东，莫之敢指。蜺，东方名也。诗人言蜺在东者，邪色乘阳，人君淫佚之徵。臣为君父隐讳，故言莫之敢指。刺卫奔女，私奔淫佚，决成家室之计，皆指女也。

《抱朴子》曰：屈虹见城上，其下必大战流血。屈虹从城外入城中者，三日内城可屠。

《黄帝占》曰：攻城从外南方入饮城中者，从虹攻胜。

郗萌曰：城上有交头虹，城可攻。

《潜潭巴》曰：虹五色迭至，照于宫，有兵革之事。

张璠《汉纪》曰：灵帝时，虹昼见殿前，色青赤，蔡氏曰：小人女子之祥也。

《续汉书》：灵帝光和元年，有黑气随北宫温殿东庭中，如车盖隆起，奋迅，五色有头，长十余丈，形貌似龙。上问蔡氏，蔡氏对曰：所谓天投蜺者也。不见足尾，不得称龙。中平元年，黄巾贼张角起兵，六年，宫车宴驾。

汉《五行志》曰：后妃有专，蜺再重赤，而专至旱。注云：专者负也。

《潜潭巴》曰：五蜺俱出，天子诎。

《感精符》曰：九虹俱出，五色从横，或头冲尾，或尾绕头，失节九女并为妃族，族悉黜天外，若兵起，威内夺。

京氏曰：蜺有九，皆主身也。专君者以色专，爱及君事也。

《通卦验》曰：虹不时见，女谒乱宫。虹者阴阳交接之气，阳唱阴和之象，今失节不见者，似人君心在房内，不修外事，废礼失义，夫人淫恣而不敢制，故女谒乱宫。

《地镜》曰：虹从池井出若饮，国空虚。

《易妖占》曰：虹出君池，若饮君井，其君无后。

《汉书》曰：天雨虹，下属燕王只井中，饮井井水竭，只后诛。

《周书时训》曰：清明后十日，虹始见，不见妇人色乱。小雪之日，虹藏不见，收虹不藏，妇不专一。

《演孔图》曰：地欧蜺承天而败，皆臣子逆四方。注云：地欧蜺土中跃出也。

《抱朴子》曰：赤虹见城上，其下必大战流血。

《易候》曰：赤虹如杵，万人死其下，白虹亦然。

《运斗枢》曰：帝老不听政，赤虹填门。注云：不能听政，故虹贯塞主门，以绝之也。

《文曜钩》曰：齐举管夷吾，虹贯牛山，趣齐去妇，毋近妃宫。齐侯大惧，更立贤辅。宋均曰：出君位而阴气贯之，君惑于妻馆之象，故夷吾劝去之也。

### 虹蜺贯日二

京氏《对灾异》曰：虹蜺近日则奸臣谋，贯日客伐主。其救也，释女乐，戒非常，正股肱，入贤良。

《雒罪级》曰：五虹刺不言，内妾恣。

京氏曰：臣伤君不救国，君亡。

《易候》曰：赤虹与日俱出，其所之有急。

甘氏曰：赤虹出日左，大凶。

### 白虹三

《易候》曰：白虹其下有流血。

晋《天文志》曰：白虹者，百殃之事，众乱所基。白虹雾，奸臣谋君，擅权主威。夜雾白虹见，臣有忧；昼雾白虹见，君有忧。虹头反至地，流血之象。

《黄帝占》曰：白虹绕城不匝，从虹所在击之胜。其决贼及从其地破走。

《抱朴子》曰：白虹见城上，其下必大战流血。

京房曰：秋有白虹一双出西方，急陈兵待之，其赤气依傍者，必有获城。

### 白虹贯日四

《感精符》曰：宰相之谋欲有国，则白虹贯日，毁灭息。

《摘亡辟》曰：白虹贯日，四夷为祸，主恐见伐。

《感精符》曰：白虹贯日，天子将排。

《荆州占》曰：白虹贯日，臣杀主。

《甘氏占》曰：日旁有白虹冲日在东方，东方反在西方，西方反在四方皆然，期不出五年中，有臣倍其主者，白大将死，色赤，大夫出，一曰有反城。白虹贯日，近臣为乱，诸侯有欲反者。赤黑虹尤甚，期不出三年。

《维罪级》曰：白虹贯日，近臣乱胜，主人亡。

《易妖占》曰：白虹在日为丧，又为兵。

京房《对灾异》曰：虹蜺贯日，客杀主，专君位，大臣乘枢。不救之则兵至宫殿战。

《史记》曰：邹阳上书曰：荆轲慕燕丹之义，白虹贯日，太子畏之。应邵曰：燕太子丹秦始皇遇之无礼，丹亡去，故厚养荆轲，令刺秦王，积诚感天，白虹为之贯日。《列士传》曰：太子见虹贯日不彻，曰：吾事不成矣。

《后汉书》曰：唐樟永建五年举孝廉，除郎中，时白虹贯日，樟因上便宜三事，陈其咎徵。书奏，弃官去之。

《诗推度灾》曰：挠弱不立，邪臣蔽主，则白虹刺日，为政无常，天下逆。

京房《易传》曰：白虹双出日中，妻以贵娇夫。白虹在日侧，黑蜺裹之，气正直，妻不从正。蜺与日会，妇人擅国。蜺日夺明而火，温温而雨，尊卑不别，列宿虹蜺出。

郗萌曰：虹与日俱出房心间，诸侯王死，期不三年。

甘氏曰：虹出牵牛之度，必有坏城，期二年。

陈卓曰：虹出须女，后族专权，谋杀为害。

《洛书》曰：天无云，有赤蜺绕昴毕，东北角西行，臣主相谋伐。

《洛书摘亡辟》曰：苍云白虹围轸，亡之戒也。

《运斗枢》曰：后族专权，虹贯太微。

## 卷九十九

### 山 崩

《尚书中候》曰：山崩水溃，纳小人。

《运斗枢》曰：山崩者，大夫排主，阳毁失基。

《考异邮》曰：山者君之位也，崩毁者阳失制度，为臣所犯毁。

《春秋纬保乾图》曰：山崩道散。又曰：山崩，修北斗七政之事，辅豪杰除恶之毒。

董仲舒《对灾异》曰：山者阴类，崩者忠贞离叛，臣蔽主之善，使恩泽不流，怒患壅隔，民人乖散之象也。任贤良，使忠贞，以救之。

《地镜》曰：山崩，人君位消政暴，不出三年，有兵夺之。

京房《易传》曰：山崩，阴乘阳，弱胜强，天壁亡。又曰：国山崩，君争政，女戚五年败。又曰：邑山崩，邑有战，主亡或大水。

京房《对灾异》曰：山者三公之位，台辅之德也，乃兴云出雨，漫溉万物，助天成功，今崩去者，此谓大臣怀叛不忠也。

《地镜》曰：山春崩，国有伐城；夏崩，天下有水；国主亡；秋崩，有大兵；冬崩，年中大饥。

京房《易妖占》曰：山以春崩，亡邑有拔城；以秋崩，人主恶之；以夏崩，人主有亡，天下大水；以冬崩，多饥兵兴。又曰：山崩绝，辅臣去。又曰：山以二月崩，其邑战；以八月崩，有兵；以十一月崩，此降民从而行。

《河图秘徵篇》曰：侯恣权则邑土崩。

《春秋经》：鲁僖公十四年，沙麓崩，卜偃曰：将有大咎，几亡国。《谷梁传》曰：林属于山曰麓，沙其名也。《公羊传》曰：沙麓，河上邑也。班固《天文志》曰：沙麓者地，沙山名也，震而麓崩，不书震，举重者也。杜预曰：沙麓，山名也。阳平元城县东有沙麓山。刘向《洪范传》曰：崩者陷而下也。麓在山下平地，臣象阴位也，崩者散落，皆叛不事上之类也。夫山者君之表也，麓者臣之象也，故沙麓崩，臣将叛也。沙麓卑地，无崩颓而崩，其异甚矣。

《春秋》：鲁成公五年，梁山崩。《谷梁传》曰：壅河三日不流，晋君率群臣素服而哭之，河乃流。《左传》曰：晋侯以传召伯宗，伯宗辟重，曰：辟传重人。曰：待我不如捷之速也。问其所，曰：绛人也。问绛事焉，曰：梁山崩，将召伯宗谋之，问将若之何，曰：山有朽坏而崩，可若何？国主山川，故山崩川竭，君为之不举，降服乘缦撤乐出次，祝币史辞以礼焉，其如此而已，虽伯宗若之何。伯宗请见之，不可，遂以告而从之。《洪范传》曰：山者阳之位，君之象也，水者阴之表也，民之类也，崩者坏沮也，壅者不得其所也。天若语曰：人君权威重，将崩坏，不治百姓，将不得其所也。至于以丧礼泣之，缟素哭泣然后流，丧亡之象也。刘歆曰：梁山，晋望也，古者三代命祀，祭不越望，吉凶祸福不是过也。国主山川，山崩川竭，亡之徵也。

汉文帝元年，齐楚之山二十九同日俱大发，水大溃。《洪范传》曰：山者君之象，一曰诸侯位也，水者阴之类，言众盛强沮溃，败君之效也。一曰诸侯沮，俱自坏败也。

《东方朔别传》载汉孝武帝时未央宫前殿钟无故自鸣，三日三夜不止，于是帝召太史待诏方朔问之，曰：恐有兵气。帝更问于东方朔曰：夫铜者土之子，土者铜之母，以阴阳气类言



之，子母相感动，山恐有崩堕者，是以钟先为之鸣。故《易》曰：鸣鹤在阴，其子和之，精之至也。帝曰：应在几日？朔曰：在后五日内。居三日，南郡太守上书，言山崩。丞相以闻，帝曰：善。赐朔帛三十疋。

《考异邮》曰：山之亡，主沉溺。

### 山移动 山亡 山鸣 山出光 山石生血

《地镜》曰：山徙是谓德重，直臣去，佞人用，政在女主，不出五年，有走王。又曰：山无故自徙，天下兵，社稷亡。又曰：山徙是谓非分，不出三年，四方兵起。又曰：山石忽自动，及相拘累，及大小移转，或湿或血，为天下兵乱。

《地镜》曰：山无故亡，人君失位。

《地镜》曰：山无故昼夜有声如哭，天下兵丧。

《春秋潜潭巴》曰：山有长光，臣下不良。

《地镜》曰：山有长光，臣不祥。

《地镜》曰：石忽生赤如血，诸侯不助，时父子绝。

### 山石变化 石生水中

《地镜》曰：山中见异类物，非人所常见者，各有形名音声，皆为其邑大水，或饥，兵革行，邑亡。又曰：山忽化为人形，及六畜飞鸟形，皆天下虚。又曰：石化为人，君绝祠。又曰：石如人形，庶雄持政；如禽形，诸侯兴兵诛行；形如飞鸟，外戚女主近臣谋反。又曰：山忽生于石上，邑出主。石生正方，三公外谋，不出三年，逆兵起。又曰：石生重累，不出五年，相谋逆且成。又曰：石生往往如聚，不出五年，兵谋行。

《地镜》曰：石生水中上见者，近相谋逆，与女主连，不出八年兵行。

石生庙邑 豕自声音 豕自移并陷与豕树自死

《地镜》曰：石生于都邑，人君去故就新，不出三年易政。又曰：石生于宗庙中，人君不行先王法度，不出三年易主。又曰：石生而陨坠，雄烈败。

《地镜》曰：豕自音声，天下大兵起。

《地镜》曰：豕自动，天下分破。又曰：豕自陷，天下移。又曰：豕树自死，天下易主。

### 光

《河图》曰：圣人起，昌光见。

《汉书郊祀志》曰：武帝封禅，夜有光，昼有白云起封中。

《元命苞》曰：有瑶光贯月，感女枢生颡项，女枢见此而意感也。

《河图》曰：瑶光如虹贯月，正白感女枢，出房之宫，生帝颡项。

《汉武帝禅仪》曰：天封之禅，昼有白气，夜有赤光。

《汉书郊祀志》曰：武帝幸汾阴，汾阴男子公孙傍洋等见汾阴傍有光如绛，上遂立后土祠于汾阴。又郊太一祠，上有光，封禅太山，其夜有光。又曰：宣帝祀世宗庙，神光兴于殿旁，神光又兴于房中，如烛状。广川国世宗庙殿上有钟音，房大开，夜有光，殿上昼明。

《东观汉记》曰：安帝私在郡第，数有神光照耀室内。又曰：李轶等语讖曰：言刘氏当复起，李氏为辅，遂市兵弩绛衣赤帻，归旧庐，望见庐南有若火光，以为人，持火呼之，光遂炽，瞳瞳吓然，上属天，有顷不见，异之。

张勃《吴录》曰：武烈皇帝姓孙氏名坚，字文台，吴郡富

春人。汉季世墓上数有光，云五色上烛天。

《天源记》曰：武王吕光子世明王以石氏建武四年夜有光曜，举舍异之，名曰光。

《异苑》曰：孙坚丧父，行葬地，忽有一人曰：君欲为百世诸侯，欲为四世帝乎？曰：欲为帝。此人因揭一处而没。既葬，冢上常有怪。

《抱朴子》曰：有赤光如火，从天来下人，军乱将死。

郗萌曰：有光如日月，见虚，为男子之祥。又曰：有光如蛟龙，见宫室，为女子之祥。

《后秦记》曰：姚襄将与苻广眉战，谓将军王钦庐曰：吾数行，常有异光引吾前，状如导軀，数日忽复不见，意恶之，此何祥也？钦庐不对，即与眉战死于陈。

## 卷一百

### 醴泉 河出

《瑞应图》曰：醴泉者，水之精也。王者得地理则出，有仙人以爵酌之。

《运斗枢》曰：旋星得则醴泉出。

《地镜》曰：河徙是谓阴反，不出五年，有叛臣，兵行，民流亡。河徙一里至三里，是谓失政，且有谋臣；河徙至五里十里，女主执政，外戚有背叛。河徙十里已上，人君失道，政在下臣。流水忽易道，君易贤。

### 水涌溢及竭

《地镜》曰：河盈溢，不出三年，国有忧。水忽自盈起，君凶，且大水。

《运斗枢》曰：帝壮而夺势，水决坏山。注云：壮年健时见夺势，故水决坏山，言阴奸行，君危也。

《汉书》曰：武帝建始二年，北宫井水溢出，王莽之徵也。水流庭，霍氏遂乱。

王隐《晋书》曰：大兴元年，河水竭断百余步，两头深浅如故，中绝不流。

《后魏书》曰：前废帝普大元年，司徒府大仓前井并溢，占曰：民迁流之象。永熙三年十月，都迁于鄴地。

《地镜》曰：井水流出地，若理绝者，臣骄猾，兵方起。

京房《易候》曰：涌水无处，必流杀人，七日七年，圣人威。

晋《中兴徵书祥说》曰：咸安九年，涛水入石头，杀人，俄而海西公废。大元十三年十二月戊子，涛水入石头，毁大船，沈杀人。己亥，江水涌起，建康秣陵江淹没杀人，阴旺之应也。

崔鸿《十六国春秋北燕录》曰：龙城东沟竭涸积年，夏四月，沟中坟起有声，俄而泉涌出。闵尚曰：沟中坟起，所谓深谷为陵；泉涌出，所谓百川沸腾，阴旺之所致也。国及家井自沸溢，君将亡覆之，期三十日。水忽自竭，邑虚不吉。都邑中水无故自绝及易处者，邑人徙亡。

## 河 壅

《地镜》曰：河大壅，下臣執政，或主大水色变，不出六年，易王，女主亡。

《汉书五行志》曰：水北方终藏万物者也，其于人道，命终而形藏，精神放越，圣人为宗庙以收魂气，春秋祭祀以终孝道，若不敬鬼神，政令逆，则水失其性，百川逆溢，坏县乡邑，溺人民，及淫雨伤稼，是水不润下。

《尚书大传》曰：简宗庙，不祷祠，废祭祀，逆天时，则水不润下。

《潜潭巴》曰：河水逆流，怨气甚。

《地镜》曰：水逆流，是谓道逆，不出二年，兵从女主起。

《国语》曰：灵王二十年，谷洛二水斗，毁王宫。又曰：水忽不流，妇人惑政乱令废，不出五年亡国。水一年不流，有反臣。

汉《五行志》曰：谷洛斗，刘向以谓近火沴水，以传推之。四渎比诸侯，洛其次卿大夫象，卿大夫将分争以危王室也。

《地镜》曰：流水忽停，天下饥，停水流，天下兵。

《续汉书》曰：桓帝永兴二年，彭城泗水增长逆流，永寿元年六月，雒水溢至津城门，流物。是时皇后兄冀秉政，疾忠直，后遂诛灭。

## 水 赤

京房《易候》曰：宫水化为血七月，七年圣人灭。

《古今注》曰：安帝延平六年，河东水化为血。

《异苑》曰：勃勃虏都长安端门外井，人常宿汲，停水壅中，夜砰磕有声，视水如血，中有丹鱼，长三尺而有赤光，国寻灭。

京房《易候》曰：水自赤光如血，其国有流血。

《地镜》曰：水赤如血，邑有流血。

《晋朝杂事》曰：元康六年，彭城泗水赤如血。

京氏《对灾异》曰：河水赤者，狱有冤恨，诛杀不当，则致河水赤也，其救也，正狱刑，解疑罪。

京房《易传》曰：君溺于酒，淫于色，贤人潜，国家危，厥异流水赤。

汉《五行志》曰：秦武王三年，渭水赤。

《汉书》曰：广陵王胥宫中池水变，鱼死，王为事诛。

《后魏书》曰：太祖登国中，河南有虎七卧于河侧，三日及去。后一年，蚺蜍白鹿尽渡河北。后一年，河水赤如血。此卫辰灭亡之应，及诛其族类，悉投之河，其地遂空。

《地镜》曰：井水赤，邑虚，相攻主亡。

### 水黄浊 水清 水无鱼 水自臭

《地镜》曰：君井若黄浊，政令不明。清水忽自浊，天下将死。国及家井浊，皆君主将亡覆之，期三十日。《易乾凿度》曰：孔子曰：天之将降喜应，河水清三日，清变白，白变赤，赤变黑，黑变黄，各三日，河水安，天下乃清。

《续汉书》曰：延熹九年，济阴东郡济北平原河水清，襄楷上言：河者诸侯之象，清者阳明之徵，岂诸侯有窥京都计邪？其明年，桓帝晏驾，征解渎亭侯为汉嗣，是为孝灵皇帝。

《地镜》曰：泽泉水无鱼，天王无居。

《地镜》曰：国及家井臭，君将亡覆之，期三十日。

《吴志》曰：诸葛恪将诛，盥漱闻水腥臭，侍者授衣，衣服亦自天，恪怪其故，易衣易水，其臭如初。

### 水出高山 水出朝市 水沸

《礼记威仪》曰：君乘土而王，其政太平，则蒙水出于山。

京房《易候》曰：水无故高山上出，邑亡起兵。

《地镜》曰：山石崖有水出，主有谋不成。水忽自出山上，兵且作。

《地镜》曰：水忽出于朝市，兵且作。

京房《易候》曰：水无故市中出，邑兵大作。

《地镜》曰：君井涌沸，宗庙失堕。

单子曰：夏桀德衰，岱山泉沸。

京房《易候》曰：泉水沸，此谓贱人将贵。王者不顾骨肉，不亲九族，厥德已，泉涌沸。

京房《对灾异》曰：江河沸者，有声无实，此为执政者怀奸不公，众邪并聚，则致此灾，不救必有叛君谋其政也。令百官举公直，选有德，置于政。井水沸者，谓人君好用谗邪所致也。

《崖头易林》曰：井水沸，不可安居。

水中火出 水鸣 水出异物 井自出  
井中气出 泽枯 火不炎上

京房《对灾异》曰：水中火出，何所谓？阴气溢，亡阳施也，女妃无阳，则敌气溢至水中，火出不救，有天殃，阴害阳。其救也，正妃妾，率后宫，施命令，诰四方，嫁贞女，赐鰥寡，此灾即消。

《地镜》曰：泽水忽自鸣，百姓哀；若作金声，土地分裂。国及家井有音声，皆君主将亡覆之，期三十日。

《地镜》曰：凡水中忽见异物，皆为大旱。

《瑞应图》曰：井不凿自成，王者清净则出流，有仙人至之徵。

《地镜》曰：井中气直上叩天，而王走民间，国大衰，损兵起。

京房曰：泽枯岁贫，国易臣，不出三年各辞。

《尚书大传》曰：弃法律，逐功臣，杀冢子，妾为妻，则火不炎上。君上行此四者，为天南官之政官，于地为火无故燔灼为害，是不上。

汉《五行志》曰：谗夫昌，邪胜正，则火失其性，宗庙宫

馆灾，是火不炎上也

## 火 无 烟

《南燕录》曰：慕容超大正五年，南郊柴燎焰起而烟不出，灵台张光令私于中书侍郎王景晖曰：烟者国之种，今火旺烟灭，国其亡乎！

## 卷一百一

## 霜 占

《元命包》曰：阴阳凝为霜。

《易坤卦》曰：初六，履霜，坚冰至。象曰：履霜坚冰，阴始凝也，驯致其道，至坚冰也。

《礼记月令》曰：季秋之月，霜始降，百工休，孟冬行秋令，则雪霜不时。

《考异邮》曰：霜者阴精，冬令也，四时相代，以霜收杀，霜之为言亡也，物以终也。

曾子曰：阴气胜，凝为霜。

《地镜》曰：视屋上瓦独无霜者，其下有宝藏。

《援神契》曰：霜挫物。

京房曰：凡候霜下早晚，若正月一日雷，知七月一日霜下；若二月一日雷，即知八月一日霜下。又曰：霜者刑罚行也，霜者所以成万物也，刑罚者所以诛恶人者也，刑一以惩十，杀一以全万。非圣君居位，则刑罚妄行，诛杀不当，故天应以殒霜于春于夏。臣依公结私，诛杀无罪，霜下。在上却忠臣，依公结私，以缓有罪，霜附木。杀罚不由上，霜见风而飞，此皆刑罚不法之应。又曰：霜下或未见日而欲晞者，此人



君以喜怒行刑罚也。霜或见日而不晞，此人君执法坚不可犯也。霜或天阴不见星而有霜者，此臣下擅行诛罚也。兴兵妄诛，厥灾其霜，杀五谷，诛不原情，兹谓不仁。冬先雨，乃殒霜，有芒角，贤圣遭害，其霜附木不下地。

《考异邮》曰：穆公即位，仲夏霜杀草，日不消。僖公即位，殒霜不杀草，梅李实。不杀草者，臣威强；梅李大树，此果为实，是君不能伐也。定公即位，殒霜杀菽。菽者稼最强，季氏之萌也。

《天镜》曰：霜非时而杀草，是时而不杀，并为虫蝗，是谓大饥。春陨霜，杀草木，是谓阴隆，臣强君弱，下不事上。

京房曰：春下霜七日，七年圣人灭。

《春秋命历序》曰：桀无道，夏陨霜。

《师旷占》曰：春夏一日有霜云者，君父治政大严大苦大杀，天以示之。何以言之？霜威杀万草，坐大杀也。见变如此，宜损威杀，重人命。

京氏曰：夏霜，君死国亡。霜下或无芒者，此人君行刑罚而哀恕其人也。霜下或无芒者，此人君观过刺不深也。芒或旁指者，此人君旁言而刑人也。霜下或芒严者，此人君刺过深克者。芒或向下者，或如露微者，此人君尽欲加法一姓服属也。霜下或同类之物或不死，此人君知人有罚同，独有所缓不诛。有以平法诛者，霜下或翩翩状如雪者，此人君知人有罪，不以为意也，亦不出于徕牢也。霜或止于树头而不下地者，此下请决罪而上不下也。霜下或有泽于物者，此人君欲杀直而下却之也。霜下昼夜不明而陨霜者，皆君臣诛或心疑而径行之，霜亦随之于春。霜下或重，其日温者，此行诛或依法深浅，故其日温也。霜不下而物自以寒死者，此邪臣执法周密，众人不知，物不得霜而死也。夜雨雪且为霜，为人君率臣重以为严也。

## 雪

《元命包》曰：阴阳凝为雪。

《汜胜书》曰：雪者五谷之精。

曾子曰：阴气胜则凝为雪。

《穆天子传》曰：雪盈数尺，年丰。

《八节占》曰：冬有积雪，岁美人和。又曰：冬祁寒，降雪盈尺，年丰岁稔之候。

董仲舒曰：太平之世，雪不封条，凌弥毒害而已。

《考异邮》曰：庚辰大雪，深七尺，并者丈四尺。

京房曰：雪附木者，此人君听言杀忠臣也。雪未至地而复上，久而复下，此人君欲宽死罪。雪而温者，此人君脱有罪。凡雪者，阴气盛也，小人系公结私，以胁其主而专其权，二月九月而不已，此执法权正引邪以成贼理，故雪厚为旱，薄则为冰，皆一百九十二日。

《天镜》曰：春雨雪不消，妻党专政，擅持君威，天下饥，民死亡。

《易通卦验》曰：乾得坎之寒，则夏雨雪。

《天镜》曰：夏雨雪，必有大丧，天下兵起。

《诗推度灾》曰：违天地，绝人伦，则夏雨雪。

《晋朝杂事》曰：大康七年，河阴雨赤雪二顷。

京房《易候》曰：夏雨雪，国殃，必有丧，司马为乱。又曰：君死国亡。

《天镜》曰：秋雨雪，百姓多死，草木零落，天下大丧。雪下厚三尺以上，大兵方起。

## 雹

《考异邮》曰：阴阳专精，凝合生雹，雹之言合也。

董仲舒曰：雹者，阴气胁阳也。

京房曰：凡雹过大，人君恶间其过也，抑贤不与共位，小人取利布币，私施所爱人，专施不普，当雨不雨，天反下雹，人有衅则严威集，人欲惑其君，故雹伤生。雹或杀飞鸟者，此人君信谗佞之言，行谪罚于庶人。

《月令》曰：仲夏行冬令，则雹冻伤谷。

《感精符》曰：大臣擅法则雨雹。

京房曰：雹下或毁瓦，碎破车，杀马牛者，此人君任小人，伐其人。雹下尽剥树木之枝，又害五谷者，此人君赋敛酷民有杀者。雹下或多状如积雪者，此臣欲弑君也。雹下或尽败人禾稼者，此人君因春夏庶人有罪执杀之。雹下或霜俱降者，此人君私邪人从后过而诛之。雹下或多状如积雪者，此臣欲弑君也。雹下极地而晡者，此人君私施邪人而下成之。雹下或状如积冰者，此臣欲杀人君。雹下或多芒状如雪者，此人君欲害人而甚者。雹下或如梨实者，此人君大乱庶人而恶甚者。雹下或与风俱降者，此人君施大乱，其寒过度罚深。雹下或状如珠者，此人君欲害人而甚也。

《汉书五行志》曰：大雨雹，常寒之罚。武帝元封三年十二月，雨雹大如马头，宣帝地节四年，山阳济阴雨雹如鸡子，深二尺五寸，杀二十余人，皆霍氏诛戮也。

《续汉书五行志》曰：孝安永初三年，雨雹大如雁子，伤稼，是时邓太后专阳政。

晋《中兴书》曰：太和三年四月，雨雹，是时海西昏乱，相龙朱实等淫逆。大元二十一年四月雨雹，是时王道子辅政，奸佞竞进，烈宗不能禁绝，王室大乱。

《天镜》曰：夏雨雹民饥。

## 冰

《地镜》曰：水以春冰，有兵，其岁不成。水夏冰，胡兵将起，人民无病而死，大饥，民流。秋冰，下臣忧，大兵起。

《左传》：成公十六年春正月，雨木冰，寒过节，冰著树也。

《谷梁传》曰：阴阳失度，时寒过节，雨而木冰，志异也，根枝折。

《墨子》曰：三苗大乱，天命殛之，夏冰。

京房曰：夏水冰冻者，国君有疾病，民流亡，五谷不成，人民饿。

《说苑》曰：秦始皇即位，夏冻。

《地镜》曰：水三月至八月忽有冰者，大兵丧。

《汉书五行志》曰：刘歆云：阳强不下通，阴弛不上达，故雨而木为冰。木曲直也，刘向以为冰阴之隆，木少阳，贵臣象，此人将有害，则阴气胁木。叔孙乔如出奔，公子偃诛死，公见执辱之异也。或曰长老名木冰为木介，介，甲兵象也。

晋《中兴书》曰：大兴三年二月，雨木冰，其后有王敦之难。

京房《易候》曰：夏而冻，其乡有流亡。

《地镜》曰：水冬不冰，易王或饥兵。

## 寒

京房曰：有德遭险，兹谓逆命，厥异寒。

《洪范五行传》曰：听之不聪，是谓不谋，厥罚恒寒。

晋《中兴书》曰：大兴四年冬，大寒，民冻死。是时王敦肆乱，而天子不能禁，任意专杀，戮及忠良。

京房《易候》曰：夏有遗冬，人民行诉。夏而大寒，其国

有急。冬而不冻泽，其乡有疾疫。冬至后十日不冻者，人君不行刑不严。一曰缓死罪不诛。

## 雾

《元命包》曰：阴阳乱为雾。

《庄子》曰：腾水上溢，故为雾。

《尔雅》曰：地气发，天不应曰雾。

董仲舒曰：太平之世，雾不塞望。

东方朔曰：凡雾气不顺四时，逆相交错，微风小雨，为阴阳气乱之象，从寅至辰巳上周而复始为逆者，不成积日不解，昼夜昏暗，天下欲分离。

京房《易候》曰：甲乙有雾，疾疫；丙丁有雾，旱；戊己有雾，邻国有城拔，无军有土功事；庚辛有雾，兵；壬癸有雾，为水。冬雾及其门，日悬而雾，马驰人起。不雨雾曰兵所走。

《帝王世纪》曰：黄帝五十年秋七月庚申，天大雾，三日三夜雾除，帝游洛水之上，见大鱼负图书，命河图，帝视萌篇是也。

《河图》曰：山冬大雾，十日以上不除者，山崩之候也。山，水脉也。

郗萌曰：凡雾四合，有虹各见其方，随四时凶气青黄更相掩。

《运斗枢》曰：四独雾下，天下冤。

《晋书天文志》曰：昼雾夜明，臣志得伸。

《孝经洞宝册》曰：世无道，皇不用孝，法去兵经，五雾并起，苍苍郁郁淫淫，蔽四方。

《天镜》曰：天雨雾如黄土，百姓劳苦，奔亡不安，名曰黄雾。

《汉书元后传》曰：成帝时，王大弟封侯，其夏黄雾四塞终日。

晋《中兴书》曰：大宁元年，黄雾四塞，王敦之应。咸和元年，大雾，步武不相见，会稽王道子专政之应也。

《陆机别传》曰：机被诛日，大风折木，天地雾合。

《兵书》曰：白雾四面围城，必有兵到城下，不出其日。

《史记》曰：上至平城，匈奴围王七日，大雾，汉使人来往，胡不觉。

《抱朴子》曰：白雾四面围城，不出百日，大兵至城下。

《黄帝》曰：雾者百邪之气，阴来冒阳，奸臣擅君权立威。

《荆州占》曰：昼雾夜明，臣志得伸；夜雾昼明，臣志不伸。雾终日终时，君有忧，色黄小雨。

郝萌曰：雾从夜半至日中不解，遂上为雾，君不悟，行邪政于百姓。过日中而似雨，强气所避。

《河图》曰：雾乍散，臣欲谋君，为逆者不成，自亡。

《荆州占》曰：凡雾气四方俱起，百步不见人，名曰昏，不有破国，必有灭门。

甘氏曰：雾秋以庚申辛酉日，气色白，东行为利客，先举兵者胜，后举兵者败。

巫咸曰：雾夏以丙丁巳午日赤黄气西行，为利客，主人凶。

《海中占》曰：雾冬以壬癸亥子日气青黑色南行，兴军动众。

## 露

《元命包》曰：阴阳散为露。

曾子曰：阳胜则散为露。

蔡氏《月令》曰：露者阴液也，晡为露。

《论衡》曰：露，秋气所生也。

《易通卦验》曰：立秋白露下。

《元命包》曰：露以润草。

《运斗枢》曰：天枢得则甘露浊。

《五经通义》曰：和气津凝，为露从地出。

《礼运》曰：圣王所以为而弗悖也，天降甘露，地出醴泉。

《命历序》曰：桀纣无道，露冬下。

《吕氏春秋》伊尹说汤曰：水之美者，三危之露，和之美者，雩揭之露，其色紫。

《地镜》曰：图视山川，多露无霜者，其下有美玉。

《瑞应图》云：耆老得敬，则柏受甘露；尊贤爱老，不失细微，则竹苇受甘露。

### 霾 曠

《尔雅》曰：风而雨土为霾。

郝萌曰：凡天地四方昏濛若下尘，十五日以上，或一月，或一时，雨不沾衣而有土，名曰霾。故曰天地霾，君臣乖，若不大旱外人来。

《尔雅》曰：阴而风为曠。

《说文》曰：曠，天地阴沉也。

《纪年》曰：帝辛受时，周大曠。周昭王十九年，天大曠，雉兔皆震。惠成王元年，昼晦。十六年，邯鄲四曠，室多坏，民多死。

### 霰

《说文》曰：霰，积雪也，从雨散声。

《释名》曰：霰，星也，水雪相转，如星而霰。

曾子曰：阴之专气为霰。

《尔雅》曰：霰为消雪。郭璞注云：霰，水雪杂下，故为消雪也。

《毛诗》曰：如彼雨雪，先集维霰。注云：霰，暴雪也。或云：雪上遇温气而转之，霰也。

## 霁

《说文》曰：霁者，雨止也，云罢貌。

晋《中兴徵祥说》曰：咸和四年，阴霖五十余日，苏峻灭，后乃霁。

《魏略五行志》曰：延康元年，大霖雨，五十余日，魏有天下，乃霁。将受大祚之应也。

## 濛

《释名》曰：濛，日不明。濛，蒙蒙然也。

京房曰：臣私禄及亲，兹谓罔辟厥异，濛行。善不请于上，兹谓祚福，濛一日五起五解。辟不谋臣，臣辟异道，上濛下雾，立嗣子疑，兹谓动欲濛，赤日不明。利邪以食，兹谓闭上，濛大起，日不见，若雨不雨，十二日解。禄生于下，兹谓诬君，濛微而小雨，已乃大雨。下相攘善，兹谓盗明，濛黄浊。下陈功于上，兹谓不知，濛微而赤风鸣条，夜复濛不解。

《春秋潜潭巴》曰：大濛三十日，群猾起。

《抱朴子》曰：若濛气围城，或入于城，则外兵得入。若濛气从内出，主人出战。

《尚书中候》曰：桀无道，地吐黄，黄是濛也。

《礼记月令》曰：仲冬行夏令，气濛冥冥。

《演孔图》曰：猾待期则赤濛沾冠。

《黄帝占》曰：凡连阴十日，昼不见日，夜不见月，乱风



四起，欲雨而无雨，名曰濛。臣谋君，故曰久阴不雨，臣谋主。

郝萌曰：濛雾者，邪气也，阴未冲阳，奸臣谋君，在天为濛，在人为雾。日月不见为濛，前后人不相见为雾。

《荆州占》曰：夜濛昼明，臣谋政；昼雾夜明，臣得伸志。

## 卷一百二

### 雷

《易说卦》曰：震为雷。动万物者莫疾乎雷。

《河图始开图》曰：阴阳相薄为雷。

《河图帝通纪》曰：雷，天地之鼓也。

《洪范五行传》曰：雷者，诸侯之象也。

《河图》曰：黄帝以雷精起。

《尚书中候》曰：秦穆公出狩，天震大雷，下有火，化为白雀，衔丹书，集公车。

《史记》曰：高祖母刘媪尝息大泽之陂，梦与神遇，时雷霆冥晦，见蛟龙于其上，已而有娠，遂产高祖。

《元命包》曰：阴阳为雷。

京房曰：凡雷者，阴阳合和，震动万物，使各戴其元而起，故雷以动闻百里；或闻七十里，或闻五十里，或闻二十里，各应其德而起，以应人君行之动静。或雨且雷，和气令，雷声或殷殷辘辘，风雨微，皆阴阳和，利稼之雨，象君臣百姓和合也。

《论衡》曰：图画之士图雷之状，累累如连鼓形，又图一人若力士之容，谓之雷公。

京房曰：雷者，月当有效于消息以为主，声闻于人。雷之为政，大壮始，君臣强，从解起。

《风俗通》曰：雷已发声作酱，令人肠中雷鸣，故雷不作酱也。

京房曰：雷起乾宫，人民多疾病；雷起坎宫，国邑多雨；雷起艮宫，禾好泉长，五谷贱；雷起震宫，五谷暴贵，多伤；雷起巽宫，雨霜伤五谷；雷起离宫，夏少水，旱，蝗虫；雷起坤宫，蝗虫害五谷；雷起兑宫，兵起，铜铁贵。雷起水门，流潦滂沱；雷起天门，人不安；雷起石门，蝗虫食，大凶；雷起木门，棺木贵，岁大熟；雷起风门，霜禾伤；雷起金门，铜铁贵；雷起火门，夏旱，蝗虫食；雷起土门，五谷贱，鱼不长；雷起鬼门，人民常暴死。春始雷东方，东方五谷尽熟，人民蕃殖；以夜雷，岁半熟。雷始南方，岁小旱，夜雷大旱，余倍，种不成。雷始西方，谷小熟，有虫；夜雷，六畜病。雷始西方，五谷不熟，有曝骨其野，马牛大病；夜雷，赤地千里，余贵。雷始北方，海水出，百川皆流溢，五谷不成；夜雷，百川皆溢。春不雷而霜，树木以风落，皆为人疾病。春三月甲子己丑戊寅辛卯戊午，有雷霹雳石，其下有兵。春夏甲子丙寅戊子，有雷杀人，有将军在外大战，期不出三十日。夏三月雷电不闻，多疾病，害五谷。夏三月甲子己丑戊寅辛卯，疾风雷，其在城坏军，在外大战。戊子雷，云露变，土易民，以其雷入月深浅日，当一月或当一岁，不出其月，必有亡国死王。庚子雷，必有恶令，期不出三十日，或日有令。庚午日雷，不出其月兵起，甲子雷亦兵矣。春己丑丁丑，夏甲午壬戌己亥丁未，冬甲寅，又曰春戊寅，夏戊申，冬戊子，不雨而雷，雷之所建，有所将流血。戊子雷，雨三日止，其下大战，不雨而雷，外兵必归，不雨而雷，兵起必阻。王者动事不时，正月大雷；动事不明，但雷而不电，当雷不雷，太阳弱，此君弱臣

强，臣夺君政，故春分之后雷不发声，君当扬威武，退强臣，正治道，当发声矣。人神德隆，雷鸣盛春。秋分雷，春分不雷，秋分不雷，春分雷，春过一日，秋亦过一日。春雷不发，秋雷不藏，君死国亡，冬雷上朔，皆为所当之乡骸骨盈野，夜雷亦然。冬雷者，阳气之盛应之，各以雷之日知何方，鸣东方，各以其辰为方。冬三月，有大雷闻千里者，人君绝令，霹雳者以兵去，温者以弱去矣。天冬雷，地必震。教令挠则冬雷，民饥。冬雷不蛰，兹谓自藏，万物化不成。

《天官书》云：无云而雷，是谓天狗，所当之国必有甲兵，王国偏虚。冬雷而星下，胡蛮之王死，中野不雷而星下，其国兵起。又曰：冬雷而星不下，当日之国王死其所。冬雷屈折，不及三年有兵丧，有更政。天无云而雷者，此君无恩泽于百姓，国将易君，万人不静，小人失命。雷声掩掩，状如欲息，雨疏无风，此人君深念忧百姓。又曰：雷或一声而止，此人君出令重也。雷而不雨，此人君欲动其事，无补于百姓，有风令行，无风令不行。雷风雨霹雳丘陵者，逆先人之令。雷或霹雳大风其雨，发屋折木，此皆小人处位，贤士隐。雷雨水大风霹雳，此皆人君用谗言，刑杀正人。上下不和，岁少雷。雷不雨者，有声无实也，士走。霹雳，破害也。贤人兴道，雷止其处，不然夜半雷，一闻其声。若电无雷，皆为人君绝令，一名枉矢。雷或霆，此人君动令，下不蔽欺明君。雷蛟龙出，国有贤士正言不诎者，阴中阴也。雷之发声，于坎多水，于艮山崩，于震多风，于巽必大风起，于离大旱，于坤土功，于兑兵起，于乾天象。雷声或格格，雨下籍籍，此人君施百姓侮之。雷声深辘辘，状如欲伏，雨疏无风者，此人君深忧念百姓。入震卦雷，一闻声后不复闻，若有无电雷，皆为人君绝令，亦名枉矢。雷如聚火而徙，此人君且绝之象。雷电皆生火，有所击极，阴生阳也。雷或霹雳无风雨者，此皆刚柔不均，激气并

作，此君臣相忿争，恶令暴出。雷或霹雳甚大，风雨俱至者，此皆乱令大作，以动百姓。雷声或在南，或在北，或在西，或在东，此人君为政不知所去就也。先雷后雨，不湿土；先雨后雷，屋舍崩溃。

《师旷占》曰：春雷始起，其音柏柏格格，霹雳者，谓雄雷旱气也，其鸣依依音音不大，霹雳者，谓雌雷水气也。春不雨，有雷音在地中，其所有兵起其下。

《礼记月令》曰：春日夜分，雷乃发声，有不戒其容止者，生子不备，必有凶灾。

《天镜》曰：冬震兵饥。

晋《中兴书》曰：升平二年十一月雷，是时皇太后临朝，政舒缓。

《洪范五行传》曰：秦二世元年，无云而雷。雷阳也，云阴也，有云然后有雷，有臣然后有君也。无云而雷，示君独处无人民也。

《河图》曰：臣僭大者不犯主，则雷电击朝。

京氏《五星占》曰：人君承用节度，即雷风以节，暴行威福，则雷霆击人。其救也，议狱缓死，则灾消矣。

京氏《对灾异》曰：雷鸣连而不绝者，此谓人君政事，民不恐惧。

又曰：雷电俱出，或先鸣而后电者，此谓执法贪苛。

### 霹 雳 占

《春秋繁露》曰：霹雳者，金气也，其音商，故应以霹雳。

《说文》曰：震，霹雳振物也。

《释名》曰：霹雳，折也，所历皆破折；震，战也，所击辄破，若攻战也。

《范子计然》曰：天者变化行精气者也，令者谓暴风雨霹雳也。

《晋朝杂事》曰：元康七年，霹雳破城南高祿石。高祿，中宫求子像也。贾后妒忌，将杀怀愍，天怒，霹雳之，贾后将诛应也。

《搜神记》曰：扶风杨道和，夏于田中，值天雷雨，止桑树下，霹雳击之。道和以锄格，折其左股，遂落地，不得去，赤如丹，目如镜，手如牛角，长三尺余，状如六畜，头似猕猴。

《续搜神记》曰：吴兴人章狗者，五月中于田中耕，以饭萝置菰里，晚饥求食，而饭已尽，如此非一日。后于菰中伺之，见一大蛇偷食其饭，狗即以镬刈之，蛇便走去。狗乘船逐之，至一坂，有穴，蛇便入穴，但闻啼哭，人云：斫某甲或云当何如？或言符雷公命霹雳杀奴。须臾云雨四合，震电伤狗，狗于是跳梁大骂云：天公，我贫穷，展力耕垦，蛇来偷食我饭，罪应在蛇，反更来霹雳，许是无知，雷公若来，今当以镬斫汝腹破。须臾云雨辄开，乃更还霹雳向穴，诸蛇死者数十。

《天镜》曰：雷霆击宫庭中，大夫欲逆，不出五年，交兵流血。

《合诚图》曰：霹雳击于殿，女宫急。

《潜潭巴》曰：霹雳击宫室，君情泄，下有谋起。

《天镜》曰：雷霆击宗庙，是谓天戒人君暴云，不出八年，削地夺国。

《春秋繁露》曰：王言下不从革，而秋多霹雳。

《天镜》曰：雷电击贵人从官车骑，此乃人君惑于佞人，失众和。

《汉献帝纪》曰：初平二年，无云而霹雳杀人。

《天镜》曰：雷霆击贵人正殿，此谓重阳之戒，此佞人持

政，不出六年，地削君亡。

晋《中兴书》曰：元兴三年秋，永安王皇后自巴陵将设威仪入宫，天大雷，震人马，一时俱栗。

《续晋阳秋》曰：大兴元年，震含章殿四柱，杀内侍二人。

## 电

《河图》曰：激阳为电。

《易稽览图》曰：阴阳和合，其电耀耀也，其光长。

《元命包》曰：阴阳激为电。

《河图》曰：大电绕福星，照郊野，感符宝而生黄帝。

《天官书》曰：电者阴阳之动也。

《庄子》曰：阴气伏于黄泉，阳气上通于天，阴阳交争，故为电。

《释名》曰：电，殄也，乍见则殄威也。

京房曰：电生火，有所击，极阴生阳之象。

董仲舒曰：太平世，电不眴目，霰示光耀而已。

## 霆

京房曰：凡霆者，金余气也。金者内镜而外冥，人君即位，乃先敬让，而内尚贼心，阴行众物，举事发微，自以为明，虚言妄据，深依以考，凡事亦自以为能矣，故无云而霆。霆或为火者，此人君以暴罚也。霆或聚火者，光起而从，此人君将众之象也。霆或中天而见，此人君自以为明也。霆或将如交蛇，光明之而一正者，此人君行明行直。霆或正赤，下至地而复上者，此人君听谗言也。霆或东西南北皆有霆者，此人君行役不避四时。霆或正直而长光明者，此人君行微，不知曲直。霆或正黄泽者，此人君行明，虽得事实，取其中也。或雾

而寔者，此人君默行，不得事实，而乱不息，下将不制。寔瞬瞬晖晖者，此人君质不知自明也。寔或奕奕明之而复息者，此人君讥问内直言之事。寔或无云而以昏数见者，此人君诚以微言而以害人也。一云默言。寔或将如蝶蛇明久而微正者，此人君行不明莫有非也。天阴不雨但为寔者，此人君阴行，欲以来事实也。

## 卷一百三

### 历 法

上元甲子，距今麟德元年甲子岁积二十六万九千八百八十算外；上元甲子，距今大唐开元二年甲寅岁积二十六万九千九百三十算外。章岁三万九千五百七十一，总法一千三百四十。章月四十八万九千四百二十八。半总六百七十。章闰一万四千五百七十六。辰率三百三十五。闰分一千二百一十四。奇八。奇率一十二。历周四十四万三千七十七。旬周六十。月法二十九日余七百一十一。弦法七日余五百一十二。奇九。气法一十五日余二百九十二。奇十。历法二十七日余七百四十三奇一。

推朔端术：置上元甲子距今所求年算，以章月乘为岁，分章岁除为积月，余为闰余，以闰余减岁分为朔分，总除为积日，余为小余。以天正小余减朔分余为总实。求次朔，以月法加求闰余，以闰余加求弦，以弦法各加其朔，得上弦，以次转加望下弦及来月朔。

推入历术：以历周去总实余，以变奇率乘之满变小余，加其余总法除为日，不尽为余，命日算外即所求年天正，恒朔入历日及余。

求次朔及弦望，准前术。满历日及余奇则去之。求夜半入

历，各以其恒小余减。

推中气术：各以闰余加其恒朔小余，即其气节，以气法加。

推加时术：各以六乘其小余辰率，除残，以五乘四百二，除为辰残，又以六乘如前余，为刻分，命时起子半算，即加时所在辰及刻分。

求定气术：冬夏二至即以恒气为定，自外各以气下消息数息减消，加其恒气小余，满若不足进退其日。各得所求。加者为盈气，减者为缩气，定其盈缩所在，故曰定气。

推日中影及消息盈缩定数术。各置其所入气后，气数相减，余以乘所入，如算十五，以各减其数为定。前少加之，前多减之，其求入历定迟速及星者仿此。入气十五算者如十六。

推朔弦望盈缩经辰所入术：各以其日所入盈缩定积，盈加缩减，其恒经辰所入余即各所求。

推朔弦望定迟速术：置所入日迟速数分，后日数相减，余以入历日，余乘以总法，除得以加减迟速数为定。

推定朔弦望术：各以其日迟速盈缩定数，历速减迟，加气盈如缩减，恒小余满若不足，进退其日，命以甲子算外即各所求。

推定月大小术：其定朔日名十干与来月同者，大不同者小月无中气者为闰。若正月交有时正见者，消息前后各一两月以定月，以之大小。今亏在晦二，其弦望亦随事消息，月朔大小若过类三者，观定小余近夜半者，量定其弦望，以五乘定小余，秒法除为刻，即各其辰所入刻数，皆减其晨刻，后刻不满，前刻者从前日注于嗣后。

推土王术：置四季之节，加大余十二，小余二百三十五，即各其气后土干日。

推没日术：气小余一千四百七已上，以九十乘之，又以十五乘小分，从以减没分十二万二千三百五十七，余以没法一千



七百五十七除为日，不尽为余，以日数加气大余，即各气内没日。

推每定气初日夜半日所在度术：各以其定小余减其气日度分，命以宿次，即其夜半日度及分。求次日日加一度，又各以其日躔差率进加退减度分数。

推朔望加时所在度术：各以定小余加其日，夜半日度分即加时所在。

推朔望加时月所在度术：朔加时日所在为合朔，日月同度，加其望日，加时度一百八十二分百三十四四十二。

推朔定日夜半月所在度术：各在其定小余乘所入历日离程，总法而一，为夜半后分以六十七，除为度，余为度分，以减其日加时所在夜及分命，以宿度求次日，各以离程加，若至其朔，即别起其端，不得因前而加之。

推定气日昼夜漏及日出没时：倍其气晨前刻及分，分漏法从刻为日，不见漏以减百刻为日，见漏加日，见漏，五刻为昼漏刻，以昼漏刻减百刻，余为夜时刻，四刻十二分加晨前漏刻，命起于刻，算外即日出晨刻，以日见漏加日出辰刻，以次如前，即日没所在晨刻。以二十五除夜漏，得每更一算之数，以二刻三十六分，加日没晨刻，即甲夜即卯晨。又以更筹数加之，得甲夜一筹数，以次晨满，晨去之，即五更筹所当晨刻及分也。以配二十一前夜漏漏法。

推昏明去中星度术：每日求其昼夜漏刻数，以乘岁实二百，乘总法而除之，得昏去其中星度，以减周天度，余为晨，去中星度，以昏明去中星度，加其晨所在，即各其日中星度数。其梗概粗举者，加其夜半日度，亦各其中，中星宿度。因求次日者，各置其日刻差七十三乘之二百八十八，而一为度差，满十为度，冬至后加，夏至后减，随日加减，各得每日去中度，晨昏所距日在黄道中，星准度以赤道。

历 日	离 程	速 (迟) 数
一日九百八十五	增一百四十四	速初
二日九百七十四	增一百一十七	速一百二十四
三日九百六十二	增九十九	速二百五十一
四日九百四十八	增七十八	速三百五十
五日九百三十三	增五十六	速四百二十八
六日九百一十八	增四十三	速四百八十四
七日九百二	增九	速五百一十七
八日八百八十六	减一十四	速五百二十六
九日八百七十	减三十八	速五百十二
十日八百五十四	减六十二	速四百七十四
十一日八百三十九	减八十五	速四百十二
十二日八百二十六	减百四	速三百二十七
十三日八百一十五	减百二十一	速二百二十三
十四日八百八	初减一百二末增二十九	速一百二
十五日百一十	增一百二十八	迟二十九
十六日八百一十九	增一百十五	迟一百五十七
十七日八百三十三	增九十五	迟二百七十二
十八日八百四十六	增七十四	迟三百六十七
十九日八百六十一	增五十二	迟四百四十一
二十日八百七十七	增二十八	迟四百九十三
二十一日八百九十三	增四	迟五百二十一
二十二日九百九	减二十	迟五百二十五
二十三日九百二十五	减四十四	迟五百五
二十四日九百四十一	减六十八	迟四百六十一
二十五日九百五十	减八十九	迟三百九十三
二十六日九百六十八	减百八	迟三百四
二十七日九百七十九	减百二十五	迟百九十六
二十八日九百八十五	减百三十四初减七十一	迟七十一

二十日气日中影消息数盈缩，晨前刻及分昏去中度定日度及寄，冬十一月一丈二尺七寸五分息初，先盈末三十刻八十二度二分斗十二度。

赤道度：

斗二十六。牛八。女十四。虚十。危十七。室十六。壁九。北方九十八度斗分三百二十八。

奎十六。娄十三。胃十四。昂十一。毕十六。觜二。参九。西方八十度。

井三十三。鬼四。柳十五。星七。张十八。翼十八。轸十八。南方一百一十二度。

角十二。亢九。氏十五。房五。心五。尾十八。箕十一。东方七十五度。

黄道度：

斗二十四及分牛七。女十一。虚十。危十六。室十八。壁十。北斗九十六度。

奎十七。娄十三。胃十五。昂十一。毕十六。觜三。参十。西方八十三度。

井三十。鬼四。柳十四。星七。张十七。翼十九。轸十八。南方一百九度。

角十二。亢十。氏十六。房五。心五。尾十八。箕十。东方七十七度。

终率一千九十三万九千三百一十三。奇率三百。

约终三万六千四百六十四。奇一百一十三。

交中一万八千二百三十二。奇五十六半。

亏朔三千一百六。奇一百八十六。

望实一万九千七百八十五。奇一百五十。

后准一千五百五十三。奇九十三半。

前准一万六千六百七十八。奇二百六十三。

推泛交分术：置总实以终率去之，不足去者奇率乘之，满终率又去之，奇率约之，为天正恒朔夜半入交分，不尽为奇。以天正恒朔小余朔泛交分交加分，即天正恒。

求望泛交分，以望实加之，求以朔者，以亏朔加之，满约终去之。

推朔望定交分术：以六十一乘定迟速数七十，七十七除之，所得为限数，及入气盈缩加减泛交分，为定交分。

推入蚀限术：入交定分，如交中已下为月，在外道交中已上，以交中减之余为月，在内道内外分，如后准已上前准已上者为入蚀限，望则月蚀，朔入限月在里者蚀，入限如后准已下为交后分，前准已上反减交中余为交前分，置前后分，以一百一十二约之，为去交时数。

推日月蚀所在辰术：如求律气应加时法，得加时所去辰月在衡辰蚀，昔非正见者，于日出及日没前十二刻半内。

求月在表朔蚀，准夏至初去交前后二百四十八分为初，准已下加则午正前后七刻内者蚀。又夏至前后每一日损初准二分毕，于前后九十四日各为每日变准，若变已下加时如前者蚀。又以末准六十减初准及变准，余以十八约之为刻准以算，午正前后七刻数百时，准加时去时，准内去交，如末准已下前蚀。又置末准，每一刻加十八为差准，加时刻去午正前后，如差准刻已下去交分，如差准已下者甚蚀。秋分至春分去交，如末准已下加时南方三辰者二蚀。求月在里朔不蚀，准夏至日去交一千三百七十三初为准初，准已上加时午正前后十八刻内或不蚀。又夏至后每一日益初准一分半毕，前后九十四日各为每日变准，以初准减变准，余十而一为刻准，以减午正前后十八刻，余为时准，去交在变准已上加时准内或不蚀。

推月蚀分术：置去交前后定分，冬交前皆去二百二十四，春交后去一百，交前去二百，夏不问前后去五十，秋交后去二

百，交前去一百，不足去蚀。既有蚀者，以减后准一百四而一余半已下为半弱，半已上为半强，命以十五满限，得月蚀之大分。

月在内道蚀，初起东南，蚀甚西南。月在外道蚀，初起东北，食甚西北，十三分已上正东起，皆据正南而言之。

推日食分术：月在内道冬至毕，雨水秋分毕，大雪以五百五十八为差。自入春分已后，日损六分，毕芒种。夏至初日无差。自后日益六分，毕白露。

置去交前后定分，皆以差减，不足减反减差，为不蚀。余小满毕小暑加时午正前后七刻外去不蚀。余一时三刻内即加一时，大寒毕立春交前五时，外大暑毕立秋，立后五时外皆去不蚀。余一时五时内，即加一时，月在外道。冬至初日无差，自后日益六分为毕雨水，自入春毕白露，皆以五百二十二为差。自入秋分已后，日损六分，毕大雪所损为差。以差加去交定分为蚀分，以减后准余为不食分，各置差十五约之以减一百四余为定法。以除不余分得为分余半法，已上为半强，已下为半弱，以减十五余为蚀之大分。月在内道日蚀，初起西南，蚀甚东北。月在外道日蚀，初起西南，食甚东南，十三分已上正西起，亦据正南方而言之也。

推日月蚀亏初及复末时刻术：置朔望蚀大分为率，五已下增二，已上增三，十已上增四，十三分已上增五为蚀。用刻以四乘十除，得减蚀甚刻为亏初，又六乘十而一以加蚀甚刻为复末辰刻。其月蚀甚初末更筹，因其日月所入辰刻及分，依前定气所遇夜刻更筹术，求其初末及其时更筹。

岁星：率五十三万四千四百八十二，奇四十五。

伏分二万四千三十一，奇二十二半。

荧惑：率一百四万五千八十，奇六十。

伏分九万七千九十，奇六十。

填星：率五十万六千六百二十三，奇二十九。

伏分二万四千八百四十一，奇六十四半。

太白：率七十八万二千四百四十九，奇九。

伏分五万六千二百二十四，奇五十四半。

辰星：率一十五万五千二百七十八，奇六十六。

伏分二万六百九十九，奇三十三。

木终日：三百九十八，余一千一百六十二，奇四十五。

火终日：七百七十八，余一千二百二十，奇六十。

土终日：三百七十八，余一百三，奇二十九。

金终日：五百八十三，余一千二百二十九，奇九。

夕见伏二百五十六日，晨见伏三百二十七日。

余奇同终分奇。

水终日：百一十五，余一千一百七十八日，奇六十六。

夕见伏五十二日，晨见伏六十三日。

余奇同终分奇。

推五星平见术：各以伏分减总实余，以其星率去之，余反减率余总法约为日，不尽为余奇，即所求年天正恒朔。夜半后晨夕见，见日算及余奇。天正定朔进退日者，进减加一日为定期，半夜后星斗见日及余奇，其金水二星知得夕平见其满，晨见伏日及余奇者，去之余为晨平见之。命起天正定月大小，去之不满月命日算外，即各所求。

推五星定见术：各置其星平见所入气，计日损益，满半总为日，不满为分，以损益所加减讫，余以加减平见日及分为半，其日消息定数息减消加之，即其定见分。岁星，初见去日起十四度。见入冬至，毕小寒。减六日，已后日损八十七分。春分初日平，已后日加八十五分。立夏毕小满加六日，已后日损十九分。夏至毕立秋加四日，已后日损百七十八分。自白露初日平，已后日减五十三分。小雪毕大雪减六日。

荧惑，初见去日十七度。见人冬至，初日减二十七日，已后日损六十三分。大寒初日平，自后日加四十二分。雨水毕谷雨加二十七日，自入立夏已后，日损一百九十八分。立秋平，自入处暑已后减百九十八分。小雪毕大雪减二十七日。

填星，初见去日十七度。见人冬至，初日。减四日，自后日益八十九分。大寒毕春分减八日，自入清明已后日损五十九分。小暑初依平，自后日加八十九分。白露初日加八日，自后日损七十分。秋分加四日，自后寒露已后，日损五十九分。小雪初日依平。自后日减八十七分。

太白初见，加八日自后日损去日十一度。夕见人冬至，初日依平，自后日减十一分。惊蛰毕春分减九日，自入清明已后日损一十分。芒种依平，自入夏至后日加一百分。处暑毕秋分减九日，自入寒露已后日损一百分。大雪依平，自入大寒已后，日加六十七分。立春毕立夏加三日，自入小满已后日损六十七分。晨见人冬至依平，自入大寒已后日加六十七分。大雪依平，晨见人冬至依平，自入大寒已后日加六十七分。立春毕立夏加三日。自入小满已后日减六十七分。夏至依平，自入小暑已后日减六十七分。立秋毕立冬减三日。自入小雪已后日损六十七分。

辰星，初见去日十七度。夕见冬至，毕清明依平。谷雨毕芒种减二日，夏至毕大暑依平，立秋皆霜降应见不见，其在立秋及霜降二气之内，夕去日十八度外三十六度内，有木火土金星已上者，夕见立冬毕大雪依平，晨见人冬至减四日，小寒毕大寒依平，立春毕启蛰减三日。其在启蛰气内去日度如前晨，无木火土金一星已上者不见。雨水毕立夏应见不见，其在立夏气内去日度如前，有木火金一星已上者亦见。小满毕寒露依平，霜降毕立冬加一日，小雪毕大雪依平。

推星见所在度术。置星定见日夜半日所在宿度算及分，以定见馀加其夜半度分，乃以其星初见去日度数，晨减夕加之，

即星初见辰所在宿度。转求次日夜半星行所至，各以一日所行度及分顺行逆减之，有小分以日率为母，小分满母去从行分一，行分满半总，去从度一，其行有益疾益迟者，副置一日行分，各以其差疾益迟损乃加之，留者因前逆则依减，得每日所至。其五星后顺流退所终日度，各依伏求其去日远近消息，日度之率，以定伏日所在，若注历，其日月及金水等皆弄其分。推平行度分，置定度率，以半总乘有分者从之，以日率除，所得为一日行分。

求差行初日行度分术。置定日率减一，以所差分乘半之为差率，益疾以差率减，益迟以差率加平行分，即初日行分。

岁星：初顺差，先疾日益迟一分。一百一十四日行一十八度，五百九十四分。前留二十六日。旋退差行，先迟益疾二分。四十二日退六度十二分又退，先疾益迟二分。四十二退六度，十二分。后留二十五日。后顺差行，先迟日益疾一分。一百一十四日行一十八度。五百九十四分日尽而夕伏。

荧惑：前日加加减度率加疾率行限减率。前迟日率度率退率度率。后留日率。后疾。日率行限。前留十三，前疾减日率者，以其数分益比留及后迟日益。前疾加日率者，以其数分减比留及后迟日益。后顺迟差行，先迟日益疾二分。六十日行二十五度。前疾加度者，此迟依数减之为定疾，无加度者，此迟入秋分至立冬减三度，入立冬减五度，后留定日缩十三日者，以所缩日数加此迟日率之。

推荧惑平率及变率术：各以其所入气数与后所数减余计日，以加减本率，皆为平率。其后疾变率与前迟缩六十日行二十五度退行六十三日十五度者，以所盈缩日度，盈减缩加之，唯退行度即盈加缩减，其差行者前疾先疾，后疾先迟，各日益迟疾分余，皆平行段疾分日尽而夕伏。

填星初顺差行，先疾日益迟半分。八十三日行七度，二百九十分。前留三十六日，旋退差行，先迟日益疾退半分。五十一日退三度三十分。又退，先疾日益迟退半分。五十一日退三度，三十



分。后留三十六日，后顺差行，先迟日益疾半分。八十三日行七度。二百九十分日尽而夕伏。

太白：夕见疾顺，入冬至毕立夏，入立秋毕大雪。一百七十二日行二百六度，自入小满后十日益一度为定度，初入白露毕春分差行先疾自益迟二分，自余平行。夏至毕小暑一百七十二日，行二百九度，自入大暑已后五日损一度半气尽。启蛰毕芒种七日行七度，自入夏至后五日益一毕于小暑。寒露初日二十三日，行二十三度自后六日损一毕于小暑。顺迟差行，先疾日益迟八分，前疾加度，过二百六度者，唯数损此度。四十二日行十度。夕留七日。夕退西行十日退五度日尽而夕伏。晨见，初退。西行十日退五度，日退半度。晨留七顺迟差行，冬至毕立夏大雪毕气尽。四十二日行三十度，先迟日益疾八分，自入小满已后，率十日损一度，毕芒种。夏至毕寒露四十二日行二十七度差行依前，自入霜降已后，气数益一度，毕于小雪。平行，冬至毕气尽立夏毕气尽。十三日行十三度，自行一度，自入小寒已后六日益日及度，各一毕于启蛰，入小满后，七日损日及度，各一毕立秋。雨水初日二十三日，行二十三度。自后六日损度，各一毕于谷雨。处暑毕寒露无此，平行，自霜降后五日益日及度，各一毕大雪。度行一百七十二日，行二百六前迟行损不满三十度者，此疾依数益之，处暑寒露差行先迟日益疾一分尽余平行日尽而晨伏。

辰星：夕见顺行十二日，行二十一度六分，日行一度五百三分。大暑毕处暑十二日，行一十七度一十分，日行一度二百八十分。平行七日行七度，自入暑后二日损日及度各一入立秋无此平行。顺迟行六日行七度四日行二百二十四分，疾行分一十七度者，无此迟行。夕留五日，日尽而夕伏。晨见，留五日，行二度，四日行二百四分，自入大寒毕行于启蛰，无迟行。顺迟行六日平行，七日行七度，日行一度入大寒已后，二日损日及度，各一入立春无平行。顺疾行十二日行二十一度六日一行度五日三分。前无迟行者，十二

日行一十七度一十分。日行一度二百八十分各日尽而夕伏。

## 卷一百四

### 算 法

臣等谨案：九执历法，梵天所造，五通仙人承习传授，肇自上古百博。又二月春分朔，于时曜躔娄宿道历景止，日中气和，庶物渐荣，一切渐长，动植欢喜，神祇交泰，权兹令节，命为历元，窃稽开设法数，建立章率，述而不作，信而好古，窃简易之智陈，得希夷之妙术，河带山砺，久而逾新，藏往知来，挹而靡竭。尝试言之，盖以其国人多好道，苟非其气，虽曰子弟，终不传也，臣等谨凭天旨，专精钻仰，凡在隐秘，咸得解通，今削除繁冗，开明法要，修仍旧贯，缉缀新经，备列算术，贝标如左，自作口诀，亦题目附本章。

算字法：样一字 二字 三字 四字 五字 六字 七字 八字 九字  
点右天竺算法，用上件九个字乘除，其字皆一举礼而成，凡数至十，进入前位，每位处恒安一点，有间咸记，无由辄错，运算便眼趁须，先及历度。

右天竺度法，三百六十，确符管律，更无奇剩。

推积日及小馀章：闰及甲子算七曜直等在术中。上古积年数太繁广，每因章首，遂便删除，务从简易，用舍随时。今起明庆二年丁巳岁二月一日以为历首，至开元二年甲寅岁，置积年五十七算。甲子五十算。术曰置积年，假令推开元二年甲寅岁事置五十七算为积年，若推向前一年癸丑岁事，即减一算，若推向其年三月五日事，即历后一年乙卯岁事，即加一算，他皆仿此。以十二乘之，加自入年已来所积月。假令推其年三月五日事，即历起二月一日为首，于二乘讫，数上更加一算，即是加入年气经一个月了。加讫重张位

下，以七乘之，恒加一百三十二，以二百二十八除之，得闰月。不尽为闰餘，既未滿闰弃之，以闰月加上位为积月，以三十乘之，加自入月已来所经日。假令推三月五日事，即于三十乘讫，数上更五算，即是加入月所经五日了。重张位下位十一乘之，恒加差四百二十九，一百六十九，以七百三除之，得自入历已来所经小月。其小月梵云欠夜。不尽为小餘。其小梵云小月餘。以小月减上位为积月，其小餘及积日各列为位。又置积日，以六十除，弃之餘，从庚申算上命之，得甲子之次。又置积日，以七除，弃之餘，从荧惑月命得之七曜直日次。一算为荧惑，二算为辰星，三算为岁星，四算为太白，五算为填星，算定为日。其七曜直用事法，别具本占。

推中日章：凡在梵历，大例分积滿六十成一度，其度积滿三十成一相，其相积滿十二乘弃之，他皆仿此。术曰置积日重张位，下位以十二乘，以九百除之，得没度。其没度，中国在历法为没日者是也。不尽十五除之，得没分，恒加差三十分。其分薄六十成一度。以没度减上积日，又每退积日一置为六十分，以没分减之，减餘列为中日分位，其减讫积日以三百六十除之，得自入历已来所经年，弃之假令置积年五十七算还只除得五十七。餘，以三十除之，得相，不尽为度，其相及度与前所列中日分并之，置为日中位。置位皆三重，从戛而列之，其下位列分，其中位列度，其上位列相，他皆仿此。

推中月章：术曰置小餘重张位，下位二十五，餘之得者加上位，加讫以六十除之得度，不尽为分，其度分列为位，又置自入月已来所经日，假令前推积日加自入月五算，推此亦须准前历置止算。以十二除之，以三十除之得相，不尽为度，以其相及度与前所列表度及分并之，又与中日并之，置为中月位。

推高月章：术曰置积日以九除之得度，餘以六十乘之，依前除之，谓亦九除也，得分，其度以三百六十除，弃之餘，以

三十除之得相，不尽为度，其相及度兼分列为位，又置积日，以六十除之得分，其分满六十成一度。以其分并前所列分位，恒加差十八相二十六度四十一分，一相十三度四十五分，置为高月位。

推月藏章：承前或译为月损益率。术曰置中月以高月减之，如不是减于月中相位上更加十二相减之。减讫置为月藏位。

推日藏章：承前或译为日损益率。术曰置中日减二相二十度，如不足减，于中月相位上更加十二相减之也，他皆仿此。减讫置为日藏位。

推定日章：日段六。第一段，三十五。第二段，三十二。第三段，二十七。第四段，二十二。第五段，十三。第六段，五。右一段每管十五度，两段管一相，凡在六段，用管三相。术曰置日藏若相及度位俱定，唯有分者置分，以第一段三十五乘之，以九百除之得分，凡此分满六十成一度。恒视日藏位相定及一二三四五相者，命日殺首，六七八九十及十一相者，命日称首，又凡在梵历，相定是一相法一相是二相法二相是法，他皆仿此。得殺首，即以此度分损中日位，得称首，即以此分益中日位。以度损益度以损益分。如是损益讫，置为定日位。

推定月章：承前或译为月或。月段六。第一段，七十七。第二段，七十一。第三段，六十一。第四段，四十七。第五段，三十。第六段，十。右一段每管十五度，两段管一相，凡在六段，用管三相。

术曰置月藏若相及度位俱定，唯有分者置其分，以第一段七十七乘之，以九百除之得分。凡此分满六十成一度。恒视月藏位，相定段一二三四五相者，命日殺首，六七八九十及十一相者，命日称首。得殺首，即以此度分损中月位，得称首，即以此度分益中月位，如是损益讫，置为定月位。

叙三相已下藏例：日与月并同此法。置减位。若相定位，其度

不满十五，兼有入者，两置其度，以六十乘之，内分在梵历是名通作分也，亦以第一段乘之，以九百除之，得分，其分命用并亦准前。置藏位。若有十五度已上者，置将除并十五度讫，十乘度内分也，他皆仿此。以次第二段乘之，准前除也，他皆仿此。以次第二段乘之，准前除之，凡言准前者，用旧术也，今亦用九百除之，他皆仿此。得分，其分加上位不满六十，成一度，其度及分命用并已准前。置藏位。若有一相十五度已下者，直除去一相讫，即并到第一段，第二段为上位，除通分内，予以次段乘之，自余命用，并亦准前。置藏位。若有一相十五度已上者，直除讫一相，兼十五讫，即并第一段迄，至第三段为之位，自余命用，并亦准前，置藏位。若有二相十五度已下者，有除讫二相讫，而开列第一段迄至第四段为上位自余命用并亦准前。置藏位。若有二相十五度已下者，有除讫二相兼十五度讫，即列第一段迄至第五段为上位，自余命用并亦准前。置藏位。若唯有三相更无度分者，直并三相讫，即并列第一段迄至第六段为上位，自余命用益亦准前。叙三相已上藏例：日与月并用此法。置藏位。如有三四五相者，别置六相以减之，减余相度分至于排段，命用并亦准前。置藏位。如有六七八相者，直并六相，余相度分至于排段，命用并亦准前。置藏位。如有九十及十一相者，别置十二相减之，减余相度分至于排段，命用并亦准前。

推昼刻及夜刻章：梵历昼夜刻共有六十刻，凡一刻即六十分，成都计总有三千六百分，若作一百刻，每一刻得三十六分。刻段三。第一段，一百六十。第二段，一百三十二。第三段，五十四。右一段每管一相，凡在三段，用管三相。至于排段别住受及乘除叙例命用亦同前定日法。术曰置定日，若相空即置其度，通作分，以第一段一百六十乘之，以一千八百除之，得分。其分满六十成一刻。其分一六十除之得刻，不尽为分，恒加三十刻置为夜刻分位，又恒别置六十刻，以所置刻及减之，减余刻及分，置为短刻分位。凡春分后昼渐长，夜渐短，其长刻昼也，短刻夜也。春分段首也，秋分后夜渐长，昼渐短，其长刻夜也，其短刻昼也，秋分

称首也。其长刻及其短刻及分合置为全昼全夜刻位，其全昼全夜刻及分并各半之，置为半昼半夜位。置定日若有一相直弃一相即列第一段，一百六十为上位，餘通作分，以第二段一百二十乘，以一千八百除，自餘命用并亦准前，置定日。若有二相，亦直弃二相，并列第一段第二段，二百九十为上位，餘通作分，以第三段五十四乘之，以一千八百除之，自餘命用并亦准前。

推月域章：承前或译为明量确据，梵音呼为勃夜，其义云月食限也。谓每经一昼一夜，月行吞得度数之量也。泽为域者，亦得刻域之限也，此月域内兼日行，分合在其中。术曰置今日定月，以昨日定月减之，餘通作分，凡置为月域位。又法置七百九十为本位，又取通乘月段，以九乘之，论直弃一位，餘者恒视月藏三四五六七八相者，命曰蟹首，九十一兼相位定及一二相命者，龟首。蟹首益本位，龟首损本位，即是月域。

推日域章：承首译为日法明量，其义日以减却日行分，故标日为前也。日行分法，相位定及一相二相三相，行分五十七，四相行分五十八，五相行分五十九，六相行分六十，七相八相九相行分六十一，十相行分六十，十一相行分五十九。术曰恒视定月相位，以前行分于月域数内。假令相位空，即于月域数内减却行分五十七，他皆仿此。减讫置为日域位。

推宿刻章：宿法于此术中凡是宿平等为八百分，天竺每以月临宿占其日，一即休咎，仍取其宿用事。又唯用二十七宿，命娄为始，去牛，终奎，其牛宿，恒着吉祥之时，不拘诸宿之例，别有占算法。术曰置定月，通作分，谓三十乘内度六十乘度内分，他皆仿此。以八百除之，得已通宿次，餘者是用宿。假令除得为娄二百，胃三百，即是已，过宿次，餘者是所临毕宿用事也。他皆仿此。以六十乘之，以月域除之，得宿刻又来又除。谓亦以六十乘，亦以月域除，他皆仿此。得分置其刻及分为宿刻位。

推宿断章：术曰置半（阙）刻及分，兼全昼刻及分，以宿

刻及分减之，先减夜刻。谓从夜半子时向亥酉至于戌酉而减之。如夜刻尽，余以减昼刻，亦谓从酉向申未等而减之也。如减夜不尽，即直只减夜不减昼也，知夜昼俱尽，人以减往夜刻。谓从卯向寅日等而减之也。如减往夜全刻亦尽，余以减往昼刻。谓从酉向申等而减之也。凡减昼夜刻至所止处，是正著两宿界中央刻时。谓已遇宿位未所临宿之初也。其日时月初临其宿，用是也。以此时名宿断时，置其刻及分为宿断位。

推节刻章：或译为著蚀时，或译为日节，中国名为加时。梵云即切详，意义如竹以节隔其间，今日一昼一夜，其昨日一昼一夜，相分每刻之处，亦如竹节，由是名焉。术曰置定月，以定日减之，如不足减，于定月相位上更加十二相减之。减余通作分，以七百二十除弃之。其弃者是加自入月已来，日若少于本数，名未来节，数若多于本数，名过去节断。余者名为节除，以六十乘，以日域除之，得节刻，不尽又乘又除。凡言又乘又除，皆是依前数乘之，依前数除之，今此以六十乘，以日域除，他皆仿此。得分置其刻及分为节刻位。

推节断章：谓正著蚀时也，亦是往日今日，每两界中央分判检剂节断之处也。术曰置半夜刻及分，兼全昼刻及分，以节刻及分，一如取宿断法，减之至所止刻为节断刻时，谓正著蚀时也。置其刻及分为节断位。

推均分章：承前或译为月度分法，在梵历此术九妙，朔下日月相及度分算三位并均望，即度及分二位均弦，即准只分一位，均推得朔望，均分路日月夹蚀。。根法，置定月，以日定减之，减余有六相者弃，有有相余通作分，名为过去根法。如减余通五相者，别置六相减之，减余作分，名为未来根法。术曰置根法，以六十乘之，以日减除之，如是过去以除得数损之日分，如是未来以除得数益定日分，又以除得数加根法，以六十除之得度，不尽为分，如是过去损定月度分，如是未来益定月度分日月度分均平齐等，即并列之，置为均分位。又法置节刻位，通作分列，为

根法。本曰置根法以定日行分。谓日域术中相法之下所标五十七等是也。乘之，以三千六百除之，得分。其馀损益定日分。其损益法，损之两得均者，即使损之。益之，而得均者即使益之。又置根法，以日域乘之，以三千六百除之得分，其分又以六十除之得度，不尽为分，以其度及分损益定月度分。日若益之，月亦益之。日若损之，月亦损之。如是损益论，置为均分法。俱损俱益，是均分也。一损一益，非均分也。

推阿修章：承前或译为风，或译为蚀神，梵之日呼为罗喉。释氏所云罗喉阿修王，即此臣灵也。又《河图》云：暗虚值月则月蚀，值星则星亡，亦谓此怪灵也。又诸曜则巡宿顺行，其阿修则巡宿，逆转掩蔽日月，以亦交蚀。术曰置积日，以六千七百九十四除之，得为已过遍数，弃之馀，以十二乘之，准前除之，谓亦以六千九百九十四除之也。得相馀，以十二乘之，准前除之得度馀，以六十乘之，准前除之得分列，为前位，又别置五相二十四度四十分，以其前位减之，如不足减，于五相位上更加十二相减之，减讫，馀相度分置为何修位。

叙日月蚀法：凡算蚀者，先置均分及阿修位，从前蚀之后斗至六个月白博义，天竺每月二博义，从月初至十五日白博义，从十六日至月尽为黑博义。其博义译云翅也。十五日，月当交蚀之限，从前蚀后斗至六个月黑博义。月尽日也。日当交蚀之限，月或个月，白博义蚀，或五个月，白博义蚀，或十四日蚀，或十六日蚀，日或七个月蚀，或五个月蚀，或十六日蚀，日或七个月蚀，或五个月蚀。又曰：蚀初亏皆在西方，月蚀初亏皆在东方，蚀既者虽亦带隅，正方之数俱多也。其正方谓东西方也。蚀鲜者虽亦带隅，正方之数小也。又蚀所从方进而亏黑，还于其方，退而放明也。又蚀色初至如烟，于时亦如烟。又蚀不尽，缺处黑，如尽，外赤色，中赤黑色。

推间量府章：日月有蚀无蚀及起亏与隅，并在此术中。置均



分，以阿修减之，如不足减，加十二相于均分相位上减之。记减得殺首，为北行。若得北行，其有日蚀，初起西北，其有月蚀，初起东南。得称首，为南行。若得南行，其有日蚀，初起西南，其有月蚀，初起东北。餘者置为间量府。凡有蚀法减阿修讫餘者，即是间量府也。如十二度已下，月即有蚀，十二度已上，无蚀，凡日蚀法，减阿修讫餘者即是间量府也，凡有日成间，量讫有十二度已上日，即有蚀，十二度已下无蚀。如其加十二相减阿修者，还却置十二相，减讫，蚀者置为间量府，如其减阿修，有六相已上者，置弃六相，餘者置为间量府，如其减阿修讫，有五相已上者，别置六相减之，减讫，餘者置为间量府。

推月间量命：段法。凡一段管三度四十五分，每八段管一相，总有二十四段，用管三相。其段下侧注者，是积段并成三数。第一段，二百二十五。第二段，二百二十四，并四百四十九。第一相。第三段，二百二十二并六百七十一。第四段，一百一十九并八百九十。第五段，二百一十五并一千一百五。第六段，三百一十并一千三百一十五。第七段，二百五并一千五百二十。第八段，一百九十九并一千七百一十九。第九段，一百九十一并一千九百一。第十段，一百八十三并二千九十三。第二相。第十一段，一百七十四并二千二百六十七。第十二段，一百六十四并二千四百三十一。第十三段，一百五十四并二千五百八十五。第十四段，一百四十三并二千七百二十八。第十五段，一百三十一并二千八百五十九。第十六段，一百一十九并二千九百七十八。第十七段，一百六并三千八百四。第十八段，九十三并三千一百七十七。第三相。第十九段，七十九并三千二百五十六。第二十段，六十五并三千三百二十一。第二十一段，五十一并三千五百七十二。第二十二段，三十七并三千四百九。第二十三段，二十二并三千四百二十一。第二十四段，七并三千四百三十八。术曰置间量府，通作分，以二百二十五除之，得者为段，以其段下并数列为上位，假令除得一，其第一段

下无并，即直列二百二十五为上位，如其除得二，即例测注并数四百四十九为上位，如其除得三，例侧注并数六百七十一为上位，他皆仿此。馀以次段乘之，假令除得三侧，侧注并数为上位讫，即以第四段二百一十九乘之，他皆仿此。以二百二十五除之，得者并上位置为间量命。非月蚀用之。推月间量法：术曰置间量命，以四乘之，置为初位，又列置四万三千四十一，以月域除之得者，假令除得五十一，即以五十一除初位。以除初位得度，不尽六十乘之，依前除之得分，置为月间量位。如推日蚀列算日间星法。

推月量法：术曰置月域，以二乘之，以四十九除之，得度，不尽以六十乘之，依前除之，得分，置是月量位。

推阿修量法：术曰置月域，以五乘之，以四十八除之，得度，不尽以六十乘之，依前除之，得分，置为阿修量位。推阿修及月全位半位法：置阿修量与月量并之为全位，又半之为半位，其全位其半位，各列为位。

推蚀经刻法：谓初亏至复满，所经刻度也。术曰置量自相乘，先以度自相乘，列为上位，又以分自相乘，以三上除之，加上位，凡三十分从度者，谓收半已上也。又置半位，亦自相乘亦如收分法为之。置半位相乘讫，数减之，减馀以开方除之，其开方梵音云根法也。得者以六十乘之，又以日域除之，得刻，不尽又乘又除，得分，其刻及分二乘之，谓位分也。置为亏满刻法。又以其数加节断刻上，节断是若初亏时，得此刻通至复满时。

推月规法：此术中备载日月盈亏多少及蚀既深浅等事。术曰置月量，半准其数，或用缙，或用木为规限远作光时坛。又置间量，准其数，或以缙，或以木，从光明坛正中心向蚀方引出，至末际，置为位。又起末际位，据为正中心，置阿修量，半准其数，或用缙，或用木，为规限，远作黑暗坛，据黑暗坛掩著处，以定亏缺多少，蚀既深浅，一如其事。若推日蚀掩规，置月量，半为光明坛，以日成间量府，得作间量者为间量以以

月量，半为黑暗坛，自餘算术并同月规法。

推蚀甚法：谓蚀后更停，经一刻或二刻或半刻方始退蚀放明也。术曰置阿修量半，以月量半减之，餘又以月间量减之，如其减间量尽，为蚀尽，如其减不尽，为蚀不尽，若尽即有蚀甚法，若不尽则无蚀甚法。减餘以六十乘之，以日域除之，得刻，不尽又乘又除，得分其刻及分二乘之。谓倍也。置为蚀甚刻位。

推蚀刻位：谓左右用行数推步蚀隅畔剂并图如左。术曰置间量以九十乘之，以半位除之，得度，置为蚀行法。

### 蚀行法

度	南	度
四	度	四
十	四	十
五	十	五
度	度	度
四	四	四
十	十	十
五	五	五
度	度	度
四	四	四
十	十	十
五	五	五

右先为八方讫，东西正中加一画，各中通，以成十方。诸方各置四十五度，其东西二分头加一中画，便是各半其方，即东西各四半方也。各置二十二度三十分，言蚀从亏者，是从中道北入也，言从南亏者，是从中道南入也。若从东北隅入，月蚀即从东中道北行，以蚀行减方数，尽则蚀初之分。南入法准此。若从西北隅入，日蚀即从西中道北行，以蚀行减方数，尽即蚀初之分。南入法准此。

推日量法：术曰置日行分，谓日减术前所标五十七等数。以六十乘之，以十一除之，得度馀，以六十乘之，依前除得分，置为日量法。

推日蚀法：凡云日蚀，太白从月星伐阿修星，又并日月二为半位，其所用间量之，并以日间为之日蚀，术算亦同月蚀也。术曰置节断刻位，通作分，谓六十乘刻内分也，别置之为刻分位。

推日上星驷法：术曰置定日以半夜刻及全昼刻并之，并訖所行刻以减定日分行，减訖置为日蚀出位。又别置三十度，以日出位度及分减分，其减分法退一度破为六十分而减之。减馀通作分，置为上虚驷。

段法：第一段，一百九十八。第二段，二百三十二。第三段，二百九十。第四段，三百五十一。第五段，二百六十。第六段，三百五十八。右六段从上向下为殺首，次从下向上为称首，及置上虚驷，恒视日出相得殺首次第，假令日出相定即得殺首也，谓即须用殺首第一段乘也，他皆仿此。以其段乘之，以一千八百除之，所得者谓所得数也，以减刻分位成减为一相，即以一相加日出相位，日出位中度及分并弃之，即以次段减段令，用殺首第段乘上虚驷訖，即第刻分位乘三十段二百三十二减之，又以一相准前加日出相位，又以其次段减刻分位成减，又以一相加日出相位，视刻分位数堪更减之，他皆仿此。至不成减，止除刻分位，不成减云馀也，以三十乘以所至段除，能止从首加三相於是相位訖，即取次四段除之，他皆仿此。得此度不尽，以六十乘，依前除得分，以所得度及分并加日出位，加訖即是节断，恒减三相减訖。殺首为北行，称首为南行，日间如是量府，三相已上准减相例为如之，为其相定，及三相已下总通作分，谓三十乘内度六十乘度也，一如前推，月间量命法为之置，为月间量命，以一百四十六数除之，所得为度馀，以六十乘之，依前除之，所得为分，置为位，恒观月间量府，若殺首

减，谓随方眼法，

随方眼法其随方眼中国用三十五分也。若称首以加随方眼法之置，以位为中命，置中命又一如前命法为之置，为后命月域乘之，以五万一千五百六除之，所得为度余，以六十乘之，依前除之，所得分所得度及分，恒视间量府，谓均分减阿修讫，间量府也。得戡首减之，亦为均分减阿修讫，间量府也。得称首加之，亦谓加均分间量府也。减阿修讫，置为日间量。如十一度已下有蚀，十一度已上无独。又并日月二量为全位，复半之为半位，置半位自相至，又置日间量，亦自相乘讫，即以半位数内减却日成数，成减有蚀，不成减无蚀，余并一如蚀中叙。凡在历大侧，如其分不足减，退度一置为六十分而减之，如其度不足退，相一置为三十度而减之，如其相不足减，加十二相而减之。置上虚驷恒日出相，依戡首称首次第，假令日出相定，即得戡首也，谓即用戡首第二段乘也，他皆仿此。以其段乘之，以一千八百除之，所得者谓所除得数也。以减刻分位，成减为一相，即以一相加日出相位，其日出位所有度及分并弃之。又即以次段减刻分位，假令用戡首第一段乘上虚驷讫，即用以第二段二百三十二减之，他皆仿此。成减又以一相加日出相位，又以次段分减刻位，成减又以一相加日出相位，每视刻分位数堪更减段者，恒教此法减而加之，至不成减，止余以三千乘以所至段除之日得度，不尽六十乘，依前除之得分，以此度及分并加日出位，其日出位度分先并弃之，今以此度加及分置之。加讫即是节断著也。其节断著恒减三相减讫，得戡首为北行，得称首为南行。置为日间量府。如其有三相已上，谓日间量府有三相已上也。准减相例其例在定日术后者是也。为之，如其三相已下，总通作分，谓三十乘相内度，六十乘度内分也。如推月间量命法为之，置为日间量命，以一百四十六除之得度，余以六十乘之，依前除之得分，恒视日间量府，若得戡首，即以此度分数内减却随方，其随方眼中国用三十五分。若得

称首，即以此度分数内更并随方眼置为中命，置中命又再更，一如前命法为之，置为后命，置后命以月域乘之，以五万一千五百六十六除之，得度，餘以六十乘，依前除之得分，恒视间量府，得均分减阿修訖，间量府也。得穀首以此度分损之，谓损其减阿修訖，间量府也。得称首以此度分益之，谓其减益阿修訖，间量府也。如此损益訖，置为日间量位，其间量数有十一度已下，日即占蚀，十一度已上，又并日月二量为全位，又半之，占无蚀，为半位，置半位，自相乘，又置日间量，亦自相乘，即以半位数，谓有相乘訖数也，内减却日间量数，谓自相訖数也，成减有蚀，不成减无蚀，自餘术理咸悉，一如月蚀中术。

## 卷一百五

古今历积年及章率：古今历上元已来至今开元二年甲寅岁积，黄帝历上元辛卯至今二百七十六万八百六十三算外。

章岁十九。章闰七。章月二百三十五。蔀岁七十九。蔀月九百四十。蔀日二万七千七百五十九。元法四千五百六十。纪法一千五百二十。蚀月一百三十五。蚀法二十三。蚀岁五百一十三。蚀数一千八十一。

颛顼历上元乙卯至今二百七十六万一千一十九算外。

章岁十九。章闰七。

夏历上元乙丑至今二百七十六万五百八十九算外。

章岁十九。章闰七。

殷历上元甲寅至今二百七十六万一千八十算外。

章岁十九。章闰七。

周历上元丁巳至今二百七十六万一千一百三十算外。

章岁十九。章闰七。

鲁历上元庚子至今二百七十六万一千三百三十四算外。

章岁十九。章闰七。

前汉刘歆三统历上元庚戌至今一十四万三千九百三十四算外。

章岁十九。章闰七。日法八十一。统法一千五百三十九。朔望会一百三十五。元法四千六百一十七。冬至牛初。岁星一百四十四年起一次。

岁数一百四十四。周数一百四十五。

后汉四分历上元庚辰至今九千九百九十五算外。

元法四千五百六十。纪法一千五百二十。纪月一万八千八百。部法七十六。部月九百四十。章法十九。章月二百四十五。周天一千四百六十一。日法四。部日二万七千七百五十九。没数二十一。通法四百八十七。没法七。亦为章闰。日餘一百六十八。中法三十三。大周三十四万三千三百三十五。月周一千一十六。

吴刘洪乾象历上元己丑至今七千八百八十五算外。

乾法一千一百七十八岁。会通七千一百七十一。纪法五百八十九。周天二十一万五千一百三十。通法四万三千二十六。通数三十一。日法一千四百五十七。岁中十二。餘数三千九十。章岁十九。没法一百三。章闰七。会数四十七。会岁八百九十三。章月二百三十五。会率一千八百八十三。朔望合数九百四十一。会月一万四千四十五。纪月七千二百八十五。元月一万四千五百七十。月周七千八百七十四。小周二百五十四。

魏韩翊黄初历上元壬午至今三万二千七十二算外。

章岁一十九。章闰七。纪法二千八百八十三。斗分一千二百五。周天一百七十八万三千五百。日法一万二千七十九。经六千四百九。月法三十五万六千七百。

魏杨伟景初历上元壬辰至今四千五百二十三算上。元法一万一千五十八。纪法一千八百四十三。纪月二万二千七百九十

五。章岁十九。章月二百三十五。章闰七。通数一十三万四千六百三十。日法四千五百五十九。馀数九千六百七十。周天六十七万三千一百五十纪日。岁中一十二。气法一十二。没分六万七千三百一十五。没法九百六十七。月周二万四千六百三十八。通法四十七。会通七十九万一百一十。朔望合数六万七千三百一十五。入交限数七十二万二千七百九十五。通周一十二万五千六百二十一。

周日日馀二千五百二十八。周虚二千三十一。斗分四百五十五。

晋刘智正历上元甲子至今九万七千八百五十算外。

章岁十九。章闰七。纪日一百四万九百五十三。交会通六百一十万九千一百七十四。纪岁二千八百五十。冬至斗二十一。纪月三万五千二百五十。馀一万八千七百三。

姜岌历上元甲子至今八万四千一百七十算外。

章岁十九。章闰七。纪二千四百五十一。斗分六百五。日法六千六十三。经馀三千二百一十七。历馀三千三百六十二。冬至在斗十七。

梁赵历上元甲寅至今六万一千七百四十算上。

元法四十三万二千。纪法七万二千。蔀法七千二百。章岁六百。章月七千四百二十一。亦曰时法。章闰二百二十二。周天二百六十二万九千七百五十九。亦曰通数。馀数三万七千七百五十九。斗分一千七百五十九。日法八万九千五十二。亦曰纪日。月周九万六千二百五十二。小周八千二十二。会数一百七十三。度馀二万七千七百一十九。会虚六万一千三百三十三。交会差一百四十七。度馀三千三百一十一。迟疾差六百馀四千五百三十。周日二十七日馀四万九千三百八十。周虚三万九千六百七十二。

宋何承天元嘉历上元庚辰至今五千九百七十四算外。



章岁十九。章闰七。纪法六百八。日法九百五十二。历餘四百一十七。经历三百九十九。度法三百四。度分七十五。会月九百三十九。会数一百六十。雨水室二度。

宋祖冲之大明历上元甲子至今五万二千一百九十算外。

元法五十九万二千三百六十五。纪法三万九千四百九十一。章岁三百九十一。章月四千八百三十六。小周五千二百二十七。章闰一百四十四。闰法十二。月周五十二万七千九百二十七。日餘十六万九千七百七十五。月法十一万六千三百二十一。日法三千九百三十九。岁分一千四百四十二万三千八百四。岁餘九千五百八十九。餘数二十万七千四十四。没分三百六十万五千九百五十一。没法五万一千七百六十一。周天一千四百四十二万四千六百六十四。度分一万四百四十九。差八百六十。行分法二十三。小分法一千七百一十七。通周七十二万六千八百一十。会周七十一万七千七百七十七。通法二万六千三百七十七。

梁武大同历上元甲子至今一百二万五千八百七十算外。

章岁六百一十九。日法一千五百三十六。纪法三万九千六百一十六。

后魏张龙祥正光历上元壬子至今一十六万七千九百四十二算外。

章岁五百五。章闰一百八十六。章月六千二百四十六。法六千六十。斗分一千四百七十七。纪法六万六百。统法十二万一千二百。元法三十六万三千六百。日法七万四千九百五十二。周天分二百二十一万三千三百七十七。气法二十四。经月大餘二十九。小餘三万九千七百六十九。会数一百七十三。餘二万三千二百八。会通一千二百九十八万九千九百四。周日二十七。餘四万一千五百六十二。通周二百六万五千二百六十六。小周六千七百五十一。月周八万一千一十二。

东魏兴和历上元甲子至今二十九万四千一百七十算外。

章岁五百六十二。度法一万六千八百八十。章闰二百七。斗分四千一百一十七。日法二十万八千五百三十。餘十一万六千四百七。周天六百一十五万八千一十七。历餘一十万五千六百三十一。会数一百七十三。日餘六万七千一百一十七。木终餘一万五千六百八。火终餘一万五千一百四十三。土终餘九百八十一。金终餘一万四千五百二。水终餘一万四千八百一十八冬至斗。

刘孝孙历上元甲子至今四十三万五千二百三十算外。

章岁六百一十九。元法一十六万九百四十。纪法九千四十七。日法一千一百四十四。岁餘一千九百六十六。虚分六千四百七。差分五百九。度法二万四千一百四十一。行分三十九。会月二千一十三。会率三百四十一。周法三万四千三百二十。历朔差分六万七千四百四十二。冬至命度起危前五度。

齐宋景天保历上元甲子至今一十一万六千九百九十算外。

元法一百四十一万九千六百。纪法二千三万六千六百。部法三万三千六百六十。亦名日度法。章岁六百七十六。亦名日度法。章闰二百四十九。亦名闰法。章中八千一百一十二。章月八千二百六十一。日法二十九万二千六百三十五。周天八百六十四万一千六百八十五。亦名通数，亦名部法，亦名没分。餘数一十二万四千八十七。亦名没分。斗名五千七百八十七。岁中十二。气法二十四。会数一百七十三。餘九万一千五十八。会通五千七十一万六千九百一十三。会虚二十七万一千五百七十七。周日二十七。餘一十六万二千二百六十一。通周八百六万三千四百六。周虚一十三万三百七十四。小周九千三十七。月周三十一万六千二百九十五。望十四。餘二十二万三千九百五十三半。交限数一百五十八。餘一十五万九千七百三十九半。经月二十九。餘一十五万五千二百七十二。虚分十三万七千三

百六十三。

周甄变天和历上元甲寅至今八十七万五千九百四十算外。

章岁三百九十一。章闰一百四十四。部法三万三千四百六十。日法二十九万一百六十。朔餘一十九万三千九百九十一。斗分五千七百三十一。会餘九万三千五百一十六。历餘一十六万八百三十。冬至日在斗十五度。

周马显景寅元历上元景寅至今四万一千六百八十八算外。

章岁四百四十八。章闰一百六十五。斗分三千一百六十七。部法一万三千九百九十二。日法五万三千五百六十三。亦曰部会法。历餘二万九千六百九十三。会日一百七十三。会餘一万六千六百一十九。冬至日在斗十二度。

隋张实历上元甲子至今四百一十二万九千一百三十算外。

元法六百一十七万七千六百。纪法一百二万九千六百。部法十万二千九百六十。亦名度法。章岁四百二十九。章闰一百五十八。章月五千三百六。通月五百三十七万二千二百九。日法十八万一千一百二十。亦名周法。虚分八万五千三百九十一。朔时法一万五千六百一十。周天分三千七百六十万五千四百六十三。亦名没分。餘数五十三万九千八百六十三。亦名没法。岁中十二。斗分三万五千六十三。气法二十四。气时法八千五百八十。会月一千二百九十七。会率二百二十二。合数一百一十半。会分一十一亿八千七百二十五万八千一百八十九。会通六十九亿六千七百七十五万五千七十三。亦曰交数。会日法四千二十万四千三百二十。会日一百七十三。餘五万六千一百四十三。小分一百一十。会虚一十二万五千七百七十六。小分一百一十一。会日限一百五十八。会九万八千八百三十八。小分二百二十半。朔望合日数十四。餘一十三万九千二百二十四。小分一百一十半。交法五亿一千二百一十万四千八百。三分法二千八百一十五。阴阳历一十三。餘三万二百六十三。小

分二千三百二十八。历合二十七。餘三万八千六百七。小分一千八百四十一。朔差二。餘五万七千九百二十二。小分九百七十四。望差一。餘二万八千九百六十一。小分一千八百九十四半。蚀限十二。餘八万一千三百三。小分四百三十三半。定差四万四千五百四十八。通周五百一万二千六百九十九。餘岁一万三千八百九十七。限三千八百一十三。周日二十七。餘十万八百五十九。亦名小大法。周虚八万一千六十一。通率七。差虚十三万七千三百七十二。转率二百四十。分率七百五十八。日周一百三十七万六千四百。小周五千七百三十五。朔望合数十四度。餘一十三万九千二百二十四半。

张曹玄历上元甲子至今一百四十二万七千七百五十算外。

章岁四百一十。章闰一百五十一。日法一千一百四十四。度法四万二千六百四十。朔餘六百。斗分一万八千八百六十六。岁差五百三。周法二千五百四十八。餘一千四百一十三。冬至命度虚。初五后七。交会通一千六十四万六千七百二十九。比古会日。朔差九十万七千五十七。比古会数。

刘焯皇极历上元甲子至今一百万八千九百五十算外。

章岁六百七十六。度法九万三千二百八十八。日法一千二百四十二。餘六百五十九。岁餘二万二千八百一十三。岁差一千四百二十三。会月二千七百二十九。会率四百六十五。周法二千二百六十三。餘一千二百五十五。

傅仁均戊寅历上元戊寅至今一十六万四千四百三十六算外。

章岁六百七十六。亦名行分法。章闰二百四十九。章月八千六百六十一。月法三十八万四千七十五。日法一万三千六。时法六千五百三。度法九千四百六十四。亦名气法。气时法一千一百八十三。岁分三百四十五万六千六百七十五。岁餘二千三百一十五。周天分三百四十五万六千八百四十五。斗分二千

四百八十五半。没分七万六千八百一十五。没法一千一百三。历日二十七。历日餘一万六千六十四。历周七十九万八千二百。历法二万八千九百六十八。餘数四万九千六百三十五。

神龙历上元乙巳至今四十一万四千三百七十算外。

母法一百。旬周六十。辰法八刻三十三分二十半。期周三百六十五日。餘二十四奇四十八。气法十五日餘二十一奇八十五少半。月法二十九日餘五十三奇六。候法五日餘七奇二十八。游分四望法十四日。餘七十六奇五十三。弦法七日餘三十八奇二十六半。闰差十日餘八十七奇七十六。没数九十一餘三十一奇十二。没法一餘三十一奇十二。日周法二十七日餘五十五奇四十五小分五十九。日差法一百餘九十七奇六十小分四十一。天周三百六十五度餘二十五奇七十一小分七十一。交周法二十七日餘二十一奇二十二小分十六七分。交差法二日餘二十一奇八十三小分八十三三分。交中十三日餘六十奇六十一小分八三分半。阳前限十二日餘四十四奇六十九小分十六七分。阳后限一日餘十五奇九十一小分九十一六分半。阴前限二十六日餘十五奇三十小分二十五分半。岁星合法三百九十三日餘八十六奇七十九小分八十。荧惑合法七百七十九日餘九十一奇五十五小分四十五。镇星合法三千七十九日餘八奇四小分八十。太白合法五百八十三日餘九十一奇七十七小分七十。中合法二百九十。日餘九十五奇八十八小分八十五。辰星合法一百一十五日餘八十七奇九十五小分七十。中合法五十七日餘九十三奇九十七小分八十五。

李淳风见行麟德历上元甲子至今二十六万九千九百三十算外。

章岁三万九千五百七十一。总法一千三百四十。章月三十八万九千四百二十八。半总六百七十。章闰一万四千五百七十六。辰率三百三十五。闰分一千二百一十四奇八。奇率一十

二。历周四十四万三千七十七。旬周六十。月法二十九日餘七百一十一。弦法七日餘五百一十二奇九。气法十五日餘二百九十二奇十。历法二十七日餘七百四十三奇。

## 卷一百六 星图一

### 二十八宿星座古今同异

#### 东方青龙七宿一

角二星十二度夹左角星，去极九十一度，郑分，旧南星在赤道内一度，今测其南星正押赤道。亢四星距西第二星去极八十度，郑分，旧南第二星在赤道外，今测在赤道内二度。氐四星十五度，距西南星去极九十四度，宋分，古今同。房四星、钩钤二星五度，距西南第二星去极一百八度，宋分，古今同。心三星古今同五度，距前第一星去极一百八度半，宋分。尾九星、神宫一星十八度，距本第二星去极一百二十四度，燕分，旧去极一百二十度。又三星入河，今去极一百二十四度，有六星入河，又距星傍有一星，旧不载。按古经赞云：神宫一星在尾第二星傍，主解衣之内室。既有古赞，今附入其天河，审视天河，曲邪中绝，与旧不同，并依天改正。箕四星十一度，距西北星去极一百二十四度，燕分。旧四星并在河内，审视天南二星出河，其天河与旧不同，今并依天改正。

#### 北方玄武七宿二

南斗六星二十六度四分度之一，距魁南第四星去极一百一十六度，吴分，旧柄第二星在黄道内，又魁二星出河，今测在黄道外，魁四星出河。牵牛六星八度，距中央大星去极一百一

十度，吴分，旧南二星入南斗度，一星在牵牛度，今视天三星并在牵牛度，元不入斗，又旧去极一百六度，今测一百一十度。须女四星十二度，古今同，去极一百六度，赵分。虚二星十度，古今同，距南星去极一百四度，齐分。危三星、坟墓四星，古今同，十七度，距西南星去极九十九度，齐分。营室二星、离宫六星十六度，距南星去极八十五度，卫分，古今同。东壁二星九度，距南星去极八十六度，卫分，古今同。

### 西方白虎七宿三

奎十六星，距西南大星去极七十度，鲁分，旧去极七十七度，今测七十度。又旧星并均，今视天即有疏有密，大小不等。娄宿古今同，三星十二度，距中央大星去极八十度，鲁分。昂古今同，七星十一度，距西南第一星去极七十四度，赵分。毕古今同，八星、附耳一星十六度，距左股第一星去极七十八度，赵分。觜古今同，三星二度，距西南星去极八十四度，晋魏分。参古今同，十星九度，距中央西星去极九十四度，晋魏分。

### 南方朱雀七宿四

东井八星、钺一星，三十三度，距南轸西头去极七十度，秦分。《星经》云：去极七十度，其距星旧在黄道内一度，又八星并在河，今以仪测，在黄道外一度。又北轸二星出河。舆鬼四星四度，距西南去极六十八度，秦分。旧积尸积兵帛积金玉等四星正指四方，今积尸等并全出黄道内，又外四星斜指四隅。柳八星十五度，距西头第三星去极七十七度，周分，旧西南口头欠一星，东头尾后加一星，添满八星，今视天尾后无星，其星本在口边，今改正。星七星七度，距中央大星去极九十一度，周分，旧去极九十七度，距星合在赤道外六度，旧在

赤道内一度，今测去极九十度，星正押赤道。张宿古今同，六星十八度，距前第一星去极九十七度，周分。翼二十二星十八度，距中央西星去极九十九度，楚分，旧距前第一星，按经今距中央西星，今测正距中央西星。义星有远近斜曲小异。轸四星、长沙一星、轸二星十七度，距西北星去极九十八度，楚分，旧距西南星即与经旨乖舛，今测取西北星即得确传度数，如中央距星并合赤道外。

## 卷一百七 星图二

### 石氏中官星座古今同异

摄提古今同，六星夹大角。大角同一星。梗河三星大角北。西星曲向南，今视西星亦端直。招摇古今同，一星梗河北。玄戈古今同，一星招摇北。天枪古今同，三星北斗柄东。天棓古今同，五星女床东北。女床古今同，三星天纪星北。七公古今同，七星招摇东。贯索古今同，九星七公前。天纪九星贯索东，旧在尾箕度，今测东三星入南斗度，近织女。织女古今同，三星天纪星东端。天市垣二十二星房心东北端，旧东垣从南门第一星至第五星并在赤道外，今测从门头星至第三星在赤道外，余星在赤道内，又东垣第二星第六星在河里，旧图并不入市。又审视天河一差入市。帝座古今同，一星在市中。候古今同，一星帝座东南。宦者古今同，四星帝座西。斗五星在宦者西南，旧斗星口，仰兼背斜，今视天斗口向下覆斛。宗正古今同，二星帝座东南。宗人旧在河外，今在河内。四星宗正东，宗星旧两星相去远，今测两星相去近，二星宗人北。东咸古今四星房东北。西咸旧四星，并在房星西赤道外北一度，今测在房星西北，三星在赤道内，房度一星在赤道外，氐一度四



星房西北。天江古今同，四星在尾北。建星旧五星在黄道内，兼一星，又一星在黄道外，今测六星并在黄道内，元不入河，六星在南斗北。天弁旧大小远近并均，又偃势覆向下，今测有疏密大小不均，其偃势仰向上，又视天河与旧不同，九星在建星北。河鼓旧三星并旗六星并亢河，又旗南四星在赤道外，今测河鼓唯北一星及旗三星入河，又旗南唯三星在赤道外，视天河正当河差，河鼓并旗十二星在牵牛北。离珠旧在须女，又在须女北横列，今测在牵牛度，又在须女西北，竖立五星在须女西北。匏瓜旧并在河中，又近天津，今测在河外，又去津远，又视天河与旧不同，五星在离珠北。天津旧并在虚度，仍竖唯二星出河，今测向西北东南斜指入牵牛女虚等度，及有六星出河，又视天河有断绝委曲不同，九星在虚北河中，螣蛇旧八星出河，今视唯尾末二星出河。二十二星在奎北河中。阁道旧北四星出河，今测北二星出河，六星在王良北。附路古今同，一星阁道傍。天大将军旧星并均圆曲向上，今测星有出入不均，十一星在娄北。大陵古今同，八星在胃北。天缸旧四星出河，今在河内，九星在大陵北河中。卷舌旧北二星入河，今并在河外，六星在昂北。五车旧东北及西北星入河，今出河，又西北柱旧双星向上，今测向下，又东北柱旧双星在东北，今向西北，五车三柱十四星在毕东北端。天关古今同，一星五车南，参西北。南河北河，南河旧在河内，西二星入前实沉次，今测不入河，亦不入前次，复在河外，又在后鹑首次，北河旧在鹑首次，今测二星入前实沉次，六星夹东井。五诸侯旧东头第一星在黄道外，今测在黄道内四度。又旧东头第二星曲向南，今乃曲向北，又与第三星相近，五星在东井北，近北河。积水积薪二星旧在鹑首次，今并在前实沉次。积水一星北河西北，积薪一星积水东南。水位旧南二星入河，今四星并在河外，四星东井东南北列。轩辕旧尾渐斜向上，其右角在黄道内，今测其

尾势迤邐向西，其左角出黄道外半度，不在内，十七星在七星大星北。少微同四星，太微西南北列。太微古今同，十星在翼轸北。黄帝座旧四星，去黄帝座近远并相侣，今有近有远不等，黄帝座一星在太微中，四帝四星夹黄帝座。内屏古今同，四星在黄帝座南郎位，旧取端正均配行列，今有偏并不均，十五星在帝座东北。郎将古今同，一星郎位东北。常陈古今同，七星如毕状帝座北。三台古今同，六星两两而居，起文昌，列抵太微。相星太阳守二座，旧重四相当，今太阳守在相星西南，相一星北斗南，太阳守一星相星西南。天牢旧均圆近中台，今其星北斗魁下，兼有疏有密。文昌古今同，六星北斗魁前。北斗古今同，七星辅一星在太微北。紫微宫垣两蕃，旧在娄昂毕井柳张轸等度，今测在胃毕井鬼七星张轸等度，十五星东蕃，八西蕃，七北斗北。北极古今同，五星。钩陈六星，皆在紫微宫中。天一太一，旧并在轸度，今俱在翼度，天一星紫微宫门外右星南，太一一星天一星南相近。

## 卷一百八 星图三

### 石氏中官星座古今同异

库楼古今同，十星、五柱、十五星、冲四星，凡二十九星，在角南。北落师门古今同，一星羽林西南。土司空旧在奎度天濶东南，视天在东壁度一星奎南。土司空新图濶西南。南门古今同，二星库楼南。平星古今同，二星库楼北。天仓旧二星在奎度，三星在娄度，今五星在奎度，一星在娄度，六星在娄南。骑官旧三三又列并均，今其星有疏密，有横竖，亦有斜，不均。二十七星在氐南。天囷古今同，十三星在胃南。天廩旧四星并在赤道内西北东南列，今三星在赤道外，又西南东

北列，四星在昴南。积卒古今同，十二星房心南。龟星旧四星入河，一星出河，审视天唯一星入河，四星出河。又天河曲直与旧不同，五星在尾南。天苑古今同，十六星昴毕南。傅说古今同，一星在尾后。鱼星旧在傅说东南，今测在傅说东北，其天河断绝曲斜与旧不同，一星在尾河中。杵星古今同，三星在箕南。参旗古今同，九星在参西，一名天弓。玉井古今同，玉井四星在参左足下。天屏古今同，二星玉井南。鳖星旧在南斗度，又在斗魁东南，今测在箕度，又在斗魁西，唯东一星入南斗度，十四星南斗南。厕星古今同，四星在屏东。天矢古今同，一星在厕南。军市旧在厕正东，又星并均图，今测在东北，其星有相近，亦有疏阔，十三星参东南。九坎旧在斗牛女度，今在斗牛度，不至女宿，九星牵牛南。狼星古今同，一星参东南。败臼旧在须女危度，今测唯在虚度，四星虚危南。弧星旧全坐并在河外，今测东头一星入河，并疏密大小不依象，九星东南。垒壁陈东头第一星入东壁度，又西头五星入危度，今测不入东壁度，又西六星入危度，其羽林旧八星络东壁距道入壁度，三三又对，南北分为五行，西一星入危度，审视不络东壁度，西九星入危度，南北只有四行，亦有不相入者，羽林四十五星，垒壁十二星，凡五十七星室壁南。老人古今同，一星在弧南。稷星古今同，五星七星南。

## 卷一百九 星图四

### 甘氏中官古今同异

天皇大帝古今同，一星钩陈口中。四辅古今同，四星抱北极枢。华盖古今同，七星、杠九星，凡十六星，大帝上。周鼎古今同，三星摄提西。帝席古今同，三星在角南。平道古今

同，二星左右角间。五帝内座古今同，五星华盖东。六甲古今同，六星华盖傍。天柱古今同，五星紫微宫中近东垣。进贤古今同，一星平道西。谒者古今同，一星左执法东北。三公内座古今同，三星谒者东北。九卿内座古今同，三星三公北。柱下史旧经云在北极东南斗度，审视在北极东北牵度，一星北极东北。女史旧图在南斗度，今测在须女度，当柱下史北，与紫宫东垣南第六星相近，一星柱下史北，近紫微东垣第六星内。五诸侯古今同，五星九卿西。太子古今同，一星黄帝座东北。从官古今同，一星太子西北。幸臣古今同，一星太子东北。尚书古今同，五星紫微宫门内东维。阴德古今同，二星尚书西。天床旧图普阔促均齐，视天乃狭长，兼有明暗，六星紫宫门外。天理古今同，四星北斗魁中。内厨古今同，二星紫微宫西南角外。明堂古今同，三星大微西南角外。灵台古今同，三星明堂西。势星古今同，四星太阳守西北。内平旧云在中台南，旧图在轩辕腹，又在柳七星度，今测在中台南张七度，复与星经同，四星中台南。耀星旧图在轩辕腹内，今测在轩辕。尾南近柳北四星。内阶经云在文昌北，旧图安星在八谷北毕觜东井等度，其星又阔促，今测在文昌北东井柳度，又狭长，两相近，亦与星经本文同，六星文星北。天厨旧在虚危度，并阔促均齐，今测在南斗牵牛须女虚等度，又狭长明暗不等。酒旗古今同，三星轩辕右角南。天麟古今同，三星东井北。诸王古今同，六星五车南。司怪旧图端列南第一星出河，审视天并在河内，又向西曲，四星在钺星前。座旗旧去在司怪西北，旧图及视天并司怪东北九星。天高古今同，四星参旗西近毕。策星旧图在河外，今在河内，一星王良前。传舍旧图在奎娄度，今测在东壁奎娄胃等度，九星华盖上近河傍。造父古今同，五星钩星南河中。砺石古今同，四星五车南。八谷古今同，八星五车北。天谗古今同，一星卷舌中。积水古今同，一星天船中。积

尸古今同，一星大陵中。车府古今同，七星天津东近河傍。人星古今同，五星车府东南。臼杵古今同，三星人星傍。臼星古今同，四星人星东南。左更古今同，五星在娄东。右更古今同，五星在娄西。军南门旧在天将大军西，近奎北，以仪测，在天将军南，如奎正东，一星天将军西南。天横旧四星东西列，一星在北，审视天，四星南北列，一星在西，五星在五车中。扶匡旧在须女度东北，西南行列，又在子规外，审视天在南斗度东，南北行列，又在子规内，唯一星在规外。司命古今同，二星在虚北。司禄古今同，二星司命北。司危古今同，二星司禄北。司非古今同，二星司危北。败瓜旧四星入河，一星出河又横，审视天并在河外，又竖五星匏瓜傍。咸池旧图在五车中近东，今测近西，附金柱三星天潢西北。月星古今同，一星在昴东。天街旧图络黄道，今在黄道北，二星昴毕间，近月星东。天河古今同，一星在昴西。河鼓左旗旧九星并入河，今测三星出河，九星河鼓左傍。天鸡古今同，二星狗国北。罗堰古今同，三星牵牛东。市楼旧在赤道外，今测在赤道内，六星在市中，临箕上。斛星古今同，四星在市中斗南。日星古今同，一星房中道前。天乳古今同，一星在氐北。亢池古今同，六星在亢北。渐台古今同，四星属织女东足。辇道旧星并均南斗度，又在河外，今其星有远有近，南二星入牵牛度，又入河，五星属织女西足。三公古今同，三星在北斗西南。

## 卷一百十 星图

### 二十八宿

#### 甘氏外官一

青丘古今同，七星在轸东南。折威古今同，七星在亢南。阵车古今同，三星在氐南。骑阵将军古今同，一星骑官中东端。糠星古今同，一星箕舌前。车骑古今同，三星骑官南。农丈人旧在狗星西南，今在狗星西，一星南斗西南。狗星古今同，二星南斗魁前。狗国古今同，四星建星东南。天田古今同，九星牵牛南。哭星古今同，三星在虚南。泣星古今同，二星在哭东。盖屋二星在危南。八魁旧三星在营室度，六星在危度，今并在营室度，九星北落东南。雷电古今同，营室西南。云雨古今同，四星霹雳西南。霹雳古今同，五星土公西南。土公古今同，二星东壁南。土公吏古今同，二星营室西南。铁钺古今同，五星天苍西南。天濶古今同，七星在屏南。外屏古今同，七星在奎南。天庾古今同，三星天仓东南。刍藁古今同，六星天苑西。天园古今同，十三星天苑南。九州殊口古今同，九星天节下。天节古今同，八星毕附耳下星南。九游古今同，玉井西南。军井经云玉井东南，旧在屏南，今在屏东四星。水府旧在东井南河外，今在河内，四星东井南。四渎一星入河，三星出河，今三星入河，一星出河，四星东井南轸东。阙丘旧在南河东南赤道外，今在南河南赤道内，二星南河南。天狗古今同，七星狼东北。三坐旧并在西北斜列，今并在东北斜列。丈人二星军井西南，子二星丈人东，孙二星在子东。天社古今同，六星在弧南。天记古今同，一星外厨南。外厨旧近河，又

东西狭，今去河远临赤道，又东西阔，六星柳南。天庙旧并引行正直，今有曲直，十四星在张南。东瓠古今同，五星在翼南。

### 巫咸中宫二

大尊旧在中台西子规外，今在中台北子规内，一星中台北。三师古今同，三星北斗魁第一星西。大理古今同，二星紫微宫门老星内。御女古今同，四星钩陈后北。天相古今同，三星七星大星北。长垣旧在黄道外有二星，今并在黄道内，四星少微西南北列。虎贲古今同，一星下台南。军门土司空二坐旧并在轸星南，今在轸星西南近翼。军门二星青邱西。土司空四星军门南。阳门古今同，二星库楼东北。顿顽古今同，二星折威东南。从官古今同，二星房星南。天辐古今同，二星房星南。键闭古今同，一星房东北。罚星古今同，三星东咸北列。列肆古今同，二星天市中斛西北。车肆古今同，二星天市门左星内。帛度古今同，二星宗星东北。屠肆古今同，二星帛度北。奚仲旧三星在虚度，一星入女度，其星在子规外竖立，今三星在牵牛度，一星在南斗度泊，子规东南西北斜列，四星如衡状，天津北。钩星古今同，九星如钩状，造父北。天桴旧在赤道外，今在赤道内，四星河鼓左旗端南北列。天钥古今同，八星南斗柄第二星西。天渊古今同，十星在鳖东南九坎间，一名三泉。齐一星九坎东，衡星东北。赵二星在齐西北。郑一星在赵东北。越一星在郑西北。周二星在赵东北。秦二星在周东。代二星在周东南。晋一星在周西南。韩一星在晋北。魏一星在韩北，近秦星。楚一星在魏西南，近郑星。燕一星在楚东南，近晋星。秦赵等十二星座旧图并须女度，今齐郑赵越周等五座在须女度，又列位不同。璃瑜古今同，三星在代东南北外。天垒城古今同，十三星如贯索状，哭泣西。虚梁古今同，

四星在危南。天钱古今同，十星在北落东北。天网古今同，一星在北落西南。斧钺古今同，三星在八魁西北。东厩旧络东壁距道，又在河外，今测络奎距道，仍北三星入河，不络东壁距道，十星东壁北，近王良。天阴旧骑赤道，今测近黄道五车毕柄西。

## 卷一百十一 八谷占

### 八谷生长

神农曰：禾生于枣，出于上党羊头之山右谷中，生七十日秀，六十日熟，凡一百三十日成，忌于寅卯。黍生于榆，出于大梁之山左谷中，生六十日秀，四十日熟，凡一百日成，忌于丑。大豆生于槐，出于沮石之山谷中，九十日毕，六十日熟，凡一百五十日成，忌于卯。小豆生于李，出于农石之山谷中，生六十日，华五十日熟，凡一百一十日成，忌于卯。秫生于杨，出于农石之山谷中，七十日秀，六十日熟，凡一百三十日成，忌于午。荞麦生于杏，出于长石之山谷中，生二十四日秀，五十日熟，凡七十五日成，忌于子。麻生于荆，出于农石之山谷中，生七十日秀，六十日熟，凡一百三十日成，忌于未午辰亥日。小麦生于桃，出于须石之山谷中，生三百日秀，三十日熟，三百三十日成，忌于子。稻生于柳，出于农石之山谷中，生八十日秀，七十日熟，凡百五十日成，忌于亥。

五谷生长日种者多实，以老死日种者无实，又难生，以忌日种之，一人不食。

禾生于巳，疾于酉，长于子，老于戌，恶于丙丁，忌于寅卯。黍生于寅，疾于午，长于丙丁，老于戌，死于申，恶于壬，忌于丑。豆生于申，疾于子，长于壬，老于丑，恶于甲



乙，忌于丙丁。麦生于酉，疾于卯，长于辰，老于午，死于巳，恶于戌，忌于子。

太岁在四季，葶苈子熟时可种禾豆，夏至时可种黍麻，夏至后百五十日地气上时可种麦。丑未戌是也。太岁在四仲，槲熟时可种禾豆，夏至可种黍糜，夏至后九十日地气上可麦。子午卯酉是也。太岁在四孟，以蚕卧起时可种禾豆，夏至前五十日可种稻黍糜，夏至后八十日地气上可种麦。寅申巳亥是也。

### 八谷阴阳相冲

《黄帝占》曰：谷有阴阳，冲位相当，王相废休，名在其乡。

《黄帝要经》曰：春夏为阳，秋冬为阴，阴当合贱，阳当合贵，春夏贱为顺，秋冬贵为逆。

《黄帝占》曰：稻与小麦为阴阳，稻贱时小麦贵，十五日反之亦等。黍与小豆为阴阳，黍贱时小豆贵，麻与大麦为阴阳，麦贱时大麦贵，大麦贱时小豆贵。麻与大麦为阴阳，麻贱时大麦贵，大麦贱时麻贵。粟与大豆为阴阳，粟贱大豆贵，大豆贱粟贵。

### 候八谷贵贱及岁杂物蚕善恶

《黄帝占》曰：粟尝以建戌之月下旬二十五日下价为本，以建亥之月上旬上价为末，乘本贵之一钱，以五并本价，以为来年春夏极贵定，即亥月与戌月平者，更以建子之月乘亥月价见一贵之，一贵之以三皆并本价，以为来年春夏极贵，各在其冲月，即冬三月皆不贵，各平，平者来年春不复贵矣。黍常以建酉之月下旬二十五日下价为本，以建戌之月上旬上价为末，本一钱贵之，以五并本价，以为来年春夏极价定，即冬三月平，平者春夏不复贵。麻常以建戌之月下旬二十五日价为本，

以建亥之月上旬价为末，末乘其本一钱贵之，以五并本价，以为来年春夏价定，即冬三月皆平，平者春夏不复贵。大豆常以建亥之月下旬二十五日下价为本，以建子之月上旬上价为末，末乘其本一钱贵之，以五并本价，以为来年春夏极价定矣，即冬三月皆平，平者春夏不复贵。麦常以建午之月下旬二十五日下价为本，以建未之月上旬上价为末，末乘本一钱贵之五并本价，以为来冬春价极贵定矣，夏秋三月平，平者冬不复贵。

《师旷占》曰：常以正月一日迄十二日以占十二月，以日易月，每岁黄气，其气为差岁，风从西来、西南来，皆为谷贵，从东即谷贱。

《黄帝占》曰：正月上卯日候风，其有寒风者谷小贵，若至冲必贵矣。其卯日不风寒而温者，即中平也。春雨甲申五谷熟，夏雨甲申五谷大好。

《神农占》曰：正月上朔有风雨，三月谷贵，石五百钱。

《黄帝占》曰：春雨甲寅乙卯入地五寸，余小贵，若不贵夏谷贵。正月丙丁为朔，稷黍贵；戊己为朔，粟贵；庚辛为朔，麻稻贵；甲乙为朔，大小麦贵；癸为朔，大小豆贵。正月三日当风不风，则莫不同者谓无黍。

《东方朔占》曰：正月朔日雨，岁中下，田麦成，禾黍小贵。

《沛公占》：常以正月甲辰先至，大麦贵；丙辰先至，黍贵；戊辰先至，粟贵；庚辰先至，大豆贵；壬辰先至，小豆贵。正月一日得寅贵，尽十二日以占十二月。

《黄帝占》曰：正月晦二月朔，有风雨，稻恶余贵；二月晦三月朔，有风雨，其年大水，麦恶；十二月晦正月朔，风雨，春旱；三月晦四月朔，有风雨，春余贵；四月晦五月朔，有风雨，其年大水，麦恶；五月晦六月朔，有风雨，春旱；六月晦七月朔，有风雨，春余贵；七月晦八月朔，有风雨，岁余

贵。

《东方朔占》曰：三月得己朔，大麦熟；庚朔，禾熟，兵贼起；辛朔，下田不收；壬朔，赤地千里，米谷贵；癸朔熟。

三月有三卯，大豆好，无三卯，旱，种禾，四月丙午夏苗长。四月无三卯，旱，种麻。《京房占》曰：五月无三卯，旱，种大豆；六月无三卯，稷不好。《神农占》曰：八月有三卯，麦大善；无三卯，麦不善。《京房占》曰：八月无三卯，旱，种麦。

《黄帝占》曰：四月朔日风起东来，鸡鸣至日出，禾黍亩三斛，至日中，亩二十斛，至夜半，亩三十斛，以中田准之。

《黄帝占》曰：夏至以五月朔日至者，其国大惊，谷小贵；四月五日六日至者，谷大贵；十日十二日至者，五谷大贵；二十七日二十九日至者，国王大惊；以晦日至者，国有大丧；六月朔至者，人民相食，及五年事，四月至上。又云：夏至在天门土，国大惊；在地户谷雨，五谷大贵；在人门，为三公群臣大夫，谷贵，必察之二日之中。又五六月晦朔日夏至者，卖田宅，谷贵十倍，人民相食，其岁恶，田宅虽贱，慎勿取之。立夏戊子，大风自北来，余石三百倍贵。

《黄帝要经》曰：春雨乙卯，夏余贵；夏雨丁卯，秋余贵；秋雨辛卯，冬余贵；冬雨癸卯，春余贵倍。雨一卯斛百文，雨二卯斛二百，雨三卯斛三百，雨四卯斛一斤金。

《沛公占》曰：三月一日乙卯，荆楚贱，得丁卯周秦贵，得己卯燕赵贵，得辛卯韩魏贵，得癸卯梁鲁贵。

《神农占》曰：凡虫食李则黍贵，食枣粟贵，食杏麦贵，食荆麻贵，食桑丝贵。正月上朔日风从东来，植禾；善风从南来，植黍；善风从北来，稚禾善。四月四日风从东来，植豆善；西来四日至七日中善，七日至十日稚禾善，十四日无风不可种豆，从东至日到来年，满六十日，有大风雨，折树木，麦

大善。从平朔至食时，植麦善；至日中，中麦善；至日入，稚麦善。常以夏至后九十日可种。四月朔日风从东来，从平明至辰时，植黍善，至日中中黍善，至日入稚黍善。正月朔日日清明蚕善。

《京房占》曰：正月一日候风，平明和调不风，植稼蚕善，日中和调，中稼稚蚕善，至暮无风，五谷桑蚕滋茂，人民六畜无病。

《沛公占》曰：正月一日平明温不风，早蚕善，日中不风，中蚕善，日入不风，稚蚕善，终日不风，植稚皆善。

东方朔曰：正月朔日当温，更风雨者，米大贵，蚕伤。风起西方，来年兵革贵。

京房曰：太岁在寅岁中三十日，大阴，蚕不登，菽麦昌，人民食四升。太岁在卯中调和，豆麦昌，人民食五升，旱四十日，在六月。太岁在辰岁中，旱三十日，六月大风，旱六十日，岁人病，豆成。太岁在巳，小兵起，大麦登，四十日旱，在六月，百物贱，不宜早蚕，晚者成，五谷熟。太岁在午，五百日旱，蚕登，百谷不为，晚蚕伤，兵革起，六畜小儿死。太岁在未，十月小兵，豆登麦恶，旱，蚕不成，晚者好，旱六十日，在二月。太岁在申，蚕登，麦熟，五谷，旱五十日，人多病，兵革起，早蚕不成，晚者好。太岁在酉，兵起，人病，早蚕不登，晚者好，六畜伤，六月七月旱。太岁在戌，兵起，蚕不登，肉贱，牛马贵，高山旱，人饥，米斗七十文。太岁在亥，兵起，人饥，人多病，忧在四十日，在州旱七十日，豆麦好，五谷成，蚕子如星。太岁在子，水旱不时，五谷不成，旱三十三日，在六月，西方米麦暴贵。太岁在丑，有兵起，早蚕不成，晚者好，人民不安。

《黄帝占》曰：太岁在亥，名曰天空，余法当贵。太岁在丑，名曰阴尽阳起，可取阳谷，阳谷者粟也。太岁在巳，名曰

地空，余法当贵。太岁在未，名曰阳尽阴起，可取阴谷，阴谷者黍也。太阴乘寅，早水晚旱，蚕禾菽麦昌，人食四升。太阴乘卯，禾稻菽麦黍昌，人食二升。太阴乘辰，早旱晚水，人饥，豆昌麦熟，民食二升。太岁乘巳，小兵动，蚕麦昌，二升。太阴乘午，大旱，蚕成，稻菽麦昌，禾不为，二升。太岁乘未，小兵起，蚕稻昌，菽麦不为，三升。太阴乘酉，大兵，民疫，蚕菽麦皆不成，民食七升，大耗。太阴乘亥，有兵，麦禾善，五升。太阴乘子，天大雾，岁水大出，稻麦蚕禾昌，民食三升。太阴乘丑，岁小兵，早蚕不登，稻疾菽不成，麦昌，民食三升。

《黄帝占》曰：正月一日二日雨，民食二升，三日四日雨，民食四升；五日六日雨，民食六升；七日八日雨，民食一升；十日雨不占。

《师旷占》曰：正月七日风从西北来起，荆地弱，来人民，霖变讼，六畜贵，谷亦贵，过度岁不善。

《京房占》曰：正月初一日为鸡，二日为狗，三日为羊，四日为猪，五日为牛，六日为马，七日为人，八日为谷，和调不风寒，即人不病，六畜不死亡。

郗萌曰：常以正月朔日暮候东井上，有云，岁水潦，务耕山田高处。

东方朔曰：常以正月一日夜半子时候东方，有黄色云者，春大赦；南方有黄云者，夏有赦；西方有黄云者，秋有赦；北方有黄云者，冬有赦；杂者皇太子有赦；有黑云杂者，必有皇后若女子之赦。

《京房易占》曰：正月一日云气五色备且精神，十二律气各具，岁则天下太平。风雨从西北起，余贵。

神农曰：正月有甲子，余初贵后贱。

沛公曰：正月甲寅先至，棺木贵；丙寅先至，丝帛贵；壬

寅先至，鱼盐贵，各三倍。

正月朔日，大风发屋折木，扬沙动石，其岁恶。风从东方来，人民多疾病；风从南方来，大旱；风从西方来，六畜死亡伤；风从北方来，下田不收，高田好。常从冬至后却数到来年正月上旬，满五十日食足，不满一日之月，过一日长一月。

神农曰：正月上辛温者，善风寒者，不好。

《黄帝占》曰：常以正月八月夜候月，在昴东，年中大喜；月在昴西，岁多雨；月在昴北，其年大恶；月在昴南，其年大旱。

京房曰：正月八月候月，在参东，大善；在参西，多水虫；在参北，大恶。

《黄帝占经》曰：春不欲雨乙卯，夏不欲雨丁卯，秋不欲雨辛卯，冬不欲雨癸卯，以此四卯日雨者，人民多病。

《黄帝占》曰：常以正月一日夜半子时至明视北方，有黑云，七月水四丈七尺；青云必有疾病流行，燕赵当之；赤黄云人民大饥，国多刑狱；白云素服之变；赤云国有喜，母子同光，女有昌。视南有赤云，当大旱，赤地千里，五月炎旱，六月有风雨，发屋折木；并白云，国有大丧，天子失丧坐；有黑云，大水，不出其年五月；有青云者，大吉，妇女谋内。视西方有白云，秋有兵，内相走，宫钟不鸣，剑戟交锋；有青云，大凶，君克臣必死，物在市，不出其年九月；黑云者大吉利。

秋雨甲申，六畜多死；冬雨甲申，人民疾病。九月晦十月朔，有风雨，其岁恶，有小水；十月晦十一月朔，有风雨，人民多死；四月一日二日得酉，人民大乐；三日四日得酉，人民悦和；五日六日得酉，人民多疾病；七日八日得酉，人民多病；九日十日得酉，人民多流；十一日十二日得酉，人民自相食，大凶。

京房曰：五月朔日当热而风雨者，米贵，人食草木；风从

北方来，禾大败，人民相食。

《黄帝占》曰：立夏后五日虹始出者，万物皆实。

冬至后一日二日得酉，其岁半熟；三日四日得酉，人民大乐；五日六日得酉，田禾大熟；七日八日得酉，大恶；九日得酉，五谷大贵；十日十一二日得酉，五谷大成，伤害六畜，寇贼多兴；十三日得酉，人民相战，大凶灾，八方俱沸沸。酉者，金兵之本，收成之元首。

京房曰：冬至后一日有壬，无雨；二日有壬，稚再生；三日四日有壬，上下皆熟；五日六日有壬，沟渠溢，苗易治；七日八日有壬，水横流；九日十日有壬，无立墙；过十日有壬，还一等；至后三日七日有壬，苗难治。

《黄帝占》曰：青车木位，甲寅之精。不周风至一日，贼风至，棺木贵，苇席贱；广莫风至，材木贵，葵韭贱；条风至，葱薤贱，乌菹贵；明庶风至，桔朽贱，蒲席贵；清明风至，棺木贱，苇席贵；景风至，材木贱，葵韭贵；凉风至，乌菹贱，葱薤贵；闾阖风至，蒲席贱，桔朽贵。火车丙寅之精，不周风至，枲麻络贱，黄白绿贵；广莫风至，紵缕贱，锦绣贵；条风至，布缕贱，缁帛贵；明庶风至，绵皮革贱，絺絮贵；清明风至，黄白绿贱，枲麻络贵；景风至，锦绣纈贱，紵贵；凉风至，缁席贱，布缕贵；闾阖风至，絺絮贱，绵皮革贵。土车戊寅之精，不周风至，稻贱，秫术麦贵；广莫风至，小豆贱，黍贵；条风至，大豆贱，粟贵；明庶风至，大麦贱，麻缣贵；清明风至，秫与小麦贱，稻贵；景风至，黍贱，小豆贵；凉风至，粟贱，大豆贵；闾阖风至，麻缣贱，大麦贵。金车庚寅之精，不周风至，铁器贱，铅锡贵；广莫风至，胶漆贱，黄金贵；条风至，珠玕贱，铜器贵；明庶风至，玉器贱，田宅贵；清明风至，铅锡贱，铁器贵；景风至，黄金贱，胶漆贵；凉风至，铜器贱，珠玕贵；闾阖风至，田宅贱，玉器贵。

水车壬寅之精，不周风发，盐豉贱，海错贵；广莫风至，鸡犬贱，鲤鱼贵；条风发，猪豕贱，生鱼贵；明庶风发，牛马贱，羊羔贵；清明风发，海鱼贱，盐豉贵；景风发，鲤鱼贱，鸡犬贵；凉风发，生鱼贱，猪豕贵；闾阖风至，羊羔贱，牛马贵。凡五寅之风所从吹，本乡来之处贱，风往所冲之处为贵。一日分出时终日，贵在六十日，从日入至夜半，贵在二旬中，从夜半至鸡鸣平明，贵在一时。

常以庚寅之日候五车金星动，故有耗其物，金铁贵，动而不明即贵，有大风寒，折木发屋，即大贵；大风寒大贵，小风寒小贵，其温即贱，不风寒自如。常以壬寅之日候五车水星，主船筏六畜，水中自行者，故水车星动微黑，即贵水物，有大风寒，折木发屋者，大贵，大风寒大贵，小风寒小贵，不风寒自如。常以甲寅之日候五车木星，立柱材木苗芦薪苛茅，故木车星动微青即贵，有风寒，折木发屋，大风寒大贵，小风寒小贵，其温即贱，不风寒自如。常以丙寅之日候五车火星，主虫采繒帛皮革，色赤动即贵，有大风，发屋折木，大风寒大贵，中风寒小贵，其温即贱，不风寒自如。常以戊寅之日候五车土星，主土公田宅五谷，其星赤黄有柱动，即谷贵，有大风寒，发屋折木，大风寒大贵，小风寒小贵，温即贱，不风寒自如。

## 卷一百十二 竹木草菜占

### 草木休徵

#### 朱 草

孙氏《瑞应图》曰：朱草者，草之精也，圣人之德无所不至则生。



《鹖冠子》曰：惟圣人能正其音，调其声，故德上及泰清，下及泰宁，中及万灵，朱草生。

《尚书大传》曰：德光地序则朱草生。

《淮南子》曰：太清之世，流黄出，朱草生。

《春秋运斗枢》曰：璇星得则朱草生。

《尚书候》曰：文命得成，俊乂在官，朱草生郊。

《魏略》曰：文帝欲禅，朱草生于文昌殿侧。

《大戴礼》曰：朱草生，日生一叶，至十五日止，十六日落一叶。

### 嘉 禾

《春秋感精符》曰：德沦于地则嘉禾生。

《春秋运斗枢》曰：璇星得则嘉禾液。

### 福 草

《礼斗威仪》曰：君乘木而王，福草生于庙中。

《瑞应图》曰：福草者，宗庙斋敬则生宗庙中。

### 芝 草

《运斗枢》曰：瑶光得则陵出芝草。

《瑞应》曰：芝草者，亲近耆老，养有道，则生。

《地镜》曰：敬事耆老，不失旧故，则芝草生。

### 禾 连 理

《地镜》曰：不失民心，则木连理生。

### 木同本异枝

京房曰：有木同本而异枝，是华光，国有吉昌，五谷登，

他民归国。

《京房传》曰：树同本异末，君有庆，诸侯朝。

### 木 卒 长

《地镜》曰：国治，树木卒长自大，其君方有嘉。

京房《易传》曰：木成员围以上，一夜长数丈，当有臣强于君。

### 木生君屋上及朝廷

《地镜》曰：木卒生人屋室上，其地出圣人。

京房《易传》曰：木生于君屋，上及朝廷，其君有圣子。

### 木生木及木垂枝

《地镜》曰：木生木，国益土。又曰：木生枝尽向下者，大吉。

### 木偃自起及木生有实

京房曰：有偃木而起，岁有大吉。木生有实，其邑有庆。

### 竹 木 咎 徵

#### 竹木自死疾疫非时枯落

《地镜》曰：竹柏枝遍一百里，是谓阴消阳，国必亡。又曰：竹柏夏枯，王侯失位。又曰：树木非其时而枯，是谓金克伐，不出一年，暴兵外国来。又曰：凡树忽生死，主易兵将至。又曰：社树自死，世主国君亡。

京房曰：有木夏落叶，有兵丧。

京房《易侯》曰：秋叶落七十步，人民移徙；大飞扬，人

民离乡。

《地镜》曰：木叶非时落，去本七十步，国有兵，民弃故乡。

### 木 生 复 死

京房《易侯》曰：枯杨生蕢，断枯复生，天辟当之。

《地镜》曰：竹苇树木枯死忽复生，辅臣执政，流其令。又曰：枯木冬生，谓阴阳易位，不出二年，国有丧，小人近，君子亡。又曰：木实当死者反生，世主凶。

京房《易传》曰：木枯而生，不及二年，国有大丧，上贪色，以宠人为主。又曰：枯杨生花，国后当之。

### 木 冬 荣

《地镜》曰：木冬生，有兵，民流。一曰君失政。又曰：木冬华，当生反死。

京房曰：木冬生，王者不平，有卿相出走。又曰：有木冬荣，黍不成。又曰：木冬生，国后当之。

### 木 再 荣

《地镜》曰：木一岁再花实，有兵，民流。又曰：木再荣，世主堕手，姬女致兵之象。又曰：桃再花，夏有霜；杏再花，夏有电；李再花，春有霜；榆再英，有宽令，当死反生。又曰：木春冬再作实，世主凶；秋夏再花实，邻国逼之。

京房曰：木岁再花，国后当之。又曰：木一岁再实，邻国来其国。又曰：木再荣于夏，后亡，国有丧，若五谷不熟，百姓罢作。

### 桑谷自生朝廷及木生不入土

《地镜》曰：桑谷俱生于庙廷，世主废贤用不肖。又曰：木生不入土而独立，天下危。

### 木卒生道中及木卒枝

《地镜》曰：木卒生道中，君失治，九宫废。又曰：木无故一夜十枝丛生，邑将虚。

### 木伤叶及木自鸣

《地镜》曰：木生一枝偏无叶，岁恶民饥。又曰：木忽自鸣，主死；自鸣作金声者，主地方分裂。

### 木哭泣及出血并生齿

《地镜》曰：树木泣，天下有兵。

京房《飞侯》曰：树哭实，邑虚，虚，邑实。

《地镜》曰：木无故血出及汁流出地，邑败，有兵。

京房曰：伐木有血，侯王有忧。又曰：林木生齿，有兵起。

### 榆荚不落

京房曰：榆荚不落，国受大咎。

### 竹实反枝

《地镜》曰：竹实，众鸟群行，不出二年大饥。又曰：竹忽实而枯，主易民饥。又曰：国中竹皆尽枯，地失。

### 黍稷生疣

京房《易传》曰：黍生疣，大君有忧，相去亡；稷生疣，大君忧，大臣死。

### 蓬叶生

京房《易传》曰：蓬叶繁兴，岁不熟。

## 卷一百一十三 人及神鬼占

### 人名体

《春秋说题辞》曰：人者仁也，以心合也。宋均曰：与他相偶合也。

《易》曰：立人之道曰仁与义。

《春秋繁露》曰：人有三百六十六节，耳目之明，日月之象，外有四支，副时数也，乍视乍瞑，副昼夜也，乍哀乍乐，副阴阳也。

《白虎通》曰：人有五藏六府，所应五行六合也。

《大戴礼》曰：天地人，一二三，三三九，九九八十一，主日，日数十，故人十月而生，人生悻悻然后行，三年头然后合焉。

《孝经援神契》曰：头圆法天，足方象地，五藏象五行，四支法四时，九窍法九州，两目法日月，肝仁，肺义，脾信，心礼，胆断，肾智，旁光须发象星辰，节象月岁，肠法经纬。

人 瑞

真 人

《礼斗威仪》曰：君乘土而王，其政太平，黄真人游于后池。宋均注曰：黄土色，游于后宫之池，则黄帝问道于玄女素女是也。）

孙氏《瑞应图》曰：真人者，黄帝时游于池。王者著德不贪货利，则金人乘金船游王后池。又曰：王者德至，则金人游于池。

玉 女

《礼含文嘉》曰：禹卑宫室，尽力沟洫，百谷用成，玉女敬降养。宋均注云：玉女，有人如玉色也；天降精生玉女，使能养人，美女玉色，养以延寿也。

贤 圣 进

《春秋繁露》曰：君恩及保虫，城郭充实，则贤圣皆进。

郑玄注《论语》云：周公相成王，致太平，时四乳而生八子，皆有贤行，和气之所致也。

长 人 见

《魏志》曰：咸熙二年，晋太子昭封襄武县，言有大人见，长三丈余，迹长三尺二寸，白巾，著黄单衣，黄巾拄杖。或云今当太平。

## 人 怪

### 长 人 入 国

京房曰：君暴乱，疾有道，厥妖长狄入国。

《左传》：文公十一年，败狄于咸。《谷梁》《公羊传》曰：长，狄也，兄弟三人，一者之鲁，一者之齐，一者之晋，煞之，身横九亩，五丈四尺，断其首而载之，眉见于轼，何以书，记异也。刘向以为时周室衰微，三国为大，可责者也。天戒若曰：不行礼义，大为夷狄之行，将致危亡。其后三国皆有篡逆之祸，近下人伐上之病也。

《史记》：秦始皇帝二十六年，有大人长五丈，足迹六尺，皆夷狄服，凡十二人，见于临洮。天戒若曰：大为夷狄之行，将受其祸。是岁秦始皇初并六国，反意以为瑞，销天下兵器，作金人十二像之，自言贤圣，燔诗书，坑儒士，奢淫暴虐，务欲广地，南戍五岭，北筑长城，以备胡越，甃山填谷，西自临洮，东至大辽，东西径数千里，故大人见于临洮，明祸乱之起也。后十四年而秦亡。

### 人走入宫室

《春秋潜潭巴》曰：有人入宫之祸，极效之验也。又曰：有人走入宫，不知其名，大水为灾，国惊，群猾并谋。

《汉书五行志》曰：成帝建始三年七月丁未，渭上女子陈持弓年九岁，言大水至，走入城，入未央宫尚方掖门殿门，门内诸卫户者莫见，至钩盾省乃见，民惊走上城。此下将篡，国因女宠，有宫室之象也。后王氏兄弟父子五侯秉权，至莽卒篡天下。又曰：成帝绥和二年八月庚申，郑通里男子王褒衣绛衣小冠，带钩入北司马殿东门上前殿，入非常室，解帷组结佩之

曰：天帝令我居此署。长业等收缚考问褒，故公车大譙卒应劭曰：在司马殿门，掌譙呵也。病狂易，不自知入宫，后王莽篡之象。

《续汉书》云：灵帝光和中，雒阳男子以弓箭射阙北，吏收考问，辞居贫负责，无所聊生，因买弓箭以射阙，近射妖也。其后车骑将军何苗与兄大将军进部曲相疑，对相攻击，战于阙下，苗死败，杀数千人，雒阳宫室因火延烧尽。

《风俗通》曰：灵帝光和元年，南宫中黄门寺有一男子长九尺，白衣，中黄门吏呵问：汝何等人？白衣妄入宫曰：我梁伯夏，天使我为天子。吏欲收取，忽不见，董卓之应也。

王陵《晋书惠帝纪》曰：齐王冏为大司马，十二月，有白头老公入司马府，大呼有大兵起，不出甲子旬。即收都卫考，竟殉于内外。

《演晋汉春秋》曰：齐王冏辅政，大安元年，有一妇诣大司马门，求寄产，吏乃诘之，妇曰：待我截脐便去。言讫不见。有位者闻而恶焉。至二年而冏被诛。

## 讹言

《汉书王莽传》曰：建国元年，长安狂女子碧呼道中：高皇帝大怒，趣归我国，不者九月杀汝！莽收捕杀之。

《幽州录》曰：吴郡张茂度在益州时，忽有人道：朝廷诛徐羨之、傅亮、谢晦三人。遂传纷纭。张推问造言之主，问何由言此，答曰：实无所承，恍惚不知言之耳。张鞭之，传者遂息。后乃验，日月正与符同。

沈约《宋书》曰：大明二年，民筑治广陵城，刘诞出巡行，有人扬声大骂曰：大兵寻至，何以辛苦百姓！使执之问其本末，答曰：夷姓名孙，家在海陵，天公与佛道共议，欲烧此间人民，道佛苦谏强得，至今大祸将至，何不立六慎门。诞问



六慎云何，答曰：古言祸不过六慎门。诞以其言狂悖，杀之。又五军士忽狂见鬼，惊怖啼哭曰：外军围城。城上张白布帆，执录二十余日乃散。筑城之日，云雾晦螟，白虹临门，连蜀城内。

## 童 谣

《汉书五行志》曰：言之不从，是谓不义，时则有诗妖，君亢阳而虐，臣畏刑而箝口，则怨谤之气发于歌谣，故有诗妖。

《鸿范五行传》曰：下既非君上之刑，畏严刑而不敢正言，则先发于歌。歌，口事也，气逆则恶言至，或有怪谣，以此占之，故曰诗妖。古者人君必视人民，听其歌谣，以省国政。

《左传》曰：僖公五年，晋侯伐虢，八月甲午，围上阳，问卜偃曰：吾其济乎？对曰：克之。公曰：何时？对曰：童谣有云：丙之辰，龙尾伏辰。龙尾，尾星也，日月之会曰辰，日在尾，故尾星伏而不见也。均服振振，取虢之旂。戎事上下同服，振振，盛貌，旂，军之旌旗也。鹑之贄贄，天策焯焯，火中成军，虢公其奔。鹑，火星也，贄贄，鸟星之体也，天策，傅说星，时近日星微，焯焯，无光耀也。言丙子平旦，鹑火中军，事有成功也。此已上皆童谣言也。童子未有念虑之惑，而会成嬉戏之言，似若有凭者。其言或中或否，博览之士能惧，思之人兼而志之，以为炯戒，以为将来之验，有益于世教。其九月十月之交乎！以星验之，知九月十月之交谓夏之九月十月也。交，晦朔交会。丙子旦日在尾，月在策，是夜日月合朔于尾，月行疾，故至旦而过在策。鹑火中，必是时也。冬十二月丙子朔，晋灭虢，虢公丑奔京师。周之十二月，夏之十月也。

《左传》曰：文成之世，童谣曰：鸛之鹄之，公出辱之。鸛鹄之羽，公在外野，往馈之马。鸛鹄跕跕，公在乾侯。徵蹇

与鹄，鸛鹄之巢。远哉摇摇，稠父丧劳。宋父以骄。鸛鹄鸛鹄，往歌来哭。至昭公时，鸛鹄来巢。公攻季氏败，出奔在外，野次乾侯，八年薨于外，归葬。鲁昭公名稠，公子宋立，是为定公。

《异苑》曰：秦世有童谣云：秦始皇，奄僵僵，开吾户，居吾床，饮吾酒，唾吾浆，食饮以为粮，张弓射东墙，前至沙丘当灭亡。始皇既坑儒焚典，乃发孔子墓，欲取经传，圻既启，悉如谣者之言。又言谣文藏在冢壁，始皇甚恶之，反问之，还沙丘而修别路，见群小儿犂沙为阜，问之，云沙丘也。从此得疾而殁。

《汉书五行志》曰：元帝时童谣云：井水溢，灭灶烟，灌玉堂，流金门。至成帝建始二年三月戊子，北宫中井泉水溢出南流，象春秋时有鸛鹄之谣，而后有来巢之验，井水阴也，灶烟阳也，玉堂金门至尊之居，象阴盛而灭阳，窃有宫室之应也。王莽生于元帝初元四年，成帝封为三公，辅政，因以篡位。

又曰：成帝时童谣曰：燕燕尾涎涎，张公子时相见，木门仓琅根，燕飞来，啄皇孙，皇孙死，燕啄矢。其后帝为微行出游，常与富平侯张放俱，称富平侯家人，过河阳公主作乐，见舞者赵飞燕而幸之，故曰燕燕尾涎涎，美好貌也。张公子谓富平侯也。木门仓琅根谓宫门铜钹，服虔曰：门铜根也。应劭曰：门铜铺首环也。苏林曰：钹音环。言将尊贵也。后遂立为皇后，弟昭仪，贼害后宫，皇子卒皆伏辜，所谓“燕飞来，啄皇孙，皇孙死，燕啄矢”者也。又曰：成帝时童谣曰：邪径败良田，谗言乱善人，桂树花不实，黄爵巢其颠，昔为人所羨，今为人所怜。桂树赤色，汉家象，花不实，无继嗣也。王莽自谓黄象，黄爵巢其颠，象也。

《续汉书》曰：更始时，南阳有童谣曰：谶不谶，在赤

眉；得不得，在河北。是时更始在长安，世祖为大司马，平定河北，更始大臣并见煞，是更始之不谐在赤眉也。世祖由河北兴。

又曰：世祖建武中，蜀童谣曰：黄牛白腹，五铢当复。是时公孙述僭号于蜀，时人窃言莽称黄，述欲继之，故称白腹，五铢汉家货，明当复也。述遂诛灭。

又曰：顺帝之末，京都童谣曰：直如弦，死道边；曲如钩，反封侯。案顺帝即世，孝质短祚，大将军梁冀贪，树疏幼，李固以为清河稚性聪明，敦诗悦礼，加以属亲，立长则顺，置善则固，而冀私白太后，策免固，因徵蠡吾侯，遂即至尊。固由是结怨，幽毙于狱，暴尸道路，而太尉胡广封安乐乡侯，司徒赵戒厨亭侯，司空袁阳安国亭侯。

又曰：桓帝之时，京都童谣曰：城上乌，尾毕逋，父为吏，子为徒，一徒死，百乘车，车班班，入河间。河间姹女工数钱，以钱为室金为堂，石上慊慊春黄粱，梁下有悬鼓，我欲击之丞卿怒。案此谣皆谓为政贪也。城上乌尾毕逋者，处高利独食，不与下共，谓人主多聚敛也。父为吏子为徒者，言蛮夷将叛逆，父既为军吏，其子又为卒徒往击之也。一徒死百乘车者，言前一人往讨，广既死矣，后又遣百乘车往也。车班班入河间者，言桓帝将崩，銮輿班班入河间，迎灵帝也。河间姹女工数钱，以钱为室金为堂者，言灵帝既立，其母永乐太后好聚金钱，以为堂室也。石上慊慊春黄粱者，永乐虽积金钱，犹慊慊常若不足，使人舂黄粱而食之也。梁下有悬鼓，我欲击之丞卿怒者，永乐教灵帝使卖官受钱，所禄非其人，天下忠笃之士怨望，欲击悬鼓以求见，丞卿主鼓者，亦复谄顺怒而止我也。

又曰：献帝践祚之初，京都童谣曰：千里草，何青青，十日卜，不得生。案千里草为董，十日卜为卓，青青暴强之貌，不得生者，亦旋破亡也。

《魏略》曰：令狐愚字公冶，太原人，为兖州刺史。愚见吴未平而齐王芳年少，又闻楚王有智勇，初东郡有谣云：白马出河，妖马夜过，官收勒，呜呼众马皆应。明日见迹大如斛，行数里还入河中。又有谣言“白马素鞮西南驰，其谁乘者朱虎骑。”愚既闻此谣，又闻大司马楚王。小字朱虎，故遂与其舅王陵阴谋立楚王。愚病死后发觉，刀割愚棺而戮尸焉。

《吴志》曰：初兴年中，吴中童谣曰：黄金车斑斓，昌门出天子。昌门，吴西郭门也，夫差所作也，其后孙氏兴焉。

《异苑》曰：义熙中童谣云：长作扫帚枢作杷，扫除洛中迎瑯琊。及十一年，晋大军至洛，修复围陵，时封琅邪王也。

《中兴徵祥说》曰：大和中童谣曰：青青御路杨，白马紫缕缰。汝非皇太子，那得甘露浆。又曰：凤凰生一雏，天下莫不喜。本言是马驹，何悟成龙子。是时海西公宠爱殿中，常侍相龙等因共为乱，生子男三人，海西以为己子，将欲立之，既而被废，以马鞮杀三子。三子死之明日，南方献甘露焉。

《中兴徵祥说》曰：隆和中谣曰：升平不满斗，隆和那得久。哀皇闻而恶之，改为兴宁。又谣曰：虽复改兴宁，只自无聊生。寻哀帝中药，不识万几。

《异苑》曰：石勒末年谣曰：一杯水，食者旨，石勒死，人不知，不信我语视盐池。三月忽变而生渥，七月而勒死，池还如先。又曰：苻坚域中谣曰：河水浊复清，苻诏死新城。又谣曰：肩不过项。及其南侵，其相王猛谏曰：童谣有云“肩不过项”，此不宜远行之徵也。不从，果败于寿春之项城。

### 人生角及自出地

京房曰：权臣专政，厥妖人生角。

《汉书五行志》曰：景帝二年九月，胶东人年七十馀生角。角有毛。角兵象，老人吴王象也，年七十七，国象也。时

胶西、济南、临淄、胶东四王谋反，连楚赵，凡七国。

《华阳国志》云：李势未亡之前，涪陵有民头生角，长三寸，凡三截之。

京房《易传》曰：人自地出，君有忧，民散流，国亡地。

### 男 化 为 女

《春秋潜潭巴》曰：小人聚，天子弱，则丈夫化为女子。

京房曰：丈夫化为妇人，兹谓柔胜强，阴胜阳，邦必亡。又曰：男化为女，有异姓来其国。

《蜀王本纪》曰：武都丈夫化为女子，颜色美好，盖山精也。蜀王取为后，后死，蜀王于武都担土，于成都葬之，故地号曰武担，以石镜一表其墓。

《汉书五行志》曰：哀帝建平三年，豫章有男子化为女子，嫁为人妇，生子。长安陈凤言：阳变为阴，将无继嗣，自相生之象，生一子将复一世绝也。

### 女 化 为 男

《春秋潜潭巴》曰：贤人去位，天子独居，则女化为丈夫。

京房曰：女子化为男子，兹谓阴昌，贱人为政，其邦必亡。又曰：君将绝嗣，则君妻化为男。

《纪年》曰：晋定公二十五年，西山女子化为丈夫，与之妻，能生子。其年郑一女生四十人，二十人死。

《史记》曰：魏襄王三年，魏有女子化丈夫。

《续汉书五行志》曰：献帝建安七年，越雋有女子化为男子，时周群上言，哀帝时亦有此，将有代易之事。至二十五年，帝封山阳公。

## 人生而能言

京房《易传》曰：言之不知，则人生而能言，天使代其言也。又曰：人生而能言，言善则善，言恶则恶，此国之徵。

《地镜》曰：多有谗贼，人生而言。

## 人生而能行

京房曰：人生而行，其国大昌其君有忧。又曰：自受其殃，黔首散亡。

《地镜》曰：王事急，民欲流，亡国有兵，则人生而能行。

## 人相食

《续汉书五行志》曰：灵帝建宁三年，河内妇食夫，河南夫食妇。

《异苑》曰：后汉桓帝元嘉元年，任城民妇生儿，即自取食之。又谓姑曰：天使如此，我亦行死尸僵者，门间安歇者，失半覆则尽灭。言毕而匍匐，复产一儿，而两头五人，杨难自王仇池分国之应也。

## 人生子异形

《天镜》曰：妇女一时生三男，不出三年，外国来；生三女，国有阴私。

《春秋潜潭巴》曰：人生五首，猾大起。

京房曰：人生子首在背，天下易乡。

《天镜》曰：人生两首，不出三年，上帝命王征四方，布令天下。又曰：人生四头两目，世主大哀，人生多头，君王有咎，民颠沛流亡。

《地镜》曰：天下忧，主凶民流亡，则人生有四目。

《天镜》曰：人生三目，横兵并起为害。

京房曰：人生子有一目，其国不宁。

《春秋演孔图》曰：崇高将亡，阴不承阳，怨望生，则十口之人出。

京房曰：人生有二口以上，国主见惊以兵。

《天镜》曰：人生两口，五谷不登，百姓丧亡。

京房曰：人生子舌长，天下有兵。人生子有一耳，是谓不聪。人生有三耳以上，是谓多方，其国无王。又曰：是谓多聪，国事无定。人生子有一手，是谓不寿，其国有咎。人生有三臂，有反臣。人生有三手以上，臣谋主。人生三足，是谓非常，天下有兵。

《天镜》曰：人生多足，是谓大役，其国东西移走。人生有三足，不出二年，国有兵丧。

京房曰：人生子有一足，是谓不行，国主亡。人生子有三十指，民流亡。人生子有二鼻，有民谋其主。人生有二背，臣反主亡。

《天镜》曰：人生两身，世主被殃，民人散亡。人生两腹，不出三年，岁太熟，民食足。

京房曰：人生子有三腹，其国分。人生有二腹，是谓恶祥，国主以仇亡。人生子目在首上及后，天子亡。

《天镜》曰：人生目着腹，五谷丰，横兵起。

京房曰：人生子目在项背，天子不安。人生子目在臂及手，天下有大事。人生子目在腋下，天下不相见。人生子目在阴，天子亡位。人生子目在踵及足，是谓下视，天下大兵。人生子口在首上及在后，国主亡。

《天镜》曰：人生子两口在背，国无兵，人民行，五谷昌。

京房曰：人生子口在肢，臣主亡。人生子口在腹旁，天下有兵。一曰为天德，五谷丰熟。人生子口在节，天下民大饥，流亡。人生子鼻在背及项，天下不宁。人生子鼻在首前，太子有殃。人生子鼻在腹，天下大荒。人生子鼻在四肢节，天子亡。人生子鼻在阴，是谓不恒，天子降。人生子耳在首上及前后，天下有兵，民流亡，国君丧。人生子耳在腹，天下兵。人生子耳在背及肩项，天下有忧。人生子耳在四肢及手足，有反主者。人生子腹在背，天下饥。人生子腹在手上前后，天下民饥兵作。人生子腹在四肢足，天下有大兵，又曰天子易。人生子四肢在背，天下乱于兵。人生子阴在首，天下大乱；在背，天子无后。人生子阴在腹，天下有大事。

京房《易候》曰：人生子足小，此谓下约，不出三年，邦消亡。

《汉书五行志》曰：平帝元始六年六月，长安女子生儿，两头异颈，面相向，四臂共胸，尻上有目，长二寸所，若六畜首，目在下，兹谓亡上，政将变更。凡妖之作，以谴失正，各象其类。二首下，不一也，手多所，任邪也，足少，下不胜任也。

《风俗通》曰：灵帝光和二年，洛阳上西门外女子生儿，两头异肩，四臂共胸，俱前向，以为不祥，随地弃去。朝廷变乱，上下无别，二头之象也。

《春秋运斗枢》曰：人主不省山川之祠，州土之位，不应天府，斩伐无度，坏山绝渠，则人生大头。

《天镜》曰：人生子头如囊者，主有咎凶。又曰：人生头大，不出三年，将有大师来伐其国。又曰：人生无头，世主方凶。

京房曰：人生子无目，其国主暴死。人生子无口，其国主见贼。又曰多疾。



《春秋运斗枢》曰：上弊下塞，则人无唇。

京房曰：人生子无唇，是谓不祥，国主死亡。人生子无耳，天子不聪。

《天镜》曰：人生而无口鼻耳，世主凶，其国年熟。人生子无鼻，其国主疾病。人生子无足，岁大饥。人生子无手，主有客兵至。人生子无手掌，世主大忧，疾病。人生无足，世有丧徵也。人生无足，不出三年，其国空。

京房曰：人生子无指，天子有更令。人生子无腹，其国年大熟。人生子无四肢，其国主君臣有反者。人生子无阴，其国主无后。人生子无尻，国主以仇亡。

《天镜》曰：人生子无头，不出三年，有大师来伐其国。人生子无骨，其国主昌。

《魏志》：公孙述时，襄平北市有人生，肉长围各数尺，有头目口喙，无手足而动摇，此赤眚也，占曰：有形不成，有体无声，其灭亡必也。

## 人生六畜

京房曰：人生六畜，是谓更有王，天下易主。人生马，百姓劳苦。人生彘犬，人君失道。人生彘，贵人牵义，民不义。人生六畜形人面者，天子不聪。人生六畜口在手之上及腹，天下有大兵。人生六畜口在腹背胸，天下有反者。人生子人形六畜面，更天子。人生六畜口在阴，天下有恶天子。人生六畜耳在手上，天下有忧，又云有反者。人生六畜耳在四肢，天下有兵，一曰天下大荒。人生六畜耳在腹及胸，天下有反臣。人生六畜耳在阴，群臣常谋天下。人生六畜四肢在腹及首，天下大乱。人生六畜有三首以上，天下乐昌。人生六畜有两身，天下有重兵。人生六畜有三目以上，天下有乱臣。人生六畜有一目，国令不行。人生六畜有两口以上，天下有兵。人

生六畜有三耳以上，天下有大事。人生六畜有一耳，国主不聪。人生六畜有两鼻以上，有谋反者。人生六畜有一足，天下无主。人生六畜有二足，天下有大忧。人生六畜阴在首上，天子失位。人生六畜有二阴以上，国主多子。人生六畜有四肢无节，天下有不善者。人生六畜有二尾以上，国有大事。人生六畜有毛无羽，天子失位。人生六畜有羽无毛，天子无朝之者。人生六畜身半有毛半无毛，国有大事。人生六畜无面，天下兵作。人生六畜无首，天下无主，天子失位。人生六畜无目，社稷亡。人生六畜无口，天下大饥，重有大兵。人生六畜无鼻，天下有灾。人生六畜无耳，天子无令臣。人生六畜无腹，天下大饥，重以大兵。人生六畜无四肢，天子无忠臣。人生六畜无阴，天子无后。人生六畜无骨筋肉，天下昌。人生六畜无尾，是谓无后，近臣反，杀主。人生六畜无毛，天下贫民饥。

《地镜》曰：兵起则人生牛马。

### 人生野兽飞鸟

《天镜》曰：人生野兽，国君兄弟分别，不出一年，夷狄内侵。

京房曰：人生野兽，天下不通。人生野兽，有他变形，天下大兵，凶亡。

京房《易候》曰：人生飞鸟，兹谓不祥，司马将兵，上卿亡。人生子形如飞鸟面者，非常兵行。人生子人面飞鸟形者，大水行，兵战。人生飞鸟有人形体者，天下分。

《天镜》曰：人生飞鸟，君忧，小民散流。

### 人生五谷草木杂物

京房曰：人生子尽为五谷，国民昌。人生子尽为草木，国主死。人生子尽为石，兵强。人生他物，非人所见闻者，皆为

天下有兵。

### 人生龙蛇虫鱼

《地镜》曰：国君见伐，则人生龙。

京房曰：人生龙，有异姓来相其国，君将亡。人生子人面而龙蛇形者，天下有兵。

《纪年》曰：令王四年，碧阳君之诸御产二龙。

人生子人形而龙蛇面者，天下饥，其兵合。人生蛇蜂虺，天下有并民。人生蛇蜥蜴，国破，有丧君走。人生子鱼为首者，有大水。

### 人死而更生

《天镜》曰：人死复生，国有大病，五谷死，兵起。

京房曰：子不三年改父之道，则为私，厥妖人死更生。

《左传》曰：晋杀秦谍于绛，七日复生。

《续汉书五行志》曰：献帝初平中，长沙人姓桓死，棺敛月馀，其母闻棺中有声，发之遂生。至阴为阳，下人为上，其后曹公由匹庶起也。又曰：献帝建安四年，武陵宛县女子李娥年六十馀，死于城外，已四十年，行人闻塚中有声，发出遂活。

京房《易传》曰：死人复行，五谷不登，兵革大起。

### 女生赤毛

京房《易传》曰：人君尊卑无别，则女生赤毛。

## 神 瑞

### 西 王 母

《帝王世纪》曰：舜时群瑞毕臻，昆仑之北，玉山之神，人身虎首豹尾，蓬头戴胜，执几杖，皓然白石，城金室而居，南有青鸟，常为取食，名曰西王母，慕舜之德，来献白环及贡益地图。

《瑞应图》曰：王者承先王法度无遗失则来。黄帝时，西王母使使乘白鹿来献白环。

《大戴礼》曰：舜以天德嗣尧，布恩散德，日月出入，莫不率俾，西王母来献玉琯。《异苑》云：零陵文学奚景于舜庙下得玉琯一，即舜西王母所献玉琯也。汉《律历志》注云：西王母献舜白玉管。以玉为管也。

### 四 海 神

《金匮》曰：武王伐纣，都洛邑，阴寒雨雪一十餘日，深丈餘。甲子朔旦，有五丈夫乘马车，从两骑，至王门外，欲谒武王。武王将出见之，太公曰：不可。雪深丈餘，五丈夫车骑无迹，恐是圣人。太公乃持一器粥，出门而进五车两骑曰：王方未出，天寒，故进热粥以御寒，而不知长幼从何来？两骑曰：先进南海君，次进东海君，次北海君，次西海君，次河伯雨师风伯。粥既毕，使者告太公，太公谓武王曰：此四海之神，王可见之。南海神曰祝融，东海神曰勾芒，北海神曰玄冥，西海神曰蓐收，河伯名为凭，雨师名咏，风伯名飞廉，请以名，前五神皆惊，相视而叹。祝融等皆拜焉。武王曰：天阴，远来何以教之？四海曰：天代立周谨来受命，请敕风伯等各奉其职。

《墨子》曰：郑繆公昼处庙，有神入门而左，鸟身素服三

纯，面状正方。缪公乃惧，神曰：无奔，帝享汝明德，使锡寿十年，使君昌。公问神名，神曰勾芒。

《国语》：夏之兴也，融降于崇山。融，祝融也。崇，高山也，夏居阳越，高山所近也。

### 登 山 神

《管子》曰：桓公北征孤竹，未至卑耳溪十里，援弓将射，未敢发，见人长尺，而人物具冠，右祛衣，走马前疾。管仲曰：臣闻登山之神有俞儿者，长尺，人物具焉，伯王之君兴则见，且走马前导也。右祛示从右涉，至溪，如所言。公拜马前曰：仲父之圣若此。对曰：夷吾闻圣人先知无形，非有形而后知。臣非圣人，臣承教者也。

### 神 女

《瑞应图》曰：美女者，盖神女也，君德被远则至，周穆王时持酒来酌之。

### 神 怪

#### 神 吟 啸

《淮南子》曰：夏桀乱四时之政，黄神吟啸，鬼神失其常。

### 神 降 莘

《左传》庄公三十二年，有神降于莘。有神声以接人莘虢地。惠王问内史过曰：是何故？对曰：周之将兴，明神降之，鉴其德也。将亡，神又降之，观其恶也。故有得神以兴，亦有以亡。虞夏商周皆有之。王曰：若之何？对曰：以其物享焉，

其至之日，亦其物也。享，祭也，若以甲乙日至，祭先脾，玉用苍，服尚青，以此而祭也。王从之，内史过往，闻虢请命，闻虢请于神求赐土田之命。反曰：虢必亡矣。虐而听於神，神居莘。六月，虢公使祝应、宗区、史嚣享焉，神赐之土田。祝，大祝也，宗，宗人也，史，太史也，应，区，嚣，人名也。史嚣曰：“虢其亡乎！吾闻之，国将兴，听于民，政顺民心。将亡，听于神。求福于神。神聪明正直而一者也，依人而行，唯德是与。虢多凉德，其何土之能得！”凉，薄也，谓二年晋灭虢也。

### 回禄神蓐收神

《国语》曰：夏之亡也，回禄信于聆隧。回禄，火神，再宿为信，聆隧，地名也。又曰虢公梦在庙，虢公，王季之子，文王之弟虢公丑也，庙，室庙也。有神人面白毛虎爪，执钺于西阿。西阿，祭也。公惧而走，神曰：无走，帝命曰，使晋袭于尔门。帝，天也，袭，入也。公拜稽首，觉，召史嚣占之，对曰：“如君之言，则蓐收也。天之刑神，刑杀神也。天事官成。官成祸福，各以官象成也。公使囚之，且使国人贺梦。欲转吉，故使贺也。舟之侨大夫也告其诸族曰：众谓虢不久，吾乃今知之。以其贺梦。其适晋，六年虢亡。

### 神致璧

《史记》：秦始皇三十六年秋，使者从关东夜过华阴平舒道，有人持璧遮使者曰：为吾遗镐池君，服虔曰：水神也。张晏曰：武王居镐，镐池君则武王也。武王伐商，故神云。始皇荒淫若纣矣，今亦可伐也。孟康曰：长安西南有镐池也言曰：“今年祖龙死。”苏林曰：祖，始也，龙，人君之象，谓始皇也。使者问其故，因忽不见，置其璧去。使者奉璧具以闻，始皇默然良久，曰：“山鬼固不过知一岁事也。”退言曰：“祖龙者，人之先也。”使御府视璧，

乃二十八年行度江所沉璧也。三十七年，始皇崩于沙丘。

### 神降不见形

《吴志孙权传》曰：太元元年五月，临海罗阳县有神自称王表，周旋民间，语言饮食与人无异，然不见形。又有一婢名纺绩。是月，遣中书郎李崇赍辅国将军罗阳王印绶迎王表。李崇既至，与崇及所在郡守令长谈论，崇等无以易，所过山川，遣婢与其神相闻。秋七月，崇与表至，权于苍龙门外为立第舍。表说水旱小事，往往有验。十一月，权祭郊还，寝疾。二年二月，表亡。至四月，权薨。

### 池 神 见

《幽明录》曰：晋武帝于殿上窗下，清曙忽见一人，著白帋黄绢单衣，举身沾湿，自称是华林罗中池水神，名曰淋泠君也，若善见待，有福祐。时帝饮已醉，取常佩刀空掷之，刀空过无碍，神忽曰：“不以往事垂接，当令知所过。”居少时暴崩。

### 鬼 怪

### 鬼 见

《天镜》曰：鬼见官府及私宅内，失土地之象。

《国语》曰：周之衰也，杜伯射王于郕。注云：常昭曰：郕，郕京也，杜国伯爵，陶唐氏之后也。

《春秋》曰：宣王杀杜伯而不辜，后三年，宣王会诸侯，田于圃，日中杜伯起于道右，朱衣冠，操朱弓矢，射宣王中心，折脊而死也。

《左传》曰：庄公八年十二月，齐侯游于姑芬，遂田于贝丘，姑芬、贝丘皆齐地，田，猎也。见大豕，从者曰：公子彭生

也。公见大豕而从者见彭生，皆妖鬼也。公怒曰：彭生敢见！射之，豕人立而啼。公惧，坠于车，伤足丧屦。

《汉书五行志》曰：高后八年三月自灊上还轺道，见物如苍狗，撼高后腋，怒，见赵王如意为祟，遂病腋伤而崩。先是，后杀如意。

### 鬼 掷 人 屋

《天镜》曰：鬼掷人屋扣门户，如贼盗劫人，不出一年，民人疾病。

### 鬼 呼

《墨子》曰：夏桀之时，鬼呼于国。

《天镜》曰：鬼呼，大人当之，是谓丧亡，不出一年，天下争地。一曰哭祖民分散。

《述异记》曰：吕光永康二年，有鬼叫于都卫曰：兄弟相灭百姓毙，两口绝祀。吏寻声视之，则靡所见。是年光死，娇子绍立五日，绍庶兄纂篡绍自立。明年，纂弟车骑大将军常山公征伐，屡有战功，疑纂不已，帅众攻纂，所杀无穷，常酗游走无度，明年，因醉为从弟超所杀。超推兄隆为主，姚兴因遣叔父征西将军陇西公硕德伐之，隆师徒挠败，乃称蕃于姚氏。三年，遂为姚氏所灭。

### 鬼 吟 哭

《墨子》曰：夏桀之时，鬼叫于国。商纣之亡，有鬼宵吟。

董仲舒《五行逆顺》曰：人君简宗庙，不祷祝，咎及于外，则鬼夜哭。

京房曰：国虚空，人君有尸禄，则鬼夜哭。



《晋阳秋》曰：苻坚未败，常安市鬼夜哭，一月乃止。  
京房曰：鬼夜哭，国将亡。

## 卷一百十四 器服休咎城邑宫殿怪异占

### 器用休徵

琅玕 白玉 白玉赤文

《孝经援神契》曰：神灵孳液，百宝为用，则琅玕景。宋均曰：事神明得理则琅玉有光景也。

《礼稽命徵》曰：王者得理制，则泽谷之中有白玉出。

《礼稽命徵》曰：王者制礼作乐，改损祭器，得鬼神之助，则有白玉赤文，像其威仪之状。

玉英 玉璵 玉典

《瑞应图》曰：王者五常并循，则玉英见。又云：王者服饰不侈，则出又自正，饰服不逾，祭服乃出。

《孝经援神契》曰：玉英，石华，王者尊卑不失其服则见。又曰：神灵孳液，则有玉英。宋均曰：玉有英华也。

《瑞应图》曰：玉璵者，师旷时来至杂紫绶。又云：王者慈仁则玉典见。

玉 璜

《尚书大传》曰：周文至磻溪，见吕尚钓鱼，文王拜尚云：望钓得玉璜，剡曰姬受命，佐桀德，合于令昌，来提。郑玄云：得鱼，鱼中得玉璜也。佐桀犹助，提者取也。半璧曰璜。

《瑞应图》曰：王者循五常则出。

## 玉璧 玉瓮

《瑞应图》曰：王者贤良美德，则白玉出。

《中兴徵祥说》曰：王者不隐其过，则玉璧见。愍帝建武元年，江宁民虞迪垦地，得白玉麒麟玺一枚，文曰长寿万年。安帝义熙十二年，左卫兵陈阳于淮水中得玉玺一枚。

《瑞应图》曰：玉瓮者，圣人应也，不汲自盈，王者饮食不流离下贱则出。

## 玄珪

《尚书璇玑铃》曰：玄珪则出，刻曰延喜。禹功既成，天佩以玄珪也。

《瑞应图》曰：王者勤苦以忧天下，厚人薄己，卑宫室而尽力乎沟洫，则玄珪出。禹时天以赐禹。又云：四海会同则玄珪出。

## 金车 金胜 银瓮

《瑞应图》云：王孝至孝，仁德广施，则金车出。舜时见于帝廷。

《孝经援神契》曰：金胜者，象人所饒胜而金色，四夷来即出。

《瑞应图》曰：世无盗贼凶人，则金胜出。又曰：浸润不行，奸盗静谧，绋绣不用，则见。

晋《中兴徵祥说》曰：金胜者，仁宝也，不琢自成，光若水月，四夷宾服则出。穆帝永和元年，阳谷民得金胜一枚，长五寸，状如织胜。后桓温平蜀路，此四方来服之应也。

《瑞应图》曰：王者宴不及醉，则银瓮出。

### 明珠 明月珠 珠英 珠镜 地珠

《礼记威仪》曰：君乘金而王，其政象平，则海出明珠。

《援神契》曰：王者德至渊泉，则海出明珠。珠可照暗也。

《瑞应图》曰：明月珠者，介鳞之物、鱼盐之税通乎什一，则海出明珠以给王者。

《礼记威仪》曰：君乘土而王，其政太平，远方神献其珠英。有神圣故以其地所生来献。舜时西王母献益地图玉琯者是也。

《援神契》曰：神灵孳液，百宝为用，则珠镜见。事神明得理则大珠有光耀，可为镜。

《瑞应图》曰：王者以才为宝，则地珠出。

### 大贝 琉璃碧

《礼记威仪》曰：君乘金而王，其政荡平，则海出大贝。

《援神契》曰：德至渊泉，则江出大贝。

《运斗枢》云：先德则江吐大贝。

《瑞应图》云：王者不贪财宝，则海出大贝，大可盈车。又曰：王者不匮则出。

《援神契》云：王者行政，神明得理，则琉璃碧见。

《瑞应图》曰：王者不多取妻妾，则碧琉璃见。

### 苏胡钩 珊瑚钩

《援神契》曰：王者要誓信，则苏胡钩出。

《瑞应图》曰：王者弃玩好之物，则苏胡成其钩而出。

《瑞应图》曰：王者敬信则珊瑚钩见。

### 神 鼎

《瑞应图》曰：神鼎者，质文之精也，知凶知吉，知存知

亡，能重能轻，能不炊而沸，不汲而满，中五味。黄帝作三鼎，象三辰。大禹治水，收天下美铜以为九鼎，象九州也。王者兴则出，衰则去。

《说苑》曰：汉孝武帝时，汾阴得宝鼎而献甘泉宫。群臣上寿贺，皆曰得周鼎，侍中吾丘寿王曰：“周德始于后稷，长于公刘，大于太王，成于武王，显于周公，德泽上畅于天，下漏于泉，上天报应，鼎为周出。今汉自高祖以继周，昭德显行，六合和同，至陛下而愈盛，天照有德，而宝鼎自至，所以遗汉，此汉鼎，非周鼎也。”上曰：善。群臣皆称万岁，赐寿王黄金十斤。

晋《中兴徵祥说》云：王德盛则神鼎见。神鼎者，仁器也，不炊而沸，不汲而满，烟焜之气自然而生，世乱则藏于深山，文明则应运而至，故禹铸宝鼎以拟之。成帝咸康八年，阳谷民刘珪夜见光，取得鼎一枚，外围四寸，此文明之应也。

### 丹甌 瓶瓮

《援神契》曰：丹甌者，不炊而自热，五谷丰穰则见。

《瑞应图》云：王者弃淫污之物，则丹甌出。又曰：化行年丰即出。

《瑞应图》云：瓶瓮不汲自满，王者清廉则出。又曰：接于末贱则出。

### 白 裘

《瑞应图》曰：王者以身率先人恶衣服而致美乎黻冕，则献白裘。禹时渠搜民乘白马来献。《禹贡》：渠搜，山名。西夷衣皮，见禹功成，皆来服也。又云：王者政本五行，教民种植，以事其先，则献白裘。又云：王者德茂，不耻恶衣，则四夷来献白裘。黄帝时，南夷乘白鹿来献白裘。

## 器服咎徵

钟自移 种自鸣 钟不鸣

《天镜》曰：钟自鸣，移处，君不安，不出年。

《春秋潜潭巴》曰：天子钟自鸣，下土动兵。

《兵书》曰：钟无音，士卒怒，欲攻战。

鼓自鸣 鼓不鸣

《潜潭巴》曰：库兵动，鼓自鸣。

《天镜》曰：鼓忽夜鸣，有敌人来。

《兵书》曰：金鼓无故自鸣，军中当罢，且有功名。

《兵书》曰：金鼓无故忽无音响者，邑且降。

《汉书五行志》云：李陵击匈奴夜击鼓起士，不鸣，陵曰：吾士气少衰而鼓不起，何耶？军中是有女子乎！搜军中，得卒妻皆斩之。

角自鸣 角不鸣 巾箱中有鼓角声

《天镜》曰：国君角自鸣，有伐者。

《天镜》曰：角吹而不鸣，不宜征伐。

《异苑》曰：晋孝武大元末，每闻巾箱中有鼓吹鼙角之声。又曰：护军府军铠甲铮铮有声，遭王敦之变。

刀剑自拔自鸣

京房曰：君刀剑无故自拔，与其室相去，君且杀。

《地镜》曰：刀剑无故自拔出及光有声者，忧，兵伤若有血汗。

京房云：君刀剑无故自鸣，他人无闻者，而君独闻之，妻

妾且杀其君。

《兵书》曰：将军剑无故自鸣，他人不闻，己独闻之，此名妇为人杀之象。

### 忘 豹 尾

《晋中兴书》曰：海西公初即位，忘设豹尾。圣人所以豹变也，而海西豹变之日，非所忘之时，天戒若曰：忘其豹尾，亦不能终也。

### 车奔 鼎沦 鼎震

《天镜》曰：国君车奔，不出三年，有丧事。

《墨子》曰：桀无道，九鼎沦。

《洪范五行传》曰：周烈王二十三年，鼎震，金失也。金震，木动之也。鼎者宗庙之器，鼎震，木沴金失之象。

### 冶 铁 飞

《汉书五行志》曰：武帝征和二年春，涿郡铁官销铁，皆飞去。其三月，涿郡太守刘屈氂为丞相，后月巫蛊事忽兴，帝女阳石公主与太仆公孙敬声下狱死，掘蛊太子宫，太子与母皇后议，恐不能自明，乃杀江充，举兵与丞相屈氂战，死者数万人，太子败走，至湖自杀。明年，屈氂复坐祝诅腰斩，妻梟首。成帝河平二年正月，沛郡铁官铸铁不下，隆如雷声，又如鼓音，工十三人惊走，竟还视地，地陷数尺，炉分十二炉，中销铁散如流星。时王凤为大司马大将军，秉政，丞相王商与凤有隙，凤谮之，免官自杀。

### 灶 鸣

《地镜》曰：宫中灶及釜甑鸣响者，不出一年，有大丧。

郭璞《洞林》曰：卷令施安上家釜九鸣，旬月之中，寻有九丧。

### 白 中 水 出

京房《易传妖占》曰：白水出，大臣咎。

《地镜》曰：水忽出臼中，臣为咎，且将大水。

《帝王世纪》曰：初力牧之后曰摯，其母曰始朵，居伊水之滨，梦神告己曰：臼出水而远，走无顾。及明，视臼中有水，即告邻而走，东十里乃顾，其地尽为水矣。

伏候《古今注》曰：成帝建始二年，太原祁安县民石臼中水出如流状，稍益至满臼，民夜谣曰：水大出，走上城。后三年，女子陈持弓闻谣言大水至，走入掖门，至省中，官吏大惊，上城。

### 秤斗改小 饮食自亡

《天镜》曰：人君改小秤衡斗桶，是谓裂德，五谷不入仓，民流亡，大饥。

京房传曰：君饮食无故自亡，君且失位，凶。

### 床自动 床自亡 帐幕自动

京房传曰：君床无故自动，君且移居。

《兵书》曰：将军坐床无故自动，臣下欲杀之。又曰：君床无故自亡去，君且去。

《兵书》曰：将军帐幕无故自动，人散走，各归其乡。

### 羽 扇

晋《中兴书》曰：旧为羽扇柄者，剡木以象骨，用十毛取全数也。中兴初，王敦始改用长柄，使下出可提，减其羽用八

识者，以为柄使可执用，是敦执国柄之象也，毛减用八者，是羽翮损少之应也。

### 幘 头

晋《中兴徵祥说》曰：太元中，人不复着幘头，亦服妖也，象人君独立无亲戚也。

《天镜》曰：人君及民无故违国制，服上古之服，是谓悖德，君臣有反政。又曰：好作大衣，下臣悦。又曰：无故小其衣服，不出三年，边有急兵，若外国来降服，后大凶。又曰：好小衣，臣自用。又曰：人君好为短小之衣，兵革，不出六年，边城有相犯，君弱臣强。又曰：好着黄者太平，好着白，兵，好着青，年中熟。

京氏云：民人皆好素服者，民多丧，期三年。众人好学诸侯之服，而高其衣服，不出五年失民。

### 假 髻

《左传》曰：郑子臧好聚鹖冠张晏曰：鹖鸟赤足黄文，以其毛饰冠。韦昭曰：鹖禽翠，鸟也。郑文公恶之，使贼杀之。刘向以为近服妖者也。一曰非独为子臧之身，亦文公戒也。初文公不礼晋文，又犯周天子命而伐滑，不尊敬上，其后晋文伐郑，几亡国。

### 冠 坠

《汉书五行志》曰：昭帝时，昌邑王贺遣中大夫之长安，多治仄注冠，应劭曰：今法冠是也。李奇曰：一云高山冠，本齐冠也，谒者服之也。赐大臣，后又以冠奴。刘向以为近服妖也。时王贺狂悖，闻天子不豫，弋猎驰骋如故，与驹奴宰人游居娱乐，骄慢不敬。冠者尊服，奴者贱人，贺无故好作非常之冠，



暴尊象也，以冠奴者，当自至尊坠至贱也。

### 冠衣改变

《续汉书》曰：“灵帝光和四年，作列肆于宫，彩女为商贩，更盗窃，帝著尚服，饮食宴观以为乐。又于西园与狗著进贤冠，带绶，又驾四驴车，帝躬自操辔驰骋，此服妖也。后天下乱。

《搜神记》曰：晋中兴，著帻者以带缚项下，逼上，上无地也。

《续汉书五行志》曰：献帝建安中，男子之衣好为长身，而下甚短，女子好为长裙，而上甚短。时益州从事黄嗣以为服妖，是阳无下而阴无上，天下未欲平也，后遂大乱。

《搜神记》曰：吴景帝以后，衣服之制，长上短下，又积领五六而裳居一二，故归命放情于上，百姓惻于下之象也。晋兴后服，上俭下丰，又为长裳以张之盖，上衰弱下放纵也。

衣服汗血 衣服自亡

衣服有光 衣自出匣

《兵书》曰：将军衣无故自汗血，臣下欲杀之。

京房曰：君朝服无故自亡，君有事，臣大凶。

《兵书》曰：衣无故自亡，将且死，人家亦然。

《异苑》曰：晋惠帝羊皇后将入宫，衣中忽有光若火，后藩王搆兵，四废四立，及洛阳失御，复为刘曜所嬖。

《汉书》曰：平帝元始元年二月乙未，义陵寝衣在匣中，忽出在床上。又曰：王莽传杜陵便殿乘舆，宫府衣在藏中，忽自倒去外堂上，良久委地。莽恶之。

### 绶带有光 履改变

《天镜》曰：印绶有光者，免官，带有光，贺事。

《搜神记》曰：昔初作履者，妇人员头，男子方头。员者顺之义，盖作者之意，所以别男女也。履者所履践而行者也。太康初，妇人皆方头履，言去其从，与男女无别。

### 履自着足 履自亡

京氏曰：君履无故自着于君足，有远行。

京氏曰：君履无故自亡，君且不复远行。

《天镜》曰：人君履无故夜亡其处，近臣为践。

### 败屨自聚

《搜神记》曰：元康之末以至于太安之间，江淮之域有败屨自聚于道，多者至四五十量，余尝视之，时人散而去之，明日悉复。或见狸衔而聚之。说者曰：屨，人之贱服，处于下，当劳辱下民之象；败者，疲毙之象；道者，地理四方所以交通。王命所由败，屨聚道，民罢病，将搆聚为乱。后张昌逆乱。

### 城邑宫殿怪

#### 邑壅成山 邑没为池

《地镜》曰：邑无故壅成山，是谓阳反为阴，君淫，为妇人所谋，不出一年兵起。又曰：邑没为池，是谓侵阳，人主征发无道，不出一年，兵马兴。

## 门 崩 坏

京氏曰：上下咸悖，厥妖城门坏。

《天镜》曰：君门倾，君不安上。

《洪范五行传》曰：秦世都门无故崩。都门者，秦东郭门，通山东者也，亦崩者，象赵高杀二世。时外降政内败。一曰西郭莫崩而东独然，又先崩者，象山东兵至灭坏，出二世不逾，楚汉之兵皆自都门而入，此皆内不平外不敬之所致。

《汉书五行志》曰：景帝三年十二月，吴二城门倾，大船自覆。刘向以为近金沴木，木动也。先是，吴王以太子死于汉，称疾不朝，阴与楚王戊谋为逆乱。城犹国也，其一门名曰楚门，一门名曰鱼门，吴地以船为家，以鱼为食。天戒若曰：与楚所谋，倾国覆家，吴地以王。不寤。正月与楚俱举兵，身死国亡。又曰：宣帝时，大司马霍禹所居第门自坏，时禹内不顺，外不敬，见戒不改，卒受灭亡之诛。又曰：哀帝时大司马董贤第门自坏，时贤以私爱居大位，赏赐无度，骄慢不敬，大失臣道，见戒不改，后贤夫妻自杀，家徙合浦。

《续汉书》曰：桓帝延熹五年，太学门无故自坏，裴楷以为太学者教化所居，其门自坏，文德将衰，教化废也。是后天下遂至大乱。

《魏志》曰：黄初二年春，文帝幸许昌，城南门无故自崩，帝心恶之，遂不入，还洛阳。五月帝崩。

晋《中兴徵祥说》曰：元兴二年，大船门层屋自坏。船门者，盖古之鸡门，都城之门也，王者所由出入，是孝安静默警蹕之响未尝至于鸡门，而桓玄之篡乘间也。

## 门关折 门钥自亡

《地镜》曰：城门关无故自折，将有贼至，为人所开，邑

败。

京氏曰：君门户自亡，其君且杀。

《汉书五行志》曰：成帝元延元年，长安章城门牡自亡，函谷关决门牡自亡。晋灼曰：牡，出钥也。孟康曰：决门，聚落门也。谷永对曰：章城通路寝之路，函谷关阻山东之险，城门关守，国之固，固将去焉，故牡飞。

### 门自开闭

《天镜》曰：昼夜门自开闭，方有大兵至，大忧。

京房传曰：君门户无故自阖，臣杀其君。又曰：国门无故夜自开，且有昼闭之忧。

《天镜》曰：殿阁门夜自开，其下方有大兵。

《地镜》曰：人家门户无故自开自闭，有力兵事。

京房传曰：城门无故不可开，邑有忧。又曰：君门无故不可开者，君凶，人家亦然。

《地镜》曰：凡门无故不可开，是谓戒过，不出三年，必有兵从近城郭起。

《洪范五行传》曰：燕王明光宫卧内三户闭不可开，王使二十余人疏户，终不开，久甚。王意以为内有人，使奴踞屋视，内中无人。小臣者赵圣推户，户开，视其户不开。夫户以出入屋室者也，无故不开，且不居也。

### 屋室自坏

干宝《晋纪》曰：武帝太熙元年，太庙梁折，四月，世祖崩。

晋《中兴徵祥说》曰：大兴二年，吴郡米庀无故坏。米庀货余之屋，无故自坏，天戒若曰：五谷踊贵，无所余买，不复须屋。是岁人大饥，饿死者十二三万。又云：王敦在武昌架屋五

间，已构五木，一宿梁坠地，楸在柱上甚危。无几作乱，敦灭。

### 殿名妖异

晋《中兴徵祥说》曰：烈宗起清暑殿，识者非之。清暑楚声今起，殿以楚之声为号，非吉祥，后桓楚篡。

《续晋阳秋》曰：桓玄在姑熟起斋，画为龙，名曰盘龙斋，及败，刘毅居之。毅小字盘龙。

### 城郭宫阙有声崩侧

《天镜》曰：城郭宫阙廷栋梁头鸣，不出二年二月，国亡削地。

京氏曰：邑城门无故夜鸣，邑有大丧，人家亦然。

《地镜》曰：邑城门忽夜鸣者，将有兵丧。

《王莽传》曰：天凤二年，朱鸟门鸣，昼夜不绝也。

王隐《晋书》曰：城有声若牛，出许昌城，此应主，为侯怀太子。

《潜潭巴》曰：宫柱自鸣，下土诸侯号有声。

《天镜》曰：宫殿廷门自鸣，动摇有声音，不出三年，有流血交兵，从近臣亲戚起。

京房传曰：邑君屋无故自动，动而大声者，邑且虚。

《天镜》曰：君府门阁自鸣，强兵方至。京氏曰：君室中无故有人声，且有大奸。又曰：君室殿无故有哭声，国家大凶。又曰：贱人将贵，则城复于隍。

### 社鸣及自移

《潜潭巴》曰：里社鸣，此里有圣人其响，百姓归之，天子走。鸣则教令行善，汤放桀也，响，鸣之怒。

京房曰：社鸣，实邑虚，虚邑实。又曰：里社鸣，圣人出。又曰：社树自移，君有大行，有凶，移来国昌。

### 市惊及出泉

《天镜》曰：民人市惊，大兵至，失政之象也。

京房曰：市人无故自惊者，春惊期一年，夏惊期二年，秋惊期三年，冬惊期四年。案《掘镜》曰：叛兵起，失政之象也。又曰：天不雨，泉肆自出泉，百姓乱。又曰：泉肆无故自出泉，民人相食，君肆无故自出泉，将军与相为乱。一曰国内乱期三年。

### 城庙宫殿濡湿

京房曰：天不雨，庙自濡者，其国大饥，人主当之。

《天镜》曰：人君宫殿门墙润濡，不出一年，狱失囚。又曰：宫殿及垣墙无故汁出如水，濯之状不出，八十日亡国。

《述异记》曰：宋临王子项在荆州，永光元年，所住庭柏折栋裂，并自濡湿汁滴地，明年被诛。

京房曰：天不雨而城自濡者，其国大溃乱，相当之。

### 宫殿自动

《天镜》曰：人君宫阙宫廷门户无故自动，不出期年，有流民，且交兵。

京房曰：君宫室无故自动者，且为兵墟。

### 宫殿臭 宫室柱生芝

《天镜》曰：宫殿中及宫府间闻腐臭，不出一年，有暴丧，若妇人暴死。又曰：宫殿闻血腥腐臭，是谓不出一年有大水流血。又曰：宫殿中闻焦臭，是谓移妖，不出一年，以火为

灾。又曰：宫殿闻臭，是谓阳动，不出一年，宗庙社稷移徙。

《握镜》曰：宫室屋木无故生芝者，白为丧，赤为血及火，青为狱，黑为贼，黄为吉。

### 宫殿生点 宫殿瓦自坠 宫殿柱自鸣

《地镜》曰：宫室中壁无故生点者，白为丧，赤为血及火，青为狱，玄为虚耗亡遗，黄为吉。

《潜潭巴》曰：宫瓦自坠，诸侯强凌，主身不祥。又曰：宫室柱自鸣，下土诸侯号有声。

## 卷一百十五

### 鸟 休 徵

#### 凤 凰 鸾

《尚书考灵曜》曰：通天文者明，审地理者昌，凤凰下之。

《地镜》曰：凤凰赤精，项颡德。

《尚书中候》曰：尧即政，凤凰巢阿阁。

《礼斗威仪》曰：君乘土德而王，其政太平，凤凰集于苑林。

京房曰：凤凰来仪，翺翺其羽，兹谓休德。

《抱朴子》曰：古者太平之世，凤凰常居其国而生光。

《淮南子》曰：凤凰之翔，至德也。

《礼稽命徵》曰：父子君臣夫妇尊卑有别，凤凰至，飞翔盛于明堂。

京房《易候》曰：鸾见于国，天下大安。

《中候》曰：周公归政于成王，鸾凰见。

### 白鸟 白燕

《地镜》曰：众庶感则白鸟来。

《瑞应图》曰：白鸟者，宗庙肃则至。

京房《易妖占》曰：山见白燕，其君且得贵女。

《地镜》曰：妾媵有制，白燕来巢。

### 朱雀 黄雀

《地镜》曰：赤雀衔书，文王德。

《瑞应图》曰：赤雀者，王者动应于天时，则衔书来。

《礼稽命徵》曰：祭五岳四渎得其宜，则黄雀集。

### 白鸠玉鸡 比翼鸟 三足鸟 鸛巢园树

《瑞应图》曰：白鸠，王者养耆老，尊道德，不以新失旧则至。又云：玉鸡者，王者德令神明则出。

《地镜》曰：王者德綦高远，则比翼鸟来至。又曰：王者德不任卜筮，则三足鸟来。

京房曰：鸛巢园树，岁安熟。

### 鸟 咎 徵

### 鸾三指 鹊巢宫阙及巢军 鹤巢树

《地镜》曰：鸾三指，其下不以德，所下之国有易王。又曰：鹊巢门殿，上贤据代之，世主衰失之象。

京氏曰：鹊巢军旗鼓上，将军死。又曰：鹤巢树，此谓失教，邑亡岁苦，人多死。



### 燕群及市朝树 燕衔土 燕雀斗

京房曰：燕群斗，外内饥于寇，国兵起。

《地镜》曰：玄鸟群见，水大兴，女主持政，兵革且起，不出四年，王道绝。

京房曰：燕自经市朝之树，为政者凶。

京房曰：燕衔土出之，国益土。又曰：燕衔土出置之，邑中虚。

《地镜》曰：雀与燕共斗，内寇乱，此国兵起。

京房曰：燕与雀斗，贱人为寇。

### 鸡非时鸣

《易通卦验》曰：万民闻鸡鸣，皆翘首结带，正衣裳。

京房曰：鸡无故夜鸣，必有急令。又曰：鸡据栖而鸣，邑令不迁，乃免也。

《地镜》曰：鸡昏鸣者，世主任女人，为政乱。又曰：鸡夜鸣，天子适有急令，戎马兴。

京房曰：鸡夜半中鸣，有军军罢，若有惊亡，将军妻死。又曰：鸡晨昏鸣，人民有事；人定鸣，且战；夜半鸣，流血滂沱。又曰：鸡不以时鸣，国当之。

《地镜》曰：鸡飞及走且鸣，天子退声。又曰：雌鸡作雄鸡鸣，女主乱政，家则妻妾奸媒，女人忧。

京房曰：雌鸡非时而雄鸣者，家大伤。

### 鸡不上栖及不下栖 雌鸡冠距生

《地镜》曰：鸡不肯上栖上树者，凶。又曰：鸡日中不下栖，女主乱政，家则妻妾奸谋，女人忧。

京房《易候》曰：鸡逐日不下树，其邑必有水忧。

《地镜》曰：雌鸡转腹生冠距，女主乱政，家则妻妾奸谋，女人忧。

《河图》曰：鸡有六指杀人。

### 鸡与野鸟斗戏

京房曰：鸡与野鸟飞走，入人堂而斗若戏，其君不复居，人主亡。又曰：鸡与野鸟斗，其邑乱，臣弑君，大臣相戮，流血滂沱。又曰：鸡鸟相斗，其国杀大臣，有丧邑，流血。

《地镜》曰：鸡与野鸟斗，君杀国乱。

### 鸡不鼓翼及窥井 鸡自飞翔及五色

京房《易候》曰：鸡不鼓翼，国受大咎。

《地镜》曰：鸡窥井，牢狱事。

《地镜》曰：鸡无故自飞翔去，家有蛊。

《河图》曰：鸡有五色，杀人。又曰玄鸡头食病人。

### 鸡自来及自死 鸡与鸟淫

《地镜》曰：他鸡无故飞来不去家者，暴死。又曰：鸡无故自死，家虚耗。又曰：鸡与鸟淫，世主内乱，外臣有谋，横兵方起。

### 鸡生子异形

京房曰：鸡生子不完，其邑忧。又曰：鸡不卵，生子无羽而兽形，邑虚。又曰：鸡不卵而生子非鸡形者，邑有大水。又曰：鸡不卵而生子为六畜形，邑有兵作。又曰：鸡不卵而生子为鼠者，邑有大害。又曰：鸡不卵而生子为野兽形者，邑有大忧。又曰：鸡不卵而生子有六畜形，邑有忧。又曰鸡卵中尽为虫蛇蜂蝇，国邑虚。

《地镜》曰：鸡生子杂异形，皆为兵水忧。

## 卷一百十六

雉立宫门上及入宫止君室上

京房曰：雉无故立宫阙门上，其主且去宫殿。又曰：雉无故巢邑君屋上，且大事，宫虚。

京房曰：雉止君屋上，为虚，不可居，君当之。

《地镜》曰：雉入宫室，其主去宫。

京房云：雉无故入人室庭，家虚。

雉相戏及巢木上并自死宫中

《地镜》曰：雉无故相戏，其主且去宫。雉自死宫中，其主去宫。

京房曰：雉无故巢木上，水大至。

雀巢木及穴地 雀不见及客雀来

京房《易候》曰：雀巢于木，兹谓伤禄，必有弃职。

《地镜》曰：雀皆巢木上，大兵起。

京房曰：雀无故巢木，岁大水，兵起。又曰：雀无故穴其地，邑有兵。

京房曰：雀不见，岁饥。

《地镜》曰：客雀从他所来，岁中谷贵，民移徙。又曰：阳雀大众多，先水后旱，冬有兵，君无恩。又曰：水雀衔鱼置宫寺室上，不出三年，水出坏邑。又曰：水雀下竹，女主执政，忧，有水出。又曰：水雀下杨柏，君行阴道，不出三年，军行。

《遁甲至哉铃》曰：赤雀不见则无贤，白雀不降则无后

嗣。

### 鸬移巢 鹊集鸣城室及木上

京房曰：邑鸬巢去树木之地若室上，谓去常居，亡地且兵。

《地镜》曰：鹊集城上及室上，鸣而泣，皆为兵且起，邑将虚。

### 鹊夜鸣及群饮井 鹊群下集地及巢军

京房曰：鹊夜鸣，且必有甲兵。

《地镜》曰：鹊夜飞鸣，兵且起，邑将虚。又曰：鹊群饮井中，兵且起，邑将虚。又曰：鹊群下集地，兵起，邑将虚。

京房曰：鹊巢军起，资屋空虚。

### 鹊相斗及自死

《地镜》曰：鹊相斗死，为兵起，邑将虚。又曰：鹊自死宫中，兵起邑虚。

京房曰：鹊无故自死，宫中主死。又曰：鹊无故自死君宫室门上，有喜，及屋上亦然。

### 伯劳鸟鸣聚 乌巢集军

《地镜》曰：伯劳斗屋上及呼不止，不出六十日祸起。

京房曰：伯劳鸟鸣，为怪，君室凶。又曰：伯劳鸟聚军中，岁大水。又曰：伯劳鸟聚军中，大水且至。

京房曰：乌巢军旗鼓上，将军死。又曰：乌集聚军中，将军出令，增秩应之。

### 鸛鹄巢宮室 鸛鹄鳴巢宮室上

《地鏡》曰：鸛鹄巢宮室，不出三年，夷狄內侵。又曰：鸛鹄鳴人君屋上及巢屋，大水且至，民流散，國將亡。又曰：鸛鹄巢門殿上，賢據代之，世主衰失之象。

### 鳥巢宮闕上

《地鏡》曰：野鳥巢宮室，不出三年，夷狄內侵。又曰：鳥巢城上及其下，不出一年，忧被围。

京房曰：鳥无故巢于門上及殿下，宮邑且虛，其屋巢者，為不終歲，無兵者兵作。

### 眾鳥鳴泣城邑門闕 眾鳥夜鳴

《地鏡》曰：鳥鳴君門上作人聲，君亡。又曰：眾鳥集木上鳴而泣，兵且起，邑將虛。

京房曰：眾鳥皆无故自立城，泣人家室上者，國且围，家亦然。又曰：飛鳥无故泣而立於野及木上，鳴而相應，邑有大兵。又曰：眾鳥无故立城，泣邑門上，其邑且虛。又曰：鳥鳴門闕上如人音，邑且亡。又曰：眾鳥群鳴城上，聲習習，實邑。又曰：眾鳥鳴回軍中，必暴戰，不出三四日中。

京房曰：眾鳥夜鳴，且必有甲兵。

《地鏡》曰：眾鳥夜鳴，為兵且起，邑將虛。

### 鳥止入宿宮闕城邑

京房曰：鳥无故群立君門上者，其君死。又曰：眾鳥集止城上，內向則邑見围，外向邑大兵行。又曰：眾鳥栖城上，內向則凶，外向破于兵。又曰：日有非常之鳥來宿于邑，此謂斂吏，邑有兵。又曰：飛鳥皆无故自入，宿邑中及附木身，不大

凶即邑虚。又曰：野鸟飞入君室，其邑虚亡，之他方。又曰：鸟无故群宿邑中，其邑虚。

《地镜》曰：非常鸟来宿邑中，此名斂殃，流血滂沱。鸟或黄身黑翼白头股赤喙足也。

《地镜》曰：野鸟飞入宫，其君方去。

### 鸟死宫中及集宫殿城邑

京房曰：众鸟无故自死宫中，其君死。

《地镜》曰：众鸟自死宫中，兵起邑虚。又曰：飞鸟群聚宫殿中，主失国无后主。又曰：众鸟集城及室上鸣而泣，皆为兵且起，国将虚。

### 鸟翔宫邑上

《地镜》曰：鸿鸟之属翔府国宫府上两时以上，或至三日，群谋将起，大兵将至。又曰：野鸟群翔邑上，邑且虚，市上亦然。又曰：飞鸟俱翔障日，臣下有谋，宜警之。邑中终岁无鸟，兵起。

### 鸟飞舞于市及饮井 鸟巢井中及集地

京房曰：飞鸟无故飞舞于市，邑且有兵。

《地镜》曰：众鸟群下饮井中，兵且起，邑将虚。

《地镜》曰：大鸟巢井中，贼弑君。又曰：众鸟群下集地，兵且起，邑将虚。

### 鸟斗死及与兽斗 鸟异形

《地镜》曰：众鸟相斗死，为兵且起，邑将虚。又曰：飞鸟与四足斗，横兵方起。

京房曰：飞鸟与野兽斗，国有殃。

京房曰：众飞鸟有人形，为兵。又曰：众飞鸟为兽形见，即大人忧。又曰：众飞鸟为六畜形，见则有兵。

### 鸟集故墟及冬卵 野鸟入邑及却飞

京房曰：故墟无人，众鸟集之，必复居。

《地镜》曰：众鸟冬生子，此不祥，君有祸。

京房曰：有白文鸟居野，不及三年，有死君，此旱祥也。

《地镜》曰：野禽鸟入人家，勿煞之，有殃。又曰：鸟却飞，世主失国。

《黄帝占》曰：天下有鸟毛羽五色者，雄名曰最，雌名曰极，此鸟见，天下大凶。小见可，若普见，天下大灾。

### 鸟巢军资及集军中

京房曰：鸟巢军资，屋空虚，又曰：鸟集众军中，将出令增秩应之。又曰：鸟集军中，人皆不知其名，此为劳军，必败。又曰：野鸟群入军，室必灭。又曰：众鸟群飞军上太多，战必败，兵且罢。又曰：军中入飞鸟止军上，万数止其上，将军应死。

## 兽 占

### 兽 休 徵

#### 麒麟

京房《易传》曰：麒麟，麋身牛尾马蹄，有五彩，腹下黄，高丈二尺，毛长。

《瑞应图》曰：麟者仁兽也，牡曰麒，牝曰麟，羊头鹿

身，牛尾马蹄，黄色圆顶，顶有一角，角瑞戴。

晋《中兴徵祥说》曰：麟者应也，盖与圣为期应也。角上有肉，示不伤也。

曾子曰：麟，毛虫之精，阳气所生。

《鹖冠子》云：麟，阴之精。

《抱朴子》云：麟，兽之圣也，寿二千岁焉。

《说文》云：麟者，仁兽也，麋身牛尾，狼蹄肉角，一角角端有肉，王者至仁则出。今并州有麟，大小如鹿，非𪚩也。

《礼记》曰：王者之嘉。又曰：圣王用水火金木，饮食必时，颁爵位必当年德，无昆虫之灾、凶饥妖孽之疾，则天不爱道，地不爱宝，人不忧情，则麒麟在近郊。

《春秋感精符》曰：麒一角者，明海内共一主也。王者不刳胎，不剖卵，则出于郊。又曰：王者德旁流四表，则麒麟至。

《春秋考异邮》曰：王者功平则麟至。

《礼记威仪》曰：君乘金而王，其政象平，则麒麟在郊。麟，木精也。文子曰：主有积德者，天兴之，地助之，鬼神辅佑之，则麒麟在郊。

何休注《公羊传》曰：麟角戴肉，设武备而不为害，所以为仁也。上有圣帝明王，天下太平，乃至。

孙卿子曰：王者好生恶杀，则麒在郊野。

《春秋繁露》曰：恩及羽虫，则麒麟至。

蔡氏《月令章句》云：视听孔修，则麒麟至。

《尚书中候》曰：黄帝时，麒麟在囿。麒似马无角，麟似麋而一角。

《汉书》曰：武帝元狩元年，幸雍祠五畤，获白麟，作《白麟之歌》。应劭注云：武帝获白麟，为瑞，乃铸黄金为麟趾，以协嘉祉焉。案晋武帝时白麟再见。



## 白泽 飞黄 驹騊 𩇑𩇑

《瑞应图》曰：黄帝巡于东海，白泽出，能言语，达知万物之精，以戒于民，为除灾害。贤君德及幽遐则出。《抱朴子》云：黄帝穷神知奸者，出于白泽之辞也。

《淮南子》曰：黄帝治天下，物无分争之心，日月星辰不失行，风雨时，五谷熟，于是飞黄伏皂。又曰：天下有道，飞黄服皂。注云：飞黄出西方，状如狐，背上有角，乘之寿三千岁。伏皂历而食焉。郭璞注《山海经》云：乘黄即飞黄也。《周书》：黄吕狐，背有两肉角也。

《瑞应图》云：王者舆服有度，秣马不过所乘，则地出乘黄。

《瑞应图》曰：驹騊者，幽兽也。明王在位则来，为时除灾害。又曰：德盛则至。

《山海经》曰：有兽异状如马，名曰驹騊。又曰：𩇑𩇑者，后土之兽也，自能言语，王者仁孝于民则出。禹治水有功而来。

## 周市 角端

《瑞应图》曰：周市者，神兽名也，星宿之变而见，王者德盛则至。又曰：角端日行万八千里，能言，晓四夷之语，明君圣主在位，明达方外幽隐之事，则角端奉书而来。

## 獬豸 𧈧

《说文》曰：獬豸似牛一角，古者决讼，命触不直者。

《瑞应图》曰：獬豸，王者狱讼平则出。

《神异经》曰：獬豸毛青似熊，性忠直，见人斗则触不直者，闻人论则咋不正者。

《论衡》曰：獬豸者，一角之羊也，性知有义。皋陶治狱，其罪疑者令羊触之，有罪则触之，无罪则不触。斯盖天生一角圣兽，助狱为验，故皋陶跪座事之，则神奇瑞应也。

《瑞应图》曰：兕知曲直，王者狱讼无偏则出。

郭璞注《山海经》云：兕似青牛色，一角，重三十斤。

### 犀角戴通

《援神契》曰：神灵孳液，百宝为用，则犀角戴通。注曰：案《交州记》云：犀毛如豕蹄，有三甲，头如马，有二角，鼻上角长，额上角短，浮着肉，不连骨也。《南州异物志》云：犀如象大，色正乌，似毫猪，神者角有光耀，白日视之凡犀，暗夜视之，皆烽火从甲中出，望如炬火。以角冒地，飞鸟走兽皆惊，或一角、两角、三角。《抱朴子》曰：通天犀角，有一白理如绀者，以盛米，置群鸡中，鸡辄惊，故名曰骇鸡犀。得其通天以刻为鱼，衔以入水，当为开，方三尺所得气息。《淮南子》云：犀置狐穴，狐不敢复居。郭璞注《山海经》云：犀角似象，食棘，口中常流血。案平帝章帝时，黄支国献犀牛，章帝时日南献白犀也。

### 白象

《援神契》曰：神灵孳液，百宝为用，则白象素象至，色白如素也。

《瑞应图》曰：王者政教得于四方，则白象至。得字当作行。又曰：王者自养有道，则白象负不死药来。

### 驺虞 白虎

毛萇注《诗》曰：驺虞，义兽也。白虎玄文，不食生物，有至信之德则应之。

《援神契》曰：王者德至鸟兽，则白虎动。晋《中兴徵祥说》曰：王者仁而不害，则白虎见。白虎者，仁兽也，虎而白色，缟身如雪，无杂毛，啸则风兴。昔召公化行陕西之国，骆虞应焉。

《宋书符瑞志》云：王者不暴虐，则白虎而不害。

《感精符》云：将兴，白虎戏朝。戏汤朝也。

《括地象》曰：圣王感期而兴，则有玉虎晨鸣，雷声于四野。

### 白獐 五色鹿 白鹿

《瑞应图》曰：王者德茂，则白獐见。注云：案宋文帝时，华林园白獐生二子，皆白。又元帝时，白鹿再见。宋文帝、孝武帝并获白鹿。何法盛、沈约皆以白鹿附白獐焉。又云：天鹿纯灵之兽，五色光耀，王者孝道备则至。

《礼记威仪》曰：君乘水而王，其政和平，则北海输白鹿。

《援神契》曰：王者德至鸟兽，则白鹿见。

晋《中兴徵祥说》曰：白鹿者，仁兽也，王者明惠及下则见。色若霜雪，白牝牡，不与紫鹿为群。注云：周平王时，白鹿见。汉章帝西巡日，白鹿见于临平观。

《天镜》曰：王者仁明则白鹿至。又曰：爱民人，白鹿见。

### 赤熊 赤罴

《瑞应图》曰：王者奸宄息，则赤熊入国。注云：案宋文帝时白熊见。沈约《符瑞志》曰：附赤熊。

《瑞应图》曰：王者远佞人，除奸猾，则赤罴见。

《天镜》曰：王者武功过乱，则赤罴出。

## 白狼 白狐 玄狐

《瑞应图》曰：王者仁德明哲，则白狼见。又曰：王者进退依法度则至。周宣王得之而犬戎服。

《尚书璇玑铃》曰：白狼衔钩入殿朝。注云：钩，缚束之要。案《帝王世纪》曰：汤得天下要地，有神獐白狼衔钩入殿朝。

《瑞应图》曰：王者仁智明则白狐出。又曰：王者仁智动，唯法度，则见。

《天镜》云：王者德和则白狐来。又曰：成王时太平，则玄狐见。

## 文狐 九尾狐

《礼斗威仪》曰：君乘火而王，其政讼平，则南海输文狐。

《瑞应图》曰：王者德及禽兽，则南海输文狐。

《援神契》曰：德至鸟兽，则狐九尾。宋均注云：王燕嘉宾，则狐九尾也。

《淮南子》曰：狐九尾者，九配得其所，子孙繁息，明后当旺也。

《瑞应图》曰：六合一统，则九尾狐见。一云：王者不倾于色则至，文王得之，东夷服。

《吕氏春秋》曰：禹年三十未娶，行于涂山，思时晚，慕失制，乃曰：吾之娶，心有应焉。乃见白狐九尾而造于禹。禹曰：白者服也，九尾其徵矣。涂山人歌曰：绥绥白狐，九尾庞庞。成家成室，我都在昌。禹因娶涂山氏女。

陈思王《上九尾狐表》曰：黄初元年十一月二十三日，于甄城县北见众狐数十，首在后，大狐在中央，长七八尺，赤紫色，举头树尾，尾甚长大，林丛有之甚多，然后知九尾狐斯诚

圣王德正和气所应也。

### 赤兔 白兔

《瑞应图》曰：王者德茂，则赤兔也。

晋《中兴徵祥说》曰：白兔，仁兽也，王者尊敬耆老则见。

《天镜》曰：人君好赒贫，则白兔见。

《瑞应图》曰：王者敬事耆老，则白兔见。又云：王者应事疾则见。注云：《春秋元命包》曰：兔者月明之精也。

《玉策记》曰：兔百岁则色白也。

### 一角兽 三角兽 比肩兽 六足兽

《瑞应图》曰：天下太平，则一角兽至。又云：六合同归，则一角兽至。又云：王者法度修明，三统得所，则三角兽至。

《天镜》曰：王者承光法度，无所造次，则三角兽至。

《瑞应图》曰：王者德及幽隐，鰥寡得所，则比肩兽至。又云：王者谋及众庶，则六足兽至。

### 兽 咎 徵

#### 麒麟执

《春秋合诚图》曰：苍帝将亡，则麒麟见继。

《公羊传》曰：襄公十有四年春，西狩，获麟，麟者仁兽，有王者则至，无王者则不至。有以告者，麋而角者，孔子曰：孰为来哉？反袂拭面，涕沾袍曰：吾道穷矣！

《五经异义》：公羊说：孔子获麟，天命绝周，天下叛去为贼。

狸力 猾褢 朱厌 狢狢 朱儒 蜚

《山海经》曰：峩山有兽，其状如豚，有距，其音如狗吠，其名曰狸力，见则其县多土功。又云：尧光之山，有兽如人而彘鬣，其名曰猾褢。滑怀两音。或曰：署褢其音如斫木，如人砍木声。见则其县有大徭。谓作役也，或曰其县乱。又云：小次之山有兽焉，其状如猿，而白首赤足，名曰朱厌，见则为兵。又云：余我之山有兽，状如兔，鸟喙鸱目蛇尾，见人则眠，名曰狢狢。仇余两音。其鸣自叫，见则蟊蝗为败。又云：耿山有兽，状如狐而鱼翼，其名朱儒，自呼见，国有恐。又云：太山有兽焉，其名蜚，行水则竭，行草则死，见则大疫。

### 象

《运斗枢》曰：变江淮之祠，斩伐无度，则瑶光不明，象负车奔。象八足，阴敖翔。注云：象，太阴之物，八足是欲行之八方之远，臣如此，自恣之甚也。

《东观汉记》曰：桓帝延熹五年，有惊马逸象入宫殿，国灾。

白虎执 虎断道人国  
虎食人 虎衔鱼 虎相食

《合诚图》曰：白帝亡则白虎执。

京房曰：虎断道，边国谋。又曰：白虎入国邑，野人为政，危其宗族。

《地镜》曰：虎入国，国将空荒。

京房《易传》曰：君行无道，将害民庶，虎食人。

《运斗枢》曰：君失恩于小民，则虎衔鱼。

《地镜》曰：虎相食，不出三年，国荒。

### 虎牛尾无口目 虎两口 虎两足

《河图说微示》曰：主无德，则虎牛尾无口目，名曰乱朝。

《潜潭巴》曰：有虎两口，君出走，诸侯绌。虎可畏，今复两口，象大臣欲有所咀嚼也。

《地镜》曰：世主方起，大臣遭罪，则虎有两口。

《晋杂事记》太康六年，南阳献两足虎。干宝曰：虎金精，南阳火也，金入火，刑王室，乱妖也。

王隐《晋书》曰：中宗诏问王隐曰：荆州送两足虎，其徵何为也？隐曰：谨案先臣铨传，太康时两足虎，因作诗以讽。铨意以晋金行也，金在西方，其兽为虎，虎有四足，犹国有四方：无半势，而又见获，将有愍怀之祸也。

### 麋入宫 麋入国

晋《中兴徵祥说》曰：兴宁元年十月，麋入于东海王宫。麋，主也，将为天下主之徵。后哀帝崩，东海王即位。

京房《易候》曰：麋入都而国虚。又曰：麋见于邑，有臣戮。又曰：麋入市，邑有忧。

《地镜》曰：麋入国，国方见屠。

《洪范五行传》曰：庄公十七年，冬多麋牝。兽之淫莫大于麋，麋，迷也，庄公悦郑詹之言，取齐淫女。刘歆以为毛虫之孽，刘向以为麋色青，近青祥。

### 候鹿解角 鹿入宫 熊入宫

《易通卦验》曰：鹿者，兽中阳也，兽者阴，贵臣之象，鹿应阴解角者，夏至太阳始屈，阴阳相向，君臣之象，今失节不解，阴不变阳，臣不承君之象，故为贵臣作奸。

京房《易候》曰：鹿入宫都而国虚。

《论衡》曰：汉中王筑宫楼未成，鹿走上阶，其后果薨。

《汉书》曰：昌邑王贺闻人声，曰熊，视而见大熊，左右莫见。王以问郎中令龚遂，遂曰：熊山野之兽，而来入宫室，王独见之，此天戒大王，恐宫将空虚之象也。贺不改寤，后卒失国。

### 狼入国绕军 狼食人

《吕氏春秋》曰：乱国之妖，有狼入国。

京房《易候占》曰：君失春政，则苍狼入于邑；君失秋政，则白狼入于邑；君失冬政，则黑狼见于邑。又曰：狼逐家人犬者，夷狄且来，入君邑中。又曰：狼鸣于邑中，邑且空；狼伏邑中，有兵。又曰：赤狼见于国，不出三年，必有大祸，野人为政。

《抱朴子》曰：有狼狐绕军而鸣者，军败。又曰：君无道，则狼食人。

### 狐一头两身 五狐入室上屋

### 狸三头 獭不祭鱼

《火异图》曰：王公不祇上命，刻暴百姓，人民吁嗟，则一头两身狐见。

京房曰：狐逐家人犬者，夷狄且来，入君邑中。又曰：狐入室，必有大丧，将出室不居。

《地镜》曰：狐入室，有暴丧，上屋亦然，以淫危主。

《河图说微示》曰：狸三头名曰𧈧，见则女害。

《通卦验》曰：獭不祭鱼，国多盗贼。



### 兔两头 兔生雉 兔入宫 兔止宫城

《运斗枢》曰：女两舌则兔两头。

《吕氏春秋》曰：乱国之妖，有兔生雉。

《握镜》曰：兔上城及入宫中，不出一年主死。

京房曰：兔入于王宫，其君亡。

京房曰：兔无故入宫，溃其宫矣，家亦然。又曰：兔止城上，邑必虚，入宫殿，生子，其宫且空，生草木矣。又曰：兔无故入宫殿生子者，宫有忧。又曰：兔无故宿及守之，其邑君死，兵小行。

王隐《晋书》曰：王后在薨时，有谣曰：出城门，以望户中，有伏尸，王彭祖，有野狐，踞后府门。后为石勒所杀。

### 鼠群行 鼠却行

京房曰：鼠群行，有水，期一年。又曰：鼠无故群不居穴，众聚居殿中者，其君死。

《地镜》曰：鼠无故群行，不畏人，昼为饥，夜为兵。又曰：鼠群行入廷，豪侵弱。又曰：或道中有兵丧。

京房曰：鼠无故却退而前尾者，邑有忧。

### 鼠鸣朝市 鼠舞朝市

京房曰：鼠无故群相随，朝夕鸣，邑且为湖泽，期一年至。又曰：鼠无故朝时入暮时当朝邑门而泣，邑且空虚。又曰：鼠相斗，其君死。

《地镜》曰：鼠无故自向城若市朝而大鸣，皆为兵丧。又曰：鼠聚朝廷市衢中而鸣，地方屠裂。又曰：鼠泣啜啜，为兵丧，在家人凶。

京房曰：鼠无故舞于朝市，其邑有大丧。又曰：鼠无故舞

邑门外，厥君亡；于廷中道上，其邑有大兵。

《地镜》曰：鼠无故舞戏，游走大道，君当之，若家主当之。

### 鼠积土 鼠巢木上 鼠食木实五谷

京房曰：鼠无故皆自积土，大水且至，水去邑饥。

《兵书》曰：鼠薮军中，将有谋反意。又曰：野鼠在此中者，军必败。

京房曰：鼠无故巢木上，邑且大水。

《汉书》：成帝建始四年，长安城南有鼠衔黄蒿柏叶，上民家柏及榆树为巢，时议臣以为恐有水灾。穴而登木，象贱人将为显贵之位。

《潜潭巴》曰：鼠食木果，众臣不任，害贤人也。

《对灾异》曰：人君斥贤任佞，众谗在朝，而鼠群行，食五谷。

《地镜》曰：鼠食木实上树，邪臣害贤，俗败也。又曰：人君用刑深刻，吏为阴贼，上下无德，则群鼠害禾谷。

### 鼠逐狸 鼠斗及生子杀子

京房曰：众鼠逐狸，兹谓有伤，臣代其王，思为乱，天辟亡。又曰：鼠无故逐狸狗，是谓反祥，臣且杀其君。又曰：众鼠逐狸，杀其君，大臣亡。或曰诸侯以妇女诛，异姓来相国者也。

《地镜》曰：鼠斗宫殿上，为兵丧；自杀其子亦然。

京房曰：鼠无故皆自相杀，斩其首道中者，兵作。又曰：鼠斗殿上，其君死。又曰：鼠生子女中而不穴，宫且空。又曰：鼠无故杀其子，若自出穴，其子死于穴中，其邑且虚。

### 鼠穴殿冠带履

京房曰：鼠无故穴殿上宫中，其君死。

《地镜》曰：鼠无故常穴人履冠带，其身危。

### 鼠啮殿上地穿门户宿褥席上 鼠交殿上

京房曰：鼠无故啮殿上及寝庙中地，其君死。又曰：鼠无故穿殿上及室中，邑舍空。又曰：鼠穿门户，外内通明，大喜。又曰：鼠穿门户，下彻外，有迁者。又曰：鼠无故自常宿褥席中，身死。又曰：鼠交殿上，其君死。

### 鼠啮杂物

京房曰：鼠啮人杖，主被伤。又曰：鼠啮马蹄，行破亡。鼠啮履头，家有丧，急去之。又曰：鼠啮牛角及蹄，不行。又曰：鼠啮冠，即其身死，若有丧。又曰：鼠啮人带，有利，吏被选，断之狱辞连。又曰：鼠啮刀剑，奴妾不祥，后有殃。又曰：鼠啮官府文书曳尾，官府有赦。又曰：鼠啮衣背上，唯有丧。又曰：鼠啮上衽，有利，囊得财。又曰：鼠啮人鼻，且有丧。啮人头，男子伤，洗浴吉。鼠啮人者，有谋贼人。鼠啮人足，有行事去而吉。鼠啮人颊，必被辱若丧。啮人手指，奴婢死。鼠啮人耳目，有欲为贼者。鼠啮人发，是谓御者，女子大贼。鼠啮人织布帛，伤衣，丧。鼠啮祭物，家丧。鼠啮宫中树木枝叶，家有贼。鼠啮床席中央，夫妇杂叙。鼠为怪凶者，伤，丈夫为之烧铁门户，无咎。

《地镜》曰：鼠啮人衣，有斗争事。

### 五股翼九足蝮生冠 兽从地出

《运斗枢》曰：废江淮山渚之祠，则瑶光不明，股翼九

足。又曰女舌蛭生冠。

《握镜》曰：凡四足兽从土中出，殃，至六足兽，上无齿，主增地。

### 野兽入宫邑

京房《易候》曰：野兽入居室，兹谓不转德，室不居。

京房曰：野兽大小入邑中及王朝廷若大道上，邑有大害，君亡地，有流血。野兽无故入邑居朝廷门及官府中，邑廷且虚，家无人。野兽群鸣，邑中且空虚。野兽自经于市中，邑且大岁凶。野兽入军中，将军大战必败，急祭祀鬼神以救之。野兽鸣军中，大邦小，小邦大。野兽生子邑中者，其邑大虚。

《地镜》曰：野兽入宫门及寺门，用事者罢。野兽入城郭，臣下迷惑，有兵。野兽上城入宫中，不出一年，主死。

### 野兽死邑中 野兽却行

京房《易妖占》曰：野兽无故自死邑中门者，国且空。

《天镜》曰：野兽自死在市道侧，邑中兵方大起。

《握镜》曰：野兽却行，君当为臣。

### 野兽与六畜飞鸟交及斗

《地镜》曰：野兽与飞鸟斗，兵作。野兽与家畜来斗，他国来伐国。

《握镜》曰：野兽来与家六畜交，此人君淫于外国，妇女以淫为行，且失国。野兽与马交，国淫乱。

京房曰：有四足与飞鸟斗，有兵作，大臣去。又曰：野兽来与家畜斗，有邻国来伐，国将亡。

## 野兽生子异形

京房曰：野兽生子有人形者，且易其主。野兽生子为蠹虫如蜂形，天下且更令。野兽生子为彘，走入君室，邑且亡，社稷为人所攻。野兽生子为蛇者，其邑有大事。野兽生子其足多者，邑有忧。野兽生子足少者，邑有丧。野兽生子其口多者，邑有兵。野兽生子其目多者，邑君忧。野兽生子其目少者，邑有急兵。野兽生子无目者，其邑有忧。野兽生子无耳鼻，其邑有兵。野兽生子耳鼻多者，其邑有行兵。野兽生子耳鼻少者，邑有大兵起。野兽生子无尾者，邑无后。野兽生子其形不居其处者，皆为兵事。

## 卷一百十七

### 牛 休 徵

#### 金 牛

《瑞应图》云：王者土地开辟，则金牛见。注云：案《交州记》曰：九真群居风山，有金牛时时见，光照数十里。又武昌郡有金牛冈，冈边石上有牛迹焉。又《罗浮山记》云：增城县有牛潭，潭侧有圆石，金牛出时，盘此石上，有周灵潜往掩击，得金锁三尺许。牛出水时，有五色光。又吴与巴及淮南并有金牛，皆带金锁也。

#### 牛 有 上 齿

《地镜》曰：世主治而增地，则牛有上齿。

## 牛 咎 徵

### 牛舞 牛悲鸣

《握镜》曰：牛忽舞戏军中，军罢还乡。《天镜》曰：牛如舞，其国将亡。

《潜潭巴》曰：宫殿中有牛悲鸣，政教衰，诸侯并。牛者兵之符也。注云：牛有角，兵象也，鸣喻教令也。

京房曰：牛无故夜皆鸣，且有暴兵，牝牛善牡鸣及于大道上，邑有大兵。

《运斗枢》曰：主忧下愁阴类逆，则牛哭于田。

### 牛 能 言

《吕氏春秋》曰：乱国之妖，牛能人言。

京房曰：牛能言，如其言占吉凶。

《搜神记》曰：晋太安中，江夏郡功曹张𨔵乘牛忽言曰：天下方乱，吾甚疾焉，乘我何之！𨔵惧，中道而反。犬又曰：归何早也？安陆县有善卜者，𨔵从人占之曰：大凶，非惟一家之祸，亦天下将有兵乱也。后一郡皆破亡。𨔵还，牛又人立行，百姓聚观者众。其秋张昌乱，一郡残伤者大半，𨔵家族灭。

### 牛从地中出 牡牛生子

《天镜》曰：牛从土中出者，不出千日，有兵，民流亡。

京房曰：牛自地中出，邑中有兵，小民破亡，君有丧，不出三年。

《天镜》曰：牛从地中出，不出二年，有大殃。

京房曰：牡牛有子，其君无后。

## 牛生子异形

《运斗枢》曰：人君七政错糴，下情暗，上不明，则牛五头不能行。五头喻五方，不肯趋上命也。

京房曰：牛生子一首二身，其邑分；牛生子二头，天下分。胡氏之象也。

《天镜》曰：牛两头，军分为两。

《搜神记》曰：元帝大兴中，割晋陵郡封少子以嗣太傅东海王，俄而世子母石婕妤疾病，使郭璞筮之，遇明夷之既济，曰：世子不宜裂土分国，以致患悔，母子并贵之咎也。法所封内当有牛生一子两头者，见此物则疾瘳矣。其七月，曲河县陈门牛生子两头，郡县图其形而上之，元帝以示石氏，石氏见而有问。或问其故，晋陵土，上所以受命之邦也，凡物莫能两大，使世子并其方，其气莫以取之，故致两头之妖，以为警也。

《河图说徵示》曰：人主失国无民，见牛四角二足。

京房曰：牛生八足，上有三首，邑增地；君任邪佞，则牛两头八足二尾。又曰：牛生子三角，其邑且有兵。牛生三目以上，邑有贼臣。臣多口，则牛四目在背。牛生子三鼻，其邑有兵。牛生子鼻一孔，邑作事不成。君臣不听事，则牛一耳。牛生子三耳以上，邑大乱。人君众恶同志，至德潜隐，兴徭役，夺民时，则牛生五蹄。民人徭三月，邑有贼臣，则牛二尾。牛生子三阴已上，君多子。牛生子目在腹下及旁，邑且有事。牛生子口在腹下及在头上，邑有大事。牛生子口在四肢，邑君亡。牛生子口在背，其邑臣口舌。牛生子耳在腹下，民大饥。牛生子耳鼻在腹及背，其君相谋伤。牛生子鼻在四肢上，邑有大贼。牛生子足在腹，邑徙。牛生子尾在腹，邑大徭。牛生子尾在四肢，邑君易。牛生子无首，邑无令君，不吉。牛生子无

鼻，民太息。牛生子无尾，民贫士弱。牛生子无毛有羽，邑君亡。牛生子无阴，其君无子，君无子则牛无阴。牛生子无足，其邑谷不成。牛生子足在背，邑且有大兵。兵行，徭役夺民时，厥妖牛生五足。牛生子三足，其邑君有久疾。

《灾异图》曰：王公侯刺史不祇上命，克暴百姓，则牛八足。

《汉书五行志》曰：秦文公五年，游胸衍有献五足牛者。刘向以为近牛祸也。先是文惠王初，都咸阳，广大宫室。足者止也，戒秦建止奢泰也。又曰：景帝中元六年，梁孝王出北山，有献牛足生背上者。刘向以为近牛祸。先是，孝王骄奢，起苑方三百里，宫馆阁道相连，欲求为汉嗣。足出于背下，奸上之象也。

《异苑》曰：晋永嘉中，曲阿陈人家牛生两头犊。建武中，曲阿牛生犊一躯两头。永昌元年，江北郭洗牛生两头八足。咸和元年，护军营牛生两头六足。太元中，蜀人献角牛，奋头则角耳摇。石虎时，犝牛水道在腹下。宋元嘉中，仓谷王石丰家牛生尾在额上。元嘉十四年十月，东阳留元子家牛生两头犊，堕地便矫健善走，元子射之乃死，以呈郡守，荀伯子余亲睹焉。广汉戴道周元嘉中牛生犊，有脚而无脊骨也。

## 牛 生 人

京房曰：牛生人，民流亡。牛生人，一身二首，其邑昌。牛生人，一身三首，其邑有兵。牛生人，一身二首，无口三鼻，一鼻在项，一鼻在颊，其邑有兵不远。牛生人，一身一首，无目，一耳，相臣有兵。牛生人，一身二首，无目三耳，一耳在项，一耳在颊，其邑有兵。牛生人，一身三首，一鼻在项，一鼻在颊，女人治其政。牛生人，一身二首，无耳，三口，一口在颊，民饥。牛生人，一身二首，无耳，三口以上，



一口居顶，一口居颊，人民饥。牛生人，一身三首，二口，无耳，一口在顶，民惊兵，君乱亡。牛生人，一身二首，无耳，三口，一口在颊，一口在股上，民且大惊，其邑有乱亡。牛生人，一身三首，三耳，无目，一耳居顶，耳居颊，其邑有兵，民多流亡。牛生人，三头三面，有军行。牛生人，一首四面，其君亡地。牛生人，一首二口，其邑大饥。牛生人，一首一鼻，邑民贫。牛生人，一首三日以上，天下有争者。牛生人，一首三耳以上，邑治且乱。牛生人，一首一面，天下有争者。牛生人，一身项以上无，其邑有兵。牛生人，二首以上，其臣有反者。又云邑有大疾。牛生人，三足以上，民多相谗。牛生人，三臂以上，其邑兵行。牛生人，三阴以上，其国有谋臣。牛生人，目在腋下，其君且凶。牛生人，目在腹，天下诸侯杂居；目在背，其邑有大臣反。牛生人，目在足下，此谓不亲，其邑有大谋。牛生人，鼻在腋下，主令不行。牛生人，鼻在足，民哭。牛生人，鼻在腹，其邑谷不成。牛生人，鼻在背，其民多。牛生人，口在腹下，邑有火。牛生人，口在背，邑得利，臣有凶事。牛生人，腹在胫，邑有饥。牛生人，阴在背腹，其君有大事。牛生人，无鼻，邑有丧。牛生人，无耳，有鬼惊人者，相主走。牛生人，无足，其邑不种。牛生人，无臂，其邑疾。牛生人，无体，其邑有事。牛生人，无腹，其邑饥。牛生人，人身而六畜面者，此则不吉，臣下不受命。牛生人，人身而鸟头面者，邑有兵。牛生人，人面而六畜身者，此谓不祥，其邑有兵。牛生人，人面而犬身，其邑苦。牛生人，人面而野兽身者，邑有亡地。牛生人，人面鱼身，邑有水。牛生人，人身而虫蛇面者，其邑亡地。牛生人，人面而虫蛇身者，此邑皆空。

## 牛 生 六 畜

《天镜》曰：牛生六畜，兵且作，其君不安。

京房曰：邑更主则牛生六畜。牛生六畜，其邑女子为主。君不安宅，则牛生马。牛生马，兵将作，人零落，不安宅。牛生六畜人形者，其邑更主。牛生六畜，一身一首，君亡。牛生六畜，二鼻以上，其君有兵。牛生六畜，二口以上，邑有兵。牛生六畜，三耳三口以上，邑亡地。牛生六畜，无目，其邑令不行。牛生六畜，无四肢，主不治。

### 牛生野兽飞鸟 牛生鱼

牛生野兽，天下不通。牛生野兽，似人形，其邑有兵。兵大作，则牛生鼠。国有兵水，则牛生飞鸟。牛生飞鸟鸣者，有他变，且为兵水。

京房曰：天下虚则牛生鱼。

### 牛生五谷屎金铁石木草土布帛 牛疫

京房曰：牛生五谷，其邑昌，且大穰。牛生土及屎土，邑地大昌。牛生金铁，其邑有兵。兵强主武，则牛生石。牛屎生草木，其君死。牛屎布帛，其君有令。

《握镜》曰：牛大疫，觔草动，主用兵，杂城郭，不出三年，有大殃。

## 卷一百十八

### 马 休 徵

#### 神 马

《援神契》曰：王者德至山陵，则泽出神马。宋均注云：神马巡狩四方。《典略》曰：神马者，河之精也。

晋《中兴书徵祥说》曰：孝武帝大元十四年六月，宁朔州刺史贾统上言，晋宁须池县此月辛亥有马二匹出于河上，一白一乌，盘戏相逐河水上，从卯至巳乃没。

#### 龙 马

《尚书中候》曰：尧励德匪懈，万民和欣，龙马衔甲，赤文绿色，龟背，袤广九尺，五色，额下有赤文似字。注云：龙形象马，赤燦怒之，使甲所以藏图。王者有仁德则龙马见也。其文赤色而绿地也。

《瑞应图》曰：龙马者，仁马也，河水之精，高八尺，长头，身有鳞甲，鬣上有翼，旁有垂毛，鸣声嘎嘞，蹈水不没，有明王则见。又曰：王者不储秣马，则龙马乘黄泽马白马朱鬣并集矣。

#### 腾黄 飞兔 骀𤛎 泽马 玉马 驳马

《瑞应图》曰：腾黄者，神马也，其色黄。王者德被四方则至。一名吉光。乘之寿三千岁，以马无死时。又曰：飞兔者，马名也，日行三万里。禹治水有功，勤劳历年，拯民之害，天眷其德而至。又曰：骀𤛎者，神马也，与赤兔同应。应劭注《汉书》云：骀𤛎，古马，赤喙玄身，日行一万五千里。

又曰：王者爱人而贱马，则泽马来。又曰：王者劳来百姓则至。

《随巢子》曰：夏后之兴，方泽出马。

《瑞应图》曰：王者精明尊贤，则玉马至。又曰：师旷时，玉马出。又曰：世治则西王母献岱骏马。

《礼斗威仪》曰：君乘火而王，其政和平，则南河输骏马。

注曰：骏马者，黄赤色马也。

《天镜》曰：王者不伤禽兽，则骏马见。

### 白马朱鬣 青马白鬣

《瑞应图》曰：明王在上，则白马朱鬣至。又曰：王者乘服有度，则白马朱鬣。又曰：白马朱鬣者，任用贤良则出。

《礼记威仪》曰：周王白马朱鬣。

《天镜》曰：王者资服有制，则青马白鬣来。

### 马咎徵

#### 马化为牛狐及出地中

京房曰：马化为牛，君且无强兵也。

《纪年》曰：周宣王三十三年，有马化为狐。

京房《易传》曰：马出地中，国有兵，民散亡。又曰：军丧，不出三年。

### 马变毛

京房曰：马一夜改毛，易政，又曰：马一夜变毛，名曰易衣，君且小忧，有马之家家长死，又曰：马一夜变易毛色，南乡更为北乡，东乡更为西乡，政且有变。

《握镜》曰：马忽易色，君忧。一曰：马忽变易赤色，主

有大丧。

### 马悲鸣 马能言

《潜潭巴》曰：天子马行而鸣，天号无声，故马应之而鸣。

《天镜》曰：马鸣蹢地不食，必远行千里，若国君所乘马，主伐他国。主乘马夜悲鸣，国有外贼。

京房曰：马无故一夜皆鸣，且有大兵来者。又曰：马能言，如其言吉则吉，言凶则凶。

《吕氏春秋》曰：乱国之妖，马乃言。

### 马入宫殿

《潜潭巴》曰：有马入宫，大臣不从，行不忠。其有声也，臣名于天下，主令不行，轻见虏。注云：马地精，阴也，从人无所不之，今忽入宫，臣欲夺主位居其宫之祥也。有声是日而鸣，声者欲行主教令也。

京房曰：马走入君宫，兵事，大忧。

《异苑》曰：后赵建武十四年，有妖马一匹，色青，尾焦燎，自中阳走阙下。是岁虎死，国乱。

《晋阳秋》曰：咸康八年，有马色赤如血，自宣阳门直入殿前走出，不知所之。

《石伪事》曰：石混说建武十四年时，忽有爍马一匹，有四目，系著殿中十余日，突去不知所在。

### 马生角

《地镜》曰：马忽生角，其君以兵攻，国破亡。

《吕氏春秋》曰：乱国之妖，马乃生角。

京房曰：下不顺政，厥妖马生角，兹谓贤士不足。又曰：

天子亲伐，马生角。

《洪范五行传》曰：文帝十二年，有马生角于吴，在耳前，上向，右角长三寸，左角长二寸，皆大二寸。刘向以为马不当生角，犹吴主不当举兵向上也。又曰：成帝绥和二年二月，大厩马生角，左右耳前围长各一寸。是时王莽为大司马，害上之萌自此始矣。

《晋纪》曰：隆安四年，梁州刺史郭诜送马生角，桓玄之应也。

《赵书》曰：前赵临泾县马生角，在耳，长七寸，摇之则动。

### 牡马生驹

京房曰：方伯分威，厥妖牡马生驹。

《史记》：秦昭王二十年，牡马生驹而死，非类妄生而死，犹秦恃力强得天下，而还自灭之象也。

《汉书五行志》曰：哀帝建平二年，定襄牡马生驹，三足，随群饮食，太守以闻。马国之武用，三足不任用之象。后侍中董贤年二十二为大司马，居上公之位，天下不宗。哀帝暴崩，成帝母王太后召弟子新都侯王莽入，收印绶，贤自杀，莽因代之。

### 马生子异形

京房曰：马生子一目，其君弱。马生子三目以上，臣制主令。马生子二口以上者，其令多乱。马生子三鼻以上，民流亡。马生子三耳以上，其民人多死者。马生子二足以上，民流亡。马生子三足，其邑主且有不利。马生子二阴以上，有兵。马生子目在腹下及在旁，其邑有兵。马生子目在四支，其邑俘囚。马生子目在阴，其邑大弱，主亡。马生子目在背，民流亡。

不从令。马生子口在背，邑民大去其君。马生子口在腹，邑饥，五谷大贵。马生子耳鼻在四支者，兵作。马生子耳鼻在腹及背，臣谋叛上，败绩。马生子足在首，失邑君。马生子足在背，人主有行。马生子足在腹，主劳民饥。马生子尾在首足，谷不成。马生子尾在背，其君摇。马生子尾在腹，臣谋反。马生子无目，其邑君久疾。马生子无口鼻，其邑君无子。马生子无耳，主失位。马生子无足，主失位。

《古今注》曰：汉哀帝大初四年中，张幼乡有马生子，一身三头九口，各有言，民皆书之户上。

《华阳国志》曰：蜀李特将亡，马生驹，一头二身，著六牙，一牡。

《异苑》曰：李势时，有马生驹，一头二身六脚，身中有牝牡。

## 马 生 人

京房曰：上无天子，诸侯相伐，民流百姓劳，厥妖马生人。马生人，一身有两头以上，邑有反者，兵大作。马生人，一首三颡以上，邑相挠乱。马生人，一首两颡以上，邑有大兵。马生人，一身而两首，无目，一耳居颡以上，且有兵。马生人，一身三首以上，三耳以上，无目，一耳居颡上，是谓不祥，天下有兵，民流亡。马生人，一身两首九口，鼻居项，天下大饥，民流亡。马生人，一身两首以上，无耳无口，二鼻以上，一鼻著项，一鼻著颡，天下有兵丧。马生人，一身两首，邑无主。马生人，一身而两面以上，其邑大不祥。马生人，三首以上，邑争凶。马失人，一身三耳以上，其邑乱。马生人，一首两鼻以上，邑民贫。马生人，有臂无首足，邑有兵，不胜凶。马生人，三臂以上，邑君有恶疾。马生人，三足以上，其邑劳。马生人，三腹以上，无足，邑有大丧。马生人，三阴以

上，臣谋其主。马生人，首在腋下，主贼杀其臣。马生人，首在足下，邑君私，社稷亡。马生人，首在背，民大劳苦。马生人，首在阴，其君亡地。马生人，目在腋下，其君丧。马生人，目在背，邑有大兵流亡。马生人，目在腹若喉颚，人主有亡地。马生人，目在足下，此谓下视，欲谋其上。马生人，口在腹，邑有兵，民且饥。马生人口在背，邑有大事，民绝食。马生人，鼻在腹下，主令不行。马生人，鼻在足下，民相从哭。马生人，鼻在腹下，其邑谷不成。马生人，鼻在背，邑民劳。马生人，鼻在阴，邑君鬼神不享。马生人，耳在背，民不相从，邑有兵。马生人，耳在腹，其邑弱，主治不行。马生人，耳在阴，贤者不上通。马生人，腹在跨，其邑大饥，君亡地。马生人，阴在上，其君无子。马生人，阴在背腹，民饥，臣下大谋其主。马生人，四支在首及项，其君失位。马生人，无首，其君大疾。马生人，无目，其国失令亡。马生人，无口，天下大饥。马生人，无鼻，其邑有丧。马生人无耳，其邑有鬼惊人主。马生人，无手足，其邑不谷。马生人，无臂，邑有兵，兵败。马生人，无腹，邑亡，有兵，民饥。马生人，人身而畜面者，民饥主易。马生人，人面而六畜身者，是不祥，邑有兵。马生人，人面野兽身者，邑有大客及兵。马生人，人身而野兽面，天下有亡邑。马生人，人面鸟身，是谓不祥，邑有兵。马生人，人身而虫蛇面者，邑且亡。马生人，人面而虫蛇身者，谓邑虚及有兵。马生人，人身而蛇龙面，其邑有弱主，不治。马生人，人面而龙蛇身者，民流亡。

《洪范五行传》曰：秦孝公二十一年，有马生人，占曰：畜生非其类，子孙必有非其姓者。后始皇盖吕不韦子也。

《史记》曰：秦孝公有马生人。刘向以为皆马祸也。孝公始用商君攻守之法，东侵诸侯，其象将以兵革抗，极成功而还自害也。



## 马生六畜

京房曰：马生六畜，君有大事。马生羊，邑安，又曰国无忧，民大安。马生牛，人安，五谷蕃。马生六畜，一首两身，其君且逐。马生六畜，二口以上，天下有作兵者。马生六畜，二鼻以上，民大饥。马生六畜，三耳三目以上，君失社稷亡。马生六畜无首，人君失位。马生六畜无四支，其君不安。马生六畜无目，臣塞君之善，上令不行。马生六畜无鼻口，天下有兵。马生六畜无耳，天子失忠臣。马生六畜无阴者，女主治。

### 马生野兽飞鸟 马生鱼虫

京房曰：马生野兽，有他变，民尽为兵。马生野兽，天下不通。马生飞鸟，民不安，有反臣。马生飞鸟，有他变形者，皆为兵丧。又曰：马生鱼，邑主忧。又云大水至，谷不成。马生虫蛇及蜂蚊者，其邑流亡。

### 马生五谷金钱铁石土草木

京房曰：马生五谷，岁乐昌。马生金钱，其邑臣有欲贼主者。马生石，其邑强。马生土，其邑增地。马生草木，其君疾。马生布帛者，政令且更。

## 卷一百十九 羊犬豕占

### 羊 休 徵

### 玉 羊 见

《瑞应图》曰：钟律调，五音当节，则玉羊见师旷时。

羊疫 夷羊 羊两口 羊六头 羊多角

《汉书五行志》曰：视之不明，是谓不哲，时则有羊祸，多疫死及为怪。

《国语》曰：商之亡也，夷羊在牧。贾逵注曰：夷羊，神兽也。许慎注《淮南子》曰：大羊也，牧，商牧野。

《天镜》曰：羊一头两口，其年不熟，民饥亡。

《灾异图》曰：王侯二千石不祇上命，克暴百姓吁嗟，则一羊六头。

《异苑》曰：石虎建武初，秦州南安虞大柳摩猷六角及四角羊各十，山羌中有三角五角羊，又旄牛有一角，皆其类也。江陵黄丘村有羊两头，一头下，不能鸣。

羊四耳 羊无足 羊生犬马

《河图》曰：黑羊四耳，目在腋下，名孽，见即有起王。

《天镜》曰：羊无后足，前吉后凶。又曰：羊无前足，先忧后悦。

晋《中兴徵祥说》曰：咸和元年，司徒府羊产无后足，其后苏峻作逆。

《天镜》曰：羊生犬，国被外贼。又曰：羊生马，天下将兵起。

犬 咎 徵

犬 狂 疾

《洪范五行传》曰：犬祸者，西方也，以口守言之类也，言气毁则犬伤疾矣，故曰犬伤祸也，旱岁犬多狂死，或言气乱则犬为怪，以期占之。

京房曰：佞臣在侧则犬妖生，岁多蝗虫。任佞则群物尽伤，犬妖则军兵将至。又曰：犬能言吉凶，如其言。又曰：犬呼其主，主且亡。

《天镜》曰：犬作人音声，世主移。

犬群噪 犬自食子 犬反哺 犬负子 犬不啮鼠

《淮南子》曰：夏桀在位，乱四时之政，而万物失所，犬群噪起渊。

《运斗枢》曰：七政乱，主见禁，则天下犬噪。

《天镜》曰：犬噪街巷中，不出其年，有贼在邑。犬群噪街巷中，不出其年，外内戒严，君臣交兵，从朝廷起。二犬噪，众犬和，兵必起。犬群噪城池，不出三年三月，国内虚空。犬噪屋上，国有丧。犬噪门巷中，其邑不宁。

京房曰：犬晨夜噪堂室上，家且有丧，邑亦然。

《天镜》曰：犬群噪，暮噪室中，男若女必喜，朝噪室中，长女死。

《墨子》曰：三苗大乱，天命倾覆，则犬噪于市中。

《天镜》曰：犬逆吠，其主必远行，若国君远征，伤将，亦伤兵。

京房《易传》云：犬群噪，国将亡。

《天镜》曰：犬自食子，国无盗贼。又曰：犬子初生，反哺其母，国有义。又曰：犬负其子走，来入城池中，其国不征伐，邻国归。犬负其子入巷，民去其乡。京房曰：犬无故皆见鼠不动，邑且有贼臣，公不禁下。

犬聚宫门 犬浴水中 犬从地中出

京氏曰：犬死无故当邑门及宫门，聚如尸，皆大凶。又曰：犬无故相从浴水中，兵大作。又曰：犬自地中出，邑大

水，君且贫。

《晋书徵祥说》曰：兴平二年，吴郡府舍地中得犬子，二头，一雄一雌，太守张懋闻斋内床下犬子声，地自坼，见有二犬，取而养之，皆成。寻而懋为洗克所害。《夏鼎志》曰：掘地而得狗名曰假。

《尸子》曰：地中有犬，名地狼也。

又曰：晋孝武帝太元中，卢江灈县何旭家忽闻地中有犬子声，即于声处掘之，见一狗母状，甚羸瘦，走入菰中，不知所在。视其处，有犬子二头，一雄一雌。取而养之，雌死雄活，及长为犬，善噬野兽。其后旭里中为蛮所没。安帝隆安中，辅国将军孙无终家既阳中地中闻犬子声，寻穴地有坼，犬子皆白色，一雄一雌，取而养之皆死。后无终为桓玄所诛。

### 犬 戴 冠

京房曰：君不正，臣欲篡，厥妖狗冠，出朝门。

《汉书五行志》曰：昌邑王贺为王时，见白人冠方山冠而无尾，此服妖，示犬祸。龚遂曰：天戒在君也。贺既废死，不得置后，犬无尾徵也。

《续汉书五行志》曰：熹平中，省内冠狗带绶，以为娱乐。有一狗突出，走入司徒府门，或见之者，莫不惊怪。灵帝宠用便嬖，西园卖官，实狗而冠也。

### 犬生角 犬两首 犬入宫室淫连 犬豕交

《天镜》曰：犬生角，世主增地。

京房曰：犬生角，必人主失政，小人进用。

《汉书五行志》曰：文帝后元五年，齐城门外有狗生角，齐悼惠王亡，后帝分齐地，立其庶子七人皆为王，兄弟并强，有亢阳心，故犬祸见。犬守卫，角兵家，在前向上也，犬不当

生角，犹诸侯不当举兵向京师也。

《运斗枢》曰：狗两首人行衔刀。宋均注云：狗为人吠守而设，两头且主行，衔刀兵是宿卫之臣欲叛。自作主而妖也。

《地镜》曰：犬入室中淫连，君亡之象。

《吕氏春秋》曰：乱国之妖，犬彘乃连。注云：案《汉书五行志》曰：景帝三年，邯郸狗与彘交，悖乱之气近犬豕祸也。比时赵王遂悖乱，与吴楚谋为逆，遣使匈奴求助，卒伏诛。

京房曰：人君夫妇不严，厥妖狗与豕交，兹谓反德，国有兵革。

### 犬生子异形

京氏曰：犬生子三耳以上，邑且有乱臣。犬生子一目，邑有臣事二主者。犬生子三目以上，邑有大臣谋主。犬生子有二口，邑有忧。犬生子鼻一孔，邑有兵。犬生子有二鼻，邑且有兵。犬生子三足以上，其邑主有公侯。犬生子有五足以上，其邑且大卒行。犬生子有二阴，君多子。犬生子有二尾以上，邑有徙亡。犬生子口在背，邑有反臣。犬生子口在阴，邑臣强，主命弱，令不行。犬生子口在四足，臣杀其君。犬生子口在腹下及腹旁，邑大忧。犬生子口在腹，民大饥。犬生子口在四支，其邑君亡。犬生子有鼻在四支，邑有兵。犬生子足在腹，邑有徙亡。犬生子足在背，邑有大咎。犬生子足在首，邑君且有大仇。犬生子尾在腹，邑有大臣杀君。犬生子尾在背四支，邑有三主争者。犬生子无尾，邑大臣杀君。犬生子无目，邑主病。犬生子无口鼻民饥。犬生子无足，谷不成。犬生子无尾，邑民贫。

## 犬 生 人

京氏曰：犬生人，其邑君失位，兵行。犬生子人形不具，其邑有兵。犬生子人之形，而物各不居其所者，主亡。犬生人之形而六畜身，主亡，大有咎。犬生人之形而飞鸟身，邑大水。犬生人之形而野兽身，此有亡主。犬生人之形而鱼身者，邑大水。犬生人之形而鼠形者，其邑虚。

犬生六畜 犬生鼠生鱼

犬生野兽 犬生飞鸟蜂蛇

京氏曰：犬生六畜，其邑易命，有大事。犬生六畜，一首二身，邑有废。犬生六畜，两身，邑且二君，流。犬生六畜，两口以上，邑大臣乱。犬生六畜三鼻，其邑有乱臣。犬生六畜有人形者，邑易主。犬生六畜无首，其邑有大事。犬生六畜无耳，邑不用事。犬生六畜无目，其邑兵行。犬生六畜无口鼻，民流亡，作兵。犬生六畜无四支，邑不治，有兵。犬生六畜无阴，主且暴死。犬生豕，岁大熟，民乐。

《天镜》曰：狗生豕，吉，不出三年，国安乐。

京氏曰：犬生子为鼠，岁虚，民流亡。犬生子为鱼，邑有大水。

《地镜》曰：犬生野兽，大夫有外谋，不出三年，君且亡国。

京氏曰：犬生野兽，邑有大咎。犬生野兽人形者，邑有大兵。

京房曰：犬生飞鸟，虽有人形，及不具，皆为大兵大水。犬生子为蜂，天下更令。犬生子为蜂蛇，其邑民人流。

## 犬矢溺宫室道路 犬矢金石杂物

京氏曰：犬矢宫室中殿堂上三日以上，邑空虚。犬矢王门中，其主有喜。犬矢王门外，邑主有忧。犬矢邑社，不及大神，五日以上，邑亡。犬皆群溺于邑门外及内，兵作，人家亦然。犬无故大道矢而行，邑大凶。群犬无故皆矢大道中，兵行。犬矢人民床席上，其殃大。犬矢井中，家虚，邑亦然。犬无故溺人，其人不出三岁亡。又曰：犬矢石，其邑臣强君弱。犬矢金铁，邑兵大作。犬矢土，邑愈坠。犬矢五谷，邑昌岁成。犬矢布帛，邑有暴政。犬矢草木，邑人有丧。

## 豕 咎 徵

### 豕能言 豕自食子 豕自食尾

京氏曰：豕能言，吉凶如其言。豕昼同时俱鸣，此谓哭，主岁不成。又曰：豕自食其子，家破。又曰：豕反自食其尾，家富，岁且凶。

### 豕登屋入宫

京氏曰：豕之屋上，其邑得贤士。豕入君室中，其社稷邑君且亡。

《汉书五行志》曰：昭帝元凤元年，燕王宫永巷中豕出圈，坏都灶，衔脯六七枚置殿前。刘向以为灶者生养之本，豕陈脯于庭，灶将不用，宫室废矣。燕王不改，卒伏诛。

《地镜》曰：野猪入宫室中，其军将围，小人失宅。

京氏曰：豕无故入君室屋，且有女忧为乱。又曰：赤彘见于国，不出三年，必有大祸，野人为政。

## 豕生子异形

《灾异图》曰：王侯刺史二千石令长不祇上命，则豕一头两身六脚。

《古今注》曰：哀帝大初三年，长安彘生两头三目，一目在项中。

京氏曰：豕生子有角，其邑有福禄。豕生子有二口以上，其邑且安。豕生子鼻一穴，郡有九侯。豕生子三足，其岁不熟。豕生子五足以上，其邑有大咎，兵。豕生子一阴，其邑分无后。豕生子目在四支，其邑兵行得地。豕生子目在腹下及旁，邑有大咎。豕生子口在背，邑主弱，群臣夺，王令不行。豕生子口在腹，其邑饥。豕生子口在四肢，民饥，兵作，邑亡。豕生子口在阴，邑有大谋。豕生子耳鼻在腹及背，臣谋其主。豕生子耳鼻在四肢及在首上，兵作邑中。豕生子足在首上，亡社稷。豕生子足在其腹，邑有大事。豕生子足在背，其民劳于兵。豕生子尾在腹及首，邑有大事。豕生子无口，其邑乱。豕生子无目，其邑臣夺主令。豕生子无尾，其邑兵弱。豕生子无尾有羽，邑亡。

## 豕生人

京氏曰：豕生人之形，即纯行，圣人且行，兵不纯，行其邑，失社稷。豕生人而有六畜形者，此邑乱亡。豕生人形而有飞鸟者，其邑大水。豕生人形而有野兽形者，其邑兵。豕生人形，如物各有不居其位，邑失地。

## 豕生六畜

京氏曰：豕生六畜，其邑易主。

《吕氏春秋》曰：乱国之妖，有豕生狗。



《天镜》曰：豕生狗，不出三年，国王走于野中死。

京氏曰：豕生犬，其君走谋于野中。豕犬形不具，邑有兵，诸兵数起。豕生六畜，有人形，邑且更令。豕生六畜，一首二身，邑分。豕生六畜二鼻以上，邑有兵行。豕生六畜二口以上，其邑亡地，臣乱。豕生六畜三鼻三目以上，其邑大恐。豕生六畜无首，其邑不安。豕生六畜无目，邑令不行。豕生六畜无耳，其邑君且不听政。豕生六畜无口鼻，其邑民流亡。豕生六畜无阴，其邑无嗣子。豕生六畜无四肢，其君不治。

### 豕生野兽虫鱼飞鸟蜂蛇

《运斗枢》曰：人主以不孝仁之名侵犯大道，则豕生鹿。大道者，君政也。

京氏曰：豕生野兽，其邑民饥，有兵。豕生飞鸟，其邑水。豕生鱼，其邑大水灾。豕生虫蝇，其邑流亡。

### 豕矢金石草木

京氏曰：豕矢金铁，邑兵大作。豕矢土，邑增土。豕矢石，邑大兵强，胜四方也。豕矢五谷，岁成熟。豕矢草木，其邑有丧。

## 卷一百二十 龙鱼虫蛇占

### 龙龟鱼虫瑞

#### 龙

《瑞应图》曰：王者承天命，而天道四通而悉达，无益之术藏，而世无浮言，官吉则河出龙图。

《援神契》曰：天子孝则大龙负图也。

《礼记》曰：圣王用水火金木必时，颁爵位必当年，得无水旱之灾，妖孽之疾，则龙在宫沼。

《天镜》曰：凡龙春见，无殃咎。

《瑞应图》曰：青龙，水之精也，乘云而上下，不处渊泉，王者有仁则出。又曰：君子在位，不有斥退，则见。

《礼稽命徵》曰：王者得礼之制，则山泽谷之中有赤龙。

《瑞应图》曰：黄龙者，五龙之长也，不混池鱼，德及渊泉，则黄龙应和气而游池沼。

蔡氏《月令章句》曰：智听政事则黄龙见。

《瑞应图》曰：王者精察贤德，则白龙见。

《河图》曰：黄龙负鳞甲，成字以授黄帝，帝令侍臣写之，以示天下。《魏文帝杂事》曰：黄帝录图，五龙舞河，此应圣贤之符也。

《尚书中候》曰：河出龙图，赤文像字，以授轩辕。

《元命包》曰：唐帝游河渚，赤龙负图以出，图赤色如锦床，赤玉为匣，白玉为检，黄珠为泥，玄玉为鉴，章曰天皇大帝合神制署天上帝孙伊尧龙润涓图在唐典右尉舜等百二十臣，发视之，藏之大麓。

《运斗枢》曰：舜为天子，东巡至舜中月临观，注云：临河观望，月或为丹字也。五采负图，出置舜前。图黄，为匣如柜，长三尺，广八寸，厚一寸四分，而连有石，白玉为检，黄金为匣，黄芝为泥，封两端，章曰天皇帝符玺，五字广长各三寸，深四分，鸟文。舜与三公大司空禹等三十人发视，玄色而绀状，可卷舒，长四十二尺，广九尺，中有七十二帝地形之制，天文分度之差。注云：黄帝含枢纽之使也，故龙匣皆黄，四合者，有道相入也。有户言可开合也。

《尚书中候》云：舜沉璧，黄龙负卷舒图出水坛畔，赤文

绿字也。

《大戴礼》曰：颙頊端拱以有谋，疏通以知事，养财以任地，履时以象天，依鬼神以制义，治气以教民，洁诚以祭祀，乘龙而至四海，动静之物，大小之神，日月所照，莫不祇属。又曰：帝尝妙日月而送迎之，明鬼神而教事之，春夏乘龙，秋冬乘马。

《括地图》曰：禹平天下，二龙降之，禹御龙行城，既周而还。注：《神虚记》曰：禹乘二龙，郭襄而为御。

《尚书中候》曰：周公摄命七年，归政成王，沉璧于河，荣光幕河，青云浮至，青龙御玄甲，临坛吐图而去。注云：周公摄政，归美成王，制礼作乐，天下治和，荣光五色从河水出，幕覆其上，浮云从荣光中来。青龙者，苍帝灵威仰之使也，玄甲所以裹图也。

## 蛟

《山海经》曰：祷过之山，虎蛟鱼身，蛇尾，音鸳鸯。注云：似蛇，四脚龙之属也。

《说文》曰：鱼满千头，蛟来为之长，率鱼而飞，置苛韭水即蛟去。

《淮南子》曰：蛟龙寝于渊而卵，乳于陵。注云：许慎曰：蛟螭属乳，谓卵，自乳者也。文子曰：王有道德者，天与之，地助之，鬼神辅之，则蛟龙宿其沼。注云：山海经言蛟龙蛇而四脚，小头细颈，颈有白婴，大者十数围也。

## 玉龟 龟负图 玄龟负书

《瑞应图》曰：玉龟者，为圣国出，师旷时至，以录讖书。

《礼稽命徵》曰：制礼作乐，改损祭器，有鬼神之助，则龟负图。又曰：刑杀当其罪，赏锡其功，立事得礼之宜，则龟

负象载。

《白虎通》曰：德至渊泉，雒出龟书。

《礼含文嘉》曰：伏羲德洽上下，故地应以龟书，伏羲乃象以作卦。

《尚书中候》曰：黄帝东巡至洛，龟书咸赤文绿字，以授轩辕。注云：虚龟负书所出，黄帝咸则也。

《尚书中候》曰：唐帝沉璧于洛水，龟负书出，背甲赤文，成字止坛也。又曰：汤沉璧于河，黑龟出赤文题。又曰：周公沉璧，玄龟青纯。注云：何休解，纯绿也，谓绿纯，千岁龟也。含光刻背甲书，止洛于坛，赤文似字，周公视，周王乃视，龟留不去，周公援笔以世文而写之，书成文消龟去。

《宋书符瑞志》曰：玄龟洛书者，天符也，王者德至渊泉则出。

### 虚龟五色 龟在宫沼

《瑞应图》曰：虚龟者，玄文五色，神虚之精也。上降法天，下平象地，能见存亡，明于吉凶，不偏不党，唯义是从，其惟龟乎。虚龟从此谓也。虚者德之精也，龟者久也。能明于久远，事王者不偏不党，尊耆老不失旧故，则神龟出。又曰：虚龟似鳖而长，合五行之精，三百岁游于藕叶之上，千岁游于蒲上，进一尺二寸，王者奉顺后土承天则见。

《宋书符瑞志》曰：王者德泽湛清，畋猎顺时，则出五色鲜明龟，三百岁游于莲叶上，三千岁常游于卷耳之上。禹卑宫室，虚龟见。

《春秋礼演图》曰：文命将兴，龟穴莲。

《礼记》曰：圣王用民必须，颁爵当时，无水旱之灾，妖孽之疫，则龟在宫池。

### 毛龟四眼六眼八眼龟

《宋书符瑞志》曰：宋文帝三获白龟，孝武帝获毛龟，明帝获四眼龟、六眼龟、八眼龟，前书不载，当时并以为嘉祥，今附于龟瑞之末，并载其形，以示将来也。

### 比目鱼 黄鱼跃出 白鱼入舟 神鱼舞河

《瑞应》曰：王者明照出远，则比目鱼见。注云：尔雅曰：状如牛脾，细鲜紫色，两片相合乃行。

《尚书中候》曰：汤沉璧于洛水，黄鱼双跃出济干澶，玄鸟随鱼出示，止化为玄玉，赤勒日，玄精太乙，受神命，伐天下服。注云：黄土色，明土归汤，玄鸟叶光纪之使，天乙汤名，天命之伐桀也。

《尚书中候》曰：周武王渡于孟津中流，白鱼跃入于王舟，王俯取鱼，鱼长三尺，赤文有字，题目下颊右曰：姬发遵昌。王燔以告天，有火自天流为赤乌。注云：孟津，南河津名也，右助天告以伐纣之意，姬周姓，遵循也，昌文王名，言武王之业也。宋均注《元命包》曰：燔鱼祭天，烟火光化为赤乌，乌日中阳物，有光明而能照也。

《汉书》曰：宣帝诏云：朕飭躬齐精，所为百姓，未济大河，天气清静，神鱼舞河，朕之德惧不能任。

### 赤蛇 大螾 大蜚

《礼稽命徵》曰：王者得礼之制，则泽谷必有赤蛇。

《东观汉记》云：安帝生，赤蛇盘于床席之间。

《吕氏春秋》曰：黄帝时，天见大螾，黄帝曰：气胜，故其色尚黄，其事则王。注曰：螾，蚯蚓也。

《帝王世纪》曰：黄帝得螾如虹。应劭云：神螾大五六

围，长十餘丈也。

《吕氏春秋》曰：黄帝时，天见大螭，黄帝曰：土气胜，故其色尚黄，其事则王。

### 野蚕成茧

《后汉书》曰：光武建武元年六月己未，即皇帝位，大赦天下，野蚕生麻尤盛，野蚕成茧，被于山阜，民获其利非一。

《吴志》曰：孙权黄龙三年，夏有野蚕茧大如卵，由卷野稻自生，改为禾兴县。

### 龙龟鱼虫怪

#### 无云而龙出 黄龙坠 龙五色

《天镜》曰：大兵将至，大水为害，则无云龙出。

《春秋合诚图》曰：黄帝将亡，则黄龙坠。

《握镜》曰：君失木行，则春青龙见，国被兵，其乡散亡，青狼豕亦然。失火行，则夏赤，失金则秋白，失水则冬黑，失土则四季黄，皆如上占。又曰：苍龙见，国有凶；黄龙见，国有丧；白龙见，有兵；黑龙见，有忧凶。

### 龙见邑社廷庙

京房曰：山见龙过于邑，邑迁。赤龙见于国，不出三年，必有大祸，野人为政。

《天镜》曰：龙见于社稷，必有大战流血。龙从宫中出，谗人聚，其国亡。

《地镜》曰：龙下朝廷，人君不顺四时，行出不时。龙以冬出当道，或斗邑中，或乳国中，或见上腹下背，有大战，主忧。春夏秋出不占。

《墨子》曰：昔三苗大乱，天命殛之，龙生于太庙。

《异苑曰》：会稽有独姥，常织芦布为业。以义熙初晒结于庭，忽疾风雷雨，山阴县东魏家堂屋上有一苍龙，长数丈，须臾而散成结，从风飘乱。姥先以大瓮著阶下，有顷天雨芦结满瓮，视之悉是芦结，尔日郭中有曝晒者，莫不失之。后有卢龙之难，寻自散走，咸谓是其应矣。

### 龙见井中

《潜潭巴》曰：龙从井中出，下为猾，谋虑，大兵不本而出。注云：龙从井出，圣人在下位，今而见势稍大，欲猾乱。时主祥也。

京房曰：井出龙若马，君不守宗庙。又曰：有德遭害，厥妖龙见井中。又曰：君行暴恶，黑龙从井中出。

《汉书五行志》曰：惠帝二年正月癸酉旦，有两龙见于兰陵延东里温陵井中，至乙亥夜去。刘向以为龙贵象而困于庶人井中，象诸侯将有幽执之祸。其后吕太后幽杀赵王，诸吕亦终诛灭。

《魏志》曰：高贵乡公正元元年冬十月戊戌，黄龙见于鄞井中。甘露元年正月辛丑，青龙见軹县井中。二年二月，青龙见温县井中。三年，黄龙仍见顿丘、冠军、阳夏县界井中。四年正月，黄龙二见宁陵县界井中。注：《汉晋春秋》曰：是非龙，人乃咸以为吉祥。帝曰：龙者君德也，上不在天，下不在地，掩而数居于井，非嘉兆也，乃作潜龙诗以自讽焉。司马文王见而恶之，五年五月己丑，高贵乡公卒，时年二十。又曰：帝见威权日去，不胜其忿，遂帅僮仆数百搢鼓而出。文王弟十七骑校尉仲入，遇帝于东门，左右诃之，仲众奔走，中护贾充入，逆帝，战南阙下，帝自用剑，众欲退，太子舍人成济前刺帝，刃出于背。陈留王景元元年十二月甲申，黄龙见华县井中。三年二月，青龙见軹

井。咸熙二年，十一月壬戌，诏群公卿士奉皇帝玺绶，策禅位于晋嗣王。

《晋阳秋》曰：太原五年，龙见武库井中，帝观有喜色，百官将贺，刘毅以为不祥。孙楚上事曰：顷闻武库井中有二龙，群官或谓之祲祥而称贺，或有谓之非祥无所贺，可谓楚既失之而齐亦未为得也。而龙守鳞翼，潜于重渊，或仰攀云汉，游于苍昊，而今蟠于坎井，同雄于蛙虾，岂独管库之士或有隐伏，期役之贤没于行伍，故龙见光景有所感悟耶？

《异苑》曰：谢晦家室各宅南路上有古井，以元嘉二年汲者忽见二龙甚分明，行道住观者莫不嗟异，有人入井看，乃是砖隐起龙形，泉从边出，浇灌殊驶。后晦等皆伏法。淮南所谓井见而贵臣拘者也。

### 龙 逐 人

《洪范五行传》曰：秦文公大猎，有龙出逐文公，公射得之。龙逐人，非所当也，射而得之，非所当射得也。射为射妖，龙为龙孽，皆瞽乱之君所致也。龙者天之象，阳之表，超乎众也，射，兵革之祸也，龙伤获为擒灭之患，是国且有兵将擒获也。文公感悟，改行自新，因居汧之阴，子孙繁昌。

### 龙斗 龙死

《考异邮》曰：龙斗则主将易。宋均曰：龙君象，斗则将争也。《潜潭巴》曰：日月食之，则蛟龙群斗。

京房曰：龙斗邑中，历数日不止，人主且分，比兵为忧。

《汉书五行志》曰：《左传》昭公十九年，龙斗于郑时门之外洧渊。刘向以为近龙孽也。郑小国，摄乎晋楚之间，重以强吴，郑当其冲，不纯修德，将斗三国，以自危亡。是时子产任政，内惠于民，外善辞令，以交三国，郑卒亡患，此纯以德消



变之效也。彙《春秋经》即郑定公也。

《续汉书五行志》曰：桓帝延熹元年，河内野王山有死龙，长可数十丈，襄楷以为龙者帝王瑞。天凤中，黄山宫有死龙，汉兵诛王莽，此易代之徵，后魏代汉。

### 灵龟执 龟无文 穿井得龟

《合诚图》曰：玄帝将亡，则灵龟执。

《尧录书》曰：玄帝之将终也，水不流下，则龟无文。

《世语》曰：晋长沙王从封长沙，至国，穿井，入地四丈，得大石，其中有灵龟，而长二尺馀，长沙王诛之象也。

车频《秦书》曰：苻坚建元十三年，高陆县民穿井得龟，其大三尺六寸，背文负八卦古字。坚藏之，太卜因而养之。十六年而坚死，令取其骨稽问吉凶，名曰客龟。太卜佐齐鲁，梦客龟言：我归江南不过，死于秦鲁。自解曰：龟三万六千岁而终之，必有灾国之徵。

### 巨鱼见 丹鱼见

京房曰：海数见巨鱼，邪人进，贤者疏。

《汉书五行志》曰：灵帝熹平二年，东莱海出大鱼二，长八九丈，高二丈馀。明年，中山王畅、任城王博并薨。

《异苑》曰：勃勃虏都长安端门外，瓮水有声，视水如沸，有丹鱼长三尺，有赤光，国寻灭。

### 河鱼逆上及生人 鱼偃行

京房曰：众逆同志，阹妖河鱼逆上。

《洪范五行传》曰：秦始皇八年，河鱼逆水上。刘向以为鱼孽鱼阴，类民象也，逆水上，民将不从君令，为逆行也。

京房《易候》曰：下无臣，大人不实，则鱼生人。

《运斗枢》曰：天下将乱，则鱼偃无足行。宋均曰：鱼潜伏，今见且偃行，是弱而降，自恣无所畏也。

### 鱼飞 鱼见屋上

京氏曰：鱼飞者，治国无礼义，则鱼飞，水有渊奥，即鱼居焉。国无礼义，民去焉，故鱼飞，不救有虚邑。其救也，安民治业，定礼兴乐。又曰：鱼入师中，司马将战胜，鱼飞集于司马鼓上，司马当之。

《地镜》曰：鱼飞入路中，兵作。又曰：鱼飞去水，国有暴兵。

《汉书五行传》曰：听之不聪，是谓不谋，君严寒气动，故有鱼孽。鱼去水而飞，极阴之孽也。

京房《易传》曰：青鱼去水飞入道，兵将起。

《握镜》曰：鱼忽出屋上，死道中，皆有兵奔败。

《魏志》曰：齐王正始中，有二鱼长尺，集于武库之屋，有司以为吉祥，王肃曰：鱼生于渊而居于屋，介鳞之物失其所也，边将其殆有乘甲之变。而后果有东阙之败。

### 五色蛇 蛇有异足

《淮南万毕术》曰：君失春政，则仓蛇见于邑，即岁多祸。君失夏政则赤蛇见，君失秋政则白蛇见，君失冬政则黑蛇见。

京房曰：玄蛇冬出则君凶。

《河图》曰：蛇四足四翼，各群立，见则兵作。

《合诚图》曰：白帝将亡，则蛇有足，伏如人。

京氏《易传》曰：青蛇见足，军中将罢。

## 蛇入都邑宫庙

《礼记威仪》曰：贱人为君，则蛇入都。

《潜潭巴》曰：朝有大蛇，亲属无道，将何为。宋均注曰：蛇阴物而性蚕燕，今而在朝，是亲属或欲为无道，何为言不成也。

《吕氏春秋》曰：妖孽生，国有游蛇，蛇一西一东。

《汉书五行志》曰：皇之不极，是谓失德，则有蛇孽。

《灾异图》曰：外镇王侯不祇上命，克暴百姓，则龙蛇见。

京氏曰：蛇群聚大道上，邑有急兵。蛇聚于国，必有围城。黄蛇见于邑，旱；长蛇见，大水。

《淮南万毕术》曰：君室无故见蛇，君且去；蛇无故在床上，君非其子。

《汉书五行志》曰：《左传》文公十六年，有蛇自泉宫出，入于国，如先君之数。刘向以为泉宫在圉中，公母姜氏尝居之，蛇从之出，象宫将不居也。又蛇入国，将有女忧也。如先君之数者，公母将薨之象。公恶之，乃毁泉台。后二年薨，公子遂杀文公之二子，恶视而主，宣公文夫人归于齐。

《搜神记》曰：鲁定公元年秋，有九蛇绕柱，占曰：以为九世庙不祀，乃立炀宫。

《会稽典录》曰：淳于翼字叔通，除洛阳市长，桓帝即位，有大蛇见德阳殿上，翼占曰：以蛇有鳞，甲兵之应也。

晋《徵祥说》曰：大宁中，武昌有大蛇居神寺神树上，出头从人受食。案京房《易妖占》曰：大蛇见神寺，不出三年，有大兵，国有大忧。时王敦作逆。

晋惠帝《起居注》曰：齐有大蛇，长三百馀步，又负二蛇，长十馀步，过市，市人悉逐观之，由齐城北门入汉景祠，

须臾不复见。

京房《易传》曰：蛇见将军营中，师罢，出则中军将军得志。或曰得士。

### 蛇鸣君室 蛇交市廷 蛇冲腹 蛇斗

《淮南万毕术》曰：为死事则蛇鸣君室。

京房曰：蛇鸣君室凶。

《地镜》曰：蛇交于市及廷中者，不出三年，必有亡主，各以其国君应之。

《运斗枢》曰：君失政，臣挟私期，则蛇冲巴。巴腹虫也。

《河图》曰：大蛇朝市路群斗，又去不去，霸者当路。

《淮南万毕术》曰：蛇无故斗于君室，后必争立，小死小不胜，大死大不胜，小大皆死，皆不立也。

《汉书五行志》曰：《左传》：郑厉公时，有内蛇与外蛇斗郑南门中，内蛇死。刘向以为先是郑厉公劫相祭仲而逐昭公，代立后，厉公奔，出公复入，弟子仪代立，厉公自外劫大夫傅瑕，使僂子仪，此外蛇杀内蛇之象。

《赵书》曰：前赵时，安定太守邵琨上言，蛇与鼠斗于郡门，而蛇自死。

### 蛙聚 蛙与虾蟆斗

《易辨终备》曰：蛙聚，大盗出。

《运斗枢》曰：妃色惑主，蛙累人邦门。

《汉书》：武帝元鼎五年秋，蛙与虾蟆群斗，是岁四将军众十万征南越。

候蚯蚓出 蜈蚣入邑 蚁聚土  
候螳螂生 候蜩鸣

《周书时训》曰：立夏后五日，蚯蚓出，不出则臣夺后令。冬至之日蚯蚓结，不结则君政不行。

京房曰：见山蜃蛆入于邑内杀。《广雅》曰：蜈蚣也。又曰：蚁无故当道，若门户城聚土，水且伤人。

《易通卦验》曰：螳螂搏蝉蜂之虫，乘虚而杀物，自隐蔽而有所害，捕搏之象也。奸人性阴邪，行令失节所生，武官不务诘奸，故为奸猾事发。《月令》云：小暑至，螳螂生。《周书》曰：夏至后五日蜩始鸣，不鸣则贵臣放逸。立秋之日寒，蜩不鸣。

《通卦验》曰：遁上九候蝉始鸣，蝉不鸣，人臣力争，国多妖言。

蝼蛄集朝廷 蚯蚓蝼蛄见军中 蝼蛄大如牛

京房《易飞候》曰：蝼蛄集朝廷，阙咎黜。又曰：蚯蚓蝼蛄见，军中尤多，师将罢，有谋者不久。地生诸虫，将军急去，大凶。

《抱朴子》曰：蝼蛄见军尤生多，有军罢，又宜备叛。

京氏曰：蝼蛄大如牛，长一丈，见，邑且有贱人贵。

蜂食苗 蜂生国 蜂入军中 蛾飞蔽日

《五行传》曰：秦昭王委事太后弟穰侯为丞相，弟谦荡君皆用事，私门权倾公朝。三十八年，上郡大饥，山东尽死，民无所食，蜂食民苗。蜂食民苗者，赤祥之灾也，能飞扬之类。赤挟毒火之色也。不当食苗，不当位也，故见灾，以蜚之蜂见挟毒物之害也。天意若曰：君不明，臣下若蜂虻而夺民，将为

国家害也。

《天镜》曰：蜂生国舍内，空亡象。

《兵书》曰：军行蜂群飞，蜂及蜜蜂尤多者，必大战，道路防之。又曰：军中有蜂鸣移，主将败，士卒亡矣。

《汉书元帝纪》曰：建昭元年春三月，上幸雍祠五畤，秋八月，有白蛾飞蔽日，从东都至轺道。注如淳曰：《三辅黄图》长安城东北次门号曰宣平城门，其外郭曰东都门也，冬河间王元有罪，废迁房陵。

## 蝗 生

《五行传》曰：介虫者，小虫有甲，能蜚扬之类，阳气所生，于春秋为象虫，今谓之蝗，皆其类也。曰：介，虫之孽也。《说文》曰：蝗虫也，旱气动象。

《礼月令》曰：孟夏行春令，则蝗虫为灾。

《春秋纬》曰：愁精所感，扰气所生，蠢冬生，天不能灭，地不能藏。

《潜潭巴》曰：生蝗虫，兵大起，行千里。

《五行传》曰：君行暴虐而赋税贪叨无厌，以师动众，取邑治城，而失众心，则虫为害。

《尔雅》曰：蝗虫食苗心曰螟，食苗叶曰蠹，食苗根曰蠹，食苗节曰贼。

董仲舒《对灾异》曰：佞臣居位，贪叨之徵。邪人在位，则蝗虫食叶；君用臣才不任职，则虫食茎；君用佞人在朝，则虫食节；君用奸贼在位，则虫食根。

《礼月令》：仲春行夏令，虫蝗为害。

《说文》曰：螟虫食谷心，从冥声。吏冥冥犯法即生螟。

《吕氏春秋》曰：乱国之妖，有螟集其国，其年凶。

《淮南子》曰：政恶，生孽虫食心。

京房曰：吏为贪狼，多螟螣。宫室奢，虫食叶。

《汉书五行志》曰：《春秋》鲁哀公十二年十二月螟，十三年九月螟，十二月螟。刘向以为春用田赋冬而螟，此三螟皆虐取民之效。

《春秋汉含孳》曰：鲁室履亩而税，贪恣太过，则蜚生。

《汉书五行志》曰：刘歆以为蜚蝗蠹之有翼，食谷为灾，黑青也。董仲舒以为蜚螟始生也。是时初税亩，乱先王制，故应是而蜚生。

《诗推度览》曰：在下不臣，虫食叶，贷者伐也，小臣为政事，变其法，故立字贷与伐同，其变臣欲杀也。

京房曰：得无节，虫食叶。

《说文》曰：蜚，野虫食草根者也。吏抵冒取民则生蜚。

京房曰：臣安禄，厥灾虫食根，不继无德，虫食本；害忠孝，虫食根。

《握镜》曰：螟虫食根；咎在女主社稷。

《毛诗义礼》曰：蠹长而细，或说云：蠹，蝼蛄也。蝼蛄食苗根，为人患。《诗推度览》曰：伤苗食之贼也。

京房曰：与公侯争，虫食蚕，伤忠臣，虫食蚕。

《史记》：秦始皇四年十月，螟虫从东方来，蔽天如严雪，是岁天下失苽瓠。

《汉书五行志》曰：景帝中元三年秋，蝗，匈奴寇边。武帝元光五年秋，蝗，五将众三十万伏马邑，又四将征匈奴。元鼎五年秋，蝗，四将征南越。元封六年秋，蝗，两将征朝鲜。太初元年夏，蝗，从东方飞至燉煌，三年秋复蝗，其年贰师征大宛，天下奉其役连年。征和三年秋，蝗，四年夏，蝗，先是一年，三将连众十馀万征匈奴，贰师七万人没不还。平帝元始二年秋，蝗遍天下，是时王莽秉政。

《汉书》：王莽地皇三年夏，蝗从东方来，蔽天，至长安，

入未央宫，缘殿。四年，汉兵斩莽。

《续汉书五行志》曰：安帝永初四年夏，蝗，是时西羌寇乱，军众征距之连年。五年夏，九州蝗，六年三月，去年蝗处复蝗子生，七年二月，郡国蝗，顺帝永建五年，郡国十二蝗，是时鲜卑寇朔方，用众征之。永和元年秋七月，偃师蝗，去年年冬，乌桓寇沙南，用众征之。

《续汉书五行志》曰：桓帝永兴元年七月，郡国三十二大蝗，是时梁冀秉政。

《东观汉记》曰：马棱伯威为广陵太守，连年有蝗，谷贵，棱奏罢强官，薄赋税，蝗虫飞入海中，化为鱼虾。

晋《中兴徵祥说》曰：元帝大兴二年，徐州及扬州之西江郡蝗，三年，冀州蝗，皆胡肆暴之徵。武帝太元十六年五月，棠邑界有蝗，广千里，长三十里许，从南来，其飞蔽天，害苗稼，是时官以贿成，皆人私库，贪私苟得之徵也。

《赵书》曰：石勒十四年五月，飞蝗穿地而生，二十日化如蚕，七八日而卧，四日蛻则飞，周遍河朔，百草无遗，唯不食三豆及麻。

蜮生蝇蔽 蛟虻兴 虻大如牛 蠛蠓满野

《春秋汉含孳》曰：妃党纵横，佞人潜世，则蜮生。

《春秋》：鲁庄公十八年秋有蜮。注云：蜮，短狐也，盖以含沙射人为灾也。

《汉书五行志》曰：庄公十八年有蜮。刘向以为蜮生南越之地，多淫妇人，男女同川，淫女为主，乱气所生，故宣武名之蜮。蜮由惑也谓之短。是时庄公将取齐之淫女，故蜮至。

《五行传》曰：《诗》云：为鬼为蜮，则不可得。盖气精也。《诗义礼》曰：一名射景，如鳖，三足。

《纪年》：晋献公二年春，周惠王居于郑，郑人入王府，多



取玉，玉化为蜮，射人。

《古今注》曰：成帝建始元年六月，苍蝇万数集白虎门，朝坐处，蔽地。

《汉书》：昌邑王贺梦青蝇矢积西阶东河五六石，以屋瓦覆，发视之，青蝇矢也。以问龚遂，遂曰：阶下左侧，谗人众多，愿皆放之。贺不用其言，卒至于废。

《诗推度灾》曰：逆天地，绝人伦，则蚊虻兴。

《兵书》曰：军行逢虻尤多者，必大战，道路防之。

《异邮》曰：陈涉即亡，景驹为主，项羽诛婴，都制九塞，自称楚王，地生神虻，大如牛。

《淮南子》：衰世飞蚤满野。许慎曰：蚤，蟻蠊也。

蜚虫不藏 虫两足 飞虫反坠 虫生宗庙

《春秋繁露》曰：木干水，冬蜚虫不藏；土干水，蜚虫冬出。

《潜潭巴》曰：虫两足赤口，诸侯强。

《五经异义公羊说》：后夫人之家专权擅势，秉持国政，蚕食百姓，则虫飞反坠。

《握镜》曰：甲虫无故生宗庙中，不出三年，臣背叛，兵兴，国忧亡。天下虫无故自死，用刑暴，戕害过。

京房曰：军行道逢虫蛇怒，必大战，吏兵与马，贼将死，以君大就，五校乱错，故致以怪。